

Վահագն Դավթյան



ԱՍՏԳ
ԵՎ ՅՈՐԴԵՆ

ՎԱՀԱԳՆ ԴԱՎԹՅԱՆ

ԱՍՏՂ ԵՎ ՅՈՐԵՆ



Երևան 2016

**Գիրքը տպագրության է պատրաստվել «Լուվա ծոր»
հայրենակցական միության աջակցությամբ**

*Կազմողներ և խմբագիրներ՝ Սիլվա Յուզբաշյան
Սերգո Երիցյան*

Գրքում ամփոփված է Վահագն Դավթյանի գրական ժառանգության զգալի մասը, նպատակ ունենալով ընդգրկել ցայտուն նմուշներ նրա տարբեր տարիների ստեղծագործություններից՝ «Ամառային ամպրոպ», «Անկեզ մորենի», «Ասք սիրո», «Գինու երգը», «Անքնություն», «Գովքեր և ողբեր», «Հողմաշունչ գիշերներ», «Լույս առավոտի», «Լույս՝ իրրև հաց» բանաստեղծական ժողովածուներից:

ISBN 978-9939-75-065-1

© Էդիթ Պրինտ

Վահագն Դավթյանի կյանքի վերջին տասնամյակը աշխարհավերերկրաշարժի, Ղարաբաղյան շարժման և Անկախության հռչակման շրջանն էր, որը հիմնովին վերափոխեց հասարակական գիտակցությունը: Այդ օրերին մեր մշակույթի շատ անվանիներ շփոթահար կանգ առան. Վահագն Դավթյանը՝ հավատարիմ սրտի ձայնին, ստեղծեց ոչ միայն այդ «աղմուկի» գիտակցության մեջ չտեղավորվող աննման քնարական բանաստեղծություններ, այլև նոր իրողություններին նվիրված բարձրարժեք ստեղծագործություններ՝ ականա դառնալով ժամանակի պատմիչն ու դպիրը: Սակայն արժեհամակարգը բեկվել էր, նորը դեռ չէր հաստատվել, հինն էլ արդեն չկար, և սակավ չէին դեպքերը, երբ ցրտի ու սովի այդ ժամանակներում ծխնելույզներից երկինք էր հառնում գրքերի ծուխը: Չնայած գրական արգասաբերությանը՝ այդ տարիներին Վահագն Դավթյանը գրեթե գրքեր չհրապարակեց: Մահից հետո եկող տասնամյակներում հրատարակվեցին գրքույկներ, որոնք իրենց ծավալով չէին կարող լիովին ներկայացնել մեծ բանաստեղծին: Այս ժողովածուն հատընտիր չէ, որքան հնարավոր է մեկ գրքի սահմաններում ներկայացված են տարբեր տարիներին հրատարակված և վերջին տարիներին գրված բանաստեղծություններն ու պոեմները:

Պարզապես ձգտել ենք պահպանել Վահագն Դավթյանի ստեղծագործության ամբողջականությունը՝ ներկայացվող բանաստեղծություններով ու պոեմներով: Վահագն Դավթյանը կենդանության օրոք անաղմուկ ստեղծեց բանաստեղծական իր աշխարհը՝ զուտ Դավթյանական, քնարական իր կենսագրությունը, որն հոգու ծանապարհի պատմություն է, և սկիզբ է առնում ծննդավայր Արաբկիրից ու հասնում դեպի «Լույս առավտի» ները... Այս գրքում ընթերցողին փորձել ենք ուղեկցել այդ ծանապարհի արահետներով... Ընտրելով դրանցից յուրաքանչյուրը՝ այս ժողովածուի համար հենց այս և նման իրողություններն ենք հաշվի առել, մանավանդ որ բարի կամեցողները ցանկություն էին հայտնել օժանդակել ներկայացվող ժողովածուի հրատարակությանը:

Առիթն ուզում եմ օգտագործել և շնորհակալություն հայտնել «Լոռվա ձոր» հայրենակցական միությանը և նրա նախագահ Սերգո Երիցյանին՝ այս ժողովածուի պատրաստման ու տպագրության գործուն օնեցած օգնության ու աջակցության համար:

Սիլվա Յուզբաշյան, << վաստակավոր արտիստ

ԱՄԲՈՂՋԱԿԱՆ ՄԻ ԱՇԽԱՐՀ

Վահագն Դավթյանի ստեղծագործությունն ամբողջացած մի աշխարհ է, ամբողջական մի շենք: Եվ այդ շենքը նման է միջնադարյան վանքի, հիմքերը՝ որձաքարե ժայռերի մեջ, գմբեթը՝ երկնքում: Եվ այդ այնքան է ներդաշնակ իր շրջապատին, այնպես է ձուլված ու խառնված բնությանն ու բնականին, որ շատ հեռուներից չի երևում: Տեսնելու, նրան հասնելու համար պետք է հավատավոր լինես ու արվեստի ուխտավոր, որպեսզի հաղթահարես ճանապարհի դժվարությունը: Իսկ վանքի ճանապարհը միշտ էլ դժվար է եղել: Երևի նրա համար, որ ուխտավորդ մարզի մարմինը, հոգնի ու տաճարի վեհության առաջ հանգստանա միանգամից ու վեհանա... Թե ինչ նոր օժանդակ շենքեր է կառուցելու Վահագն Դավթյանն իր տաճարի շուրջը, մեզ հայտնի չէ, թերևս չգիտե նաև ինքը: Կարևորն այն է, որ նրա կառուցածը տաճար է՝ երկար, շատ երկար ժամանակների և շատ սերունդների համար:

Թող Աստված չանի, իսկ Աստծո աչքը, թվում է, կշտացել է մեր գլխին աղետներ բերելուց և չի անի, եթե հանկարծ աղետ պատահեր և աշխարհի երեսից վերանար հայ բազմադարյան պոեզիան և հրաշքով փրկվեր միայն Վահագն Դավթյանի վերջին ծաղկաքաղ մատյանը, այդ մատյանը կարդալով, մարդիկ կպատկերացնեին, թե ազգային ինչպիսի մեծ ու ազնիվ պոեզիայի արդյունք է դա, թե բանաստեղծության ինչ լեզու և լեզվի ինչ բանաստեղծություն է ունեցել հայ ժողովուրդը: Կպատկերացնեին, ինչպես մենք ենք պատկերացնում նախաքրիստոնեական ժամանակների մեր պոեզիայի վեհությունը մեզ հասած պատառիկների շնորհիվ: Կպատկերացնեին, որովհետև այդ մատյանն իր մեջ առած

ունի հայ պոեզիայի բոլոր լավագույն հասկությունները՝ «Վահագնի ծնունդից» մինչև «Հոգեհանգիստ», մինչև «Ափ մը մոխիր», մինչև «Երկիր Նաիրի» (տերյանական), մինչև «Ես իմ անուշ Հայաստանի», մինչև «Արա Գեղեցիկ» ու «Ձայն հայրենական»: Այս բոլորը, երևի, այսքան նշանակալից չլիներ, չդառնար այդքան մեծ արժեք, եթե չկրեր Դավթյանի անխառն անհատականության կնիքը: Անհատականություն, որի անստորագիր կես տողի ելևէջն անգամ անմիջապես մատնում է հեղինակին: Իսկ ինչպիսի՞ բանաստեղծ է Վահագն Դավթյանը այդ մատյանով... «հանդարտ», «մեծադղորդ», «ինտելեկտուալ», «զգացմունքային», «կրքային», թե՛ «կյանքային»: Ես կասեի՝ բոլորը միասին, ամբողջական, միակտոր, միաձույլ, կատարյալ, անթերի:

Երջանիկ է Վահագն Դավթյանը, սերնդակից-գրչակիցները միշտ էլ բարի նախանձով են նայել ջուլիակ նախնիներից ժառանգած նրա աշխատասիրությանը, ազնիվ մտավորականի պահվածքին, գրական բարձր ծաշակին և քառատողերի անմրցակից ձարտարությանը...

Երկու տասնամյակ առաջ լրագրողի այն հարցին, թե ժամանակակից դժբախտ Դավթյանը եմ սիրում, պատասխանել էի. «Մեկին սիրելը լավ է միայն ընտանիք կազմելու և պահպանելու համար, իսկ գրականության մեջ պարտադիր չէ»: Նշել էի տասը բանաստեղծի անուն, որոնց սիրում էի և սիրում եմ ամեն մեկին մեկ կամ մի քանի առավելությունների համար: «Սիրում եմ այդ բոլորին,- ասել էի,- բայց խանդում եմ միայն Վահագն Դավթյանին, որովհետև նա, ասելիքից բացի, ունի նաև պատմելիք և ունի սեփական անհանգիստ միտքն անընդհատ կարգավորող խելք, որ ուրիշ խոսքով մեծ տաղանդ է նշանակում»:

Այսօր էլ, եթե ինձ տրվեր այդ հարցը, նույն պատասխանը կտայի, միայն մեր մյուս բանաստեղծներին չնեղացնելու համար կավելացնեի գուսանի նախնական ու սրտալի տողը.

«Սիրուններ, միք նեղանա, որ ես իմ յարին եմ գովում»:

Մի հանդիպման ժամանակ Վահագն Դավթյանին հարցրին՝ ո՞րն է Ձեր ամենալավ բանաստեղծությունը՝ Ձեր կարծիքով: Դավթյանը պատասխանեց, որ տակավին չի գրվել այդ բանաստեղծությունը, որ այդ բանաստեղծությունը պետք է լինի զարմանալի պարզ ու տաք մի երգ: Երգ, որն անբառ է իբրև թախծություն, իբր հառաչ, որ անհուն է, անմեկնելի է ու անեզրական...

Եվ սա ասում է այն բանաստեղծը, որ հայ պոեզիային տվել է այնպիսի գլուխգործոցներ, ինչպիսիք են «Թոնդրակեցիներ», «Բայց ծնվեցի», «Ասք սիրո և սրի», «Ռեքվիեմ» պոեմները, տաղերի շարքը և բազմաթիվ այլ բանաստեղծություններ...

Ինչ է սա՝ պչրականություն, թե՞ անվստահություն իր ստեղծածի նկատմամբ: Ո՛չ մեկը, ոչ մյուսը: Եվ ո՛չ էլ այն, որ իր պոեզիայի այդքան ներդաշնակ ու ամբողջական տաճարներից չի կարող առանձնացնել մի քար, մի քանդակ և ասել՝ սա է ամենից լավը... Շենքի ներդաշնակությունը խախտելու վախ նա չունի: Պարզապես ծշմարիտ արվեստագետի համար իր ամեն մի ձեռքբերումը, նվաճումը, հաղթանակը ոչ թե արտոնություն է բերում, այլ նոր պատասխանատվություն, մի նոր պարտք, և վճարած ամեն մի պարտքը դառնում է հրամայական նոր պարտքերի... Եվ այսպես շարունակ: Այսպես է: Բայց ես կուզենայի, իբրև Դավթյանի պոեզիայի հավատավոր ընթերցող, իրավունք վերապահել ինձ և ասել, որ Վահագնը ինձ համար արդեն գրել է այդ զարմանալի պարզ ու տաք երգը, երգ, որ անբառ է իբրև թախծություն և իբրև հառաչ...

ՀԱՄՈ ՍԱՀՅԱԼ

1982 թ.

ԵՐԲ ՎԵՐՋԻՆ ԱՆԳԱՄ

Երբ վերջին անգամ աչքերս փակվեն այս աշխարհի դեմ,
Եվ հայացքիս դեմ թրթռա վերջին ճառագայթը ջինջ,
Կոպերիս տակով մի վերջին անգամ կվազի, գիտեմ,
Մի ոտաբորբիկ, բարակ մի աղջիկ:

Լա, որ աչքերի առեղծվածներում լույս ուներ ու սև,
Լա, որ անմեղ էր և անմեղորեն չար ու մեղսական,
Լա, որի հետքով պատանությունս վազեց հևիհև,
Վազեց կարոտով, չհասավ սակայն...

Երբ վերջին անգամ աչքերս փակվեն այս աշխարհի դեմ,
Ու երբ ձակատիս թրթռա շունչը ուրիշ մի հովի,
Իմ կոպերի տակ մի վերջին անգամ կփռվի, գիտեմ,
Մի արևավոր, հեռավոր հովիտ:

Կխշա խաղաղ ոսկե մի գետակ ու բարդի մի զով,
Կթախծի լռին կտուրն արևոտ տունն իմ հայրական,
Հեռու մի հովիտ, ուր կարոտներիս արահետներով
Քայլեցի անվերջ, չհասա սակայն...

Երբ վերջին անգամ աչքերս փակվեն այս աշխարհի դեմ,
Ու փովի իմ դեմ անհուն լուռության ուրիշ մի եզերք,
Ծարավից ձաքած շուրթերիս վրա կդողա, գիտեմ,
Մի զարմանալի, պարզ ու տաք մի երգ:

Երգ, որ անբառ է իբրև թախծություն ու իբրև հառաչ,
Երգ, որ անհուն է, անմեկնելի է ու անեզրական,
Երգ, որ ողջ կյանքում իմ շրթունքների կարոտին թառած՝
Թրթռաց, դողաց, չծնված սակայն...

*Մի լիցի ինձ
Երկնել և ոչ ծնանել...
Ամպել և ոչ անձրևել,
Ընթանալ և ոչ հասանել...*

Գրիգոր Նարեկացի



ԱՆԿԵԶ ՄՈՐԵՆԻ



ՆԱԽԵՐԳԱՆՔ

...Եվ կան ժամեր, կան ժամեր, որ երբ կոպերս եմ փակում,
Իմ ցավի մեջ ու հույսի կապույտ աստղեր են կաթում:

Կապույտի մեջ ու լույսի մեր այն տունն է՝ հնօրյան,
Որի դռնակն էր բուրում որպես աղոթք ու ցորյան:

Մեր բարդիները բոլոր արշալույսներ են հագել,
Զրնգում են օդի մեջ լեցուն ու տաք փեթակներ:

Արածանին անեծքի շառագյունը մոռացել
Եվ ծայրեծայր օրհնություն ու շարական է դարձել:

Մեր լեռնաշխարհն է փոված մինչև Սասուն, մինչև Վան,
Որպես հայացքն Աստղծո՝ կապույտ երկինքը վրան:

Ծուխ է ելնում շեներից... Ու ծխի մեջ արևոտ
Անուշ բուրմունք կա հացի, ու կա մի սուրբ խղճի հոտ:

Ֆիդայիները բոլոր լեռներից տուն են դարձել,
Եվ ափերի մեջ նրանց մաճն է նորից քաղցրացել:

Հորովելն է երկարում ճառագայթի պես բարի,
Խիղճը աստված է նորից ու խոփն է տերն աշխարհի:

...Եվ կան ժամեր, կան ժամեր, որ երբ կոպերս եմ փակում
Այդ աստղային պատրանքից ցավիս մեջ ցավ է կաթում:

ԾՆԵՂԱՎԱՅԻՐ

Առաջին անգամ աշխարհում տեսած
Իմ առավոտն է այնտեղ մնացել,
Նա, որ բուրում էր իբրև ցորեն հաց
Եվ բուրում իբրև գարնան հող ու ցել...

Եվ մնացել է առաջին անգամ
Աշխարհում տեսած իմ աղբյուրն այն ջինջ,
Որից զրնգուն ու անապական
Եվ որից պայծառ չտեսա ոչինչ:

Եվ մնացել է լուսեղեն մի ամպ,
Եվ մնացել է այնպիսի մի ձյուն,
Որ իր բարությամբ ու արդարությամբ
Նման էր այնպես մանկության Աստծուն:

Առաջին անգամ աշխարհում տեսած
Իմ առավոտն է այնտեղ մնացել,
Երկինք ու բարդի, ձառագայթ ու լաց,
Իմ հողի հոտն է այնտեղ մնացել...

ԿԱՆՉ

Ու ես ասում եմ. – Կանգնիր, առավրո՛տ,
Ես էլ եմ գալիս,
Այնպես է թվում, թե հեռու հեռվից
Ինձ ձայն են տալիս:

Ու ես չգիտեմ, դա անլսելի
Չնգո՞ցն է քարի,
Շշո՞ւկը հողի, թե՞ սոսափյունը
Սոսյաց անտառի:

Ու ես չգիտեմ. անդնդում կորած
Գե՞տն է տվայտող,
Թե՞ հին խաչքարից ինձ ձայն է տալիս
Մամռոտած մի տող:

Լռությո՞ւնն է դա ձգնակեցությամբ
Ապրող անձավի,
Թե՞ կաթիլ-կաթիլ մորմոքն է քամվում
Հնամյա ցավի:

Գուցե լեռներում վարգում է մի որբ,
Տխուր հովատակ,
Եվ կապույտի մեջ փշրվում է խուլ
Վրնջոցը տաք:

Կամ գուցե, գուցե դա դարեր առաջ
Ինձանից զատված
Իմ իսկ ղողանջն է, որ ետ է դառնում
Մաքուր ու զտված:

Այդ կանչերի մեջ մի կորած, հեռու
Աշխարհ է լալիս:
Ու ես ասում եմ. – Կանգնիր, առավրո՛տ,
Ես էլ եմ գալիս:

ԱՌԱՋԻՆ ՀՈՒՇ

Առաջին տեսիլ, առաջին երագ,
Առաջին իմ հուշ...
...Մի կավե կտոր, մի չթե վերմակ,
Ու գիշեր է ուշ:

Ինչ-որ խուլ ցավից արթնացել եմ ես,
Լալիս եմ աղի,
Արցունքներիս մեջ դողում են բարդին
Ու աստղը ծավի:

Տատիկս ելել, չոքել լուսնի դեմ,
Աղոթք է անում
Եվ աղերսում է նա ինչ-որ մեկին,
Չգիտեմ, թե ում...

Արցունքիս միջով նայում եմ լուսնին,
Կեսն ամպի տակ է,
Իմ տատի դեմքն էլ այդպես ամպամած
Ու սպիտակ է:

Լուսնի դեմ չոքել, աղոթք է անում
Ձեռքերը սրտին,
Սակայն ոչ մի կերպ ես չեմ հասկանում
Խոսքերն իր խրթին:

Ախ, գիտեմ, գիտեմ, որ չի հասկանում
Եվ Աստված ինքը,
Թե չէ ինչպե՞ս է, որ մեզ չի տանում
Իր մոտ՝ երկինքը...

Ասում են այնտեղ փափուկ է այնպես,
Փափուկ է ու տաք,
Ցավ չկա այնտեղ, կա միայն արև,
Ամպ ու հրեշտակ:

Բայց գուցե սուտ է... Տես, մի աստղ ընկավ,
Որ հեռվում մարի,
Երևի այնտեղ, ախ, նրա ոտքն էլ
Առել է քարի:

Ու քար գլորվեց... Մթին ձորերով
Այծամարդն անցավ...
...Մի կավե կտուր, մի չթե վերմակ,
Ինչ-որ խուլ մի ցավ:

ԳԱՌԸ

Մեր հին այգին է,
Մեր եղրևանու թուփը կապուտակ
Ու ձերմակ մի գառ,
Որ արածում է եղրևանու տակ...

Օրն արևոտ է...
Տաք շառավիղը աչքերս է ծակում,
Երմոնյա տատս սև բուրդ է թրջում Ոսկեգետակում:
Սև բուրդ է թրջում ու խոսում կամաց,
Ո՛ւմ հետ է խոսում,
Ջրի՞,
Արևի՞...
Դեմից սարերն են նայում քարացած,
Սարերի հետ է
Կամ Աստծո հետ է խոսում երևի:

Տատս սև բուրդ է գետում լվանում,
Բայց ջուրը խփում, ալիք է տալիս
Ու բուրդը տանում:
Տատիս պատկերն էլ
Ալիքների մեջ օրորվում հանդարտ
Ու փշրվում է,
Ու ջրերի հետ գնում է անդարձ:
Երեկոն իջնում,
Լուռ ծվարում է եղրևանու տակ,
Ու ինչ-որ մեկը մորթում է այգում գառն այն սպիտակ:

Հետո մշու՛շ է...
Մի պաղ մահիկ է երկնքից նայում,
Եվ ամբողջ կյանքում
Մի մորթվող գառ է սրտիս մեջ մայում...

ՋՐՀՈՐԸ

Գլուխս կախել, նայում եմ անթարթ
Ու ինձ եմ տեսնում մեր մութ ջրհորում,
Ասում են՝ այնտեղ ցերեկով անգամ
Երկնքի ոսկե աստղերն են լողում:

Ամառ է ու շոգ, սակայն ջրհորից
Բուրում է մի զով, մի խոնավ աշուն...
Մայրս դույլն առել, եկել է նորից,
Թեքվել ջրհորին ու ջուր է քաշում:

Դույլը իջնում է զվարթ զնգոցով
Եվ արձագանք է խորքերում տալիս,
Դույլը ելնում է ծանր տնքոցով
Եվ պատերն ի վար արցունք է լալիս:

Նայում եմ նորից ջրերին խավար,
Որ հանդարտվեցին ու իրար եկան...
Թաց քարերն ի վար, մամուռներն ի վար
Արցունք է կաթում... Ու աստղեր չկան...

ՀԵՔԻԱԹԸ

«Հեքիաթ-հեքիաթ... Այս պապս,
Կարմիր քուռակը տակս...»:

Հեքիաթ-հեքիաթ... Ու դրսում
Պար է բռնել սատանան...
Այդ ծտերն են աղերսում,
Որ ներս առնենք, տաքանան...

Ու ձգում է քամու հետ
Տատս կծիկն իր խոսքի...
Կրակի մեջ, նայեցեք,
Ինչ կապույտ կա ու ոսկի:

Քունը եկել, ծովացել
Ու աչքերիցս է թափվում,
Ախ, ձեռքերը իմ տատի
Ինչքան տաք են ու փափուկ:

Լողում եմ ես ու սուզվում
Ամպերի մեջ սպիտակ:
– Եկեք, եկեք, թռչուններ,
Այստեղ լավ է, այստեղ տաք:

«Հեքիաթ-հեքիաթ... Այս պապս,
Կարմիր քուռակը տակս...»:

Աչք եմ բացում, ոչ կապույտ,
Ոչ ոսկի կա, ոչ կրակ...
– Ո՛վ գողացավ, ո՛վ տարավ
Քեզ, հրեղեն իմ քուռակ...

ԳԻՇԵՐ

Սև գերան է, սև պատ,
Սև լուսամուտ, սև շուք,
Տվայտում է մթնում
Մի խեղդված շշուկ.

– Հիսուն, բորիկ Հիսուն,
Այստեղ փուշ է ու քար,
Եվ դու իզուր, Հիսուս,
Այս երկիրը եկար:

Մեր սրտի մեջ սև ամպ,
Սև կարկուտ է ու ձյուն,
Մենք ո՞ւր պատասպարենք
Մեզ պես արնոտ Աստծուն:

Սև գերան է, սև պատ,
Սև լուսամուտ, սև շուք,
Տվայտում է դրսում
Գիշերվա խուլ մի բուք:

– Հիսուն, բորիկ Հիսուն,
Ճամփադ փուշ է ու քար,
Եվ արյուն է կաթում
Քո սքեմից երկար:

Բայց թե կուզես՝ արի,
Արի մեր տուն, օրհնած,
Որ այս անգամ արդեն
Տառապանքից ոռնաս:

ՎԻՐԱՎՈՐ ԿՈՌԻՆԿԸ

Գարնան անավրտ...
Կանաչ է ուռին...
Մի կունկ իջավ
Մեր տան կտուրին:
Օրը զնգում է,
Օրը վրնջում,
Բայց տատիս երգը
Տխուր է հնչում:

«Ձնից ձերմակ է
Քո թևը, կունկ,
Սիրտդ ամպի պես,
Ախ, սև է, կունկ,
Դու զույգ գնացիր,
Մենակ ես գալիս,
Ո՞ր է, ախ, ո՞ր է
Քո սերը, կունկ»:

Երամից զատված
Իջել կտուրին,
Կտուցով թևն է
Շոյում նա լռին:
Մղկտում է նա,
Վիրավոր լալիս
Ու հետո նորից
Թևին է տալիս:

«Հարավա քամին
Թեթև է, կոճոնկ,
Բայց, ախ, ջարդել են
Քո թևը, կոճոնկ,
Դու էլ չես հասնի
Չված երամիդ,
Կարմիրդ անցավ,
Քո սևն է, կոճոնկ»...

ՀԱՄՐ ՔԱՐԵՐ

Ախ, այն քարերը,
Ծանր քարերը,

Ամռան արևից շիկացել, կիզվել,
Մի կաթիլ ջրի տենչից այրվել են,
Սառնամանիքից ձաքձքել, կիսվել,
Ձյունամրրիկից հողմահարվել են:

Ախ, այն քարերը,
Հանր քարերը...

Ես հեռու հեռվից լսում եմ ասես
Նրանց հառաչն ու ցավի քրքիջը...

Ինչ ահավոր է
Համրերի ձիչը...

ՈՍԿԵԳԵՏԱԿԸ

Ակունքը հեռու,
Ակունքը կապույտ,
Ակունքը կանաչ
Լեռների տակ էր,
Ջուրը՝ արտասուք,
Հատակը ոսկի,
Եվ անունն, այո՛,
Ոսկեգետակ էր:

Թեքվել եմ ահա
Վազող ջրերին,
Որ աստղով, լույսով,
Շողքով են լիքը,
Ուզում եմ բռնել,
Բայց ձեռքերիս մեջ
Թռչուն է դառնում
Վձիտ ալիքը...

Թռչուն է դառնում,
Հարկում ափերիս
Իր թրթռացող
Թևերի դողը,
Թևին է տալիս,
Թռչում է հեռու,
Տանում է անդարձ
Իր լույսն ու շողը:

Ակունքը հեռու,
Ակունքը կապույտ,
Ակունքը կանաչ
Լեռների տակ էր,
Ոսկի էր տանում,
Հեռու էր տանում,
Անդամրձ էր տանում
Ոսկեգետակը...

ԱՐՅՈՒՆՈՏ ԼՈՒՅՍ

Անքնությանս մեջ
Ժայռեր էին, հավքեր...

Ժայռեր էին,
Խաչված իրենց ստվերներին,
Եվ անանուն հավքեր,
Որ լուռ տվայտանքով
Փախչում էին, հավետ, իրենց ստվերներից...

Ու մասրիներ էին...

Չէին ծաղկել, օ, ոչ...
Նրանց փշոտ ու չոր ձեռքերի մեջ
Անվերջ թայրտալուց
Լույսն էր արյունոտվել:
Ժայռեր էին,
Հավքեր
Ու մասրիներ էին...

ԱՄՊԵԼ ԷԻՆ, ՄԹՆԵԼ ԷԻՆ

Ամպել էին, մթնել էին
Դեմի լեռները,
Պարան-պարան կապում էին
Ա՛խ, մեր բեռները:

Կապում էին աման-չաման
Ու հին կարպետը,
Թողնում էին մեր թթենին,
Մեր տունն ու գետը:

Կապում էին վերմակ ու բարձ
Ու հին պղինձը,
Թողնում էին ոսկե առուն,
Մեր դաղձն ու սինձը:

Դարսում էին, կապում էին
Մեր ճամփի հացը,
Թփերի տակ թողնում էին
Ծիծաղս ու լացս:

Պարան-պարան կապում էին,
Ա՛խ, մեր բեռները,
Ամպերի տակ թողնում էին
Մեր հին լեռները...

ՇՈՒՆԸ

Չեմ հիշում հիմա, թե անունն ինչ էր...
Հայացքը տխուր, տխուր ու ջինջ էր:

Մորթը սևուկ էր ու չալ էր պոչը,
Աստղերի հետ էր նրա հաչոցը:

Նրա ոռնոցը լուսնի դեմքին էր,
Ու նրա տեղը մեր տան շեմքին էր:

Հետո ամեն ինչ մեզ-մշուշում է,
Եվ մշուշի մեջ ոռնում է շունը:

...Նա մեր գնալու հոտը առել էր,
Ցավից կույզ եկել ու պառավել էր...

Տխուր էր այնպես ու սրտադող էր,
Ոռնում էր անվերջ, փորում էր հողը:

Եվ շան մասին էր իմ տատի հարցը.
–Ինչ պիտի լինի խեղճ արարածը:

Հետո ամեն ինչ մեզ-մշուշում է,
Ու մշուշի մեջ ոռնում է շունը:

...Մեր բեռը կապած ու ձին բարձած էր,
Մեր դուան առաջ արցունք ու լաց էր:

Շունը կլանչում, շեմքը թողնում էր,
Փաթաթվում տատիս, տխուր ոռնում էր:

Մերթ վազում դեպի մեր քարավանը,
Մերթ ետ էր դառնում, պառկում դռանը:

Հարցում էր անում, ասես, մեր շունը.
Թե թողնի՞ արդյոք այգին ու տունը,

Ծանոթ աստղերը, ծանոթ լուսինը,
Որ ամեն գիշեր մեր տան ուսին էր:

Հետո ամեն ինչ մեզ-մշուշում է,
Ու մշուշի մեջ ոռնում է շունը:

Տխուր զնգում է ձիու զանգակը,
Մեր ծամփան հեռու երկնքի տակ էր:

Ու քանի անգամ, ախ, քանի-քանի,
Նա եկավ հետքով մեր քարավանի:

Հևիհև էր նա, լեզուն հանած էր,
Խոնավ աչքերում խոնավ մի հարց էր:

Փաթաթվում էր ինձ, լիզում էր ձեռքս,
Կիսում էր հացս, կիսում էր վերքս:

Ոռնում, վայում էր նա գիշերն ամբողջ
Ու ետ սլանում իր եկած ծամփով:

Հետո ամեն ինչ մեզ-մշուշում է,
Ու մշուշի մեջ ոռնում է շունը:

Կլանչում է նա, վազում հևիհև
Մեր քարավանի ու մեր տան միջև...

ԵՓՐԱՏԸ

Եվ ոլորվում է մեր քարավանը,
Մեր քարավանը իջնում է վար,
Ձորից ելնում է Եփրատի ձայնը,
Ձորում որոտ է, փրփուր ու քար:

Գետը ծեծում է իր քարե պատը,
Գետը ողբում է ու մոնչում...
Տատս պատմել է, որ այծամարդը
Մթնով սրինգ է այստեղ փչում:

Որ նա մտնում է մթին այրերը,
Որ նա իջնում է ջրի հատակ
Եվ իր գանձերը, անգին քարերը
Հանում, փռում է լուսնյակի տակ:

Ու ես նայում եմ, ժայռերը թաց են,
Եվ արեգակն է ջրին ծաթել,
Այնտեղ փռվածը, այնտեղ ցրվածը
Անգին քարեր են ու սրմաթել:

Կամուրջը մոտ է, խենթ մոնչում են,
Ահեղ շնչում են ջրերը, տես...
Մեր ձին խրտնում է ու վրնջում է
Ու փրփրում է Եփրատի պես:

Ջրերի ողբ է, ջրերի ձիչ է,
Ժայռը գնգում է իբրև զանգակ...
Ինչ իմանայի՜ թողա՞ս ինչ է
Եվ ինչ եմ տեսնում վերջին անգամ...

ՓՈՒՇԸ

...Ու մինչև հիմա չգիտեմ հաստատ,
Դեղին տե՞նդ է դա,
Երա՞զ է,
Թե՞ հուշ...

Գնո՞ւմ է, գնում հոգնած մի մանուկ,
Ոտաբոբիկ է,
Ճանապարհը՝ փուշ:

Ամռան արևը դաշտին ու սարին
Իր դեղին ու տաք մորմոքն է քամել,
Մանուկը նստել շիկացած քարին
Եվ ուզում է փուշն իր ոտքից հանել:

Ու մինչև հիմա դեղին տենդի մեջ
Արևն իր դեղին մորմոքն է քամում...

Մանուկն ուզում է
Ոտքի փուշն հանել,
Բայց մինչև օրս չի կարողանում:

ԵՎ ՄԻ ԱՇԽԱՐՀ ՄՆԱՑ ԱՅՆՏԵՂ

Եվ մի աշխարհ մնաց այնտեղ՝ բարդիներով, գետերով,
Լեռներն ի վար ծալ-ծալ իջնող անհրակյան եթերով:

Եվ մնացին ակնաղբյուրներ, որ բխում աջ ու ձախից
Ու արծաթե թարթիչներին լույս են տանում ու թախիծ:

Եվ կատարներ, որոնց վրա՝ ուռքերի տակ ձյուն ու ամպ,
Արշալույսն է միայն կանգնում իր բարբարոս մերկությամբ:

Եվ լճակներ, որ ծվարած կատարներին, վերերում
Միայն Աստծո ու աստղերի ցուլանքից են երերում:

Մնաց քամին թափառական, մնաց քարափն ամայի,
Քարափի տակ մի բուռ կանաչ ու անմոռուկ մի վայրի:

Եվ մնացին արահետներ, որ շվարած կարկամում
Ու չգիտեն, ո՞ր են գալիս, ո՞ր են գնում, ո՞ր տանում:

Եվ հանդերում, լուսնյակի տակ մնացին տաղ ու կանչեր
Որ գիշերով զարթնում հանկարծ և ուզում են ղողանջել:

Եվ ծայրեծայր մնաց մի գետ, որ փրփրած ծառանում,
Հետո անզոր փշրվելով, իր ործաքարն է ծամում....

ՄԵՐ ԾԻԾԵՌՆԱԿԸ

Եվ երևի հաջորդ գարուն,
Երբ աչք բացեց մեր տան առուն,
Ծաղկեց մեր թուփն ու ծառը մեր,
Վերադարձավ ծիծառը մեր,
Որ ձագ հանի մեր տան քիվին,
Նորից երկինքն առնի թևին,
Ճախրի թեթև ու թևածի
Լույսերի մեջ լուսաբացի...

Բայց տեսնելով թափուր մի տուն,
Մամռած մի սեմ, բակ մի տրտում,
Ինչ իմանաս, նա ինչ արեց...
Ախ, երևի թափահարեց,
Մեկ ցած իջավ, մեկ ելավ վեր,
Ճչաց տխուր ու կարեվեր,
Եվ տեսնելով, որ արդեն բուն
Պատի խորշում դրել է բույն,
Փետուրները քամուն տված,
Մեր տան վրա տխուր ծվաց...

Եվ այլ մի հավք նստած ծառին,
Երբ հարց տվեց մեր ծիծառին,
Թե՞ ծիծեռնակ, դու էս գարուն,
Ինչո՞ւ կուլաս կուց-կուց արուն,
Ինչ իմանաս, ինչ ձայն հանեց,
Մեր ծիծառն ինչ պատասխանեց...

ԱՅՆՏԵՂ, ԱՐԵՎՈՏ ԱՅՆ ՔԱՐԱՓՆԵՐԻՆ

Այնտեղ՝ արևոտ այն քարափներին
Իմ մանկությունը պիտի ղողանջեր,
Թառեր Եփրատի փրփրած թևին
Եվ ընկուզենու կատարից կանջեր:

Կիրձերի մթին քարանձավներում
Որոներ պիտի նա գաղտնիք ու գանձ,
Սլանար պիտի հանդերի հեռուն
Ու տուն գար, ամուսն բուրմունքը հագած:

Կավե կտուրից պիտի գիշերով
Ջրվորի տաղին նա ականջ դներ,
Երկնքից բռներ ասուպներ ու շող
Եվ այդ ամենը ծոցն առած, քներ...

Եվ լուսաբացին անուշ քնի մեջ
Նա լսեր պիտի երգը մաքրքի,
Ու վրան փովեր այն երկինքը մեծ
Իբրև Աստծո կապուտակ ոգի:

Բայց հուշի փշուր, մոխիր է ու հող,
Հանգած ասուպ է ու շող է տրտում,
Հեռավոր հովտում դանդաղ ավերվող
Քարե մի տնակ, հայրենի մի տուն:

ԿԱՊՈՒՅՏ ԱՆԴՈՒՆԴ

Եվ հիմա այնտեղ խորունկ մի ձորում
Գարունն է վառում քնքշանքն իր վայրի,
Չնծաղկի աչքից կապույտ է ծորում,
Կապույտով լցնում անդունդն ամայի:

Աղբյուրը ժայռից ներքև է կախում
Իր հեկեկանքն ու լույսը իր թախծի,
Եվ պատառոտված ժայռի երախում
Շվար դողում է մենավոր մի ծիլ:

Անդունդներն ի վար թավալվում են դեռ
Չարթնող որոտներ ու մեռնող ձյուններ,
Ու լեռներն ի վեր գալարվում են դեռ
Անձև կարոտներ ու թախծություններ:

Գարնան պաղ քամին մոլորվում ձորում,
Քարայր է մտնում, որ տխուր վայի,
Չնծաղկի աչքից թախիծ է ծորում,
Թախիծով լցնում անդունդն ամայի:

ՁԱՅՆԵՐ

...Ու գիտեմ հաստատ,
Որ երբ գիշերն է իջնում աշխարհին,
Երբ քարափներից լուսինը թել-թել ցնորք է կախում,
Երբ քարաքոսը գայլի մորթու պես ցուլանք է տալիս,
Եվ հովն է զնգում քարանձավների մթին երախում,
Այնտեղ`
Ճամփեքին ու ամայացած հովիտներն ի վեր,
Այնտեղ`
Լեռներում ու շեների մեջ այն ավերակված
Չարթնում են հանկարծ վաղեմի ձայներ,
Արձագանքներ են արթնանում հանկարծ:

Չարթնում են ձայներ,
Որ իրիկնային դողանջ են եղել,
Եղել հորովել` հովերի մեջ տաք,
Քարափի գլխից մանկանը կանչող մոր կանչ են եղել
Ու ջրվորի տաղ` լուսնկայի տակ...
Որ վարդավառի ուրախ ու տխուր զնգոց են եղել
Ու եղել հառաչ ու եղել են սուգ,
Չայներ, որ թաքուն ու գոց են եղել,
Եղել են հեռվից պանդուխտին կանչող,
Հարսի լի կուրծքը գիշերով տանջող,
Տանջող, ախ, տանջող տաք ու խուլ շշուկ:
Ու ձայներ, ձայներ` Աստծո հետ խոսող,
Չայներ ծնկաչոք, ձայներ աղերսող,
Չայներ խնկահոտ ու հողոտ ձայներ,
Չայներ արևոտ ու շողոտ ձայներ...

Արթնանում հանկարծ, իրար են գալիս,
Լուսնկայի տակ ծիծաղում, լալիս,
Զրնգում են զիլ,
Տվայտում են խուլ
Եվ լուսաբացին պապանձվում նորից,
Քար ու փշի մեջ ննջում են տխուր:

ԵՎ ԴԱՐՁԵԼ ԵՆ ՀԵԿԵԿԱԼՔ...

Ու երբ տանջել ես, ծարավ,
Ու երբ երազն է տարել,
Վեր եմ կացել ու կորած
Այն աշխարհում թափառել:

Մտել եմ կիրճն այն մթին՝
Ակնա ձորը բյուրական,
Ուր Եփրատն է որոտում՝
Շուրթին մի հին շարական:

Գտել եմ գյուղն այն փոքրիկ,
Ուր ուռիներ կան կախված՝
Իրիկնային արևով
Ու թախիծով թաթախված:

Թափառել եմ վիհերում,
Ժայռերի մեջ այն վառող,
Ուր աղբյուրներն են խոսում
Մանուկ Աստծո բարբառով:

Գտել գետն իմ մանկության՝
Ոսկեգետակ անունով,
Որ երկինքներ է բերում
Ու տանում է իր հունով:

Ուրցի ծաղիկ է տանում,
Լույս է տանում ու ակներ

Եվ մասրենուց կաթկթող
Ծիրանագույն ցլանքներ:

Եվ լեռների գոգերին,
Վիհերի մեջ քարադուռ
Ջանգերի պես զնգացող
Վանք են գտել ու մատուռ:

Եվ վանքերի բակերում,
Ձորերն ի վար, ջուրն ի վար
Արթնացել է հրաշքով
Մի վաղեմի վարդավառ:

Հնչել են տաղ ու հայրեն,
Ջնգացել են վեմ ու վանք
Եվ արծագանք են դարձել,
Եվ դարձել են հեկեկանք...

ՄԵՂԵԴԻ

Եվ հնչում մի անբառ, մի անհուն մեղեդի,
Ծավալվում էր անվերջ հրդեհվող երկնքում,
Դա նվաճն էր արդյոք հրեղեն եղեգի,
Թե՞ բեկված կարոտիս ձայնալարն էր զնգում:

Եվ անբառ այդ երգում կար թախիծ մի անբառ,
Եվ արյան հեկեկանք, և աղերս մի տրտում,
Մի հովիտ կար հեռու, մի քարոտ ճանապարհ,
Մենավոր մի բարդի, մի դոնակ ու մի տուն:

Եվ կային քանու դեմ զնգացող զանգակներ,
Կար ավեր մատուռի տվայտող լուսթյուն,
Եվ կանչեր հեռավոր, որ վաղուց են հանգել,
Բայց կանչում են կրկին ու կանչում են քեզ տուն:

Եվ իջնող մութի դեմ իր թևերը ջարդած,
Մեղեդին երկնքում մղկտում էր ցավոտ
Ու գնում էր հեռու, ու գնում էր անդարձ՝
Մթան մեջ թաղելու վիրավոր մի կարոտ:

ԱԿՆԱ ՁՈՐՈՒՄ

Այնտեղ՝ Ակնա ձորի վիհերն ի վար հոսում,
Դեռ երևի եփրատն հայերեն է խոսում:

Սարավանդի վրա՝ հին ակուններն ի վար
Հորովելն է հողոտ դեռ թպրտում շվար:

Որձաքարե անձավն իր կապույտը խնկում,
Ինչ-որ կորած մանկան ծիծաղով է զնգում:

Եվ քարափի վրա մի կիսավեր կոթող
Շուրթին պահել է դեռ մեսրոպատառ մի տող:

Եփրատի խղ գոռոց, ճանապարհներ լռած,
Ու ոչ մեկը չկա, որ հասկանա նրանց:

Իսկ կործանված վանքի եղինջներում շաղոտ
Արթնանում է հանկարծ մի մոլորված աղոթք,

Եղինջներից այրում իր շրթունքներն անեղծ,
Քարեքար է զարկվում ու դառնում է անեծք:

ԱՍՏԴԻ ՊԵՍ

Եվ նորից սիրտս տվայտում է շոգ,
Թախծում է նորից այս խեղձն, այս վայրին,
Ուզում է գնալ, իջնել ծնկաչոք
Իր հողին, ջրին, ծննդավայրին:

Իջնել այն կապույտ առավոտի դեմ,
Որ բուրում ծխով, բուրում էր հացով,
Եվ հանդ գնացող խաղաղ հոտի դեմ,
Որ երկարում էր գառների լացով:

Իջնել այն բարդուն, որ կապույտ հագած,
Տարուբերվում է լույսերում վերին,
Եվ հայրենի տանն իմ ավերակված,
Որ բույն է դարձել լացող բվերին:

Այն եղինջներին, որ հեռվից վառում
Եվ այս մորմոքն են արյանս տալիս,
Եվ այն ջրհորին, որի խավարում
Իմ մանկությունն է աստղի պես լալիս:

ԹԵ ՀՐԱՇՔՈՎ...

Թե հրաշքով ծամփաս տանի
Դեպի Եփրատ ու մանկություն,
Հոտոտելով քեզ կգտնեն,
Հայրենական փոքրիկ իմ տուն:

Այն կապույտից ու այն ոսկուց,
Որ ջրերին էին թառում,
Կձանաչեն ու կգտնեն
Իմ մանկության ոսկե առուն:

Հազարի մեջ կձանաչեն
Իմ մանկության բարակ բարդին,
Որ խշշում էր երկինքն ի վեր,
Երկինքն առած իր սաղարթին:

Եվ օդի մեջ, ոլորտի մեջ,
Հովերի մեջ լուսաբացի
Ես կգտնեմ բույրերը տաք
Մեր տան ծխի ու մեր հացի:

Թե հրաշքով ծամփաս տանի
Դեպի Եփրատ ու մանկություն,
Հոտոտելով քեզ կգտնեն,
Հայրենական փոքրիկ իմ տուն:

ՄԻ ԳԻՇԵՐՈՎ ԱՐԹՆԱՆԱՅԻՐ...

Մի գիշերով արթնանայիր,
Իմ հեռավոր աշխարհի,
Եվ լուսնկան մեր կտուրից
Թվար խոշոր նշխար:

Կարկաչեր երգը ջրվորի
Գիշերվա մեջ վճիտ,
Ու երկինքը խշշար վրաս
Իբրև աստղոտ մի չիթ:

Եվ կալերից արևաբույր
Գային բարակ հովեր,
Ու մեր բարդին՝ թաթին ելած,
Շեկլիկ աստղը շոյեր:

Նորից ամեն տերևի մեջ
Դողար մի լույս ասուպ,
Տատս չոքեր ու Աստծո հետ
Աներ գրույցն իր սուրբ:

Գետի ահեղ որոտը գար
Մութն ու ահեղ ձորից,
Եվ աշխարհում ամեն ինչի
Հավատայի նորից:

Հավատայի, որ այդ գետում
Կան ջրի լույս հարսներ,
Եվ նրանցից մեկն անպայման
Պիտի որ ինձ հասներ:

Հավատայի, որ շողերից
Ճանապարհներ հյուսել,
Դու ես շրջում, Աստվածամայր,
Բաժանում գութ ու սեր...

ՓՇՐՎԱԾ ԼՈՒՍԻՆ

Այնտեղ հովիտ կար արևով լցված,
Եվ արծաթով էր գետակը հնչում,
Արևածագի ցողով լվացված
Նժույգներ էին այնտեղ վրնջում:

Դու՛ իմ կորուսյալ, դու՛ իմ ավետյաց,
Իմ կանաչ երկիր, իմ կարմիր հնչյուն,
Արշալույսի մեջ ծայրեծայր ձգված,
Դու՛ արեգակի ոսկե վրնջյուն:

Եվ գյուղ կար այնտեղ՝ արևը վրան,
Զանգակատուն կար առ Աստված միտող,
Բարդիներ կային բարակ, հուրհրան,
Որ ոտից գլուխ երգ էին ու դող:

Եվ տուն կար այնտեղ, պատերում քարե
Մի նախնադարյան բույր կար ու շաղախ,
Կավե կտուրին չիր կար ու արև
Եվ ամռան օրվա օրհնանքը խաղաղ:

Եվ մայրամուտ կար... Հոտի վերադարձ,
Կորած գառների լալագին մայուն,
Ջրերի զնգոց, լուսին կար լրած,
Որ մեր ջրհորի մուգին էր նայում:

Դու՛ իմ կորուսյալ, դու՛ իմ ավետյաց,
Դու թախիժ՝ իջած իրիկնալույսին,
Դու ջրհորն ի վար դիտապաստ ընկած
Ու փշուր-փշուր ավերված լուսին:

ԴԵՊԻ ՍԿԻԶԲԸ

Ու ես թոթափած իմ անքնության ստվերները սև
Եվ ստվերներից միակ կապույտը՝
Կարոտը առած՝
Դեպի սկիզբն եմ ընթանում ահա
Քամիների հետ
Ու թռչունների...
Ասում են՝ այնտեղ ծաղիկները դեռ
Վայրի են այնպես,
Ցողերը՝ խոշոր,
Առավոտները՝
Բարբարոսաբար գեղեցիկ ու մերկ,
Ոչ մի բան այնտեղ դեռ չունի անուն,
Եվ «կարոտ» բառը դեռ չի արարված:

Երևի այնտեղ ինչ-որ թփի տակ
Իմ մանկությունից ծվեններ կան դեռ՝
Մոլորված շողի
Եվ անմոռուկի,
Եվ խոտի տեսքով...
Ու ես թոթափած իմ անքնության ստվերները սև
Եվ ստվերներից միակ կապույտը՝
Կարոտը առած,
Դեպի սկիզբն եմ ընթանում ահա
Քամիների հետ
Ու թռչունների...
Գուցե այդպես է,
Ով որ գնում է դեպի սկիզբը,
Գնում է միայն
Քամիների հետ
Ու թռչունների...

ՃԱՆԱՊԱՐՀ

Ու ես գնում էի, երկիր... Աջ ու ձախից
Ինձ հետ ջրերդ էին գնում:

Մաքուր,
Կապույտ

Ու սանձակոճ:

Մաքուր,
Կապույտ

Մի տանջանքով

Չարկվում էին վեճ ու քարի

Եվ ժայռերի

Ժանգոտ ու շեկ ժանիքներից հոշոտվելով,

Ունում էին որոտաձայն ու փրփրում:

Վիհերի մեջ,

Վիհերի դեմ

Իրենք իրենց խենթ քրքրում

Ու ծովերին էին տանում

Կապույտ զովը լեռան ձյունի:

Իսկ ես ծարավ էի սաստիկ...

Քարափների

Ու վիհերի շուրթերի պես

Պատառոտվել,

Այրվում էին շուրթերս չոր,

Ճաքձքում էր մաշկն իմ տոչոր,

Մի կաթիլ ջուր էր թախանձում...

Բայց արևը վերից խանձում,

Ողողում էր

Ինձ հրեղեն իր քրքիջով:

Իմ այդ տեսիլք-տենդի միջով

Անվերջ գնում էի, երկիր,

Եվ քո ջրերն էին ինձ հետ անվերջ գնում՝

Մաքուր,

Կապույտ

Ու սանձակոճ...

ՄՇՈՒ ԼԵՌՆԵՐՈՒՄ

Եվ ես քնեցի Մշո լեռներում,
Գլուխս՝ ժայռի քարեղեն ծունկին:
Ճաճանչն աստղերի խորհուրդն էր բերում,
Խառնում աղբյուրի վճիտ արցունքին:

Եվ գիշերը մեծ ու սքանչելի
Ականջ էր դնում անհունի ձայնին,
Ցածում հովիտը կապույտով էր լի,
Արծաթով էր լի մայր Արածանին:

Եվ հովիտն ի վար և հովիտն ի վեր,
Աստղալույսի մեջ ու աստղաթելի
Թափառում էին լուսե ստվերներ
Եվ ոգիները հին առասպելի:

Թափառում էին կրակներ ու կայծ,
Հառնում ու փչում տաճարները հին:
Եվ գետի ափին երևաց հանկարծ
Ինքը՝ Աստղիկը, ինքն՝ աստվածուհին:

Աստղիկ, կարոտի շքեղ բռնկում,
Աստղիկ, դու կրակ, կնություն ու սեր,
Դու մեր դաշնության տենչանքը քնքուշ,
Մեր արյան աղերսն ու ծարավը մեր:

Լոգանքի ժամ է... Նա քողն արձակում
Եվ գիստերն ի վար նետում է խոտին...
Մերկ է... Քայլում է, մթան դեմ ծագում
Լուսաստղի նման ու առավոտի:

Լուսնկայի տակ ստինքներն առույգ
Մի թեթև-թեթև թրթիռ են առել,
Աստղի ցուլցանքն իրեն չարչարում,
Չի կարողանում այդ դողին թառել:

Եվ հանկարծ բոցեր, և հանկարծ խարույկ...
Մութը ծվատվում ու նետվում է դեն...
Այդ հովիվներն են, կրակ են վառում,
Որ մերկ Աստղիկի լոգանքը դիտեն:

Աստղիկ... Եվ սակայն Աստղիկը հանկարծ
Մշո լեռներից մշուշ է բերում,
Պարուրում, ծածկում մերկությունն իր պարզ
Եվ չքանում է այդ մշուշներում:

Եվ ամբողջ դաշտը կորչում է մութում,
Եվ ամբողջ դաշտը ծփանք է տալիս,
Միայն աստղերը ինչ-որ բան հիշում
Ու գիշերն ի լույս արցունք են լալիս:

ՀՈՂՄԵՐԻ ԴԵՄ

Եվ ծանապարհը
Երկինք է տանում
Ու ընկնում է վար,
Եվ ծանապարհը
Անդունդների մեջ
Խարխափում շվար
Ու նորից դեպի երկինք է տանում:

Գնում եմ, գնում
Ու չեմ հասկանում՝
Երկինքն է արդյոք տապալվել վերից,
Թե՞ լեռնաշխարհը երկինք փոթորկել
Իր ժայռ ու քարի,
Թուփ ու մացառի
Սուր մագիլներով կապույտ է պոկել
Ու ծվեն-ծվեն վար բերել իր հետ:

Երկինքներով են այնտեղ լեփ-լեցուն
Անդունդ ու լճակ,
Սարահարթ ու գետ...
Ու ես գիշերով վախենում էի
Լեռներում շրջել,
Որ ոտքս հանկարծ
Շեկ աստղի չառնի

Կամ մոլորակի...
Անդունդ
ու կատար,
Թռիչք
ու անկում՝
Ամեն ինչ այստեղ պահպանում է դեռ
Ձևը կրակի:

Արարման օրից
Անդունդներն այստեղ
Շարունակում են
Դեռ անկումն իրենց,
Ու ես խորհում եմ,
Որ Աստվածն ինքն էլ
Ընկնելու ահից
Աչքերը փակել,
Հեռու է քաշվել
Այս լեռնաշխարհի երկնակամարից:
Հեռու է քաշվել
Ու լեռնաշխարհն այս
Թողել աշխարհի
Բոլոր կողմերի
Ահեղ հողմերին...

ԾՈՒՆԿԻ ԵՎ, ԾՈՒՆԿԻ...

Ծննդավայրս... Ծունկի եկ, ծունկի
Եվ գնա դանդաղ, և գնա բոբիկ,
Երեկոն, նման կապույտ արցունքի,
Թառել է ձորի քարեղեն կոպին:

Ծննդավայրս... Բարդիներն ի վեր՝
Սրբատաշ ու պարզ մի զանգակատուն,
Հողե տանիքներ ու հողե քիվեր,
Որոնցից դեռ տաք արև է կաթում:

Ծննդավայրս... Իմն է ամեն ինչ...
Ծննդավայրս... Քարափ է ու կալ...
Հեկեկում էր միշտ այս աղբյուրը ջինջ,
Թե՛ նոր սկսեց այսպես հեկեկալ:

Եվ դողանջում են հեռավոր ձայներ,
Երագում լսած ձայների հանգույն,
Եվ ոլորվում են քարոտ կածաններ
Ու թախծություններ մանուշակագույն:

Ես որոնում եմ մեր տնակը հին,
Պիտի որ լինի նա ահա այստեղ,
Իրիկնամուտի լույսն է կտուրին,
Թե՛ թթի դեղին չորացող պաստեղ:

Օ՛, Տեր իմ, օ՛, Տեր... Այստեղ ամեն ինչ
Հեռու մանկության բույրով է խնկում,
Խնկում են օդը, խոտեր ու եղինջ
Ու ճանապարհի աղուրը քնքուշ:

Ուր որ է հիմա տատս շվարած
Պիտի ինձ բակից ընդառաջ վազի
Եվ մանկան նման իմ կրծքին փարած
Օրհնություն տեղա ու աղոթք ասի:

Ու հետո հոգնած կմտնեմ ես տուն,
Հոտը կշնչեմ նոր շփխած կավի,
Եվ իմ մանկության սպիտակ կատուն,
Ոտքիս փաթաթված, պիտի մլավի:

Հետո կսպասեմ ես մերոնց գալուն,
Որ տուն կբերեն այգեստան ու կալ...
...Հեկեկո՞ւմ էր միշտ մեր դռան առուն,
Թե՞ նոր սկսեց այսպես հեկեկալ:

ՄԱՆԿՈՒԹՅԱՆ ԳԻՇԵՐ

Եվ ես այդ գիշեր քնեցի մեր տան
Կավե կտուրին,
Եվ ես այդ գիշեր իմ մանկության հետ
Մնացի մենակ,
Եվ ես այդ գիշեր մանկան խոսքերով
Աղոթում լռին,
Օրհնում էի քեզ, հայրենի տնակ:

Եվ մանկության պես հովն էր փաթաթվում
Բարդու սոսափին,
Եվ մանկության պես աստղը շեկլիկ էր,
Շողուն էր ու տաք,
Ու ես մանկորեն գլուխս նորից
Դրել իմ ափին,
Սուզվում էի լուռ ամպերում ձերմակ:

Եվ հետո քամին դաղծի բուրմունք էր
Խառնում երազիս,
Եվ բարծիս վրա կալի մղեղը
Ցնորք էր ցրում,
Դաշտից մեր գյուղի ամենասիրուն
Աղջիկն էր գալիս,
Ու կակաչի պես շորն էր թրթռում...

Աստղի ծածանչն էր հսկումի կանգնել
Կոպերին իմ փակ,
Հովը հևում էր՝ մայրական ձեռքը

Ճակատիս պահած,
Թաթի ծայրին էր ընթանում ասես
Առուն մեր հստակ,
Որ չխռովի իմ քունը խաղաղ:

Եվ հոգնությունս թեթև էր այնպես
Ու քունս՝ դյուրին,
Բարդու սոսափ էր, աստղի շշուկ էր,
Խշշոց էր արտի,
Ես երագիս մեջ խոնարհվում էի
Մեր կաթնաղբյուրին,
Եվ շուրթիս համն էր մայրական կաթի...

ԱՌԱՎՈՏԸ

Եվ առավոտյան զարմանքով տեսա,
Որ թռչունները
Ինձնից շուտ զարթնել,
Արևի բոցից,
Թոնրի բուրմունքից
Ու ծվլոցից
Ինչ-որ մի ծանոթ նվազ են հյուսում,
Որ փռեն բոբիկ ներբաններիս տակ...

Ու տեսա նաև,
Որ ծաղիկները
Նույնպես ինձանից կանուխ են զարթնել
Եվ իրենց մանրիկ,
Փխրուն ձեռքերով
Մի-մի ցող առել,
Թեքվել են խոնարհ,
Որ ցողով օծեն ոտքերն իմ բոբիկ...

ԵԼ ԲԱՎԱԿԱՆ Է...

Էլ բավական է... Թախիծն այս ցավոտ
Անվերջ ու անվերջ սիրտս է ծվատում:
Պիտի վեր կենամ ես այս առավոտ
Ու գնամ այնտեղ ու գնամ մեր տուն:

Թեկուզ և գիտեմ, որ տեսիլք է սա,
Որ այն աշխարհը հեռու է ու փակ,
Բայց միևնույն է, ճանապարհ, սուրա՛,
Սլացիր իբրև հրեղեն պապակ:

Բայց միևնույն է, անցիր վիհերով,
Մոլորվիր մթին անդունդների տակ
Եվ քարափների մամռոտ քիվերով
Ոլորվիր դեպի այն հովիտը տաք:

Այնտեղ արև կա ու հոտ կա հարդի,
Այնտեղ գետակ կա, քարեր կան կիզող,
Արև է շնչում մի խաղաղ բարդի,
Որ կիսով կանաչ, արծաթ է կիսով:

Ու տուն կա այնտեղ, քարե մի տնակ,
Եվ գիտեմ, նրա հին առաստաղից
Մի հին կարոտ է մաղում շարունակ,
Ու կաթկթում է մի մրոտ թախիծ...

ԾՈՒԽԸ

Եվ խաղաղորեն ծուխ էր բարձրանում
Ակութներն ի վեր,
Եվ խաղաղորեն իրար խառնված,
Թրթռում էին տերև ու թռչուն,
Լույսը դաշտերով ու քարափներով
Սուրում անստվեր,
Շեկ զամբիկի պես
Դոփում էր անձայն, անձայն վրնջում:

Օրը նայում էր կապույտ աչքերով
Ու տեսնում հանկարծ,
Որ իր գիշերվա
Ոսկե երազն է աշխարհին թառել,
Իրար գիրկ ընկած կարկաչում էին
Ջուր ու ճառագայթ,
Եվ թռչունները թևերի վրա
Գերեվար տանում մի հսկա արև:

Եվ առավոտը՝
Որձաքարի պես կապույտ ու առողջ,
Ինքն իր խորքերից
Ջրնգում էր մեղմ ու անլսելի,
Սաղարթ ու տերև
Ջրուցում էին մի պարզ բարբառով,
Եվ ծաղիկները գրուցում էին
Քամիների հետ ու թռչունների:

Եվ որոնում կար,
Մեղուն ծաղիկ էր որոնում անհագ,
Ճառագայթը՝ ցող,
Հայացքը՝ աստված,
Ջրի երգը՝ հուն...
Եվ առավոտն այդ որոնումի մեջ
Ուզում էր դառնալ
Հողի,
Ջրերի
Եվ աստվածների
Ներդաշնակություն:

ՏԵՍԻԼՔ

Ես լույսերի մեջ թափառում լռին
Եվ ամենուրեք փնտրում եմ նրան...
Աղբյուրի ճամփին կամ տան կտուրին
Չի՞ ծփա արդյոք շորը հուրհրան:

Սիրտս մարում է ամեն մի կանչից
Եվ սկսում է տխուր երազել,
Մեր հին թզենին թեքվում ականջիս,
Ուզում է, կարծես, նրա տեղն ասել:

Եվ առուն, գիժը, ձեռքիցս բռնած,
Նրանց տան ճամփով քաշում է ինձ վար...
...Բայց ծոնչում է մի փայտե դռնակ,
Եվ ինքն է ահա՝ շփոթ ու շվար:

Կաս-կարմիր շորը ցուքին է տալիս,
Բոցի պես թեթև թոչում առվակով:
Գալիս է մեր տուն... Երևի գալիս
Կրակ տանելու հին պատրվակով:

Քանի՜ տարի է իրար չենք տեսել...
Ու համրանում ենք ինչ-որ ցավերից:
Նույն իրանն է ձոճ, նույն մազերը սև,
Միայն աչքերն են խոնարհ ավելի:

Միայն հայացքը ավելի տխուր,
Եվ շորն ավելի մատնիչ է դարձել,
Իսկ շրթունքներին կայծկտում են լուռ
Այրվող շշուկներ ու թաքուն հարցեր:

...Տեր իմ, թող գիշեր լինի կապուտակ,
Թող պոկվի հեռվից քնքուշ մի հայրեն,
Ու ծածկաբերան մեր թզենու տակ
Թող ստինքները շապիկս այրեն:

Թող արև բուրի նրա վարսերից,
Եվ աչքերի մեջ արտասուք ցոլա,
Թող հին թզենին օրինի մեզ վերից,
Ու մեր սրտի մեջ թող գաղտնիքը լա...

Նայում ենք իրար... Աչքերի մեջ տաք
Մի խաժ ամառ է, գույներ են կալի,
Եվ ինչ-որ բան կա քնքուշ ու հստակ,
Եվ ինչ-որ բան կա անհասկանալի:

ԿԱԼԸ

Ես կալ եմ գնում... Մղեղը դեղին
Իր ցուցլանքն է փոել աջ ու ձախ,
Ու թվում է, թե արար աշխարհին
Ծուփ-ծավալվել է անձայն մի ծիծաղ:
Բարդին շոգի մեջ կարկամել շվար
Ու որոնում է ստվերն իր կապույտ,
Թուխ արտոյտները թևում վեր ու վար
Եվ թևիկներից օրհնանք են թափում:
Ամեն ինչ այնպես պայծառ է ու պարզ,
Եվ ամեն ինչից զնգոց է ելնում...
Մի ոտաբոբիկ, թխորակ մի հարս
Կալի մեջ կանգնել, ցորեն է էրնում:
Լեփ-լեցուն մաղը պարզում է երկինք,
Ու մաղից թել-թել արև է ծորում,
Ամեն շարժումից ստինքները գիրկ
Ծոցի մեջ մի տաք դող են օրորում:
Մազերին ոսկե մղեղ է իջել`
Լուսապսակ է ու լուսե կամար,
Ասես երկնքի ու հողի միջև
Կանգնել է խարտյաշ մի աստվածամայր:
Մանուկը թոչում, կանգնում է կամին,
Եվ քայլ են անում եզներն սպիտակ...
Բացում է հանկարծ թափառիկ քամին
Այդ աստվածամոր ծնկածալը տաք:
Արևի մեջ է նա ոտից գլուխ,
Արևի մեջ է աշխարհը արար,
Խաղաղություն քեզ, հայրենի իմ գյուղ,
Խաղաղություն, քեզ, իմ ծննդավայր...

ԱՄՌԱՆ ՕՐ

Այստեղ տո՛ն է եղել, հող ու ջրի հանդես,
Աստվածներն են այստեղ խրախճանել հարբած,
Եվ ամառն իր խարտյաշ գիսակները քանդել,
Երանց համար այստեղ պարել է մերկ ու բաց:

Ծղրիդները ոսկե սրինգներ են սուլել,
Ու բամբիռ են զարկել առուները արծաթ,
Ընթացել են ձերմակ, կորովաբիբ ցուլեր,
Եղջուրների վրա հողի փառքը բարձած:

Անցել դանդաղորեն, անցել ծանրակճղակ,
Երակների մեջ հորդ մի արարիչ մոլուցք,
Եվ ռունգերով ամուսն արեգակը շնչած,
Բառաչել են երկար արևի դեմ ցուլուն:

Մկանների եռքից մի տաք դող է առել
Ու թրթիռ է առել նրանց մեջքը ողորկ,
Ընթացել են նրանք առողջ, որպես տարերք,
Եվ գեղեցիկ, որպես խոյահարող բողոք:

Ու տարել են նրանք արեգակը արդար
Ճակատների վրա ու աչքերում թախծոտ,
Եվ բառաչից նրանց՝ երինջները մատաղ
Բռնկվել են հեռվում երանելի քաղցով:

Բառաչի դեմ՝ բառաչ... Ձգվել երկար ու ձիգ,
Սաստկացել է արյան մի արարիչ կարոտ...
Ամուսն օր է եղել, եղել արև ու կիրք,
Եղել կարմիր, կանաչ, անծայրածիր արոտ...

ՎԱՅՐԻ ՄԵՂՐ

Եվ շեկ ժայտերի խոռոչների մեջ
Բույր կար ու բզզյուն,
Եվ շեկ ժայտերի խոռոչների մեջ
Շեկ մեղուները մեղր էին նյութում,
Որ ծանր լույս էր
Ու լույծ արեգակ:

Եվ մեղրի բույրն էր
Տոթի պես կանգնել ժայտերի միջև,
Այդպես շեկ հողն է
Բուրում ամառվա անձրևից հետո,
Այդպես բուրում է ծաղիկը խարտյաշ,
Բուրում է հացը,
Մարմինը կնոջ...

Եվ շեկ ժայտերից
Մինչև շեկ հովտի ծաղիկները շեկ
Չգվում էր բարակ, մեղրոտ մի ձամփա,
Մի աներևույթ, ոսկեղեն մի լար,
Որ զրնգում էր
Ինքնաբաշխումի խաղաղ բերկրությամբ:
Եվ շեկ ժայտերի
Խոռոչներն ի վար կախվում էր մեղրը,
Որ ծանր լույս էր
Ու լույծ արեգակ...

ՆՈՒՈԸ

Եվ նու՛ռը, նու՛ռը...
Կողերի վրա արշալույսը ալ
Եվ անառային միջօրեների
Շոգը իր ներսում,
Հասուն կրծքի պես սկսում եռալ
Ու մի առնական ձեռք էր աղերսում:

– Եկ, մենք քեզ համար
Լցվեցինք այսպես միջօրեներով,
Լցվեցինք բոսոր
Ու արևահամ հյութերով հողի,
Եկ, մենք քեզ համար նյութեցինք մի տաք,
Մի քաղցր գորով,
Որից ձաքում է
Մաշկը մեր կողի...

Եկ, առ սիրտը մեր
Ու քո բռունցքի առնությամբ զորեղ
Քամիր շուրթերիդ
Ու քամիր քիմքիդ ծարավին անհագ,
Եվ քո արյան մեջ մենք կզրնգանք
Իբրև միջօրե,
Իբրև բերկրության կարմիր աղաղակ...

ԱՄՌԱՆ ԳԻՇԵՐ

Գիշեր է, լուսնյակ է ու լույս,
Ծղրիդը արծաթ է մանում,
Տերևը դողում է քամուց
Եվ աստղին աչքով է անում,
Իմ գյուղը վրան է առել
Կապույտն ու խշշոցը բարդու,
Իսկ հովը տանիքից տանիք
Հայրեն ու տաղիկ է տանում:

– Ախ, հոգի, սոխակը եկել,
Եկել է, վարդին է թառում,
Մի չար ձեռք իմ ու քո մեջտեղ
Սևավոր բոցեր է վառում,
Մանուկ եմ քեզ սիրել, հոգի,
Սիրել ու կարոտս չառել,
Քո ձեռքով պաղ ջրիկ տուր ինձ,
Ծարանվ եմ, սրտիկս է մարում:

Ու տաղը թրթռում թեթև,
Թառում է տերևի դողին,
Տերևը տաղի հետ մարում,
Շողեր է թափթփում հողին,
Իսկ ուրիշ կտուրից ահա
Հնչում է մանրիկ մի ծիծաղ,
Աղջկա մի ձայն է հնչում,
Պատասխան նետում երգողին:

– Սոխակը թառել է վարդին,
Բայց սրտին փշիկն է հասել,

Ինչքան էլ խաղ ու տաղ կանչես՝
Ոչ ջրիկ կտամ ու ոչ սեր,
Բոցի պես քեզ այնքան վառեմ
Ու ծարավ պահեմ քեզ այնքան,
Մինչև որ ծուխ ու մուխ ելնի
Թուխ ու մուխ այդ դունչիկդ ի վեր:

Ծառերը ծիծաղում մանրիկ,
Խփում են լուսնյակի լարին,
Առվակը աստղեր է առել,
Չնգոցով զարկում է քարին,
Հայրենը տանիքից տանիք
Շշուկ ու ծիծաղ է տանում,
Տանում է, լույսի պես փռում
Հանդերին, լանջերին, սարին:

– Երդիկից կհանեմ քեզ դուրս
Ու բարձրիկ լեռներս կելնեմ,
Վախվորած տատրակի նման
Քեզ կառնեմ ձեռներս, կելնեմ,
Խոցոտ է, ամս, շատ է խոցոտ
Սրտիկը սիրուտեր մարդու,
Ով էլ գա ու դեմս ելնի,
Իմանամ մեռնելս, կելնեմ..

Գիշեր է, լուսնյակ է ու լույս,
Ծղրիդը արծաթ է մանում,
Տերևը դողում է քամուց
Եվ աստղին աչքով է անում,
Ծղրիդը, տաղիկը, քամին
Թել թելի երազ են հյուսել,
Անհունը նայում է վերից,
Օրինություն ու սեր է մաղում:

ՄՈՐԵՆԸ

Եվ նախ թվաց, թե ամպ է դա,
Ամպ չէր, սակայն,
Ապա թվաց, թե հողմ է սև,
Հողմ չէր դա, ո՛չ...

Հեռվից հեռու
Խլրտում էր խլուրդի պես հսկայական
Ու սողում էր գետնաթավալ ու ծանրապոչ...

Եվ սողում էր
Խշխշոցով մի խժալուր
Ու խժալուր կափկափոցով,
Որ կափկափոց էր չախկալի:

Սողում էր նա,
Գալիս էր նա սպառնալի:

Ամպ չէր սակայն,
Հողմ, չէր դա, ոչ...

Համատարած մի սև մորեխ,
Համատարած մի սև մարախ,
Համատարած մի սև երախ,
Համատարած խածող ժանիք,
Խայթ էր խոցող...

Սողում էր նա
Իր խժալուր կափկափոցով,
Խուժում խոփվ ու խուռներամ

Եվ ամեն ինչ սևով ծեփում:
Կար արեգակ մի հուրհրան,
Որ շողում էր
Բարակ, բարի
Ու ոսկեգույն ճառագայթով...

Եկավ,
Խփեց իր սև թաթով
Եվ սկսեց խժռել իբրև ոսկե ծղոտ
Ու ոսկե խոտ
Ճառագայթներն այդ ոսկեգույն...

Ու ճառագայթ չեղավ իսկույն,
Չեղավ արև...

Ապա երախն իր արնախում
Պարզեց վերև
Եվ սկսեց ծամել ոխով
Կապույտ-կապույտ երազանքը ոլորտների...
Եվ վայրկյանում
Չեղավ կապույտ, չեղավ երազ...

Սարավանդին
Արտն էր փռվել՝
Շեկլիկ,
Խոնարհ
Ու ոսկեվարս...
Եվ հասկերը
Մի իմաստուն լուռության մեջ
Նյութում էին սերն ու բարին,
Որ ձեռքերով իրենց ոսկե

Պարզեն մարդուն
Եվ աշխարհին...

Եկավ հեռվից,
Մի անխարխափ հոխորտանքով
Խփեց արտին,
Եվ հասկերը
Մի պահ միայն
Սարսուացին փշաքաղված
Եվ մոխրացան, և չքացան:

Եվ արտ չեղավ,
Չեղան հասկեր...

Եվ մեղուները ոսկեվոր
Իրենց անուշ բեռը բարձել,
Դեպի խորիսխն էին տանում
Եվ կամ նորից թեթև թևով
Դեպի շաղոտ,
Արևահոտ
Ծաղիկների երազն էին վերադառնում...

Եկավ,
Չարկեց ծաղիկներին,
Ավերակեց բույն ու խորիսխ
Եվ տարածեց
Շաղոտ, շողոտ,
Արևահոտ ծաղիկների
Ու ոսկեվոր մեղուների
Դիակները ոսկեվորիկ...

Եվ ծանրացավ,
Եվ թանձրացավ

Ծառին,
Կալին
Ու ողկույզին,
Աղբյուրների մաքուր լույսին,
Հողին,
Շողին,
Այգաբացին,
Այն աշխարհին՝ ավետյացին...

Իջավ, նստեց
Մի սև մորեխ,
Համատարած մի սև մարախ,
Համատարած մի սև երախ,
Համատարած խածող ժանիք,
Համատարած խայթ մի խոցող...

Ողջը՝ կմախք,
Ողջը՝ դիակ,
Ողջը՝ մոխիր,
Ողջը՝ անծայր մի սևություն,
Մի զարհուրիկ ամայություն...

Եվ հանդերի,
Հովիտների,
Արոտների վրա ամա
Մի մահահոտ հողմ է շրջում...

Բացում երախն իր խժալուր,
Կափկափում է ու քրքում:

ԻՐԻԿՆԱՄՈՒՏ

Ծիրանի լույսն ամպի տակ հոգեվարեց ու հանգավ
Եվ Տավրոսի լանջերին թողեց մոխիրն իր կապույտ,
Հեռու վանքից ղողանջեց իրիկնային մի զանգակ
Եվ կարկաչեց դաշտերով արևահար ու թափուր:

Ծննդավայրս է ահա ձորալանջին ծվարել
Կտուրներով իր կավե, բարդիներով վիթխարի,
Ցերեկն ամբողջ՝ արևից իրենց կողերը վառել
Եվ հիմա տաք են շնչում ապառաժներն այս վայրի:

Կտուրներին աղջիկներն առվակի ջուր են ցողել,
Ու խոնավ կավն է բուրում երիցուկով և ուրցով,
Ամռան գիշերն է նստում կտուրներին այդ հողե
Հողվորների հոգնությամբ և աստղերի զրույցով:

Հայացքի տակ Աստծո իրիկնահացն է դրված,
Ու բուրմունքներն են փոված ցորեն հացի ու դաղձի:
Ղողանջում է լուսությունն ու կապույտի մեջ խրված
Բարդիներն են օրհներգում արդարությունն այդ հացի:

Հետո հեռու կտուրից մորմոքում է անտունին,
Այդպես տխուր ու մոլոր ո՞ւմ է կանչում, արդյոք ո՞ւմ...
Իսկ մի ուրիշ կտուրից աղջիկը՝ աչքն անհունին,
Լսում է երգն ու հետո վերմակի տակ հեկեկում:

Բարդիները լուսնի հետ կտրում արծաթ երազներ,
Թափթփում են հոգնաբեկ հողվորների կոպերին,
Ծղրիդի երգը ելել, երկնքի դուռն է հասել,
Խաղաղություն հայցելու ոլորտներից այդ վերին...

ԱՆԿԵՉ ՄՈՐԵՆԻ

Այրվում է, այրվում... Եվ բոցը բոսոր,
Կապույտ է ու հիր,
Այրվում է, այրվում... Եվ բոցը մորմոք,
Կարոտ է ու կանչ,
Անկեզ մորենին այրվում է, այրվում,
Եվ չկա մոխիր,
Չկա սպառում, և չկա վախճան...

Եվ բոցերի մեջ հուրհրատում է
Աշխարհ մի հեռու,
Եվ բոցերի մեջ տեսիլքն է վառվում
Կապույտ ու կանաչ,
Արևածագ է բռնկվել ասես
Ձյունոտ լեռներում,
Եվ հովիտն ի վար ցոլանք է ցանած:

Եվ հովիտն ի վար ծփում է խաղաղ,
Արևոտ մի ծուխ,
Մի մայր արագիլ ձաճանչն ուզում է
Կտուցին առնել,
Բոցերի նման կարմիր ձիերն են
Այստեղ արածում,
Եվ արածում են սպիտակ գառներ:

Եվ բոցը դողում, գալարվում է բոցն
Ու ողջը ջնջում,
Եվ բոցը նորից դառնում է մորմոք
Ու անշեջ կրակ,
Եվ բոցի միջից մի զարմանալի

Բարբառ է հնչում,
Եվ ծավալվում է մի սուրբ պատարագ:

Ծավալվում է նա, իջնում ամայի
Դաշտին ու հանդին,
Ծավալվում է նա, խունկի պես օծում
Մասունք ու աճյուն,
Ծավալվում է նա այրված ու ծարավ
Այն անապատին,
Որ իր հրեղեն ողբն է հառաչում:

Եվ այրվում է նա... Եվ բոցը բոսոր,
Կապույտ է ու հիր,
Այրվում է, այրվում... Եվ բոցը մորմոք,
Կարոտ է ու կանչ,
Անկեզ մորենին այրվում է, այրվում,
Եվ չկա մոխիր,
Չկա սպառում, և չկա վախճան...

1969-1971



ԱՍԻՔ ՄԻՐՈՒ



*Սերը... նման է նա ճշմարտության,
Կես ճշմարտությունն չի լինում կյանքում,
Չի լինում կես սեր...*

ՀԻՄՆ ԿՆՈՋ

Լուսաբացին, երբ քնատ քո ձևերն են նվաղում,
Մարմինդ ի վար տաք հողի շնչառությունն է խաղում:

Ու երբ ելնում ես զարթնած, նետում քողը քո հագի,
Քեզ հետ զարթնում է ասես քնած շունչը կրակի:

Հողի պես սուրբ ու բեղուն և կրակի նման նենգ,
Դու՝ հայտնություն հրաշքի, տառապանքի դու օրենք:

Դու՝ առաջին ձնծաղիկ՝ տրված լույսին ու քամուն
Եվ շուրթերս արյունող անապատի դու սամում:

Դու՝ հավատի մաքրություն ու մեղավոր դու հերձված,
Դու՝ մեկնելի մեղեդի ու սեպագիր առեղծված:

Շրթունքներս ձաքձքող ծարավի դեմ ու քաղցի
Հաղորդություն դու գինու, հաղորդություն դու հացի:

Քեզ եմ գալիս ես անվերջ ծարավս ու քաղցս առած,
Եվ արյունն իմ հնամյա ծնկաչոք է քո առաջ:

1970

ԺԱՄ ՀԱՅՏՆՈՒԹՅԱՆ

Հիմա գիտեմ հաստատ՝ օրերիս օրն էր դա,
Հայտնության ժամն էր դա մեծ ու վերին...
...Կապույտի մեջ սուզված բարդիները խարտյաշ
Ոչ թե խշշում խաղաղ, այլ աղոթում էին:

Կապույտի մեջ սուզված՝ բարդիները ձգվում,
Նայում էին հեռվից թաքուն, դողով,
Որ քարափին տեսնեն քո հասակը ձկուն,
Քո ոտքերը բոբիկ, ծամը ցողոտ:

Եվ տոն եղավ, եղավ հայտնության մեծ մի ժամ
Ու այդ ժամը եղավ քարանձավում:
Մատներս էին ցավում քո քնքշանքից դաժան,
Աչքերս էին դաժան լույսից ցավում:

Աչքերս էին ցավում այդ մութ քարանձավում,
Այդ մութ քարանձավում երգն էր արյան,
Ինչ-որ անտես ոգի ասես մեղքն էր քավում,
Աղոթում էր ասես, երգում «հարյավ»...

Որձաքարից քամվող արցունքները մաքուր
Մեզ մկրտում էին որպես կարոտ,
Եվ քարանձավն ասես մեզ օրհներգում էր լուռ
Նախամարդու գտած միակ բառով:

Ու երբ կուրծքդ էր հանկարծ թեթևակի բացվում,
Բուրում ցորենի պես, ուրցի, խունկի,
Արշալույսով էին իմ աչքերը լցվում,
Ու գաղտնիքն էր իմ դեմ իջնում ծունկի:

Ես՝ պատանի, ես՝ կույր, բայց հասկացա արյամբ,
Որ դա սեր չէ միայն, այլև սկիզբ,
Որ դա հող է ու ջուր, ձակատագիր ու բախտ,
Հրո վայելք է դա, հրո կսկիծ...

Խավար է դա ու լույս, ծառագայթ է ու խայթ,
Անդունդի ահ է դա, բարձունքի դող,
Եվ ինչքան էլ բացվի, պիտի մնա անհայտ,
Պիտի մնա անհաս ու անհաղորդ:

Այդպես անհաս ու մերկ՝ հեռուներում կանգնած,
Պիտի կանչի իբրև կարոտը բորբ,
Պիտի հավետ ձայնի իբրև արյան տազնապ,
Բայց և հավետ թողնի ծարավ ու որբ:

...Եվ օրերիս հեռվից ես օրհներգում եմ քեզ,
Փառաբանում եմ քեզ լուռ ու ծնկած,
Քեզ, օրերի իմ օր, իմ առաջին վայելք,
Իմ հավերժող ծարավ, դաժան իմ քաղց...

1979

* * *

Այսօր քեզ նորից հիշել եմ
Ու ետ եմ կանչում, անգին,
Աշխարհում կապույտ գիշեր է,
Ու հովն է սուլում հանդից:

Ծաղիկներն աղոթում են
Այնպես մեղմ, այնպես արդար...
Եկ, այսօր խավարի մեջ
Հղումնիս երգը կարդամ:

1940

* * *

Առուններում փշուր-փշուր
Լուսնկաներ կային,
Իմ կարոտը դարձել շշուկ,
Կանչում էր, որ գայիր...

Հևում էին ինչ-որ հովեր,
Թևում հեռո՛ւ-հեռո՛ւ,
Աստղեր էին ուզում շոյել
Բարդիները վերում:

Ախ, ճամփաներ դուք ամայի,
Ախ, հովի խենթ ալիք,
Ինչ-որ մի տեղ գիշերային
Տխուր հավքն էր լալիս...

1940

* * *

Դաշտով վազում է
Մի բարակ աղջիկ,
Ոտաբոբիկ է
Ու շորն սպիտակ...

Ամպրոպի հոտ կա,
Որոտ կա օդում,
Ու հեկեկանք կա,
Շանթ կա ամպի տակ:

...Ամպը որոտաց,
Հեկեկաց, անցավ,
Արցունքի մեջ են
Ծաղիկ ու թփեր...

Աղջկա շորը
Կպել կոնքերին
Ու թրթռացող
Կրծքին է կպել...

Դաշտով վազում է
Մի բարակ աղջիկ,
Անձրևի ցող է
Ու շող է ծամին...

Դեռ վազում է նա,
Դեռ վազում են ես,
Չեմ հասնում նրան
Ու ծիածանին...

1977

* * *

Մի հեռավոր ծղրիդի կանչ,
Մի բարալիկ, տխուր ուռի...
Քուն է մտել կտուրը տան
Լուսնյակի մեջ ու լազուրի:

Պառկել եմ ես՝ կոպերիս տակ
Լուսնկաներ փշուր-փշուր,
Ու մի աղջիկ՝ շորն սպիտակ
Ու ինքը տաք, մի տաք շշուկ...

Առուն գնում սիրտը ելած,
Տանում է լույս երազանքներ,
Երկինքն ի վար՝ աստղերի լաց
Ու աստղային տխուր զանգեր...

Երկինքն ի վար՝ ամենամեծ,
Ամենատաք, ամենահուր
Ասուպն ընկել իմ սրտի մեջ
Ու սրտիս հետ մխում է լուռ...

Մի մոլորված կապույտ թռչուն,
Մի բարալիկ, տխուր ուռի,
Մի աստղային անքնություն՝
Լուսնյակի մեջ ու լազուրի...

1976

* * *

Գալիս էր՝ բոբիկ, մազերը արծակ,
Գալիս էր՝ ձեռքին ծաղիկ մի կապույտ:

Զիլ զրնգում էր ծիծաղը արծաթ
Ու զրնգալով կանչում, խուսափում...

Գալիս էր բոբիկ, գալիս էր շաղոտ,
Գալիս էր որպես խենթ բերկրությունը...

Ինչ իմանայի, որ այդ ծիծաղով
Գալիս է ինքը՝ ողբերգությունը...

1979

* * *

Երկու ծաղկած փշատենի
Օրորվում են վերջալույսին,
Մեկը թեքվում է, որ հենի
Գանգուր գլուխը մյուսին:

Ինչ-որ բան են իրար ասում,
Ասես գգվում մեկը մեկին,
Նրանց սոսափն եմ ես լսում
Ու շշուկները անմեկին:

Կարկաչո՞ւմ է գարնան առուն,
Շուրջը դաշտերն են լուռ ննջում...
Ես այնպես լավ եմ հասկանում,
Թե նրանք ի՞նչ են շշնջում...

1944

* * *

Գարնան ջրերն են հորդում, գարնան ջրերն են երգում,
Ասես սիրուց հեկեկում ու կարոտում եմ ես քեզ:

Թափառում եմ մայթերում, քեզ եմ փնտրում ամեն տեղ,
Սրտիս մեջ քեզ եմ երգում ու կարոտում եմ ես քեզ:

Իմ առաջին երգի պես, հազար անգամ մտքիս մեջ
Սիրուս խոսքերն են հեգում ու կարոտում եմ ես քեզ:

Սակայն հանկարծ փողոցում, քեզ պատահմամբ
հանդիպած,
Իմ ճանապարհն եմ թերում ու կարոտում եմ ես քեզ:

1949

ՁՄՈՒՆ ԳԻՇԵՐ

Ձյոնն է գալիս դրսում... Եվ որքան լավ է այս
Գիշերի մեջ նստել ու անրջել,
Խորհել, որ կյանքը կա, որ աշխարհում դու կաս,
Որ գարուն կա պահված հողի մեջ ջերմ...

Որ դու իջնող ձյունի քնքշությունը հագած
Այս գիշերով խաղաղ կարող ես տունն իմ գալ,
Ներշնչանքի նման սպասված և սակայն
Ներշնչանքի նման անակնկալ:

Որ դու կարող ես գալ այս գիշերով խաղաղ՝
Թարթիչներիդ վրա ձյունն սպիտակ,
Քո մատներով քնքուշ՝ մազերիս հետ խաղալ
Ու մեղմորեն շոյել ձակատս տաք:

Որ կարող է քո սև թարթիչներին իջած
Ձյունափոշին հալվել իմ տաք շնչից:
Ու կարող ես դու ինձ գիշերի մեջ ժպտալ
Սիրո մաքուր-մաքուր արտասուքի միջից:

Ձյոնն է գալիս դրսում... Եվ որքան լավ է այս
Գիշերի մեջ նստել ու անրջել,
Խորհել, որ կյանքը կա, որ աշխարհում դու կաս,
Որ գարուն կա պահված հողի մեջ ջերմ:

1946

* * *

Ալիքը խփում ու տանում է նավակը,
Եվ հովը երգեր է ասում.
Ինչ բաց է երկինքը, արևը ինչ տաք է,
Ինչ լավն է այս լիճը լազուր:

Ճայերը թրջում են ջրի մեջ թևերը,
Ճախրում ու ճչում են օդում,
Քամին քանդակում է չքնաղ քո ձևերը,
Շոյում է վարսերը քո թուխ:

Բաց ծովն է մեր դեմը, ջրերը երգում են,
Ափերը թողել ենք հետև.
Երբ սերն է վարում քո նավակը կյանքում այս,
Ինչ հեշտ է ուղին ու թեթև:

Ծովի պես ծփում է հոգուս մեջ խայտանքը,
Ու սիրտս լեցուն է այնպես,
Սիրում եմ արևը, սիրում եմ այս կյանքը,
Այս լիճը, աշխարհը ու քեզ:

1947

* * *

Հովի շունչը կար ու հովի թև,
Ու լուսին կար խոշոր,
Եկել էր նա՝ հագին թեթև,
Հագին բարակ մի շոր:

Եկել էր նա, եկել թաքուն,
Բայց հլու չէր, անխ, չէր,
Գալարում էր մեջքը ձկուն
Եվ ուզում էր փախչել:

Բայց վախվորած սիրտը սրտիս
Ուրիշ բան էր ասում...
Ու բուրում էր նրա շուրթից
Մեղքի համը հասուն:

Հովերն էին... կուրծքը բացին,
Ծանո էր բարակ հագել,
Ու լուսնի տակ թպրտացին
Տատրակի զույգ ձագեր:

Եվ դողում էր, դողում էր նա՝
Հագին բարակ մի շոր...
Ծողում էին լուսնյակի տակ
Արցունքները խոշոր...

1976

* * *

Շաղոտ փեշը քամուն տված,
Ծամր նետած ետև,
Կանաչ-կանաչ դաշտի միջով
Վազում էր նա թեթև:

Քամին սուրում, քամին հասնում,
Ելնում հասակն ի վեր,
Բաց էր անում քնքուշ-քնքուշ
Ու մեղավոր ձևեր...

Եվ ձևերից այդ մեղավոր
Լոյս էր կաթում հողին...
Ասես վազում էր, որ ձուլվի
Հեռաստանի շողին:

Ախ, դու քամի մեղսոտ ու չար,
Ախ, մեղավոր ձևեր...
Ո՞ր է աղջիկն, ո՞ր է քամին,
Ո՞ր են, ո՞ր են թևել...

1970

ՔԵՉ

Չէիր եկել դու դեռ, դեռ ինձ համար կյանքում
Դու չկայիր անգամ, միակ իմ սեր,
Բայց իմ պատանության թախծոտ երազանքում
Ես քո պատկերն էի լույսից հյուսել:

Ու դու եկար հանկարծ, եկար անակնկալ,
Եկար որպես գարնան շունչը մաքուր,
Հպարտորեն եկար ու քնքշորեն եկար,
Եկար որպես մուսա ու որպես քույր:

Մոլորվել էր գիշերն աչքերիդ մեջ խորին,
Դողում էր քո կրծքին ծանր մի ծամ,
Դու նրբիրան էիր, որպես բարակ լորին,
Թեթև էիր, որպես սարի այծյամ:

Եկար ու թև տվիր դու իմ ներշնչանքին,
Սրտիս երազ տվիր, երգիս՝ ոգի,
Այնպես նման էիր դու իմ անրջանքին,
Այնպես նման չէիր դու ոչ ոքի:

Ու սիրեցի ես քեզ պատանորեն, անքուն,
Ինչպես սիրում է լոկ սիրտն այն անեղծ,
Որ մի ծաղկի համար այրվել գիտե կյանքում
Ու խեղդվել մի շիթ արցունքի մեջ:

Ու երբ հեռու եղա, ու երբ մենակ եղա,

Ու երբ թախծեց հոգիս լուռ ու տրտում,
Դու կարծես ծուխ դարձար հայրենի տան վրա
Ու կանչեցիր հեռվից, կանչեցիր տուն:

...Երկար է դեռ ճամփան... Ու մեր ճամփին հեռու
Դեռ կարող է լինել մրրիկ ու ձյուն,
Տո՛ւր ինձ ձեռքդ փոքրիկ, ապավինի՛ր սիրուս,
Դու իմ միակ, իմ սեր, իմ քնքշություն:

1954

* * *

Եվ ամեն անգամ քեզ հանդիպելիս
Ես թեթևակի բարև եմ տալիս,
Ու անցորդներին այնպես է թվում,
Թե մենք հազիվ ենք իրար բարևում:
Չգիտեն նրանք և ի՞նչ իմանան,
Որ կանգ է առնում սիրտն իմ մի վայրկյան,
Որ ես քայլերս եմ մի պահ շփոթում,
Մոռանում աշխարհն, օդ փնտրում օդում...
...Բայց անցորդներին այնպես է թվում,
Թե մենք հազիվ ենք իրար բարևում:

1951

ՍՊԱՍՈՒՄ

Չարթոնքի շունչ ու բուրմունք ու լրիս ու լրիս կա օդում,
Լեռան հետև ինչ-որ տեղ գարնան ամպն է որոտում:

Շուտով, շուտով երևի կիջնի անձրևը հստակ,
Ուրախության ու սիրո արտասուքի նման տաք:

Իսկ դու ձամփին ես, հիմա, իսկ դու ինձ մոտ ես գալիս,
Դո՛ւ՛ իմ վաղրուց երազած, անմատչելիս, ցանկալիս:

Գուցե բռնի քեզ ձամփին այս անձրևը մաքրաշիթ,
Իջնի քո նուրբ ուսերին ու վարսերի մեջ քո խիտ:

Եվ շո՛ւտ անցնի երևի, անցնի հոգնած ու խոնարհ,
Աղամանդներն իր թողած քո վարսերի մեջ խոնավ:

Ու երբ դու գաս, երբ դու գաս, կրծքիս վրա կանձրևի
Բույրը քո թաց վարսերի և աղամանդն անձրևի:

Սպասում ու չգիտեմ՝ գարնան ամպն է դա օդում,
Թե իմ սիրտն է կրծքիս տակ սպասումից որոտում:

1949

* * *

Ո՞ր գնամ հիմա և ո՞ր թափառեմ,
Երբ ամեն ճամփա ձեր տունն է բերում,
Ո՞ր հեռուներում կարոտս մարեմ,
Երբ քոնն են հավետ մոտիկն ու հեռուն:

Մենք բաժանվեցինք, ու թվում էր ինձ՝
Քեզ կմոռանամ անցնող օրերում,
Ի՞նչ իմանայի, որ քամու շնչից
Թոյլ կրակներն են միմիայն մարում:

Ի՞նչ իմանայի, որ հեռվից հեռու
Կանչելու է միշտ քո ձայնը թովիչ,
Ու սիրտս, սիրտս քո ձայնին հլու
Ձեր տան ճամփան է փնտրելու նորից:

Ո՞ր գնամ հիմա և ո՞ր թափառեմ.
Երբ ամեն ճամփա ձեր տունն է բերում,
Ո՞ր հեռուներում կարոտս մարեմ,
Երբ քոնն են հավետ մոտիկն ու հեռուն:

1944

* * *

Նորից ծնհալ է, ծնհալ...
Նորից ջրերն են կանչում,
Հողի փոքրիկ մի պատառ,
Տես, կանաչել է արդեն,
Ախ, կարոտները այս խենթ
Ինչո՞ւ են սիրտն իմ տանջում,
Ո՞ր են, ո՞ր են ինձ կանչում,
Ո՞ր են տանում, չգիտեմ:

Բախտը վաղուց է կյանքում
Մեր ճամփաները շեղել,
(Առաջին սերն աշխարհում
Միշտ անհաս է երևի),
Բայց քո հեռու կարոտից
Նորից սիրտս է հեղեղվել,
Ինչպես ջրերը գարնան
Ցուլանքի դեմ արևի:

Սիրտ ցավելու չափ ամուր
Կարոտել եմ քեզ նորից,
Բայց դու հեռո՞ւ ես, հեռո՞ւ,
Դու չես կարող արդեն գալ.
Եվ այնքան շատ են այսօր
Հոգուս մեջ սեր ու թախիծ,
Որ ես պատրաստ եմ այս խենթ
Ջրերի հետ հեկեկալ:

Նորից ձնհալ է, ձնհալ...
Նորից ջրերն են կանչում,
Հողի փոքրիկ մի պատառ,
Տես, կանաչել է արդեն,
Ախ, կարոտները այս խենթ
Ինչո՞ւ են սիրտն իմ տանջում,
Ո՞ր են, ո՞ր են ինձ կանչում,
Ուր են տանում, չգիտեմ:

1953

* * *

Արեգակն է համբուրում,
Բուրում է հողը կրկին,
Ու կանաչ դաղձն է բուրում
Առուների եզերքին:

Դու հիշեիր իմ մասին,
Գայիր խոնարհ ու հլու,
Ու գնայինք միասին՝
Հեռուներում շրջելու:

Թափառեինք... Ու հանկարծ
Մաղեր անձրևը հստակ,
Դու տատրակի պես հոգնած
Ծվարեիր թևիս տակ:

1955

* * *

Իմ պատանության կապույտ գիշերներ,
Լեցուն աստղերի ոսկե շուկով,
Հովանի եղաք դուք սիրուն իմ ջերմ
Հին փշատենու օրորուն շուքով:

Սերն իմ աղջիկ էր պարզ ու հասարակ,
Մազերը՝ մետաքս ու զգեստը՝ չիթ,
Գալիս էր թաքուն, հևում էր արագ:
Աստղոտ գիշերը աչքերում վճիտ:

Ու պարզ հրաշքով իմն էին դառնում
Աստղային ոսկու անձրևը վարար,
Ամռան գիշերվա կապույտը անհուն,
Հեքիաթը, երազն ու աշխարհն արար:

Իմն էին դառնում մոտիկն ու հեռուն,
Անհասը, անհայտն ու անկարելին,
Ես կարող էի աստղերը շողուն
Հավաքել, շաղել նրա վարսերին:

Ես կարող էի երկնքի մթին
Մետաքսը նրա ունն ի վար թափել
Եվ Կաթնձիռի արծաթե գոտին
Նրա բարալիկ իրանին կապել:

Ես կարող էի...

Այն նույն հազարաչք
Գիշերվա նման գիշեր է կրկին,
Բայց չի կատարվում էլ ոչ մի հրաշք,
Ու էլ չի հասնում ձեռքս երկնքին...

ՎԱՅԵԼՔ

Այնտեղ ծառերն ի վար ու շեկ ժայռերն ի վար
Կախվել էին ճաքած ու արնածոր նոներ,
Ու ես քեզ հետ, իմ թուխ, իմ արևոտ, իմ լավ,
Այգիների ոսկե ճամփան էի բռնել:

Ծոցվոր ծառերն էին տարուբերվում խոնարհ,
Ու ծփում էր մի տաք հասունության ալիք,
Աշնան բույր էր գալիս քո շուրթերից խոնավ,
Եվ արևի բոյր էր քո ուսերից գալիս:

Արեգակն իր կարմիր ընդվզումն էր վառում,
Եվ այգեստանն ասես նվաղում էր կրքից,
Քո լուսալիր կուրծքն էր ծանր տուրևառում՝
Հասունությամբ աշնան, հասունությամբ մրգի:

Շոայլ էին այնպես աշուն, արև ու հող,
Շոայլ էին այնպես, գինով էին ու բաց...
Ու ես օրհնում էի քո շուրթերը բուրող
Եվ քո վարսերը թուխ՝ մերկ ուսերիդ թափած:

Ու ես օրհնում էի հողն այս բազմադարյան,
Ու քեզ էի օրհնում, բռնկումը քո լուռ,
Ու ես օրհնում էի ընդվզումը արյան՝
Հրաձքն ամենասուրբ...

1961

* * *

Գիշերն ի լույս իմ բոլոր
Հին սերերը հիշեցի...
Մեկն առեղծված էր ասես,
Մեկը՝ դատարկ մի խեցի:
Մեկը անսիրտ էր ու չար,
Մեկը՝ սիրտ էր ու հոգի,
Մեկը երգի էր նման
Ու նման չէր ոչ ոքի...
Վերհիշեցի բոլորին
Կարոտանքով ու խանդով,
Մաքրվեցի ես նորից
Մի լուսեղեն տանջանքով:
Վերհիշեցի բոլորին
Ու բոլորին ներեցի,
Ու բոլորին, բոլորին
Այսօր նորից սիրեցի:

1962

* * *

Ասում են հին վերքն հաճախ է ցավում,
Երբ եղանակը ամպոտ է ու վատ...
Բայց գարունն այսօր այնպես արևում,
Փռում է լույսի հրձվանքն անարատ:

Ծիծառներն այնպես հարբած են թևում,
Այնպես է շիկնել ծաղկած դեղձենին,
Որ ես չգիտեմ, ինչո՞ւ է նվում
Սիրտն իմ, որի մեջ բեկոր կա մի հին:

...Ե՞րբ է գարունն այս դառնալու ամառ,
Որ խաղաղ զարկի սիրտն իմ խենթացած,
Վատ եղանակ է սա սրտի համար,
Ուր հին բեկոր կա սիրուց մնացած:

1961

* * *

Դու եկար այն գիշեր, դու եկար ինչպես սերն է գալիս,
Քնքշորեն ու հպարտ դու եկար ու եկար հևիհև,
Ձնհալի բույրերով, կանացի բույրերով մի ալիք
Փշրվեց իմ կրծքին ու ծփաց վարսերի հետ քո սև:

Ղողանջում ու կանչում էր երկինքն աստղերով, երազով,
Հով գիշերն էր շրշում, ու մետաքսն էր շրշում քո հագի,
Ես օրհնում, օրհներգում էի քեզ, քո հասակը նազող
Ու վարսերը, վարսերը քո սև՝ նման սև կոհակի...

Դու եկար այն գիշեր, դու եկար, ինչպես բախտն է գալիս,
Ու հետո հեռացար... Եվ անդարձ հեռացար բախտի պես,
Բայց կուպերդ փակած ու կրծքիս քնքշորեն հևալիս,
Չիմացար, որ իմ կուրծքը բացի ու հավետ քեզ այնտեղ դրի ես...

1961

* * *

Ծաղկի, ցողի ու լույսերի մեջ ծավի
Հեռու մի օր դու իմ դիմաց բարձրացար,
Աչքերիդ մեջ գիշերները հարավի
Ու հարավի արշալույսները պայծառ:

Կյանքը պարզ էր, պարզ էր աշխարհը անգամ,
Սերդ անմեղ ու անչար էր ու անցավ,
Դու հիմն էիր և իմն էիր դու այնքան,
Որ քեզ մի օր անփութորեն մոռացա:

Ես հիշում եմ հիմա օրերն այն ծավի,
Մութ ու լույսով լեցուն աչքերը քո հեզ...
Դու փոխվում ես կարոտանքի ու ցավի,
Եվ զգում եմ ես քեզ ցավո՞ղ սրտի պես:

1961

ԱՆԱՆՈՒՆ

Կա անանուն մի կարոտ, անհասնելի ինչ-որ տենչ,
Որ արթնանում է հանկարծ ու մորմոքում հոգուդ մեջ:

...Ահա գնացքը կանգնեց մի անծանոթ կայանում:
Եվ անծանոթ մի աղջիկ կարծես ձեռքով է անում:

Բարալիկ է ու խարտյաշ, աչքերը լի կապույտով,
Չթե՛ն զգեստն է ծփում երիցուկով ու պուտով:

Եվ թվում է հոգուդ մեջ կան շշուկներ ու բառեր,
Որ պիտի սիրտդ կյանքում միայն նրան վստահեր:

Թվում է նա՛ է, այդ նա՛, քո երազանքն իսկական,
Որին փնտրել աշխարհում ու չես գտել դու սակայն:

Բայց զիլ ղողանջ ու սուլոց... Մնում է նա կայանում,
Իսկ քեզ գնացքը նորից հեռո՛ւ-հեռո՛ւ է տանում:

Եվ անանուն մի կարոտ, անհասնելի ինչ-որ տենչ
Արթնանում է քո հոգում ու մորմոքում է անվերջ:

1961

* * *

Երազիս մեջ այսօր քեզ հետ էի նորից,
Նորից քեզ հետ էի, իմ հեռավոր...
Մենք բարձրանում էինք անձրևաթաց ձորից,
Թրջված, ցողաթաթախ ու բախտավոր:

Դու նույն աղջիկն էիր, այնպես նուրբ ու բարակ,
Անսեթևեթ այնպես, այնպես բարի,
Դու նույն աղջիկն էիր՝ մազերդ հյուս արած,
Ամենալավ աղջիկն այս աշխարհի:

Դեռ հողմը չէր անցել սիրո դաշտով պայծառ
Ու չէր տարել իր հետ ոչ մի ծաղիկ,
Դեռ անծանոթ էիր դու խաղերին քո չար,
Ես անծանոթ էի խանդի ցավին:

Շուրջը ծաղկած ծառերն անուշ բուրում էին,
Երկնքի մեջ կապույտ՝ և ոչ մի ամպ,
Ես քեզ շոյում էի, քեզ համբուրում էի
Ուխտավորի սիրով ու սրբությամբ:

Ուրախ լալիս էին առունները հորդած,
Արևի տակ պայծառ՝ հողն էր մխում...
...Ես արթնացա քնից՝ դրսում աշուն էր թաց,
Ու անձրևն էր լալիս մեղմ ու տխուր...

1962

ԱՄԱՌԱՅԻՆ ԱՄՊՐՈՊ

Ես մոռացել էի, որ ամպրոպ կա կյանքում...
Օրը գորշ էր այնպես,
Երկինքն այնպես անգույն:
Կանաչ ծառերն անգամ,
Որ գիտեին սիրո սուրբ սարսուռով դողալ,
Լուռ կարկամել էին:
Ծաղիկների երանգն ասես քամել էին,
Թռչունները բոլոր իջել էին վերից
Եվ չգիտես, թե ուր ապաստանել,
Քամին մտել քարայր,
Սիրտ չէր անում իր տաք գլուխը դուրս հանել:
Բարակել էր առուն
Եվ չէր զարկում իրեն էլ քարեքար,
Այդ ամենը, այո, հենց այդպես էր, որ կար,
Բայց ոչ հողի վրա, այլ իմ սրտում...

Ու չգիտեմ ինչպես
Ու չգիտեմ ինչից
Հանկարծակի փոխվեց օրն այդ տրտում:
Ու չգիտեմ ինչպես
Խավարի ու լույսի խաղ սկսվեց հանկարծ...
Մերթ մթնեցին ամպերն ու մերթ տվին ոսկուն,
Մերթ արևը շողաց ու թաքնվեց իսկույն,
Մերթ ծանրացավ մի ամպ ու չանձրևեց սակայն,
Ու մերթ ամպերն ամեն լույս ու հրդեհ հագան...
Եվ այդ թովիչ խաղը խավարի ու լույսի

Մերթ խոստումի պես էր,
Մերթ նման էր հոյսի...
Այդ ամենը, այո, հենց այդպես էլ եղավ
Եվ, սակայն, ոչ վերում,
Այդ ամենը եղավ
Իմ աչքերին նայող քո աչքերում:

Ու չգիտեմ ինչպես
Ամպի սրտում հանկարծ շքեղ շանթը շողաց,
Ու չգիտեմ ինչպես
Ամպի կոպին հանկարծ արտասուքը դողաց,
Ու չգիտեմ ինչպես սկիզբ առավ հանկարծ
Արտասուքով, լույսով, շանթերի շեկ խաղով
Ու կապույտով հարուստ մի խենթ տեղատարափ...
Խելագարվեց առուն, նետվեց քար ու քարափ,
Ծառը ծափեց, դողաց
Ու թրթռաց որպես կանաչ մի սիրտ,
Իսկ օդը, օդն ամռան
Ձնծաղիկով բուրեց...

1963

* * *

Դու խուժեցիր իմ բախտի մեջ
Իբրև մի տոթ հարավ,
Տվիր լույսի շնորհը մեծ,
Բայց և մի խոր ծարավ:

Մերթ կանչելով՝ խուսափեցիր,
Խուսափելով՝ եկար,
Մերթ հով եղար, սոսափեցիր,
Ու մերթ՝ մրրիկ մի չար:

Մերթ ապառաժ դարձար ու վեմ
Ու մերթ՝ փխրուն մի սիրտ,
Մերթ մթնեցիր, որ մոլորվեմ,
Մերթ տո՛րնն արիր լույսիդ:

Իմ կարոտի և սպասման
Գիշերներին ի վարձ
Դու ինձ թողիր անպատասխան
Ու անմեկին մի հարց:

Անզոր եղա ես քո անափ
Լույսն ու մութը զատել,
Անզոր եղա քեզ հասկանալ,
Անզոր եղա ատել:

Ու քայլում եմ հոգնած ու լուռ
Ոտնահետքով ես քո,
Դու, իմ մեղսորտ, դու իմ մաքրոր,
Դու իմ Մանոն Լեսկո:

1963

ԳՆԱՆՔ, ՍԻՐԵԼԻՍ...

Գնանք, սիրելիս,
Ինձ համար մեկ է, դու ընտրիր ուղին
Եվ ժամանակը դու ընտրիր նույնպես,
Ես սիրում եմ քեզ երկնքի նման և նման հողի,
Եվ ո՛ր էլ գնանք
Ու ե՛րբ էլ գնանք,
Երկինք կլինի և հող կլինի,
Կլինի նաև այն հրաշքը սուրբ,
Որ լուրթ երկնքի ու սևահողի
Դաշնությունից է արարվում անտես:

Դու իմ հողեղեն,
Եվ դու չգիտես ինչքան եմ սիրում
Փոքրիկ ձեռքերիդ թուլությունը խոնջ
Եվ պարագիծը քո գիրգ իրանի,
Քո նազանքների ծփանքը դողդոջ,
Ծփանք մի, որով հպարտ ավիքն է ծփում ծովի մեջ
Եվ լուսաբացին ծփում է օդում ծո՛ւխը ծիրանի:
Եվ դու չգիտես ինչքան եմ սիրում
Բույրը քո այդ մերկ, լուսեղեն ուսի
Եվ քո վարսերի բույրը խելահեղ
Ու մի քիչ թունոտ,
Ու մի քիչ թունոտ,
Բույր, որ նման է այնպես այն բույրին,
Որ խնկարկում է ծառը ընկույզի...

Դու իմ հողեղեն
Եվ իմ երկինքը դու միանգամայն,
Այնտեղ ճախրանքի իմ հրձվանքն անապի
Եվ ահն անկումի,
Այնտեղ ծիածանն իմ աննյութեղեն
Եվ շանթը՝ թաղված սև ամպի ծոցում,
Այնտեղ աստղերի հրախաղը թեժ
Եվ ասուպների անկումը շքեղ...

Բայց միևնույն է, գնանք, սիրելիս...

1968

ՍԵՐ

Թրթռուն կրծքով
Մի աղջիկ – Եվա,
Մի խանդոտ, տենդոտ
Այրամարդ – Ադամ,
Ու նրանց միջև
Մի մեծ առեղծված,
Ալեկոծություն
Մի հավերժական...

1980

* * *

Գիտեմ, սիրված ես եղել կյանքում,
Ու տենչանքով են միշտ քեզ նայել,
Այդ քո հայացքն է ասում թաքուն
Եվ քո նազանքը ինքնավայել:

Բայց հավատա ինձ, իմ մեղավոր,
Բայց հավատա ինձ, միակ իմ սեր,
Սերն իմ ուրիշ է՝ արևավոր
Կարոտներից եմ ես այն հյուսել:

Սերն իմ ուրիշ է, քեզ անհաղորդ
Բարձունքներից է իջել նա վար,
Նա և խոնարհ է, որպես աղոթք,
Եվ ահավոր է ու հողմավար:

Նա բարի լույսն է իմ բաղձալի
Բարի գիշերն է կեսգիշերին,
Իմ տառապանքն է հրաշալի
Ու ներշնչանքն է նա մի վերին:

Ամբողջ գիշերը կոպերիս տակ
Ոսկե երազ է ու ոսկե ամպ,
Լուսաբացի դեմ հեղեղ է տաք,
Լեցուն ահեղ մի ուրախությամբ:

Եվ աղերսում եմ քեզ, իմ անգին,
Քեզ, մեղավոր իմ, իմ սեթևեթ,
Չխառնես բոցն իմ տառապանքի
Քո փոքրիկ ու հեշտ սերերի հետ:

1963

ԵԹԵ ՀԱՐՑՆԵՍ...

Իմ հպարտ, իմ սեր,
Եթե հարցնես, թե ինչպե՞ս եղավ, որ քեզ սիրեցի,
Ոչինչ չեմ ասի,
Քանզի չգիտեմ,
Թե ձյունն ինչպես է փոխվում ձնհալի,
Թե ցայգածաղիկն ինչպես է բացվում ծերպերին լեռան,
Եվ ծովի խորքում ինչպես է ծնվում հակինթը շողուն...
Եվ սակայն կասեմ.

Իմ ձնհալն ես դու,
Ցայգածաղիկը
Եվ իմ հակինթը՝ ծովերից հանված:

Իմ խոնարհ, իմ սեր,
Եթե հարցնես, թե ես ինչպե՞ս եմ հասակդ սիրում,
Ոչինչ չեմ ասի,
Միայն կպատմեմ բաղեղի մասին,
Որ մերկ լորենու հասակն է զուգում,
Կպատմեմ նաև ծովի խենթացած ալիքի մասին,
Որ փշրվում է ավազի վրա...

Եվ հետո կասեմ
Իմ լորին ես դու,
Իմ ավազն ես տաք:

Իմ քնքուշ, իմ սեր,
Եթե հարցնես, թե ես ինչպե՞ս եմ սիրում քո հոգին,
Ոչինչ չեմ ասի,
Կպատմեմ միայն ես Փարվանայի այն լեգենդը հին,
Կպատմեմ նաև,
Թե վայրի գազանն ինչպես է գերվում
Եղջերափողի դյութական ձայնից...
Ու հետո կասեմ.

Իմ կրակն ես դու,
Եղջերափողի ձայնն ես դյութական:

* * *

Ես հաշտ էի ապրում իմ բախտի հետ
Ու տարբերում հստակ չարն ու բարին,
Բայց դու ինչո՞ւ եկար, իմ սեթևեթ,
Ու կանգնեցիր սիրուս ճանապարհին:

Ինչո՞ւ եկար, որ ես ոչինչ, ոչինչ
Չհասկանամ նորից պատանու պես,
Ոչ հայացքները՝ քո խրթին ու ջինջ,
Ոչ հմայքները քո՝ և չար, և հեզ:

Ինչո՞ւ եկար, որ ես երազանքիս
Շքեղ գաղտնարանը նորից բանամ,
Ծիածաններ, գույներ հանեմ անգին,
Քեզ զարդարեմ ու լուռ սքանչանամ:

Որ քեզ հանեմ լուսե մի բարձունքի
Ու կերպարանքը քո լույսով ցողեմ.
Մաքրության մեջ վճիտ իմ արցունքի
Ամբողջ քո հասակը արտացոլեմ:

Եվ որ հետո, հետո բերեմ քեզ վար
Իբրև իմ իսկ ձեռքով կերտված բագին...
Ես հաշտ էի ապրում, ինչո՞ւ եկար
Ինձ մատնելու այս հին տառապանքին:

1963

ՏԱՔ ՁՅՈՒՆԸ

Այսօր իջնում է առաջին ձյունը...

Եվ տա՛ք է ձյունն այդ, ա՛խ, այնքան է տաք,
Որ ինձ թվում է, թե ձյուն է բնավ,
Որ դա ամպերի կարոտն է մաքուր,
Եվ որ ամպերը թեթևանում են իրենց կարոտից:

Ինչ-որ անանուն ծաղկի բուրմունք եմ առնում ես օդից...
Բայց ոչ, երևի դա բուրմունքը էլ անանուն ծաղկի,
Դա՛ աղջիկների այտերի վրա
Շիկնանքից հալչող ձյան փաթիլներն են երևի բուրում:

Իսկ դու, սիրելիս,
Դու, որ ինձ համար
Ամենքից լավ ես շիկնում աշխարհում,
Հետս չես, չկաս ու չես էլ գալու:

Մայթերին կախված մշուշը դալուկ
Ձյունի օրորվող փաթիլների հետ
Իմ բաց ձակատն է քնքշորեն շոյում...
Բայց ինձ, սիրելիս, քո տաք ձեռքն էր պետք:

Նայիր, այս մայթին դեռես չկա ոչ մի ոտնահետք,
Իսկ ես կուզեի,
Որ իմ այս մոլոր հետքերի կողքին
Ոտնահետքերդ տավեին մանրիկ...

Իսկ ես կուզեի,
Որ այս ձյունը տաք
Օրհնության նման ու բարության պես
Իջներ երկուսիս ուսերի վրա և հասակն ի վար,
Քանզի իր մաքուր ու տաք քնքշանքով
Այս ձյունը շատ է մեր սիրուն վայել:

Կուզեի հիմա քո աչքերի մեջ ես անվերջ նայել
Ու քեզ շնջալ տողերն այն երգի,
Որ դեռ չեմ գրել,
Բայց որոնք արդեն
Վերովարում են երակներիս մեջ
Եվ ինձ շնջում.
– Սերը... նման է նա ծմարտության,
Կես ծմարտությունն ինչի է նման,
Ինչի է նման կես սերն աշխարհում...

Այսօր է միայն, որ քեզ չեմ տեսել,
Եվ կապույտ բոցով կարոտս է այրվում:
Այսօր է միայն,
Որ քո ձեռքի հետ
Չեմ կիսել քնքշանքն իմ այրվող ափի
Ու մոլորվել եմ, չգիտեմ արդեն,
Թե որտեղով է անց կենում, իրավ,
Սահմանագիծը բախտավորության ու տառապանքի:

Ու եթե հանկարծ գայիր դու, անգին,
Եթե պատահմամբ ելնեիր իմ դեմ,
Ելնեիր ձյունո՞տ,
Ցողո՞տ,
Ծիծաղկո՞տ,
Հավատա, հոգիս,

Որ եթե անգամ ես լուռ մնայի,
Չշնջայի տողերն այն երգի, որ դեռ չեմ գրել,
Դու կլսեիր շշուկը նրանց.
– Սերը... նման է նա ճշմարտության,
Կես ճշմարտություն չի լինում կյանքում,
Չի լինում կես սեր...
Ու եթե սերը կհսվում է հաճախ,
Ապա կհսվում է
Լոկ երջանկության ու տառապանքի,
Իսկ տառապանքն այդ (քաղցր տառապանք),
Հավատա, որ նույն երջանկությունն է:

Այսօր իջնում է առաջին ձյունը...

1963

ԿԵՍՆ Է ԳԻՇԵՐՎԱ...

Կեսն է գիշերվա...
Կուզեի այնպես ես քո տունը գալ,
Տեսնել շփոթմունքն ու շիկնանքը քո,
Հոգնած ամպի պես
Իմ կարոտները կրծքիդ հեկեկալ
Եվ սրտիս նման դողացող ձեռքով
Մատներդ շոյել,
Վարսերդ շոյել,
Բազուկներիս մեջ
Քո փխրուն ու տաք նազանքն օրորել...
Իմ քնքշանքների թավիշն անարատ,
Իմ թախիծների կապույտն ալիքվող,
Իմ արցունքների կայծկտումը տաք
Ու տառապանքիս բոսորը փոռել հայացքիդ ի տես,
Ասել, որ դու ես տերն այդ բոլորի,
Սակայն չգիտես:

1963

* * *

Ես չգիտեմ, ինչ ես շահում
Քո քմահաճ խաղից,
Բայց ես՝ մի ողջ պատանություն
Ու մի մաքրոր թախիծ:

Գուցե հրձվում ես դու թաքուն,
Որ հանգիստս տարար,
Իսկ ես աչքերս եմ լուռ փակում,
Ու իմն է լույսն արար:

Գուցե շոյում է քեզ սրտիս
Շփոթմունքը վրդով,
Իսկ ես հարուստ եմ, սիրելիս,
Իմ շփոթված սրտով:

Գուցե դու չար սատանությամբ
Ծիծաղում ես, խաբում,
Իսկ ես գտած պատանության
Երկինքներն եմ չափում:

Բայց, սիրելիս, ինչ էլ լինի,
Եթե խաբես անգամ,
Շնորհակալ եմ քեզանից
Հարյուր, հազար անգամ:

1963

ԻՄ ՔՍԱՆ ՏԱՐԻՆ ԵՎ ՏԱՄՆՈՒԹԸ ՔՈ...

Մի շաղոտ, շողոտ, արևոտ կածան
Քարափից կախվել, գլորվում է վար:
Հենց նոր է գարնան ամպրոպը անցել,
Եվ Հրազդանը լրիվ խենթացել,
Իր խենթությունն է խփում քարեքար:

Մի պատանի է իջնում ձորն ի վար,
Ու մի աղջիկ է բարձրանում ձորից...

Ամպրոպն աղջկան բռնել է ձորում,
Անձրևի ցողն է մազերին թափել
Եվ բարակ շորը թրջել է, ծեփել
Բարակ իրանին...
Իսկ ձորում ծաղկած ձերմակ ծիրանին
Ծաղկաթերթերի շնորհն է շաղել
Նուրբ հասակն ի վար:

Եվ շաղոտ, շողոտ կածանի վրա
Կանգնում են նրանք ու նայում իրար:

Պատանին ես եմ և աղջիկը՝ դու:

Բայց ո՛չ, սիրելիս, այդպես չի եղել,
Կյանքում շատ ուշ եմ հանդիպել ես քեզ,
Հանդիպել եմ քեզ,

Երբ իմ գարունը անցել է վաղուց,
Եվ ամառն անգամ կիսվել է արդեն:
Այո, սիրելիս, այդպես չի եղել:
Եվ այդ ամենը ես հնարեցի,
Որ իմ հրաշքով իրար հանդիպեն
Իմ քսան տարին և տասնութը քո:

Շատ էի ուզում, որ հանդիպեին,
Շատ էի ուզում,
Որ քո կիսափակ կոպերի տակից
Աղջիկ օրերիդ խոնարհությունը վախժվորած նայի,
Եվ ափերիս մեջ մատներդ դողան
Առաջին սիրո խոստովանությամբ:

Շատ էի ուզում քեզ հետ, սիրելիս,
Անցնել այս բոլոր ճանապարհներով,
Որ անց եմ կացել կյանքում առանց քեզ...
Շատ էի ուզում, որ անցյալ բոլոր օրերիս վրա
Քո սիրո քնքշանքն ու լույսը ձգես...
Շատ էի ուզում, որ հանդիպեին,
Եվ հանդիպեցին:

Ամպրոպն ապրիլի քեզ բռնել ձորում,
Անձրևի ցողն էր մազերիդ թափել
Եվ բարակ շորդ թրջել էր, ծեփել
Բարակ իրանիդ,
Բարակ, սիրելիս,
Եվ այնքան բարակ,
Որ թվում էր ինձ, թե նազանքն ինքն է
Քո տեսքով նազում...
Առուներն էին քարափից վազում
Եվ մոլոր կորչում ժայռ ու քարի մեջ:

Ես էլ իմ ճամփան կմոլորեի,
Բայց ոչ մի ուրիշ ճանապարհ չկար,
Բացի կածանից...
Աշխարհը ասես կախվել էր խաղաղ մի ծիածանից
Եվ օրորվում էր ու մեզ օրորում:

Կանգնել էիր դու քո բարակ շորում
Եվ քո վարսերից,
Քո թարթիչներից
Կաթ-կաթ արտասուք ու լույս էր ծորում:

Կանգնել էիր դու,
Կանգնել էի ես:

Իմ մարմնի վրա՝ դեռ ոչ մի սպի
Եվ ոչ մի սպի՝ իմ սրտի վրա...
...Ես դուրս եմ նայում,
Կեսն է գիշերվա,
Մի ասուպ, իրրև հրեղեն սպի, երկինքն է ձևում...

1963

ՄՐՏԻՍ ԶԱՐԿԵՐԸ ԵՎ ԺՊԻՏԸ ՔՈ...

Գլուխդ կրծքիս՝ շնչում ես դու մեղմ,
Ու ես չգիտեմ,
Ննջում ես արդեն,
Թե խոնջ քնքշությամբ կոպերդ փակած,
Սրտիս զարկերն ես լսում դու լռին:

Իսկ ի՞նչ են ասում զարկերն իմ սրտի...

Ասում են.

– Հոգիս, ես սիրում եմ քեզ, –
Ասում և սակայն զգում են նաև,
Որ այդ խոսքերով չեն ասում ոչինչ...
Լռում են մի պահ, նոր խոսք որոնում
Եվ չգտնելով, կրկնում են նորից
– Ես սիրում եմ քեզ...

Ու դա երևի

Եվ ամենահին,

Եվ ամենանոր,

Եվ ամենալավ երգն է աշխարհի:

Իսկ ի՞նչ է ասում ժպիտը քո լուռ...

Ասում է.

– Սակայն այդ խոսքերը դու

Շատ շատերին ես ասել, սիրելիս...

Զարկերն իմ սրտի ասում են.

– Այո:

Ես շատերին եմ այդ խոսքերն ասել,
Բայց այդ խոսքերով
Ես քո հասցեն եմ փնտրել երևի
Ու գտել եմ, տես:

Բայց թարթիչներիդ կապույտ շուքի տակ
Ծվարած ժպիտն անմեկին է շատ,
Ու չեմ հասկանում՝
Հարկերը սրտիդ կրկնում են արդյոք
Այն ամենահին,
Այն ամենանոր,
Այն ամենալավ երգը աշխարհի:

– Խենթ, թե չեն կրկնում, ինչո՞ւ են հապա
Մազերս այսպես քո կրծքին թափված:
Մազերս,
Նայիր,
Երեկ հինա եմ մազերիս դրել,
Որ երբ արձակեմ քո կրծքի վրա,
Նրանք հին ոսկու փայլակումը տան
Ու բուրեն կրծքիդ հին գինու բույրով:
Եթե չեն կրկնում,
Ինչո՞ւ եմ հապա ես գեղեցկանում,
Երբ մոտդ եմ գալիս...

– Թե իրավ է դա,
Որտեղի՞ց հապա այն չարությունը,
Որ խառնում ես դու քնքշությանը քո..
Ինչո՞ւ է հաճախ
Մեր հանդիպումի հույսն՝ անհուսալի,
Մեր մոտիկությունն՝ անմերձենալի,
Պարզությունը քո՝ առեղծվածային,

Քնքշանքը՝ դաժան,
Նազանքը՝ խոցող,
Եվ կրակը քո ինչու է հաճախ
Ողջակիզումի խարույկի նման:

– Ես կին եմ, իմ խենթ...
Ու թեկուզ հիմա
Մազերիս ոսկին թափել եմ կրծքիդ,
Եվ կիսաբաց է իմ կուրծքը քո դեմ,
Չխաբվես սակայն...
Ես դեռ շատ անգամ քեզ կշնորհեմ
Մեր հանդիպումի հույսն անհուսալի,
Մեր մոտիկությունն անմերձենալի,
Քնքշանքն իմ դաժան,
Նազանքն իմ խոցող...
Գարուն կլինի, կանցնեմ փողոցով
Գերեվարելով հայացք ու հիացք
Եվ շնորհելով քեզ շանթը խանդի...
Գարուն կլինի,
Ես հեռվից հեռու կծայնեմ քեզ լուռ
Եվ կխուսափեմ...
Գարուն կլինի,
Գեղեցկանալով ես մոտդ կգամ
Եվ կհեռանամ
Առավել փխրուն ու գեղեցկացած:

Ես կին եմ, իմ խենթ,
Եվ ամենահին,
Եվ ամենանոր,
Եվ ամենալավ երգը աշխարհի
Այդ ես եմ հյուսել
Եվ այդպես հյուսել:

– Գիտեմ, սիրելիս,
Գիտեմ և քեզ եմ ես փառաբանում:
Փառաբանում եմ
Մազերիդ ոսկին՝ իմ կրծքին թափված,
Փառաբանում եմ կուրծքդ կիսաբաց
Եվ թարթիչներիդ կապույտ շուքի տակ
Ծվարած ժպիտն այդ անմեկնելի,
Որ մեղավոր է ու թովիչ սակայն...

Փառաբանում եմ
Մեր հանդիպումի հույսն անհուսալի,
Մեր մոտիկությունն անմերձենալի,
Գեղեցկացումը քո գարնանային,
Քո հեռացումը,
Քո վերադարձը
Եվ անգամ ահեղ
Խանդի սև շանթն եմ ես փառաբանում...

...Ողջ գիշեր այսպես զրույց են անում
Սրտիս զարկերը և ժպիտը քո:

1963

ԿԱՐՄԻՐՆ ՈՒ ՍԵՎԸ

Այսօր առավոտ զանգ տվեց նա ինձ.
– Բարի լույս, – ասաց:
Եվ իմ սենյակում, ուր լույս էր արդեն,
Լույսի տոնն եղավ,
Ու եղավ լույսի արարողություն:

Հետո նա ասաց.
– Ի՞նչ էիր անում:
– Ի՞նչ էի անում,
«Երգ երգոցն» էի կարդում, սիրելիս:
– Ա՛խ, «Երգ երգոցը»,
Այդտեղ է, կարծեմ, որ ասում է, թե՛
Ես սև եմ, սակայն գեղեցիկ եմ ես,
Քանզի նայեցավ արեգակն ընդ իս...
– Այո՛, սիրելիս,
Այդտեղ է ասված,
Ասված է նաև,
Երկվորյակ, ձերմակ ուլերի մասին,
Որ արածում են շուշանների մեջ...
Ասված է նաև,
Որ Թերսայի պես գեղեցիկ ես դու
Եվ դրոշակիր զորքերի նման ահարկրու նաև...

Այսքանը:
Այսօր զանգ տվեց նա ինձ.
– Բարի լույս, – ասաց:
Եվ իմ սենյակում, ուր լույս էր արդեն,

Լույսի տոն եղավ,
Եվ եղավ լույսի արարողություն:

Բայց ինչպե՞ս եղավ...
Ինքս էլ չիմացա, թե ինչպես եղավ,
Չիմացա նաև, թե այս գործի մեջ ո՞վ էր մեղսակից,
Հարթնող գարունը՝ իր հրապույրի թափանցիկ քողով,
Թե՞ գարնանային կապույտ երեկոն
Եվ այնքան կապույտ,
Որ Սևանում էր ասես թաթախվել
Եվ հետո իջել, փռվել քաղաքին...
Կամ կակաչների հովիտն այն գուցե,
Հովիտն այն, որին զրնգուն մի օր մենք հյուր գնացինք,
Հովիտն այն հեռու, ուր ամեն կակաչ
Կարմիր ու սևի թաքուն խորհուրդն էր թերթերում պահել,
Ես այնտեղ մի մեծ, մի բոնցքաչափ, օ, ո՛չ, սրտաչափ
Կակաչ պոկեցի,
Պարզեցի նրան ու հարց տվի մեղմ.
– Քեզ դո՞ւր է գալիս...
– Իհարկե, օ, շատ, սևը հատկապես,
Ինչ վա՛ն է, նայիր...

Այո՛, իհարկե,
Մեզ կակաչներն այդ մեղսակից եղան
Իրենց կարմիրով և իրենց սևով:

Հետո նա ասաց.
– Գիշերը կգամ:
Ու ցերեկն ամբողջ խորհում էի ես,
Գիշեր կլինի, աստղալույսի հետ կգա նա խոնարհ,
Ես նրա ձեռքը ափիս մեջ կառնեմ
Ու ինձ կթվա, թե կանգնած ենք մենք

Ամենաբարձր լեռան կատարին,
Ուր ջրվեժների շունչ կա պաղպաջուն,
Ուր լույս կա ու հողմ, ու խինդ կա վայրի...

Գիշեր կլինի, կգա նա խոնարհ,
Ես լուռ կշոյեմ սև քնքշությունը նրա վարսերի
Եվ ինձ կթվա, թե մտնում ենք մենք անտառ մի անհուն,
Ուր խոնավ բույրեր,
Շշուկներ կան խենթ
Ու խորհուրդներ կան անիմանալի:

Գիշեր կլինի... Ու ես՝ ձեռքիս մեջ
Սև քնքշությունը նրա վարսերի,
Հպարտ գլուխը կթեքեմ վերև՝
Դեպի երկինքը,
Դեպի աստղերը,
Որ նրա խոնավ ու տաք շուրթերի
Համը համբուրեմ...

...Եվ սակայն հանկարծ հեռախոսի զանգ.
Այդ նրա ձայնն էր.
– Չեմ գա, սիրելիս...

Մութ եղավ ու լույս:
Հետո նոր երգս կարդացի նրան:
«Տառապանք» բառը
Զրնգուն հանգ էր դարձել իմ երգում:
Լսեց ուշադիր
Ու ներողամիտ ժպիտով ասաց.
– Ողջունում եմ ես հաջողությունդ:

Հեռանում էր նա:
Բանտված մրրիկ կար նրա քայլվածքում,

Ու մի կակաչ էր ծփում աչքիս դեմ:
Հեռանում էր նա:
Եվ անտես մի թել ձգվում ինձանից
Ու խձձվում էր նրա քայլվածքում:
Մոլորվել էի՝
Կտրե՞լ այդ թելը...
Բայց թել չէր դա, ո՛չ,
Չարկերանկա էր դա...

Մութ եղավ ու լույս: Մոռանալ էր պետք:
Իսկ մոռանալու համար, գիտե՜ի,
Հեռանալ էր պետք:
Հպարտ և ուրախ մոտեցա նրան.
– Վաղը թռչում եմ, – ասի, – սիրելիս:
– Եվ ո՞ր...
– Շատ հեռու...
– Չեն թռչի, – ասաց:
– Ահա և տոմսը:
– Չեն թռչի, – ասաց:

Կակաչներ էին աչքիս դեմ ծփում,
Եվ ալիքվում էր անթափանց մի քող:

Այսօր առավոտ զանգ տվեց նա ինձ.
– Բարի լույս, – ասաց:

Եվ իմ սենյակում, ուր լույս էր արդեն,
Լույսի տոնն եղավ,
Ու եղավ լույսի արարողություն:

– Ի՞նչ էիր անում:
– «Երգ երգոցն» էի կարդում, սիրելիս...

– Ա՛խ, «Երգ երգոցը»...
Այդտեղ է կարծեմ, որ ասվում է, թե՛
ես սև եմ, սակայն գեղեցիկ եմ ես,
Քանզի նայեցավ արեգակն ընդ իս...

– Այ՛ր, սիրելիս, այդտեղ է ասված,
Ասված է նաև,
Որ Թերսայի պես գեղեցիկ ես դու
Եվ դրոշակիր զորքերի նման ահարկո՛ւ նաև...
1963

* * *

Այնպես մի անի, որ ես ուրանամ իմ սրբությունը,
Այնպես մի անի, որ սրտիս համար արդեն մեկ դառնա,
Թե ում ոտքի տակ դնի իր սերն ու իր քնքշությունը,
Եվ ում համբուրեն իմ շրթունքները՝ ծարավից արնած:

Իմ հավատն էիր...
Բայց այսօր ցավի ամպերը խավար
Կարկուտ են տեղում ու թափում սիրո ծաղիկ ու թերթեր...
Դու գիտե՞ս արդյոք, թե ինչ ասել է կորցնել հավատ,
Եվ ինչ ասել է փշրել այն կուռքը, որ ինքդ ես կերտել:

1963

ՄԵՆԱԽՈՍՈՒԹՅՈՒՆ

Ցավն իմ տաք է դեռ, ու գիտեմ, գիտեմ,
Որ կսկիծն այրող հետո պիտի գա...

Ես դուրս եմ գալիս,
Աշխարհի բոլոր ձանապարհները փոված են իմ դեմ,
Լոկ քեզ մոտ գալու ձանապարհ չկա:

Ցավն իմ տաք է դեռ,
Ու ես ափիս մեջ
Կարողանում եմ դեռ սեղմած պահել
Իմ ձեռքված սրտի երկու կեսերը:

...Ոչ, դու չիմացար, թե իմ բախտի մեջ
Ինչ էր քո սերը,
Չիմացար, հոգիս, որ քո հայտնության հրաշքից հետո
Ես հաճախ էի բռնում ինքս ինձ
Քարը,
Կանաչը,
Հողը շոյելիս,
Փողոցով անցնող զույգերի առաջ
Իմ գորովանքի քողը փռելիս,
Աստղի դեմ,
Ծաղկի,
Տիեզերքի դեմ
Հիացմունքի մեջ անզոր լռելիս:

...Գիշերներն ի լույս,

Դու և երազս քույրերի նման,
Ձեր գլուխները նույն բարձին դրած,
Նույն բարձին փռած վարսերը ձեր բոց,
Զրուցում էիք կիսաքնի մեջ
Ու երջանկության առասպելներից պատմում մեկմեկու...

Եվ լուսաբացին,
Երբ զարթնում էի ու ելնում փողոց,
Ձեր զրույցն էր դեռ իմ ականջներում,
Ու ժպտում էի ես մոայլ մարդկանց,
Ու ժպտում էի մառախուղի մեջ կորած արևին:

Իսկ երբ այս հորդուն, վարար մայթերով
Ես քայլում էի քեզ հետ, սիրելիս,
Ինձ թվում էր, թե քայլում են ինձ հետ
Հպարտությունս և ինքնությունս,
Թե ինչ-որ դաժան հողմերից խլված
Միակ քնքշանքն է իմ կողքին քայլում:

Եվ հիմա չկաս.
Քայլում եմ մենակ,
Ինքս իմ ձեռքով սիրտս եմ փայփայում,
Շոյում եմ նրան որպես որբ մանկան
Ու որպես հավքի, որ վիրավոր է:

Քայլում եմ մենակ:
Իրիկնամուտը արևավոր է,
Լեռներն են վառվում,
Ասես լեռներում տոն է, կիրակի,
Հեթանոսական ինչ-որ մի հանդես:

Ի՞նչ անեմ, ասա,
Զբոնեմ արդյոք այս դժվար ճամփան

Ու գնամ, գնամ, գնամ լեռն ի վեր
Եվ սիրտս պահեմ լեռնալանջերի
Մրրիկների դեմ...

Սակայն մի անգամ
(Խենթ պատանության օրերին էր դա)
Փորձել եմ, գիտեմ,
Գիտեմ, բաժանման մրրիկների տակ
Լոկ թույլ ու առկայծ կրակն է մարում,
Եվ սաստկանում է զորեղն ավելի:
Բայց ծամփաները շատ են աշխարհում,
Կայարաններն են աղմկում անվերջ,
Եվ քաղաքներն են շառաչում ահեղ
Աղմուկով դարի,
Չգնամ արդյոք,
Որ այդ մետաղե աղմուկների մեջ
Սրտիս հետ խոսող
Այս այրող, այս տաք շշուկը մարի:

Արցունքը...
Հիմա այնպես լավ գիտեմ,
Որ նրա փոքրիկ ու ջինջ կաթիլը
Ծովի համն ունի
Եվ խորհուրդն ունի փոթորկված ծովի:
Սակայն, սիրելիս,
Ես քեզ երբևէ էլ չեմ վրդովի:
Ինքս իմ ձեռքով սիրտս կփայեմ,
Կշոյեմ նրան որպես որբ մանկան
Եվ որպես հավքի, որ վիրավոր է:

1964

* * *

Այո, սիրելիս, իմ և քո սերը նման եղավ շատ
Մի վտանգավոր
Եվ սակայն թովիչ մի ճամփորդության:

Բարեբաստիկ էր ծովային քամին,
Առագաստները և սրտերը մեր շատ էին լեցուն.
Ու մենք նավեցինք...

Մեր ճանապարհին
Մենք հայտնություններ արինք հիասքանչ՝
Գտանք անանուն,
Անհայտ կղզիներ,
Նրանց քնքշագին անուններ տվինք
Եվ բնակեցրինք
Մեր երազներով,
Թախծություններով
Ու մեր հույսերով:

Եվ հայտնություններ արինք մենք ուրիշ,
Տեսանք, որ ծովը
Հույսի այն փոքրիկ, աննշմար կղզուց
Մինչև երազի կապուտակ կղզին,
Շատ է մթամած,
Եվ մրրիկն այնտեղ շատ է մոլեգին:

Եվ հայտնություններ արինք մենք ուրիշ՝
Տեսանք, որ չքնաղ երազի կղզու
Ափի ժայռերը շատ են ուղղաձիգ,
Եվ ափ ելնելու չկա ոչ մի ձար,
Եվ արինք նաև հայտնություն մի այլ՝
Որ այդ ծովն ունի միայն մի խորհուրդ՝
Ընթանալ անվերջ, չհասնել սակայն...

* * *

Գիշերը անցավ ու ծանր անցավ:
Լուսայգն է ահա բացվում համրորեն՝
Գիշերվա գործած ծանր մեղքերից շառագունելով:

Հեռացար: Հետո լռեց ամեն ինչ,
Եվ լռությունն այդ գիշերվա մեջ խոր
Նման էր այնպես
Ծանր փորձության
Ու արհավիրքի:

Սիրտս զգում էր,
Կանխազգում էր նա այդ արհավիրքը,
Ինչպես ծովային ծեր գայլն է զգում
Հեռավոր շունչը ահեղ փոթորկի:
Նշմարում էի ես նշանները այդ արհավիրքի՝
Ես տեսնում էի
Քո հայացքները հեռվում թափառող,
Որ նման էին այն երամներին,
Որոնք չվում են փոթորկից առաջ:
Ես տեսնում էի շիկնանքները քո՝
Այդպես արևն է փոթորկից առաջ
Ծիկնում մի այրող
Ու վտանգավոր մի գեղեցկությամբ:

Եվ փոթորիկը, հիրավի, եղավ:
Լուսայգն է հիմա բացվում համրորեն:
Ու ես հաշվում եմ իմ կորուստները:
Իսկ բեռն իմ, հոգիս,
Ախ, շատ էր հարուստ ու շատ էր ծանր:
Ծանր՝ մի գանձով, որ անուն չունի,
Այլ ունի լոկ գույն՝
Հրե՛, հրավան, հրեղեն մի գույն:

Արևն է ծագում:
Լուսայգն է ահա բացվում համրորեն՝
Գիշերվա գործած ծանր մեղքերից շառագունելով:

1964

* * *

Վերջերս հաճախ երազներիս մեջ
Ես կարապներ եմ տեսնում, սիրելիս,
Ճերմակ կարապներ՝
Սև լճերի մեջ,
Ու սև կարապներ՝
Լճերում ձերմակ...

Դա լինում է միշտ, երբ քնից առաջ
Ես քո մասին եմ խորհում, սիրելիս:

1964

* * *

Քոնն է մեկընդմիշտ,
Քոնն է այն ամենն, ինչ ունեմ կյանքում
Եվ ինչ երբևէ ունենամ պիտի:
Բայց ամենից շատ ու ամբողջովին
Քոնն է սրտիս մեջ աննկատ բացվող,
Այն տխուրաչյա կապույտ ծաղիկը,
Այն կապույտ բոցը,
Որի անունը կարոտ է...

Այո,

Քոնն է մեկընդմիշտ
Այդ կապույտ բոցը,
Այդ տխուրաչյա կապույտ ծաղիկը՝
Ամենաթանկը, ինչ ունեմ կյանքում:

1965

ՏԱՐԵԼԻՑ

Այնտեղ ծառերն իբրև կանաչ մարգարեններ
Իրենց սաղարթների խորհրդավոր խոսքով
Ինձ հուշեցին կամաց,
Որ կսիրես դու ինձ...
Օրը մեծ էր,
Ասես լույսի տեսությունից
Վար էր իջել շքեղ մի կիրակի
Ու քայլում էր երկրի հովիտներով:

Այգեստանի ձեռքից հագիվ պոկված մի հով
Հիացումիս նման փարվում էր քեզ
Ու քեզ ոտից գլուխ երկրպագում:

Տարելիցն է հիմա այդ նույն օրվա,
Ու ես մենակ նստած իմ աչքերը փակում,
Ձեզ եմ ձայնում, ծառեր,
Մարգարեններ կանաչ,
Ասեք, ո՞ր է հապա խոստումը ձեր,
Եթե իրավ էիք,
Հապա ինչո՞ւ եմ ես
Հող ու ջրին այսքան ընտելացել:
Վկաներ իմ սիրո, մարգարեններ կանաչ,
Այդ նա պատճառ եղավ, որ այս տարի
Ես այսպես լավ, այսպես լավ հասկանամ,
Թե ինչ խաղ է խաղում ծովի ալիքն այն խենթ,
Որ զարկում է ժայռին ու հեռանում,
Որ հակինթ է հանում ծովի տակից հանկարծ
Ու իսկույն ետ տանում...

Եվ հասկացա նաև
Թե ինչու է բարձունքն իր ոտքի տակ
Միշտ խորխորատ բանում...
Եվ հասկացա, այնպես լավ հասկացա
Նաև լեզենդն այն հին,
Ուր Լիլիթն է սուրում կրակի պես
Ու իմ նախահորը իր հետքերով տանում...

Օրը մեծ է...
Կարծես լույսի տերությունից
Նորից ցած է իջել մի կիրակի
Ու քայլում է երկրի հովիտներով...
Նորից բարակ մի հով
Սաղարթներն է հուզում այս ծառերի:
Ու ծառերը, որպես կանաչ մարգարեներ,
Ինձ հուշում են թաքուն,
Որ կսիրես դու ինձ...

– Ուրեմն, քեզ ողջոյն, իմ նոր թախիծ,
Անքնություն, ողջոյն,
Ողջոյն ծարավ,
Ու ողջոյն ձեզ, ողջոյն,
Նոր սպիներ..

1964

ՏԱՐ ԻՆՁ, ՔԱՄԻ

Ոչ, դու չէիր դարձյալ, ուրիշն էր ինձ զանգում:

...Ես լուռ նստել էի, ու տխրությունն անքուն
Իմ կոպերն էր փակել, կոպերն իմ թաց,
Իսկ կոպերիս ներքո դու, միայն դու էիր
Քո նազանքով փխրուն ու հմայքով հորդած:
Եվ դեմ դիմաց ահա կանգնել ենք դու և ես,
Դու՝ հմայքով քո ողջ,
Ես՝ իմ հպարտ սիրով:

Դրսում ձյուն է գալիս
Նշխարի պես խոշոր
Ու արևի պես տաք փաթիլներով:
Դրսում ձյուն է գալիս, բարի ու մի տաք ձյուն
Եվ անսահման ներող, ներող, ներող...

Ես ինչ անեմ հիմա,
Արդյոք փողո՞ց նետվեմ՝
Վայելելու մենակ օրհնությունն այս ձյունի...
Բայց առանց քեզ, ավա՜ղ,
Այս առաջին ձյունն իսկ ձյունի բուրմունք չունի:

Ախ, եթե հողմ լիներ, մրրիկ լիներ եթե,
Կնետվեի փողոց, որ նա ձերմակ բոցով
Իմ ճակատի անտես բոցը մարեր,
Եվ սակայն ձյունն այսօր այնքան մեղմ է ու տաք,
Որ թվում է ձյուն չէ, այլ սպիտակ արև:

Ես ի՞նչ անեմ, ասա:

Կար ժամանակ, որ ես իմ ավերով

Քո կրծքի դողը սուրբ,

Վարսիդ ծանր հյուսկեն

Եվ քո փոքրիկ ձեռքի քնքշանքն էի կշռում...

Ախ, թափո՛ւր է, թափո՛ւր ձեռքս հիմա

Ու քո ձեռքն է հիշում:

Ես ի՞նչ անեմ, ասա:

Քո կրծքի սուրբ դողից, քո քնքշանքից թափուր՝

Ձեռքս որոնում է գինու բաժակը ալ:

Իսկ բաժակում գինին, տես, այնպես է շողում,

Որ թվում է վերից մեջը աստղ է ընկել

Ու սկսել շողալ:

(Իմ աստղը չէ՞ արդյոք):

Իսկ բաժակում գինին, տես, այնպես է վառվում,

Ասես Արարատյան այն աշունը լինի,

Որ ինձ ու քեզ մի օր իր ճամփեքով տարավ,

Մի օր երբ դու այնքան լավն ու բարի էիր,

Երբ դեռ սիրում էիր,

Երբ տաք էիր որպես սիրո հարավ:

Հրդեհվում էր աշունն ինքն իր կրակի մեջ,

Ու դու քայլում էիր թևիս հակված:

Հրդեհի մեջ այդ շեկ Ջվարթնոցն էր լուռ՝

Անմեկնելի,

Շքեղ,

Ավերակված:

Ավերակված, օ, ոչ...

Ես այդ պահին, հոգիս,

Այնպես էի լեցուն արարչությամբ,
Որ իմ հրամանով սյուներն ընկած
Հառնում էին, կանգնում,
Իսկ կամարներն հանկարծ
Ծիածանվում էին բարձրաթռիչ:

Եվ իմ հրամանով լույս եթերից
Այն զվարթունք թեթև իջնում էին արագ,
Եվ բարձրաբերձ, վսեմ գմբեթների ներքո
Սկսվում էր լույսի մի պատարագ:

Այդ պահերին ես էլ
Նման էի անչափ այդ տաճարին՝
Սերդ էր, սերդ էր իմ մեջ պատարագում:
Սակայն հիմա նորից երբ աչքերս եմ փակում
Ու նայում եմ հոգուս,
Այնտեղ Չվարթնոց կա ավերակված՝
Գետնաթավալ սյուներ, –
Հավատս էին նրանք,
Ու կամարներ բեկված, –
Իմ երազներն էին,
Ապա մկրտության
Ավազան մի ցամաք, –
Ավանդ, քո սերն էր դա:

Ավազանն այդ... այնտեղ մկրտվում էր առաջ
Սիրտս–լուսաթաթախ մանկան նման,
Իմ կարոտը–խոշոր մի աստղի պես,
Եվ իմ հիացմունքը–ձաձանչի պես բարի:

Ձյուն է գալիս դրսում, ու քամի կա արդեն...
Իմ սրտի մեջ պարող հողմի ահեղ կանչով

Ո՞ր անդնդում քնած հողմն է արդյոք զարթնել:
Ու ես դուրս եմ գալիս: Հողմի շրթունքն է ցուրտ
Ինձ համբուրում իբրև բարեկամի:
Ես լիաթոք շնչում ու գոչում եմ ապա.
– Ուր որ ինքդ ես ուզում, տար ինձ, քամի...
Ես հողմի հետ ձերմակ թև թևի եմ տալիս,
Փողոցներն եմ չափում աննպատակ:
Կես է գիշերն արդեն:
– Տար ինձ, տար ինձ, քամի,
Ինձ օրորիր ահեղ քո շնչի տակ:

Սակայն ի՞նչ ես անում,
Ո՞ւմ դուռն ես դու ծեծում,
Իմ խենթ քամի, այս ո՞ւր, ինձ ո՞ւր բերիր...

.....
Լույսն է վառվում քո տան,
Հետո դուռն ես բացում,
Ու ես՝ մեղք չգործած,
Ծշնջում եմ.
– Ներիր...

1964

* * *

Ներիր, սիրելիս, ներիր ինձ լուռ,
Որ քո սեթևեթ նազանքի տակ
Ես չէի տեսել քո սիրտը տաք
Եվ արտասուքիդ լույսը մաքուր:

Չէի նշմարել, որ այդ անհոգ
Եվ այդքան թեթև քո ծիծաղից
Թաքուն հորդում է մի լուռ թախիծ
Եվ տառապանք մի նուրբ ու անօգ:

Ու չգիտեի, որ քեզ զուգող
Այդ քողը նետած, կարող ես գալ,
Իմ կրծքին ընկնել ու հեկեկալ
Այսպիսի խոշոր արտասուքով...

1965

ԽՈՍՔ ՆՈՐ ՏԱՐՈՒՆ

Ես ի՞նչ եմ ուզում, որ բերես դու ինձ..
Ոչինչ... Ախ, միայն ոչինչ չտանես,
Միայն չխլես
Ու քո անզիջում հողմերին չտաս
Այս սերը՝
Իր մեջ առաջին սիրո
Կապույտն ունեցող
Ու լույսն ունեցող
Այս սերը,
Նրա հրաշքն անքնին
Եվ անգամ նրա տառապանքն անքուն:

Չտանես,
Քո խենթ հողմերին չտաս,
Ու ես ամեն ինչ կունենամ կյանքում:

1965

* * *

Ժամն է արդեն, սիրելիս, եկ բաժանվենք մենք անձայն,
Ամեն մեկս մեր բախտին ու կորստին մեր հլու...
Ամառային խելահեղ այն ամպրոպները անցան,
Սիրտս խաղաղ է հիմա և ուժ ունի ներելու:

Աշնան հավքերը չվել, կարկաչել են երկնքով,
Եվ հոգնաբեկ ծառերից քամին տերև է տանում,
Համբուրելով է տանում ու տանում է քնքշանքով
Ու տանում է նա այնպես, ասես շնորհ է անում:

Այս կորստի ցավի հետ ես մտերիմ եմ վաղուց,
Ծանոթ ու լավ եմ ծանոթ, աշնան քամու արածին...
Ինչ տխուր է, երբ բարակ, անգույն անձրև է մաղում,
Երբ խանդի շանթը չկա, ու ներում են սիրածին...

1966

ՏԵՈՒՐ ԷՐ ՉՈՒՆ...

Եվ ասացին մարող
Աչքերդ հեզ,
– Ոչ քեզ հետ եմ կարող,
Ոչ առանց քեզ...

Չվող հավքերն անցան,
Տխրոր էր չուն...
Դու՛ իմ լուսե հանցանք,
Իմ սև գղջում...

1967

* * *

Ծնորհապարտ եմ քեզ
Սպասումի, դողի
Եվ խոստումով խոսող
Քո այն կանչի համար,
Այն քնքշության համար,
Որ ձեռքիս մեջ թողիր
Եվ սեթևեթ ու նուրբ
Քո նահանջի համար...

Անհայտությամբ բուրող
Քո վարսերի համար
Եվ շուրթերիդ համար,
Որ շոգով են հևում,

Եվ քո հագի մատնիչ
Մետաքսների համար,
Եվ այդ գոտու համար,
Որ իրանդ է ձևում:

Ծնորհապարտ եմ ես
Այդ հայացքիդ համար,
Որ ինձ ու քեզ զատող
հնչ-որ քող է այրում,
Եվ կանացի քնքուշ
Առեղծվածիդ համար,
Որ երգում է քո մեջ
Իբրև լույս ու արյուն:

Ծնորհապարտ եմ ես,
Ծնորհապարտ եմ քեզ,
Այս մշուշի, մութի
Այս թախծության համար,
Այս արևի, լույսի,
Շոգի համար այս կեզ
Եվ այս շոայլ ու խենթ
Հարբածության համար...

1971

ՔՈ ՄԱՍԻՆ ԽՈՐՀԵԼԻՍ

Քո մասին խորհելիս,
Մի խոնավ ձնծաղիկ եմ հիշում,
Գարնան օր եմ հիշում,
Որ քնից արթնացած
Մերկ մանուկ էր ասես...
Ու ձնհալ եմ հիշում,
Ջրերի պղտորված հեկեկանք
Ու լույսի մաքրություն եմ հիշում:

Քո մասին խորհելիս
Իմ սրտի մանկությունն եմ հիշում:

Եվ հետո մատներիս
Բաբախող մաշկի տակ
Պարանոց եմ հիշում,
Խենթացող մի երակ եմ հիշում,
Խենթացող քնքշություն:

Քո մասին խորհելիս
Քնքշանում են մատներս նորից:

Եվ ամառ եմ հիշում,
Ճառագայթ եմ հիշում ու արև
Եվ հիշում հոգևոր մի նվագ,
Որ ասես օրհնություն էր լույսի
Ու հացի օրհնություն...
Այդ իմ սիրտն էր օրհնում

Եվ օրհնում էր նա քեզ,
Քո մարմինն էր օրհնում...

Քո մասին խորհելիս
Ջրերի պղտորված հեկեկանք եմ հիշում...

1968

* * *

Մենք բաժանված ենք:
Եվ սակայն սերը շարունակվում է,
Շարունակվում է մայրամուտի պես...

Շարունակվում է հորիզոնն ի վար
Մխացող ամպով,
Մթնելուց առաջ իր բույնը փնտրող
Հավքի տագնապով,
Գետափին մրսող սպիտակ ու մերկ
Ծաղկի սարսուռով,
Չղջումի նման քարայրում զարթնող
Հողմի պաղ սույլով,
Շարունակվում է ձոր ու անդունդի
Մութ մխանքներով,
Եվ իրար փնտրող հեռախոսային
Անխոս զանգերով...

Մենք բաժանված ենք:
Եվ սակայն սերը շարունակվում է,
Շարունակվում է մայրամուտի պես...

1967

* * *

Ինչ-որ տեղ հիմա
Շրջում է սերը...
Ոտաբորիկ է,
Մերկ են ուսերը:

Սև աչքերի մեջ
Լույս է ու թախիծ,
Ու տաք ծոցի մեջ
Բույր կա փեթակի:

Եվ տվայտում է
Կարոտս ամպած,
Ախ, սերը կույր է,
Կգտնի՞ ճամփաս...

1971

* * *

Այն կինը, որի մատները պիտի
Բռնեի դողով,
Որի աչքերում
Գլխապտույտս պիտի օրորվեր,
Ինչ-որ տեղ հիմա երևի մենակ
Ու շատ է մենակ.
Եվ չկա մեկը,
Որ աստվածացնի
Նրա մատների քնքշությունը թույլ:

Եվ այն խոսքերը,
Որ երբևիցե չեմ ասի նրան,
Շուրթերիս վրա մեռնում են դանդաղ...
1971

* * *

Իրիկնամուտ է
Ու տաք քամի է...
– Դու ո՞ր ես գնում
Եվ ո՞ր ես տանում
Երգող մարմինդ:

Իրիկնամուտ է:
Այրվող ամպերում
Իրար են առել
Կարմիրն ու սևը:

– Անձանոթուի՛,
Ախր, ես գիտեմ
Այդպես գեղեցիկ
Քայլում է միայն
Մեղավոր սերը...

1971

* * *

Չարթնում է նորից խոռվքն իմ վայրի...
Չգում եմ... Դու ես... Գալիս ես խաղաղ,
Դու՝ գիշերային շողուն խավարի
Եվ արշալույսի լուսեղեն շաղախ:

Ասես գալիս ես այլ ժամանակից,
Գալիս մոգությամբ մի անհնարին,
Եվ թարթիչներիդ թախծության տակից
Քնքշանքն է նայում՝ խառնված չարին:

Այլ աշխարհից ես բերում դու ասես
Քո շրթունքների հեգնանքը տանջող,
Բարակ իրանիդ բեկումը այդ հեզ
Եվ հմայքներդ նուրբ ու նահանջող:

Գալիս ես, որ քեզ լոկ հեռվից շնչեմ,
Որ մտքով անգամ ես քեզ չբանամ,
Քո մաքրության դեմ այսպես երկնչեմ
Ու կարոտիդ դեմ այսպես սրբանամ:

Այլ աշխարհից ես գալիս դու ասես,
Բերում այս դողը, ծարավն այս վերին,
Եվ հայացքիդ տակ հավատում եմ ես
Սիրուց մեռնելու առասպելներին:

1971

* * *

Ես չկանչեցի, դու ինքդ եկար,
Եկար նազանքիդ բեկումով փխրուն,
Եվ թարթիչներիդ թախիծը թեքած,
Նստում էիր լուռ ու ինձ հետ տխրում:

Ու ես, որ կյանքում զատել գիտեի
Եվ մեղքի շողքը, և սերը արդար,
Քո աչքերի դեմ կարկամում էի
Եվ անզոր էի հայացքդ կարդալ:

Մերթ դողում էր նա իբրև սև արցունք,
Մերթ վառում թաքուն ու կանչող լույսեր,
Դու՝ ոտից գլուխ մի խրթին հարցում,
Դու՝ ոտից գլուխ տառապանք ու սեր:

Եվ ինչո՞ւ եկար, ի՞նչ էիր ուզում,
Ինչո՞ւ հեռացար... Չգիտեմ ոչինչ:
Եվ հիմա հեռվից տենդորեն հուզում,
Այրում են հեռվից աչքերը քո ջինջ:

Քեզնից մնացած այս թախիծը խոր
Մթնով զարթնում է ու լուռ հեծեծում...
Նա քո՞նն է նաև, նա մանուկ է որբ
Ու որբի նման քո դուռն է ծեծում:

1971

* * *

Մենք իրարից զատված երկու շշուկ,
Ու մեր միջև հողմեր,
Քամի ու ձյուն...

Եվ լինում են, սակայն, անհուն պահեր,
Երբ շշուկն իմ հանկարծ հողմի միջով
Տաք ալիքն է բռնում քո շշուկի
Ու զրուցում քեզ հետ
Ու զրուցում...

Զրուցում են նրանք որբերի պես,
Ծշնջում են իրար,
Որ ցուրտ է խիստ,
Որ քաղցած են սաստիկ
Ու մրսում են...

Մենք իրարից զատված երկու շշուկ,
Որ որբի պես մերկ են ու դրսում են:

1971

* * *

Եվ ահա կրկին ցավոտ մի թախիծ
Գալիս է անտես ու ինձ ողողում:
...Եվ կրկին քո սև թավիշի տակից
Սպիտակ ուսդ է քնքշորեն շողում:

Շողում են կրկին աչքերը քո ջինջ,
Որ ասես մոլոր գիշերներ լինեն,
Եվ այդ աչքերից լուռ նայում է ինձ
Մեղավոր ու սուրբ այն Մազդադիներն:

Դու ո՞ր ես հիմա... Քայլերդ բեկուն
Որտե՞ղ են երգում մեղեդին այն տաք,
Ո՞ւմ ուսերին ես գլուխդ թեքում,
Իբրև քնքշորեն հոգնած հպատակ:

Եվ քո աչքերը ո՞ւմ են ցլանում
Մեղավոր ու տաք մի առավոտով,
Եվ ո՞ւմ են այրում մատները քո նուրբ
Իրենց ընտանի ու թաքուն տոթով:

...Ու ես ուզում եմ մինչև վերջ հարբել,
Ու ես ուզում եմ այսօր խենթանալ,
Խանդի մրուրը մինչև վերջ պարպել
Եվ գալ հողմի հետ, քո դուռը բանալ:

Մտնել հոգուդ մեջ, խառնել ամեն ինչ,
Քեզ նորից անել հեզ ու հպատակ,
Եվ արցունք տեսնել աչքերին քո ջինջ,
Եվ արցունք տեսնել ձեռքերին իմ տաք...

1971

* * *

Հեռանում ես դու...

Եվ մի իմանա,

Որ արյանս մեջ դու պիտի փակվես

Վերջալույսի պես

Եվ պիտի մխաս

Հանգչող արևի տխուր մխանքով:

Եվ մի իմանա, որ մենության մեջ,

Երբ քո անունն եմ ինքս ինձ տալիս,

Զարթնում են հանկարծ թախծագին բառեր

Եվ իրիկնային կապույտի միջով

Գնում են կորած մանուկների պես

Ու հեռուններում հեծկլտում են խուլ...

Եվ մի իմանա, որ երբ ուսերիդ

Հպարտ ու շողուն քնքշանքն եմ հիշում,

Իմ որբ մատները տառապում ցավով,

Դառնում են այնպես

Քնքուշ ու վայրի...

Հեռանում ես դու...

Եվ չէի ուզի,

Որ իմ այս սերը բառերի փոխված,

Պոկվի ինձանից ու հեռու գնա:

Ախր, նա շատ է

Փխրուն ու ցավոտ,

Նա շատ է իմը

Ու... վերջինս է նա...

1971

* * *

Եվ դու, որ մի օր եկար քնքշորեն ու անակնկալ
Եվ իմ օրերը մեղկ ու փոշոտված
Փոխեցիր մաքուր, նախնական ու մեծ առավոտների
Եվ իմ մենության տաղտկությունը մեղկ
Փոխեցիր կապույտ սպասումների ու կարոտների
Եվ սրտիս մաշված ոտանավորը
Փոխեցիր զնգուն բանաստեղծության,
Ինչո՞ւ, ախ, ինչո՞ւ դարձար հեռավոր ու դարձար անհաս...

Եվ դու, որ մի օր ինձ համար հացի համ ու հոտ եղար,
Հողի հոտ եղար ու խոտի բուրմունք
Եվ եղար խաղաղ միջօրեի մեջ
Երգող փեթակի արևոտ բերկրանք,
Եղար առաջին օրհնված ողկույզ
Եվ եղար նուան կեղևում պահված բոսոր բարություն,
Ինչո՞ւ, ախ, ինչո՞ւ ոգու սով դարձար ու արյան ծարավ...

Եվ դու, որ մի օր իմ ձեռքերի մեջ խոնարհվող ցողուն
Եվ իմ գրկի մեջ քնքուշ ընդվզման հոգնություն եղար,
Եվ խոնարհ հատնում, և շռայլ վատնում եղար ինձ համար
Եվ եղար շնորհ, և եղար բախտի լիաբուռ պարզև,
Ինչո՞ւ, ախ ինչո՞ւ դարձար հեռավոր,
Հեռու հեռավոր ծովափին կանգնած մենավոր մի կին...

1975

* * *

Փխրուն է ավազն ու ավազը տաք,
Կապույտ է երկինքն ու երկինքը ջինջ,
Եվ հսկայական այդ երկնքի տակ
Կանգնել ես մենակ իբրև սեր ու կին:

Ծովը ծփում է կապույտ սոսափով
Եվ անրջում է հպարտ ու տրտում...
Ու գեղեցիկ ես դու որպես սափոր
Ու որպես սափոր սլացիկ ես դու:

Դու քայլ ես անում, նազող համրությամբ
Վարսերիդ սևը նետում ես ետև,
Եվ կուրծքդ է դողում ծովի ծանրությամբ
Ու աստղալույսի թրթիռով թեթև:

Քո աչքերի մեջ լույսն է նվաղում՝
Գեղեցիկ, ինչպես մեղքը Եվայի,
Եվ հասակդ ի վար թախիծ է մաղում
Հեռավոր կանչը մենավոր ձայի...

1975

* * *

Եվ կար ժամանակ, որ իմ քաղաքի
Քնած մայթերով շրջում էինք մենք
Ու չէինք փնտրում աշխարհում ոչինչ...

Իբրև լույս ու դող
Մատներդ ունեի ես իմ ձեռքի մեջ,
Եվ դու ունեիր
Կոպիցդ կախված արցունքը քո ջինջ:

Եվ չէինք փնտրում աշխարհում ոչինչ:

Հետո իմ ձեռքն էր
Քո ուսի վրա այրվելով տխրում,
Տառապում իբրև չարձակված մի ձիջ...

Ուսը, քո ուսն էր
Այրվող ձեռքիս տակ քնքշորեն փխրում,
Ու ծանրանում էր արցունքը քո ջինջ:

Եվ չէինք փնտրում աշխարհում ոչինչ:

1975

* * *

Եվ հիշում եմ ես՝ կարմիր էր գինին,
Գինին եռեփ էր ու գինին հարբած,
Լա երակներիս թախծության մեջ հին
Վառվում էր իբրև արյան այգաբաց:

Լա քո շուրթերի թաց ու տաք մաշկին
Մեղսանքի թաքուն բույրով էր շնչում,
Լա մեզ առնչում լույսի հրաշքին
Ու խավարին էր նա մեզ առնչում:

Եվ այդ վայրկյանը խորհուրդ էր ու դող
Ու մեղք էր մթին, ու լույս էր արդար,
Ճակատագիր էր, հրեղեն մի տող,
Որ անգոր էի, սակայն, ես կարդալ:

Եվ լուռության մեջ դողում էր դանդաղ
Այդ մութ վայրկյանի խորհուրդը թաքուն,
Ու նվաղեցին աչքերդ հանկարծ,
Քո սև աչքերը դարձան մեղրագույն:

Փխրուն ուսերիդ քնքշանքը հորդել
Ու կաթկթում էր մատներից քո տաք...
Առեղծվածները քանդվում թել առ թել,
Հեկեկում էին մեր ոտքերի տակ...

1975

* * *

Կայիր դու այդպես, կայիր իմ կյանքում,
Կայիր դու որպես քնքուշ հպատակ,
Կայիր դու որպես հավատը վանքում,
Ղողանջը զանգում, լույսը կոպի տակ:

Եվ ընտանությունք քո խոնարհ ու տաք
Գիտեիր այնպես հմտորեն տանջել,
Վանել գիտեին մատներդ բարակ,
Հայացքդ գիտեր կիսախուփ կանջել:

Եվ քո այդ անմեղ-մեղավոր խաղից
Ինչ-որ մի ուրիշ լույս էր թևածում,
Տարուբերվում էր մի թաքուն թախիծ,
Ու մի արևոտ անձրև էր հածում:

Եվ նահանջում էր կիսամութն ասես,
Արար աշխարհը զիջելով լույսին,
Երբ հանկարծակի զգում էի ես
Քո պարանոցի բեկումն իմ ուսին:

Երբ զգում էի քնքուշ մի անկում,
Եվ նվաղումը քո թույլ ձեռքերի...
Կայիր դու այդպես, կայիր իմ կյանքում,
Կայիր այդպես պարզ ու անմեկնելի...

1975

* * *

Եվ հիմա միայն
Անունդ մնաց,
Եվ հիմա նրա ամեն մի տառից,
Որ մոմերի պես այրվում են իմ դեմ,
Կարոտ է կաթում,
Ու աստղ է կաթում,
Ու կաթկաթում է հրե մի թախիծ:

Անունդ...
Ծովի այն մթնշաղից
Նա ալիքի պես հեհեհ գալիս,
Իմ շրթունքներին տառապում անքուն,
Իմ շրթունքներին դողում լույսի պես
Ու հաղորդության
Եվ իմ ծարաված այդ շրթունքների
Աղի ու լեղի կարոտն է լալիս:

Անունդ՝ ալիք,
Անունդ գալիս,
Իմ շրթունքներին տառապում անքուն
Ու սրտիս վրա
Աստղեր է լալիս...

1975

* * *

Հեռու ծովափին նստել երևի
Ու քո վարսերն ես սանրում դու նազով,
Մերկ ուսերդ ի վար ալիքը սևի
Բուրում է ծովի ջուր ու ավազով:

Ծովը հևում է հլու հոգնությամբ
Ու իր խորքերից տխուր ղողանջում,
Նա կանչում է քեզ վայրի մոգությամբ,
Սրտաբեկությամբ նա քեզ է կանչում:

Նա կանչում է քեզ կապույտ մխանքով
Եվ իր վիհերի թաքուն մթությամբ,
Կանչում ծովային իր տառապանքով
Եվ իր տվայտող տեղատվությամբ:

Կանչում է նա քեզ ելնող թևերով
Եվ իր ծնկաչոք խոստովանությամբ,
Իր հնարավոր բոլոր ձևերով,
Իր խոնարհությամբ ու ըմբոստությամբ:

Կանչում է նա քեզ, որ խենթ հորդելով
Քո արևավոր ծնկներին փարի,
Եվ իր կարոտած, աղի շուրթերով
Համբուրի նորից քո համը բարի:

Եվ ալիքները ելնում են տխուր,
Բերում արևի շշուկները տաք,
Ափի քարերին տառապում են խուլ
Ու փշրվում են քո ոտքերի տակ:

1975

ԱՆԾԱՆՈՒԹ ԾԵՍ

... Եվ ահա նորից մենք հանդիպեցինք:
Իմ ու քո միջև հողմեր են շաչել,
Եվ տառապել է մեր բաժանումի
Օվկիանոսը մութ:
Եվ սակայն՝ հրաշք,
Դու առաջվա պես դեռ շիկնել գիտես
Եվ առաջվա պես գեղեցիկ ես դեռ:

Եվ այլ մի հրաշք՝ ասելիք չունենք:
Այդպես երևի ծովերն են լուում
Փոթորկից հետո,
Այդպես երևի անտառն է լուում
Մայրամուտի դեմ,
Այդպես լուում է այն տունը լքված,
Ուր կատարվել է թաքուն ու մթին
Մի ողբերգություն:

Եվ այլ մի հրաշք՝
Մեր հարազատի – խանդի մահը սև
Մեզ հարազատ է դարձրել ավելի:
Եվ ես ուզում եմ շոյել քնքշորեն
Քո սպիները, որ ես եմ թողել.
Եվ դու երևի ուզում ես շոյել
Այն վերքերը հին, որ թողել ես դու:

Եվ իմ ու քո մեջ ծավալվում է լուռ
Մի զարմանալի սրբագործություն
Կամ բոլորովին անծանոթ մի ծես,
Որ անուն չունի...

1980

* * *

Բարալիկ էր նա, խալ ուներ այտին,
Հայացքը թեքում ու ինձ չէր նայում,
Նայում էր ասես հեռու անհայտին,
Հեռու մեկին էր ասես հմայում:

Աշխարհում հազար աղջիկներ կային,
Բայց նա միակն էր, ինչպես այն եվան...
Ա՛խ, ինչքան եմ ես քո իրիկնային
Թախիծը շնչել, քաղաք Երևան...

Բայց ի՞նչ իմանար իմ սիրտը, ավաղ,
Որ երանելի ուխտավոր եմ ես,
Որ այդպես տխուր ու այդպես ցաված՝
Մի հարուստ, հարբած բախտավոր եմ ես:

Եվ ի՞նչ իմանար, որ երբ ցուրտ քամին
Հորդորի այսպես, որ դուռս բանամ,
Ես պիտի վառեմ այդ թախիծը հին,
Նստեմ նրա դեմ ու քիչ տաքանամ:

1979

ԱՍՏՂԻ ՊԵՍ

Քո աչքերի խավարում
Ժամադրվեն թող այսօր
Իմ գաղտնիքը թախծալի
Եվ առեղծվածը քո լույս...

Վաղը կգամ,
Քեզ համար
Չասված խոսքեր կբերեն:

Վաղը կգամ,
Քեզ համար
Մի մաքրություն կբերեն,
Որպես վաղուց գոյացած
Ու չլացած արտասուք:

Վաղը կգամ,
Ափիդ մեջ
Կդնեն սերն իմ վերջին,
Լուսաբացին մարմրող
Վերջին տխուր աստղի պես...

1976

ԿԱՆԱՐԴՈՒՀԻՆ

Ես գիտեմ հիմա, դու սիրո ծաղկից ու խանդի խոտից
Ինչ-որ անծանոթ մի խմիչք էիր եփում ինձ համար,
Որ դառն էր, որպես մրուրը գինու, թույնը կարոտի,
Ու քաղցր, որպես վերին մանանա:

Ես գալիս էի, երբ կեսգիշերն էր իջնում քաղաքին,
Ես գալիս էի, ասես երկնքի դուռն էի բախում,
Ես խմում էի քո ձեռքով պարզված թույնն այդ դառնագին
Հետո հեռանում, չգիտեմ, ամի, ուր...

Քնած քաղաքում կորցնում էի ես ձամփա և ուղի,
Մութ բավիղներում երեքում էի ես հարբածի պես,
Չէի հասկանում, չար ոգի՞ ես դու, թե կախարդուհի,
Ու երգվում էի մոռանալ ես քեզ:

Բայց երբ գիշերն էր իջնում քաղաքին, որպես մեղսագործ,
Ու սև ծառերի սև ցնորքներն էր մայթերին կախում,
Ես գալիս էի, ես բախում էի նորից դուռը քո,
Նորից երկնքի դուռն էի բախում:

...Դեռ քիմքիս վրա անհայտ խմիչքիդ մրուրն է մթին,
Ու դեռ չգիտեմ, անիծում եմ քեզ, թե լուռ աղոթում,
Բայց կարոտում եմ ես անդունդների գլխապտույտին
Ու երկնքին եմ նորից կարոտում...

1980

Ի ՍԿԶԲԱՆԵ

Երբ շատ հոգնեի
Ճերմակ թղթի դեմ երկյուղածելուց,
Երբ շատ հոգնեի
Համառող տողի քմահաճ խաղից,
Ամեն ինչ թողած ելնեի փողոց,
Եվ հանդիպեի՞նք մենք պատահաբար:

Եվ դա ամառվա մի շեկ օր լիներ,
Ու բոլոր կանայք աչքիս թվային
Թուխ ու գեղեցիկ:

Եվ դու լինեիր թուխ ու գեղեցիկ,
Գեղեցիկ, ինչպես հասկը ցորենի,
Ինչպես ճառագայթն արտասուքի մեջ,
Ինչպես ամռան օրն ամպրոպից հետո
Եվ ինչպես ինքը՝ անհայտը հեռու...

Եվ խորհրդավոր լինեիր նաև,
Եվ խորհրդավոր, ինչպես գաղտնարան,
Եվ խորհրդավոր,
Ինչպես ներշնչման ցավը մոտալուտ:

Իսկ ես, ախ, գիտեմ,
Պիտի թվայի քեզ ծեր ու հոգնած,
Եվ զարմանայիր պիտի քնքշորեն,
Թե ինչո՞ւ եմ ես
Քեզ նայում այդպես քնքուշ ու վայրի:

Բայց դու, որ կին ես,
Եվ գեղեցիկ ես, ինչպես անհայտը,
Եվ խորհրդավոր,
Ինչպես ներշնչման ցավը մոտալուտ,
Հաջորդ վայրկյանին կհասկանայիր,
Որ թեև հոգնած ու ծեր եմ թվում,
Բայց դեռ չեմ հոգնել սիրելու ցավից:

Հետո երևի այդ շեկ օրվա մեջ
Հնչեր մի անհայտ երաժշտություն,
Որ ողջ աշխարհում
Լսելի լիներ միայն ինձ ու քեզ:

Եվ երգն այդ անհայտ
Հուշեր ինձ ու քեզ,
Որ կա աշխարհում դրախտ ու դժոխք...

Եվ ամենայն ինչ
Սկսվեր նորից, ի սկզբանե...

1976

* * *

Այդ ես նկատեցի, որ չես քայլում դու, ոչ,
Այլ ծփում ես թեթև, որպես ավիք,
Այդ ես գուշակեցի, որ քո հոգու մեջ գոց
Ծվարել է մի լուռ հրաշալիք:

Եվ շողացիր աշնան քամիներիս մեջ ցուրտ
Իբրև անհայտ ու տաք սիրո աշխարհ:
Հետո հրաշք եղավ, ու հրաշքով այդ սուրբ
Ջուրս գինի դարձավ, հացս՝ նշխար:

Իսկ դու քանի գնաց, այնքան գեղեցկացար,
Կարոտի պես, հուշի, ներշնչանքի,
Եվ չիմացա՝ ինչպես ճակատագիր դարձար
Ու փոխվեցիր անբառ մի տանջանքի:

Երակներիս մեջ փակ դարձար քնքուշ մի ցավ,
Դարձար ցավոտ, ցավոտ մի քնքշություն,
Արտասվեցիր իմ մեջ իբրև թաքուն անձավ
Ու մխացիր որպես կարոտ ու խունկ:

Գիտեմ, սիրո համար հիմա ցուրտ է դրսում,
Եվ թափառում է նա մերկ ու եղծված,
Բայց իմ ու քո միջև բոցկլտում է մի սուրբ,
Սիրո թաքուն ու սուրբ մի առեղծված:

Եվ անպաշտպան ես դու, որպես գեղեցկություն,
Որպես անհայտ ու տաք սիրո աշխարհ,
Առ իմ խիղճը մաքուր, ապավինիի սիրուս,
Դու՝ հողմերից փրկված իմ սուրբ նշխար...

1977

ՀԱՅՏՆՈՒԹՅՈՒՆ

Հավատում էի, գիտեի հաստատ, որ այս աշխարհում
Դու ինչ-որ մի տեղ ապրում ես ու կաս,
Բայց չգիտեի, որ մոտ ես այդքան ու հենց այս գարուն
Հայտնվես պիտի ու գարնան հետ գաս:

Այդպես է, հոգիս, ով հավատում է կյանքում հրաշքի,
Նրան է միայն հրաշքն այցելում,
Հավատավորը, ուխտավորն էի ես այդ հրաշքի,
Ու հայտնվել ես, հրաշք այցելու:

Եկել ես ահա ու բերել նորից գաղտնիքն ու ցավը,
Որ գիտեն այնպես տրտմորեն լացել,
Եվ իմն է ասես լեռներում կորած այն քարանձավը,
Որի գաղտնիքը ոչ ոք չի բացել:

Իմն է հեքիաթի ցայգածաղիկը, այն ծաղիկը լուրթ,
Որի ծաղկումը չի տեսել ոչ ոք,
Իմն է լեռնային անհայտ այն լճի թրթիռը կապույտ,
Որի դեմ պիտի իջնել ծնկաչոք:

Իմն է ճնհալի այն վայրկյանը լույս, վայրկյանը վայրի,
Որից գետերն են հանկարծ ցնորվում,
Իմն է շուրթերիս ծարավին թառող ժպիտն անառիթ,
Որ խենթերին է միայն շնորհվում:

Եկել, կախվել ես իմ բախտի վրա դու որպես ասուպ
Ու որպես գաղտնիք, ու լույս, ու խավար...
Եվ նորից ահա աստղերն են խաղում իմ գինու թասում,
Որ պիտի հոսեն երակներս ի վար...

* * *

Դու անհայտն ես,
Անմեկնելին...
Բայց քո հեռու շշուկներից զգում եմ ես,
Որ տաք ես դու, որպես շշուկ,
Անմեկնելի, որպես շշուկ,
Որ ես գիտեմ,
Գեղեցիկ է անմեկնելին...

Ու ես գիտեմ,
Գեղեցիկ ես ոտից-գլուխ,
Քանզի կինը
Տաք շշուկով զրուցելիս,
Գեղեցկանում ոտից գլուխ
Ու կրկնակի կին է դառնում...

Ու ես գիտեմ,
Այս մեղավոր,
Այս հողահոտ գարնան նման
Կարող ես գալ,
Ինձ դուրս հանել իմ ասիերից,
Խփել նորից ժայռ ու քարի
Ու քրքրել,
Ու քրքրել...

1977

* * *

Օրհնյալ լինես դու...

Քո գալուց առաջ
Դատարկ, անխոռով ու կույր էի ես,
Ինչպես երևի Ադամն է եղել
Արգելված պտուղն ուտելուց առաջ:

(Այդ աստվածները ինչո՞ւ են ուզում,
Որ մենք կույր լինենք, լինենք անխոռով
Ու լինենք դատարկ)...

Օրհնյալ լինես դու,

Քո գալուց հետո
Ես տառապանքի կշիռն զգացի,
Խոռվքը խանդի, շիկնանքը շանթի,
Տեսա մերկության ցոլանքը մաքուր,
Ես լճյալ տեսա...

Ես աստվածներին դարձա հավասար:

Օրհնյալ լինես դու...

1977

* * *

Աշնան ծառերը բոց են ու բեհեզ,
Աշնան ծառերը ոսկի են ու սուգ...
Օրը ջինջ է դեռ արտասուքի պես
Եվ սակայն տխուր, որպես արտասուք:

Ու ոլորվում է ձանապարհս դեռ,
Իմ ձանապարհը՝ թախծալի հրաշք...
Եվ քո աչքերը՝ լուսավոր աստղեր,
Դեռ խոնարհվում են իմ բախտի վրա:

Եվ մի հեռանա, թող լույսն անհունի
Մի քիչ էլ դողա իմ թարթիչներին,
Թե առեղծվածը պատասխան ունի,
Ապա քեզ մոտ է գաղտնիքը վերին:

Շուտով կփչի հողմը ձյունաբեր,
Ոտքի տակ կառնի ոսկի ու հրաշք,
Եվ քո աչքերը՝ սգավոր աստղեր,
Լուռ կխոնարհվեն իմ բախտի վրա...

1978

* * *

Ես, սիրելիս, շատ եմ ապրել,
Բայց չգիտեմ մինչև հիմա,
Թե ո՞րն է լավ,
Որո՞նումի ու երազի անհաս ճամփան,
Թե՞ հասնելու
Եվ գտնելու վայելքը մեծ:

Ու ես գիտեմ,
Թե հանդիպենք,
Ապա պահն այդ գուցե նման լինի այնքան
Այն վայրկյանին,
Երբ առաջին մարդը մի օր
Առաջին կայծն ու առաջին բոցն է տեսել:

Կայծը,
Բոցը,
Հրաշալին,
Հրաշալին ու տանջալին:

Ես, սիրելիս, շատ եմ ապրել
Ու վախենում եմ կրակից:
Հոգուս մաշկին
Այրվածքների հետքեր կան դեռ
Ու հետքեր կան խարանների,
Եվ մատներս,
Որ շեկ աստղեր են շոշափել,
Այրվում են դեռ...

Ու ես գիտեմ,
Թե հանդիպենք,
Պիտի թվա,
Թե մենակ ենք մենք աշխարհում,
Ու մեզ հետ է միայն ինքը՝
Երկինքը մեծ:

Ես, սիրելիս, շատ եմ ապրել,
Շատ եմ եղել երկնքի մեջ,
Եվ չեն մարել իմ թևերում
Անհունության ցավը կապույտ
Եվ կսկիծը անկումների:

Ու ես գիտեմ,
Թե հանդիպենք,
Նորից իմը պիտի լինի
Եվ կրակի մորմոքը շեկ,
Եվ անհունի ցավը կապույտ...

1977

* * *

Դրսում նորից ապրիլ է մեծ,
Եվ աշխարհում կապույտն է շատ
Ու շատ այնքան,
Ու թե նայեն տիեզերքից,
Թվա պիտի,
Թե մեր երկիրն անհունության կոպից կախված
Արտասուք է մի կապուտակ...

Ես ապրում եմ
Այդ կապուտակ արցունքի մեջ:

Դրսում նորից ապրիլ է մեծ:
Ձյունը լեռներն է նահանջել,
Մերկացել են հովիտ ու դաշտ,
Եվ թվում է,
Թե ապրիլի աղջիկը խենթ
Կարձ է հագել,
Մերկացրել սրունք ու զիստ...

Ապրիլ է մեծ ու խենթություն:
Ի՞նչ անեմ ես,
Ես, որ հիմա ոչ ջահել եմ
Ու ոչ էլ ծեր,
Ի՞նչ անեմ ես...
Եվ այն, ինչ դու ես ինձ տվել,
Ոչ կարոտ է,
Ոչ թախիծ է

Ու ոչ էլ սեր...
Ուրիշ է սա, քիչ անեմ ես...

Դրսում նորից ապրիլ է մեծ:
Ու ես գիտեմ,
Որ հողի տակ
Նորից սերմերն են տառապում,
Որ արձակեն ծիլ ու ցողուն...

Ապրիլ է մեծ:

Ու զարթնում է իմ մեջ նորից
Տաք հողի հետ լուռ մխալու
Կարոտը տաք...

1977

ՍԵՊԱԳՐԵՐ

Քո աչքերը ասես սեպագրեր էին,
Անմեկնելի, խրթին սեպագրեր,
Որ հայացքիս հանդեպ այդպես լռել էին,
Իրենց առեղծվածով այդպես լռել:

Եվ ի՞նչ գաղտնիք էին նրանք իմ դեմ փակում,
Եվ ի՞նչ էին հուշում այդպես անխոս...
Ես վերծանում էի տառապանքով թաքուն
Այդ բարբառը քնքուշ ու բարբարոս...

Ես վերծանում էի սպասումի դողով,
Ես վերծանում էի խանդով մի մութ...
Ու մերթ իմն էր հույսի արշալույսը ցողոտ,
Ու մերթ իմն էր մռայլ մի մայրամուտ:

Ու մերթ իմն էր հողի շնչառությունը տաք,
Ու մերթ իմն էր հողմի շունչը ահեղ,
Մերթ ճաքձքում էին իմ շուրթերը պապակ
Ու մերթ այրվում էին հարբած ու խենթ:

Ու երբ հետո, հետո, տառապալի մի օր
Վերծանեցի գաղտնիքն այդ հին գրի,
Նա բարբառեց այսպես. «Ես` Շամիրամս նոր,
Նվաճեցի սիրտն այս ու մատնեցի հրի»...

1977

ԱՆԱԿԵԿԱԼ ԱՄՊՐՈՊ

Ամպը որոտաց, տեղատարափը ամեն ինչ խառնեց,
Հորդեց, որոնեց ծանապարհ ու հուն...

Եվ մայթեզրյա հին լորենու տակ կայծակը բռնեց
Ինձ ու ցողաթաց անծանոթուհուն:

Փակք քեզ, Արարիչ, լվանում էիր մոլորակն այս հին,
Որ այնտեղ մաքուր բույրերը հեան:

Ու մի պահ թվաց՝ ես ու ցողաթաց անծանոթուհին
Մենակ ենք, ինչպես Ադամն ու Եվան:

Ամպրոպը նրան բռնել, փորձել էր հագուստը հանել,
Բարակ մետաքսը ծեփել էր կրծքին...

Ու երբ ուզում էր իր առատ ու թաց վարսերը քամել,
Դառնում էր այնպես հմայիչ ու կին...

Լույսն ու խավարը մեկմեկու բացել գաղտնիք մի անեղծ,
Կայծակով էին զրուցում վերում,

Երբ փորձում էի ինքս նրա հետ նույն զրույցն անել,
Ժպտում էր թախծոտ ու նայում հեռուն:

Ու ես չիմացա, թե ինչպես լռեց այդ ամպրոպը խենթ,
Զիմացա՝ ինչպես պոկվեց նա տեղից:

Հետո լորենուց կաթկթում էին մարմրող աստղեր,
Ու կաթկթում էր մի ցողոտ թախիծ...

1979

* * *

Մայրամուտ է ու մշուշ... Այրվող ամպերն են մարում,
Վերջին ղողանջն է մարում ինչ-որ անտես մի զանգի...
Եվ հեռանաս պիտի դու, քո աչքերի խավարում
Կրակներ կան թափառիկ, որ նման են մեղսանքի:

Իսկ ես աչքերս փակել, հայտնության օրն եմ հիշում,
Երբ քո մարմինը բուրեց իբրև գինի ու ցորեն...
Գլխապտույտ կար ասես, իմ արյան տաք մշուշում
Լույսը ծունկի էր իջել ու երգում էր քրմորեն:

Ես չուզեցի իմանալ, թե ինչեր ես դու ցրել,
Թե ինչեր ես կորցրել ճանապարհին քո անցած,
Բայց հասկացա, որ քո մեջ մեղքը թախիժ է դրել
Եվ աչքերիդ մեջ դրել մի տառապող առեղծված:

Ես ուզեցի քո հոգին իմ մաքրությամբ մկրտել
Ու մկրտել իմ սիրո կարոտներով արարող...
Եվ ինձ թվաց բուրեցիր՝ մաքուր, որպես ծաղկի թեր,
Ու որպես ցող նախնական ու նախնական՝ որպես հող:

Եվ հեռանում ես հիմա: Ծառ եմ սովոր ես ցավի,
Կորստի շատ եմ սովոր– հին սպիներս են վկան...
Բայց երբ թևերդ արնեն, երբ նորից սիրտդ ցավի,
Երբ ցուրտ լինի ու քամի, կանչիր հեռվից, ու կգամ...

1980

* * *

Եվ առեղծվածն է ինձ դեռ կուրորեն տանջում,
Եվ դեռ մինչև հիմա չեմ հասկանում ոչինչ, –
Այն մեղավոր աչքերն ինչո՞ւ են ինձ կանջում,
Եվ ինչո՞ւ եմ անդող աչքերի դեմ այս ջինջ...

Ինչո՞ւ այդպես հաճախ ծանապարհս շեղած՝
Իմ լավերին այն հեզ անփութորեն թողի
Եվ տենչացի նրանց, որ մեղավոր եղան
Ու մատնեցին հոգիս խենթ ու խռով դողի:

Ինչո՞ւ չթովեցիր հովիտների շուշան,
Ինչո՞ւ չկանչեցիր մանուշակի թախիժ,
Եվ մոգեցիր դու ինձ անդունդի մոտ բուսած
Հրաբուխի կարմիր, վտանգավոր ծաղիկ...

...Թեև տառապանքից արդեն հոգնել եմ շատ,
Եվ իմ սերը պիտի խոնարհ ու հեզ լիներ,
Բայց ողջո՞ւյն ձեզ կրկին, օրհնություն ձեզ ու փառք,
Մեղավորներ, չարեր, գնչուհիներ...

1980

ՆԱԽԱԶԳԱՅՈՒՄ

Իմ կրակները դանդաղ կմարեն,
Իսկ քո աչքերը կմնան շողուն,
Ու մի օր հանկարծ ես կնշմարեմ,
Որ ինչ-որ մեղքից ձեռքերդ են դողում:

Հետո կնայեմ աչքերին քո ջինջ,
Որ կխոնարհվեն նույն մեղքի դողով,
Չեմ հանդիմանի, չեմ ասի ոչինչ,
Մենակ ու տրտում դուրս կգամ փողոց...

Ու ցուրտ կլինի, կլինի քամի,
Խուլ կհառաչի փողոցը խավար,
Ես մթան միջով ու տարաժամի
Կտանեմ իմ սիրտն ու սերն իմ ցաված:

Հանկարծ կձյունի երկինքը մթին,
Եվ քամին հանկարծ կփոխվի հողմի,
Նա ձերմակ թաթը կդնի սրտիս
Ու բիրտ քնքշանքով ցավս կմեղմի:

Ոչ ոք չի տեսնի իմ երթը տխուր
Գիշերվա միջով ցուրտ ու ամայի,
Եվ հողմը միայն ոռնոցով իր խուլ
Հետքերիս վրա տխուր կվայի...

1981

ԱԿՆԹԱՐԹ

Ամռան օր է, ժայռեր են տաք,
Ամռան օր է ու շոգ...
Իսկ ձորի մեջ, ծառերի տակ՝
Գետի արծաթ խշշոց:

Եվ կածանն ինձ ձորն է տանում,
Հասնում է զով գետին,
Նայում, սակայն չեմ հասկանում
Տեսիլք է սա, թե կին...

Կանգնել է նա մերկ ու ցողոտ,
Քամում է վարսն իր սև,
Ստինքների թեթև դողով
Մաղում գորով ու սեր:

Ինձ տեսնելով ահից ձչում,
Մեջքն է ձկում բարակ,
Գետի մաքուր ալիքներում
Նա՝ տազնապած կարապ...

Ձեռքերն իսկույն խաչ է անում
Թրթռացող կրծքին,
Նա՝ վախվորած անմեղ մանուկ,
Նա՝ մեղավոր, նա՝ կին...

...Պահ էր լոկ դա, վայրկյան էր լույս,
Ակնթարթ էր դա կարծ,
Բայց աշխարհը ոտից գլուխ
Ուրիշ դարձավ հանկարծ...

1981

ԳԱՐՈՒՆ

Գարրն, արբունքահաս աղջկա պես
Դու գալիս ես ահա ոտաբորիկ,
Քամին պատառոտել քող ու զգեստ
Քո զիստերն է բացել ու կուրծքը պիրկ:

Գարրն, մենության մեջ իր անձավի
Մի կախարդ է ապրում, հոգնած մի մոգ,
Քնքշության է այնպես նա ծարավի
Ու ծարավի այնպես շնչին քո տոթ:

Կար ժամանակ, գարրն, այդպես գալիս,
Իսկույն նրան էիր դու այցելում,
Նրա կրծքին ընկած անուշ լալիս
Ու ծիծաղում էիր, չար այցելու...

Այսօր ծաղիկներով քո ծիծաղի
Անցար, չնայեցիր անգամ վրան,
Ասիր՝ ձերմակել է, էլ ի՞նչ ծաղիկ,
Էլ ի՞նչ քնքշանք է պետք կյանքում նրան:

Գարրն, հիմար աղջիկ, դեռ մի գնա,
Տես, կանչում է նա քեզ, ձեռքով անում...
Եվ ի՞նչ անի, ասա, ի՞նչ անի նա,
Որ ձերմակել, սակայն չի ձերանում...

1981

ԵՐԵՎԱՆ, ԻՆՁ ՆԵՐԻՐ

Երևան, ինձ ներիր, ինձ ներիր, Երևան,
Որ թողած սրբատաշ հրաշքներն այս քարի,
Որոնեմ այն մայթերն ու փոշին նաիրյան,
Որ Չարենցն է երգել ու երգել Մահարին:

Որ թողած լույսերում պողոտա ու մայթեր,
Ես գնամ, մոլորվեմ գիշերում քո այն կույր,
Որոնեմ այն հին բակն ու դռնակն այն փայտե,
Որ իմ դեմ աշխարհի լույսն ու բախտն էր փակում:

Որոնեմ ջրերում փշրված լուսնկան
Ու լսեմ գիշերով հեկեկանքը թառի,
Մահու չափ կարոտեմ ծամավոր աղջկան,
Ու սրտիս անամոք թախծությունը թառի:

Որ մորմոք խառնվի իմ հացին ու գինուն,
Հեկեկա գիշերվա մայթերում ամայի,
Հասկանամ, որ կյանքում սերը մեկն է լինում
Ու միակն է լինում կյանքի պես ու մահի...

1981

ԿՈՐՈՒՍՏ

Ինչո՞ւ հիշեցի, ու ինչո՞ւ այսպես
Կարոտներիս մեջ ցուաց նա կրկին...
Անտառ է, բացատ, խոտի տաք մի դեզ,
Ու դեզին պառկած ոսկեգույն մի կին:

Նա իմ հայացքին հանկարծ հանդիպած,
Նայում է երկար ու նայում է խոր...
Փակում է դանդաղ նա զհստերն իր բաց
Ու հետո ժպտում մեղմ ու մեղավոր:

Թարթիչների տակ, շուքի պես ընկած,
Ինչ-որ մի կապույտ թախիծ է լում,
Իսկ աչքերի մեջ՝ լույսով բռնկած
Չույզ արտույտներ են ասես թրթռում:

Ու կայծեր կան նենգ, խայծեր կան անքող
Այդ թրթռոցի լույսերում վերին...
Երևի պիտի վայրի հայացքով
Նշան բռնեի զույգ արտույտներին:

Բայց մուժ է, աշուն... Նստել անհամար
Իմ կորուստներն եմ հաշվում ես կրկին...
Կորուստներիս մեջ՝ անտառ է, ամառ
Ու դեզին պառկած ոսկեգույն մի կին...

1981

* * *

Թվաց, գիշերվա հողմի մեջ ահեղ
Լսեցի հանկարծ ձայնդ հեռավոր,
Ձայնդ, որ ասես սոսափյուն էր մեղմ
Ու մի քիչ ցավոտ, մի քիչ մեղավոր...

Երևի այդպես քնքուշ ու ցավոտ
Հովերն են երգել լքվող դրախտի...
Ի՞նչ իմանայի, որ քո մեղմ ձայնով
Շաչում է վրաս սուլոցը բախտի:

1981

* * *

Դու կհեռանաս, ու թղթերիս մեջ
Երգեր կմնան տխուր ու ցավոտ,
Երգեր՝ կարոտի արցունքների պես,
Ու երգեր, որպես տրտմության աղոթք:

Գուցե փառք բերեն այդ երգերը ինձ,
Սակայն առանց քեզ ինչպե՞ս այն կրեմ,
Փառքի ծիրանին ինձ պետք է, հոգիս,
Որ ես քնքշորեն ոտքիդ տակ փռեմ...

1983

ԳԻՇԵՐԱՅԻՆ ԵՐԹ

Տխուր էի ես... Իսկ փողոցներում գիշերվա քամին
Ինչ-որ մոռացված երգ էր նվագում...
Չգիտեմ ինչու հանկարծ այդ ցրտին ու տարածամին
Ուզեցի տեսնել աչքերդ մաքուր...

Աչքերդ ու քեզ, որ աղջիկ էիր վայրի ու բարակ,
Քեզ, որ խուսափող խաղ էիր ու բոց,
Քեզ, որ հոգուս մեջ ծավալվում էիր որպես պատարագ
Ու ապրում որպես սրբություն սրբոց:

Քեզ, որ ողջ կյանքում տարա իբրև ցավ, իբրև առեղծված
Ու պահ տվեցի իմ երազներին,
Եվ նման դարձար մեր մատյաններում հավիտյան լուած
Ու չվերծանված մեր հին խազերին:

Գինով էի ես... Ու իմ կարոտը հեծկլտում էր խուլ,
Այրվում էր իբրև ծարաված մի տենդ,
Բայց քամին հանկարծ ձակատիս դրեց մատներն իր տխուր
Եվ ասաց՝ այդ ո՞ր, իմ հիմար, իմ խենթ...

Ինչո՞ւ ես խառնել երկինք ու գետին, կրակ ու մոխիր,
Ինչո՞ւ ես խառնել վայրկյան ու տարի,
Դու մոռացել ես, թե նրան այդ երբ ու որտեղ թողիր
Այդպես գեղեցիկ ու այդպես վայրի...

Լսիր, ասացի, չկա ժամանակ ու չկա տարի,
Կա միայն վայրկյան, կա թախիծ ու թույն,

Կա միայն կարոտ, կա միայն ծարավ, կա տենդ մի վայրի,
Ու կա աստղային մի հավերժություն:

Հարբած էի ես... Ու գնում էի աստղերի միջով,
Ու ինձ հետ էր նա վայրի ու բարակ,
Եվ թեև քամին հետքերս էր ջնջում մի չար քրքիջով,
Բայց և հնչում էր մի սուրբ պատարագ...

1983

* * *

Ես բաց եմ ապրել ու սիրել եմ բաց,
Եվ սպիներ կան դրանից սրտիս...
Իսկ քեզ մոտ եկա արդեն տառապած
Ու սերտած սիրո խորհուրդը խրթին:

Միամիտ էի, ինձ տանջում էին,
Հիանում վերքիս գեղեցիկ ցավով,
Խուսափում էին ու կանչում էին
Ու ժպտում էին մեղմ ու հանցավոր:

Ես գնում էի նրանց հետքերով,
Խենթանում էի ու հարբում էի,
Հարբելիս դառնում բարի ու ներող
Ու ներումներից տառապում էի:

...Դրսում մայրամուտն ամպեր է բարդել,
Շուտով գիշերը կիջնի հարավի...
Հասկացիր, հոգիս, հոգնած եմ արդեն
Ու քնքջության եմ միայն ծարավի...

1983

* * *

Գիշերն այս մութ ու խորհրդավոր է՝ որպես բնագոյ,
Ու բնագոյի պես՝ տազնապահար...
Վերում ծայրեծայր իր սպին գծեց հրե մի աստղ,
Ու նորից մութ է, նորից խավար:

Փակում աչքերս ու մտորում եմ աստղի մասին.
Ինչո՞ւ բռնկվեց, ինչո՞ւ հանգավ...
Եվ հանկարծ ողջը թվում է այնպես դատարկ ու սին,
Այնպես անմիտ ու այնպես անկապ:

Ես սարսափում եմ ու սպասում եմ լուսաբացին՝
Քո տաք քնքշանքը աղերսելու,
Աղերսելու քո ոսկե մարմինը, նման հացի,
Աղերսելու քեզ ու ասելու.

– Գնանք, ես հեռվում մի հովիտ գիտեմ, մի տաք քարափ,
Նա արևոտ է, որպես եղեմ...
Բայց դու վարանես, տազնապես պիտի, իմ թուխ կարապ,
Ու պիտի չգաս, ես այդ գիտեմ:

Պատուհանիս տակ լուռ կծկվել է գիշերը սառ
Ու մղկտում է, որպես կսկիծ...
Դու պիտի չգաս... դու քնած էիր ու չտեսար
Ոչ այդ անկումը, ոչ այդ սպին...

1983

ԱՍՏՎԱԾ ՔԵՉ ԴԱՀԻ

Հիշում եմ հիմա,
Դու այն երեկո ուրիշ էիր շատ,
Դու այն երեկո շատ էիր նման
Մի չակնկալված
Ու հանկարծ ծնված բանաստեղծության:

Դու այն երեկո արյան կանչ էիր,
Արյան ամոթխած արարողություն
Ու փոքրիկ ձեռքի վախվորած քնքշանք:

Գլուխդ ուսիս՝
Դու ուսիս իջած փառքի պես էիր,
Դու փառքի նման բաղձալի էիր
Ու վտանգավոր:

Դու նման էիր ելած ալիքի,
Եվս մի վայրկյան՝
Ու թվում էր, թե փշրվես պիտի
Իմ ծարավների ավազի վրա:

Հետո երազում
Մենք քայլում էինք վիհերի եզրով,
Որ բաղձալի էր ու վտանգավոր:
Ու ես երազում դողում քեզ համար
Եվ մի խոսք էի միայն շշնջում.
– Աստված քեզ պահի...

* * *

Քաղաքը թողինք,
Թողինք ներքևում տրտմությունը գորշ,
Իսկ այնտեղ արև, ծաղիկ էր ու ձյուն,
Չնհալի մեջ էր լեռնաշխարհը ողջ,
Լեռնաշխարհը ողջ
Դարձել էր ասես հսկա մի արցունք...

Դու ինձ հետ էիր,
Դու՝ մոտիկ, անհաս, անհասկանալի,
Ու մատներս էին քնքշանքից ցավում:
Չորում գետակը հորդել ճնհալից,
Քեզ պես՝
Չգործած իր մեղքն էր քավում...

Մեր գլխի վրա՝ կապույտն անհունի,
Մեր ոտքերի տակ ահն էր խորությամբ,
Ու չգիտեի,
Ո՞ր է սահմանը ծաղկի ու ձյունի,
Սահմանը ցավի ու երանության...

Ամեն ինչ պարզ էր,
Ամեն ինչ՝ խրթին ու մութ մի հարցում,
Եվ չկար նորից ոչ սկիզբ, ոչ վերջ...
Լեռնաշխարհը ողջ
Դարձել էր ասես հսկա մի արցունք,
Ու կանգնած էինք մենք արցունքի մեջ:

1983

ՈՐՄՆԱՆԿԱՐ

Տաճար է ավեր, տապալված կամար,
Պատին՝ ծեփաթափ մի Աստվածամայր...

Վարսի մի հյուսկե, զույգ աչքեր են ջինջ,
Ուսի մի բեկոր և ուրիշ ոչինչ:

Ես տեսիլներիս գույները վառում
Ու եղծանվածն եմ նորից նկարում:

Քնքշորեն կորվող ուսն Աստվածամոր
Չարդարում եմ ես ոսկե մի ծամով:

Սրբազան դողով կուրծքն եմ նկարում,
Քողի տակ պահած գորով ու գարուն:

Այնպես եմ անում, որ մատներն ի վար
Քնքշություն կաթի ու շող մի շվար:

Եվ ոտքերի տակ՝ տապալված քարեր,
Հերքված աստվածներ, մամոռոտած դարեր,

Քնած մրրիկներ, հողմեր մոլեգին,
Քայլում է ահա հողեղեն մի կին...

1983

* * *

Ու ես գիտեմ,
Պիտի անվերջ
Կանչես այդպես ու հեռանաս,
Պիտի անվերջ թվաս մոտիկ,
Բայց և հավետ լինես անհաս:
Լինես ծարավ
Ու ոգու քաղց,
Տագնապի պես ինձ հետ թես,
Մերթ ինձ այրես պիտի տենդով
Ու մերթ վրաս լուռ անձրևես...
Պիտի անվերջ
Քո կարոտի
Հրաշք-հավքը վրաս հսկի
Ու թևերից իր կապուտակ
Պիտի մաղի ցավ ու կսկիծ...
Ու ես քայլեմ պիտի անվերջ
Գլխապտույտ վիհի ափով,
Հարբած լույսով,
Մութով հարբած,
Հարբած սիրով ու տագնապով...
Կարոտներով ու ցավերով
Ճանապարհս պիտի ցողեմ,
Բայց և հավետ,
Բայց և հավետ
Օրհնանքներով քեզ ողողեմ...

1977

ՊԱՀԸ

Եթե իրավ է, որ այս աշխարհում չի կորչում ոչինչ,
Եթե իրավ է, որ չի մահանում ժամանակն անգամ,
Ուրեմն դեռ կա, դեռ թրթռում է այն գիշերը ջինջ,
Ու ցուցլում է դեռ այն լուսնկան:

Եվ կա այն տղան, որ ոտքից գլուխ տագնապ էր ու դող,
Ու աղջիկն այն կա, կոպին՝ անհայտի արցունքը բյուրեղ,
Ու կա պահն այն սուրբ, երբ այդ պատանու շուրթերն աղոթող
Սիրտ չէին անում նրան համբուրել:

Կապույտների մեջ ավելետում է ուրիշ մի կապույտ,
Աստղալույսի մեջ ուրիշ աստղերի գնգոց է հոսում,
Կապույտի, բարդու և աստղալույսի շշուկով մաքուր
Ինքը՝ գաղտնիքն է ասես սաղմոսում...

Լսում ես, տղա, դու մնա այդտեղ, դու առաջ չգաս,
Դու մնա այդտեղ քո դողով, լույսով, տագնապով քո լուռ,
Վարանիր այդպես ու չհամբուրես դեռ այն աղջկան
Ու դեռ չբացես նրա կուրծքը սուրբ:

Իսկ ես կգնամ... ինձ մրրիկներն են սպասում ծամփին,
Ճերմակ հողմեր են սպասում հեռվում, որ հոգիս խանձեն,
Որ խլեն ինձնից այդ տագնապը, դողն, այդ գաղտնիքն անբիծ
Ու թողնեն հետո այս պարապն անձն:

Եվ կգա մի օր, գիտեմ, հեռու չէ այդ օրը արդեն,
Ու քեզ կկանչեմ, որ դու գաս դողով այդ հրաշք պահի,
Որ կոպերիս տակ, իբրև սրբազան ու միակ պարզև,
Ես այդ սուրբ պահը տանեմ աշխարհից:

1983



ԵՐԿԻՐ

ԳԱՂՏՆԱՐԱՆ



*Ես՝ քարեղեն մոլուցք, ճյունահողմի գանգատ,
Մաղկաթերթի թախիժ ու մամուռի արցունք...*

ԵՐԿԻՐ, ՔԱՐԻ ՄՈԼՈՒՅՔ...

Երկիր, քարի մոլուցք ու մոլեգնած դու ջուր,
Երկիր, սեզի սոսափ ու կապույտի սահանք,
Աստծուն խոյահարող լեռան քարե եղջյուր
Ու գղջացող վիհի քարե ապաշխարանք:

Երկիր, ձյունահողմի ձերմակ ու ձիգ գանգատ
Եվ անդունդներն ընկած մրրիկների հարցում,
Երկիր, քարափն ի վար ջրի կապույտ գանգակ,
Ծաղկաթերթի թախիծ ու մամուռի արցունք:

Երկիր, պղնձի ձիչ, որձաքարի հառաչ
Եվ խաչքարին խաչված գեղեցկության աղերս,
Երկիր, արեգակի ու անհունի առաջ
Դու ծնկածալ աղոթք, վեր խոյացող դու ծես:

Երկիր, որդին եմ քո, դար ու դարեր անկանգ
Ես գնում եմ քեզ հետ ճամփիս վիհ ու բարձունք,
Ես՝ քարեղեն մոլուցք, ձյունահողմի գանգատ,
Ծաղկաթերթի թախիծ ու մամուռի արցունք:

1971

ՀԱՐՍՏՈՒԹՅՈՒՆ

Անդունդներդ ի վար ու վիհերդ ի վար փչող բարձունքի,
Քարանձավներիդ երակներն ի վար քամվող արցունքի,
Նահատակներիդ սրբության վրա ծխացող խունկի
Հին տառապանքը, այս հին մխանքը տվեցիր դու ինձ:

Չորս կողմից եկող մրրիկների մեջ հողմահարվելու,
Ապառաժներիդ ու լեռներիդ պես անբոց այրվելու,
Ծեկ հողերիդ հետ պատառոտվելու ու ծարավելու
Այս տվայտանքը, այս դժվար կյանքը տվեցիր դու ինձ:

Լուսնկայի տակ տխրորեն թևող անտունիների,
Բեկված խաչքարի, փլված կամարի, խախտած սյուների,
Գարնան կանաչի ու ծաղկի վրա իջած ձյունների
Այս թախծությունը և խստությունը տվեցիր դու ինձ:

Որձաքարերիդ ու սարերիդ հետ անձայն տոկալու,
Հոգսը՝ ակոսին, ցավը՝ սյունների խոյանքին տալու,
Արջալույսի դեմ ծունկի չոքելու և հավատալու
Այս տառապագին հարստությունը տվեցիր դու ինձ:

1971

* * *

Ասում են հեռու Եփրատն է մի օր
Օրորել մանուկ իմ հոգու քունը,
Արագիլների կանչը սգավոր
Ու կապույտ իրիկունը...

Մեր ասպատակված, մեր հին հարկի տակ
Ոչ մի երեկո կրակ չեն վառել,
Ու լուսինն է լոկ լույսն իր սպիտակ
Մեր երդիկն ի վար տխրորեն մաղել:

Ձգվել է գիշերն ու ձգվել երկար,
Խուլ խշշացել է ջուրը Եփրատի,
Լոկ նա է խախտել լռությունը քար
Ու յոթնապատիկ անեծքն իմ տատի:

Տանիքի վրա օրորվել է մեղմ
Հրդեհից փրկված մենավոր բարդին,
Ու վիշտ, վիշտ է խառնված եղել
Դեռատի իմ մոր անարատ կաթին:

Հեռո՛ւ է, ո՛րք է այն տունը... Ու միշտ
Գիշերով ցավն է զարթնում իմ հոգում.
Այդ դո՛ւ ես, դո՛ւ ես, հայրենի իմ վիշտ,
Երակներիս մեջ այդպես մորմոքում...

1947

ՀԱՅՐԵՆԻՔ

...Եվ թվում է ինձ՝ աղջամուղջի մեջ այն վաղնջական
Բարբառել մի ձայն, այսպես է ասել ձայնն այդ բարբառող.
– Այստեղ քար է բիրտ, անդունդ է մթին, վիհեր են անկման,
Արի քեզ տանեմ ես ուրիշ մի հող:

Արի քեզ տանեմ մի ուրիշ աշխարհ, հեռավոր դաշտեր,
Ուր հողը փափուկ, ուր ջուրը առատ ու խոտն է թավիշ...
Իսկ ես ասել եմ. – Այստեղ եմ ծնվել, կմնամ այստեղ,
Թեկուզ կաղկանձեմ ու ոռնամ ցավից...

Նախ քարանձավ էր... Ու ես առաջին խարուկիս բոցով
Որձաքարերի վայրենությունն եմ քնքշորեն շոյել,
Հետո կայծքար եմ առել ու նրա տխուր զնգոցով
Երազանքներս եմ պատերին փորել:

Ժայռերի վրա արյունոտվել են ոտքերն իմ բոբիկ,
Լեռնալանջերի մրրիկները ցուրտ իմ կուրծքն են վառել,
Եվ իմ բարբառը արձագանքելով քարերի մեջ բիրտ,
Ինչ-որ քարեղեն զնգոց է առել:

Այդ բիրտ բարբառով, երկիր, քնքշանք եմ քեզ շնջացել,
Քնքուշ անուններ տվել ծառերիդ ու թռչուններիդ,
Իմ հոգում նիրհող առասպելների ծալքերը բացել,
Կապույտ եմ հանել, կախել վիհերիդ:

Քո մերկ ժայռերին իմ երազների կանաչն եմ հինել,
Սրտիս հառաչն ու հոգուս շառաչն եմ խառնել գետերիդ,

Հորինել եմ ես գեղեցիկ ու մերկ աստվածուհիներ,
Շնորհել լազուր ու սուրբ եթերիդ:

Թախիծ եմ դրել սոսափյունի մեջ քո բարակ ուռու.
Առեղծվածների մշուշով լցրել այրերդ խավար,
Լուսնի լույսի հետ որպես հմայիլ ու որպես հուռուրթ
Բաղձանք եմ կախել քարափների ի վար:

Ես ոգիներ եմ դրել փչակում քո կաղնիների,
Սոսյաց անտառում հմայողների հանդես եմ բացել,
Հողիդ եմ տվել ես աձյունները իմ նախնիների,
Եվ մայրացել է հողն ու հայրացել:

Ու երբ եկել են, որ խլեն ինձնից լեռնաշխարհն այս լուրթ,
Խոցվել եմ հաձախ ես ոսոխների նետ ու նիզակից.
Արյունս կաթ-կաթ ծծվել է հողում, և այս հողը սուրբ
Դարձել է այդպես ինձ արյունակից...

Ու երբ նորից է բարբառել հեռվից ձայնն այդ հմայող,
Ու երբ նորից է խոստացել չքնաղ ու կանաչ ավեր,
Ասել եմ նրան.– Չկա այսպիսի հայրենիք ու հող,
Քանզի այստեղ եմ արյունս թափել:

Այս հողին եմ ես դարեդար խառնել արցունք ու կարոտ,
Խառնել տառապանք, հրաշք եմ խառնել ու խառնել ոգի,
Որ երբեք, երբեք չթողնեմ կյանքում երկիրն այս քարոտ
Ու երբեք, երբեք չտամ ոչ ոքի...

1979

ԿԱՐՄԻՐ ԲԼՈՒՐ

Ծղրիդը բռնել ամուսն արևի հրեղեն մի թել,
Երգի է փոխում ու հետ առաքում...
Երկրպագության սրբազան դողով ծունկի է իջել
Մի պղնձաշուրթ, լուսաբառ մի քուրմ...

Պղինձ ու բրոնզ... Կովից են դարձել ռազմիկներն արի,
Որ արծվաքիթ են, թուխ են ու խայտակ,
Հոնքերին՝ փոշի, իսկ հագուստներին դեռ երիվարի
Երախից պոկված փրփուրներ կան տաք:

Լորաթուխ հացի բուրմունք է, օրհնանք է, ծփանք է ու ծուխ,
Իսկ գավաթներում գինու բոց ու եռք...
Խրախձանում են ռազմիկներն արի... Եվ հարձերն են թուխ
Լրանց ծնկներին նազում կիսամերկ:

Որտեղ եմ տեսել... Ծանոթ են այնպես այս դեմքերն ամեն,
Ծանոթ ծիծաղ է ու ծանոթ թախիծ:
Այնպես է թվում, որ եթե երկար ու անթարթ նայեմ,
Կարող եմ գտնել անգամ ինքս ինձ:

...Ծղրիդը բռնել ամուսն արևի հրեղեն մի թել,
Ձգում է երկար ու հավերժորեն:
Զքացած տեսիլք: Ածխացած աղյուս: Ածխացած պատեր:
Կարասների մեջ՝ ածխացած ցորեն:

Դարևր են անցել, թե՛ ակնթարթ ու վայրկյան է թևել
Արարատ լեռան լուռ հայացքի տակ...
Եվ մանուկներ են բարձրանում ահա շեկ բլուրն ի վեր,
Որ արծվաքիթ են, թուխ են ու խայտակ:

ՃՆՃՂՈՒԿԸ

Ծիծառների մասին այնքան
Լավ երգեր կան գրված,
Ես ինքս էլ եմ հազար անգամ
Փառաբանել նրանց:

Բայց երբ աշնան քամին սուլեց,
Ամառն իր հետ տարավ,
Նրանք թողին բներն իրենց
Ու չվեցին հարավ:

Նրանք դժգոհ հեռու թռան՝
Որոնելու նոր սեր
Ու չուզեցին ինձ հետ ձմռան
Ձյունն ու ցուրտը կիսել:

Բայց դու, իմ հեզ, խիզախ թռչնակ,
Չվախեցար ձյունից,
Չչվեցիր ափերը տաք,
Քո հայրենի բնից:

Գուցե հիմա դու չես գտնում
Ոչ մի փշուր, հատիկ,
Ու դողում են, դողում ցրտից
Քո ոտքերը բոբիկ:

Սակայն դու ես մարդկանց համար
Գարնան երգը երգում,
Թեկուզ և չես փառաբանված
Ինքդ ոչ մի երգում:

1955

ԵՄ ՀԱՅԱՍՏԱՆ, ԵՄ ՔԱՐԵ...

Իմ լեռները աստղամերձ խենթ խոյանքներ են հոգուս,
Որ փոթորկել են ցավից ու կապույտում քարացել,
Եվ անդունդներն իմ մթին գաղտնարաններն են ոգուս,
Որ դարերով ցասումիս հեղեղներն են շառաչել:

Հազար կայծակ իր շեղբով իմ գոյությունն է հերքել,
Ու Եփրատն իմ սանձակոծ դուրս է եկել իր ափից...
Տաղերգուներն իմ նստած այնքան եղեռն են երգել,
Որ մագաղաթը անգամ դժգունել է սարսափից:

Բայց, Արարատ, կատարիդ ցուցլանքներն այն մաքուր
Իմ հույսերն են դարավոր, որ չեն մարել երբևէ,
Եվ դարերի խավարից սեգ արծիվներն իմ հոգու
Վերացել են ու դեպի այդ ցուլանքներն են թևել:

Ու ես ապրել եմ նորից, կերտել շեներն իմ թափուր,
Ստեղծածիս վեհությամբ իմ վեհությունն եմ չափել
Եվ օրորել սրտիս մեջ Սևանա լիճն իմ կապույտ,
Որպես հույսի ու լույսի նվիրական առասպել:

Եվ դարերով տառապած ու կործանված, ու ավեր,
Վերջին եղեռն եմ տեսել ես աչքերով դեռ իմ թաց,
Երբ իմ բախտի երկնքում լուսնի մահիկն էր կախվել,
Որպես ջարդի յաթաղան, որպես անեծք շիկացած:

Բայց լեռներն իմ աստղամերձ խենթ խոյանքներն են հոգուս,
Որ փոթորկել են ցավից ու կամքի պես քարացել,

Եվ անդունդներն իմ մթին գաղտնարաններն են ոգուս,
Որ նորածին լույսերի օրորոցներ են դարձել:

Ու ես ելել եմ նորից, կերտել շեներն իմ թափուր,
Ստեղծածիս վեհությամբ իմ վեհությունն եմ չափել...
Ես՝ Հայաստան, ես՝ քարե, ես՝ հրագույն, ես՝ կապույտ,
Ես՝ հարության առեղծված, հավերժության առասպել...

1946

* * *

Դու փոքրիկ ես, իմ աշխարհ,
Հայաստան իմ, Հայաստան,
Մի բուռ հող ես, մի բուռ քար,
Հայաստան իմ, Հայաստան...
Բայց քո մի բուռ այդ հողում
Ու քո մի բուռ քարի մեջ՝
Քանի բարձունք ու կատար,
Հայաստան իմ, Հայաստան...

1956

ԵՐԳՆ ՀԱՅԱՍՏԱՆԻ

Լույս է շաղում եղեգան փողն ու թրթռում վինը գողթան,
Եվ վարձակներն են կաքավում հեգաձկուն ու նագանի...
Բուրմունքի պես խոնավ հողի ու ծխի պես հայրենի տան
Ձգվում է երգն իմ փառավոր, իմ դարավոր Հայաստանի:

Պանդուխտն ահա մախաղն առած, շրջում է հեգ օտար հողում,
Երկիր չվող ծիծեռնակին տալիս կարոտն իր, որ տանի,
Շինականի երդիկն ի վար ամպն իր տխուր լացն է ցողում,
Ու վերքի պես երգն է մխում իմ վիրավոր Հայաստանի:

Մոկաց հարսներն են շորորում՝ աչքերը սև, հոնքերը կեռ,
Լուանյակ գիշեր... Ոսկե արտում ջահել հնձվորն, ախ, ի՞նչ անի,
Հարսն իր ֆիդան յարին հիշել՝ ձեռքը ծոցին երգում է սեր,
Ու սիրո պես երգն է վառվում իմ սիրավոր Հայաստանի:

Սասնա պարթև ծուերի պարն ասես մրրիկ է սանձակոծ,
Ու ուսմկական ահեղ պարից թնդում են թունդ տուն ու տանիք,
Մերթ փոթորկված անտառի պես, մերթ որպես թեժ օջախի բոց,
Երգն է շաչում ու շառաչում իմ թևավոր Հայաստանի:

Աջնան ոսկին է հրդեհվում այգիներում Արարատյան,
Դեպի կապույտն է երկարում ծիրանի ծուխն իմ ծխանի,
Ու ծխի հետ հայրենի տան ձգվում է երգն հավերժության
Իմ վիրավոր, իմ սիրավոր, իմ հին ու նոր Հայաստանի:

1950

ԶՎԱՐԹՆՈՑԻ ԱՐԾԻՎԸ

Տապալված սյուններ, որմեր հողմածեծ
Ու քանդակազարդ բեկորներ քարի,
Որ հրաշագործ նախշերում իրենց
Դեռ պահպանում են շունչը հանձարի:

Եվ այդ տապալված հրաշքի վրա,
Որմերի վրա հին ու փառահեղ,
Իր արքայական թևերը փռած,
Քարե մի հզոր արծիվ է թառել:

Քարե մի արծիվ, որ իր թևերին
Տաճարի վսեմ գմբեթն է պահել,
Պահել մեր ոգու թռիչքը վերին
Ու ժամանակի ծանրությունն ահեղ:

Հողմեր են եկել, հողմեր են անցել
Ու այս որմերն են ծեծել դարեդար,
Շատ խոյակ ու սյուն փոշի են դարձել,
Բայց մնացել է արծիվն անվթար:

Ու հպարտ թառած՝ հայացքն անհանգիստ
Հառել է ահա հեռու, շատ հեռու,
Կարծես հենց նոր է իջել ձախրանքից
Ու պատրաստվում է նորից ձախրելու...

Լսիր, շաչում են թևերը նրա,
Կանչում է նրան երկինքը անծիր...
– Ճախրիր, սավառնիր, սլացիր հպարտ,
Հայոց հանձարի սրաթև արծիվ:

1954

ԵՐԿԻՐ ՀԱՅՐԵՆԻ

Մարտիրոս Սարյանին

Արև, արև, ու կապույտում
Բարդիններ կան արևավոր,
Արև, արև, ու կապույտում
Արարատ լեռն է փառավոր,
Արև, արև, ու իմ դիմաց
Հրաշքի պես ահա բացվում
Իմ օրրանը, իմ հայրենին,
Իմ Հայաստանն է տարածվում...
Փռվում է դաշտն Արարատյան
Դեղծիների անուշ հոտով,
Ողկույզների մեջ մեղրացող
Իր կեսօրվա ոսկե տոթով,
Իր նորաթուխ հացի բույրով,
Ճամփեզրյա իր օշոշով,
Թոնիրների կապույտ ծխով
Ու կալերի ոսկե փոշով,
Իր մրգերով, իր բերքերով,
Աշնանային թուխ հերկերով,
Այգիների մեջ ոլորվող
Կոմիտասյան իր երգերով...
Արև, արև, ու լույսի մեջ
Ահա լեռները կապուտակ,
Որ կարծրացել են դարերի
Ու շանթերի հարվածի տակ:
Ժայռերն ահա, որոնց շուրթից

Խոլ ջրվեժներ են որոտում,
Տեսիլների պես ոսկեղեն
Ծիածաններ թողած օդում,
Ու ժայռերի քարե կրծքին,
Թերթերի մեջ հակինթ ու ցող,
Անմոռուկներ, տերեփուկներ
Ու կակաչներ բոցկլտացող,
Ամպեր՝ թեթև ու սպիտակ,
Արահետներ՝ ոլոր ու կեռ,
Եվ անդունդները անհատակ,
Որպես հսկա սրի հետքեր...
Արև, արև, ու արևի
Ցուլանքների մեջ հուրհրան՝
Կյանքի պես թանկ մի հայրենիք,
Արյան պես սուրբ մի օրրան...

1954

ՀԱՎԱՏՈՒՄ ԵՄ ՔԵՉ

Հավատում եմ քեզ, իմ հայ ժողովուրդ,
Քեզ, որ լեռներում այս բարձրիկ ու լուրթ
Ապրել ես դարեր, դարեր մաքառել
Եվ քո կրակը միշտ վառ ես պահել...
Քեզ, որ առաջին հասկն ես սերմանել,
Քեզ, որ առաջին գինին ես քամել,
Լույսի դեմ չոքել հեթանոսորեն,
Փառաբանել ես ողկույզ ու ցորեն,
Քեզ, որ կերտող ես դարերում եղել,
Քարեր ես ձևել, ժայռեր ես պեղել,
Քարի քար խղճից հանել ես բարին,
Ազնվությունդ տվել խաչքարին
Եվ քո վաստակով, քո կոթողներով,
Քո մատյաններով, սիրո տողերով,
Գողթան երգերով, խորունկ վերքերով
Եվ խոյանքներով քո լույս հանձարի
Կանգնել ես դարեր սրի դեմ չարի...

Ցեղեր են եկել, արշավել ցեղեր,
Քո արդար ու հին արյունն են հեղել,
Ասպատակել են ու ջարդել են քեզ,
Դարեր ու դարեր աղարտել են քեզ,
Բայց դու Նարեկով ինքդ քեզ զտել,
Քո սուրբ հարության հրաշքը գտել
Եվ քո վաստակով, քո կոթողներով,
Քո մատյաններով, սիրո տողերով,
Գողթան երգերով, խորունկ վերքերով

Եվ խոյանքներով քո լույս հանձարի
Հասել հողմերին այս ահեղ դարի:

Հավատում եմ քեզ, իմ հայ ժողովուրդ,
Քեզ, իմ տառապանք, իմ խորին խորհուրդ,
Քեզ, որ Դեր-Չօրի խորշակով կիզված,
Եվ այդպես ցրիվ, և այդպես կիսված,
Ապրեցիր նորից, նորից տևեցիր,
Դեպի երազդ՝ նորից թևեցիր,
Հավատում եմ քեզ, քո արմատներին,
Քո հոգու թաքուն խորխորատներին,
Բիրտ ու բարբարոս քո կարծրությանը,
Խոնարհ ու փխրուն քո թախծությանը,
Քո հին արյանը, քո արյան կանչին,
Քո հզոր լեզվին՝ մեծաաքանչին,
Քո մաքուր գինուն, քո արդար հացին,
Հարատևության քո առեղծվածին...

Գիտե՛մ, այս դարի հողմերում վրդով
Դարերից բերած խորին խորհրդով
Քեզ պիտի նորից Նարեկով զտես,
Խաչքարիդ ազնիվ լույսով մկրտես,
Ջրդեղես պիտի Չարենցյան հրով
Ու քո վաստակով, քո կոթողներով,
Քո մատյաններով, սիրո տողերով,
Քո մաքուր գինով, քո արդար հացով,
Հարատևության քո առեղծվածով
Հավերժես պիտի լեռներում այս լուրթ,
Հավատում եմ քեզ, իմ հայ ժողովուրդ...

1954-81

* * *

Քարե մրրիկն է այստեղ ննջում թևերը ծալած,
Անգամ գետակն այս կապույտ ասես թե քար է հալած...
Այն եղնիկնե՞ր են արդյոք, թե՞ լեռնային քարայծեր,
Որ նետահար են եղել ու քարափին քարացել,
Թե՞ արծիվներ, որ մի օր բարձունքներին այս չոքել,
Ապա անզոր են եղել ժայռից թևերը պոկել
Ու քարացել են այստեղ, բարձունքներում այս սիրած,
Մագիլները հավիտյան քարաքոսի մեջ խրած...
Քար է այստեղ ամեն ինչ, քարե սլացք ու խոյանք,
Քարե անտաշ կամարներ, անտաշ սյուն է ու խոյակ...
Իսկ ամենից բարձր ու վեր, ուր արծիվներն են թևում,
Իր քարակոփ վեհությամբ քարե բերդն է երևում:
Ոսոխի սուրն է մի օր այս ձորերում շառաչել,
Ու մեր ոգին է այսպես սրերի դեմ քարացել...

1961

* * *

Մի փոշոտ, փափուկ ճամփա,
Փշատի փոշոտ ծառեր,
Մի կապոյտ, կապոյտ երկինք
Ու արև, արև, արև...

Կատարին՝ լույսից շիկնած
Մի թեթև ամպի ծվեն,
Արարատ լեռն է ցոլում՝
Նյութեղեն-աննյութեղեն...

Ուխտավոր հոգնած մի հով,
Անցնելով բարդուց բարդի,
Գնում է, ծունկի իջնում
Խորանում Արարատի:

Մի փոշոտ, փափուկ ճամփա,
Փշատի փոշոտ ծառեր,
Մի կապոյտ, կապոյտ երկինք
Ու արև, արև, արև...

Հովի հետ այդ ուխտավոր,
Անցնելով բարդուց բարդի,
Ուզում ես գնալ, գնալ
Ու փարվել Արարատին...

1962

ՔԱՐԵ ՔԼՔՇԱԼՔ

Լեռ ու անդունդ, ձոր ու կատար,
Ապառաժներ պատառ-պատառ,
Քարե թռիչք, քարե անկում...
Կապույտ մշուշ, կապույտ եթեր,
Ու կապույտից պոկված գետեր,
Որ կապույտով են հորձանքում...

Լեռներն այստեղ բարձր են այնքան,
Որ շանթակերպ արծիվն անգամ
Թև չի բախում նրանց ձյունին,
Վիհերն այստեղ խորն են այնքան,
Որ ձմեռվա կեսին անգամ
Բնց է հագնում հանկարծ հոնին:

Ժայռերն այստեղ կարծր են այնքան,
Պղնձաջիղ, որձամկան,
Որ բախվելիս շանթ են ցանում,
Բայց և քնքուշ, քնքուշ այնքան,
Որ պղնձի միջից անգամ
Ծաղկի հրաշք ծիլն են հանում:

Հողմերն այստեղ այնքան են բիրտ,
Որ լեռներից ժայռ են պոկում
Ու գլորում անդունդն ի վար,
Հովերն այնքան են քնքշասիրտ,
Որ ծաղկի դեմ խոնարհ չորում,
Աղոթում են մեղմ ու շվար:

Լեռ ու անդունդ, ձոր ու կատար,
Ապառաժներ պատառ-պատառ,
Քարե թռիչք, քարե անկում...
Հայոց երկիր, հայոց իմ հող,
Դու իմ քարե մոլուցք ու դխ,
Իմ քնքշություն, իմ քնքշություն...

1963

ՔԱՐԱՓ Է, ՔԱՐ Է...

Քարափ է, քար է ամբողջովին,
Քարաբեկոր է վայրի ու կուռ,
Բայց պղնձագույն նրա կողից
Շատրվանել է ծառ մի գանգուր:

Ծառն այդ դժվար է ապրել կյանքում,
Ու թվում է, երբ բնին խփես,
Նա, կարծրացած իր տառապանքում,
Ջրնգա պիտի պողպատի պես...

1961

* * *

Երբ կարոտել եմ խոյանքի՝ Արարատիդ եմ ես նայել,
Լույսերի մեջ հավերժացող բաց ճակատիդ եմ ես նայել:

Դու դարերի կապույտ միգում աստղ ես եղել ոսկեվորիկ,
Աստղալույսի պես ինձ հասած մագաղաթիդ եմ ես նայել:

Ստեղծումի և արարման հրաշքն է միշտ գերել հոգիդ,
Հրաշակերտ Չվարթնոցիդ ու Հաղպատիդ եմ ես նայել:

Եվ սակայն կարծր ես դու եղել բիրտ սրի դեմ ու նիզակի,
Որձաքարե հիմունքներիդ, սյուն ու պատիդ եմ ես նայել:

Տառապանքի հերկերի մեջ՝ դու ոսկերուռ մի սերմնացան,
Թեև փոքրիկ, սակայն արդար ցորեն արտիդ եմ ես նայել:

Սառն ու ահեղ հողմերի դեմ պտղավորված դու ծիրանի,
Ժայռ ու քարի մեջ մխրձված խոր արմատիդ եմ ես նայել:

1962

ՅՈՒԹ ԵՐԳ՝ ԵՐԿՐԻՆ

Ա

Երկիր,

Լեռներիդ կապույտ ալիքը

Կապույտ աստղերի ու կապույտ ցրտի

Ցուլքերի մեջ է լողանում հավերժ...

Երկիր,

Վիհերիդ մութ անդունդներում

Նախապատմական մշուշն է լողում

Առասպելներիդ ծվենների հետ:

Չգիտեմ,

Երկիր,

Ո՞ւմ ներշնչանքից

Դու ծնունդ առար ու արարվեցիր,

Եվ սակայն գիտեմ՝

Դու արարվել ես միայն այն պահին,

Երբ միացել են իմաստությունը և խենթությունը:

Երկիր,

Կարող եմ բարձրանալ հիմա կատարներիդ ի վեր

Եվ այնտեղ կանգնած

Խոսել կապուտակ քո աստղերի հետ,

Ինչպես խոսում են մանուկների հետ ու ծաղիկների:

Կարող եմ,

Երկիր,

Չորերդ իջնել

Եվ անձավներիդ մութի դեմ կանգնած

Չրուցել նրանց լուռության հետ քար,

Ինչպես խոսում են իմաստունների ու ծերերի հետ:

Երկիր,
Ժայռերդ՝ կարծր տառապանք,
Եվ ծաղիկներդ՝ զոհաբերություն,
Ջրերդ՝ մաղթանք,
Ու երկինքը քո՝ լույս ու բարություն:

Կանգնել եմ,
Երկիր,
Կանգնել եմ քո դեմ, չգիտեմ սակայն,
Քեզ եմ լուռ դիտում,
Թե՞ թափառում եմ էությանս մեջ...

Բ

Երկիր,
Երբ ձյունե քո կատարների
Թրթռուն ցուլքն եմ զգում ձակատիս,
Հպարտանում եմ ես իմ ձակատով:
Երբ քո լեռնային բուռ-բուռ լճերում
Պատկերս եմ տեսնում լույսով շաղախված՝
Աստվածանում եմ ինքս իմ աչքին:

Երբ քո լեռներից ու անդունդներից
Արձագանքներն եմ լսում իմ ձայնի՝
Մեծանում եմ ես ու ահագնանում:

Երկիր,
Երբ հոգնած ներբաններիս տակ
Չգում եմ քարե կարծրությունը քո՝
Ամեն քայլիս հետ հավատ եմ տանում:

Գ

Դու փոքր ես,
Երկիր,

Սրտի չափ ես դու,
Եվ դրա համար
Իմ սրտի մեջ եմ ես քեզ միշտ պահում:

Կոպիտ ես, քարոտ,
Քնքշանքի կարոտ,
Եվ դրա համար
Ամենաքնքուշ իմ քնքշանքով եմ
Ես քեզ փայփայում...

Եվ բարձր ես,
Երկիր,
Բարձր ես աստղորեն,
Եվ դրա համար լուծում ակամա
Ու իմ գլուխն եմ քո դեմ խոնարհում:

Դ
Երկիր,
Տառապանքն այն ակոսն է սև,
Որի մեջ լույսի ու իմաստության
Սուրբ հասկն է աճում:

Այդ ակոսն ես դու,
Այդ կնձիռն ես դու աշխարհի դեմքին:

Եվ ծանրացել է քո հասկը,
Երկիր,
Լցվել է լույսով,
Ցորյանով մաքուր...
Երկիր,
Դու ակոս,
Սրբազան դու հասկ
Եվ հաց անսպառ, ն հաց ոգեղեն...

Ե

Երկիր,
Լեռների ըմբոստ են այնքան,
Որ թվում է, թե ուր որ է ահա
Հրաբուխներով որոտան պիտի,
Եվ կապույտն այնքան հեթանոսական,
Որ թվում է, թե արևաթաթախ
Առավոտն է դեռ այն նավասարդի...

Ծխանի ծուխ կա օդում ծփացող,
Եվ ինչ-որ մի տեղ լեռնալանջն ի վեր
Եղջերուններն են երևի վարգում,
Փողեր են փչում,
Թմբուկ են զարկում,
Ու զարթնում է մի կապույտ առասպել...

Արևագալի լույսերից հարբել,
Օրորվում է մի համբարձող բարդի:

Ականջս փողի հեռավոր ձայնին՝
Կարծես գնում եմ,
Գնում ու սուզվում
Առավոտի մեջ այն նավասարդի:

Զ

Երկիր,
Փակում եմ աչքերս քո դեմ,
Եվ կոպերիս տակ հրդեհ է մնում,
Կրակ է մնում
Ու մնում ոսկի...

Երկիր,
Բացում եմ աչքերս քո դեմ՝

Ոսկի է կաթում,
Կրակ է կաթում,
Հրդեհ է կաթում քո ամեն ուստից:

Երկիր,
Ամենի անդունդներից ի վար
Գահավեժ նետվող ջրերդ բոլոր
Իրենց փառավոր այդ անկումի մեջ
Ճերմակ կրակ են
Ու ճերմակ հրդեհ...

Երկիր,
Աստղամոտ քո բարձունքներում
Լձեր կան կապույտ,
Որ երկինքն ի վեր
Կապույտ աղոթքի բոցով են մխում:

Եվ քարերիդ մեջ,
Ապառաժեղեն երակներիդ մեջ
Կայծեր կան նիրհող
Ու նիրհող բոցեր,
Որ բախումներից զարթնում են հանկարծ՝
Բաշերի նման...

Եվ այրվում ես դու,
Դու ոտից գլուխ այրվում ես,
Երկիր,
Եվ այրումի պես գեղեցիկ ես դու:

Է
Լեռների, լեռնապարերդ
Մեկը մյուսի խոյանքն են կրկնում
Մի անկրկնելի վեհափառությամբ:

Եվ քո ջրերը,
Մաքուր ջրերը
Այստեղ դարեդար ժայռեր են փշրում
Իրենց իմաստուն խելագարությամբ:

Եվ ծաղիկներդ,
Եվ ծաղիկներդ,
Քարերի վրա արյուն են ծորում
Մի անկիզելի ողջակիզությամբ:

...Դարեր են գալիս,
Գնում են դարեր,
Եվ ապրում ես դու,
Հավերժում ես դու
Քո անմեկնելի ըմբոստ հեզությամբ:

1963

ԱՆԻ

Այստեղ տնքում է դարեր վիրավոր մի գեղեցկություն,
Եվ համրանում է քարե մի Նարեկ,
Անի,
Լուռ Անի,
Փշրված կամար,
Փշրված դու սյուն,
Դու ստեղծումի փշրված տարերք:

Իմ ու քո միջև
Լուռ հառաչում է փլված մի կամուրջ,
Եվ մրրկում է ալևոր մի գետ,
Դու այսքան մոտիկ,
Այսքան նյութեղեն՝
Եվ սակայն անուրջ,
Որ անմատույց է
Ու խոսում է լոկ իմ արյունի հետ:

Կանգնել եմ քո դեմ
Եվ քեզ արարել նորից սյուն առ սյուն,
Արարել նորից՝
Ինչպես որ կայիր,
Քո կամարներն եմ կապել երազուն
Եվ գմբեթներիդ եմ սուզել ես նորից
Ոլորտների մեջ այս արևային:

Եվ կանգնել ես դու,
Կանգնել քո հպարտ
Ու տխուր փառքում,

Կանգնել ես մենակ ընդդեմ աշխարհի,
Եվ պատերիդ տակ
Գեղեցկությունդ են ահա սակարկում
Խարդավանքը, դավն ու ոխը վայրի:

Եվ իմ դեմ ահա՝
Դարեր վիրավոր մի գեղեցկություն
Ու մի փշրված երազի գմբեթ,
Ոգու սուրբ փոշի,
Երազի աձյուն,
Եվ հառաչանքից ձերմակող մի գետ:

Սակայն ոչ,
Անի,
Դու քար և, սակայն, քարեղեն կրակ,
Քարեղեն երազ,
Քարեղեն դու երգ,
Դարեր ու դարեր սրտե սիրտ ձգվող
Դու արյան երակ,
Դու արյան մրրիկ ու արյան տարերք:
Դու՝ աննյութեղեն,
Դու՝ շունչ ու ոգի,
Դու՝ գեղեցկության երկրպագություն,
Դու՝ արարչության մաքուր մեղեդի,
Հրեղեն դու սյուն...

1964

ՇՆՈՐՀԱՊԱՐՏ ԵՄ ՔԵՉ

Ամռան հրդեհներից այրված, խարկված լեռներ,
Ձմռան մրրիկներից ծեծված, զարկված լեռներ,
Լեռներ, հայոց լեռներ,
Խոնարհ ու բաց լեռներ,
Հորի նման տանջված
Ու տառապած լեռներ...

Ու ես,
Գարնանամուտ,
Շնորհապարտ եմ քեզ,
Շնորհակալ եմ քեզ ու քո գերին,
Որ մի քանի կաթիլ մանուշակով
Դու այցի ես եկել այս լեռներին...

1969

ԻՄ ՀՈՂԸ

Աջնանամուտ է... Իմ լեռնաշխարհն է շողում ոսկեվոր,
Մասիսի վրա լույսի ծվեն է ձյունը նորապատ...
Քայլում եմ, քայլում... Չգիտեմ սակայն, թե ինչ խոսքերով
Եվ ինչպե՞ս լինեմ ես շնորհապարտ
Երանց, որ հողն այս, փոքրիկ այս հողը՝ նման նշխարի,
Փրկել դարերից, փրկել դավերից ագահ աշխարհի,
Փրկել են, բերել ու ինձ շնորհել...

Միայնության մեջ հաճախ եմ խորհել,
Ես ինչ կանեի, եթե չլիներ հողն այս մի պատառ,
Թե ծամփիս վրա չխշշար բարդին այս բարձրակատար,
Թե չհնչեի բուրմունքն այս հողի, ուրցի, փշատի,
Թե աշնան քամին թոնրի հոտն առած՝ դեմս չվազեր,
Թե չըրջեի ծանապարհներին հին Արտաշատի,
Եվ ավերակն այս քարե լուծյամբ
Ինձ նախնիներիս պատգամը չասեր:

Ես ինչ կանեի, եթե չլիներ հողն այս մի պատառ,
Ինչո՞վ կլցվեր անհունը հոգուս,
Երակների մեջ իմ արյունատար
Ինչպե՞ս կխայտար և ինչպե՞ս դեպի սիրտս կհոսեր
Այն զգացումը,
Որ հողե մարդուն դարձնում է աստված
Եվ կոչվում է սեր...
Ինչպես ավիշը ծառաբունն ի վեր,
Լա մայր հողից է բարձրանում իմ մեջ երակ առ երակ,
Մի բուռ սրտիս մեջ դառնում է անծուխ, անբոց մի կրակ,
Այրում է, տանջում,
Եվ այնպես քաղցր է այդ տանջությունը...

Եվ տանջությունն այդ գուցե հենց ինքը՝ երջանկությունն է...

1964

ԻՄ ՄԱՅՐԵՆԻ, ԻՄ ԲԱՐՔԱՌ

Իմ մայրենի, իմ բարբառ, կրակի հետ արարել,
Կրակի պես սրբազան քեզ դարեդար եմ տարել:

Ձգել եմ բոցը քո շեկ ես եղեգան փողն ի վեր,
Որ աստվածներ ծնես դու բոցամորուս ու հուրհեր:

Եվ հայրենի կավածեփ խուղերում եմ վառել քեզ,
Որ ծխանի ծխի հետ հավերժորեն երկարես...

Իմ մայրենի, իմ բարբառ, քեզ հացի հետ արարել
Եվ հացի պես սրբազան քեզ դարեդար եմ տարել:

Քարից քամված ցորյանիս համն ու հոտն եմ տվել քեզ,
Որ անսպառ լինես դու այն օրինված հացի պես:

Որ հեռավոր ձամփեքին օտարության ու քաղցի
Դու շուրթերիս մերձենաս հաղորդության պես հացի:

Իմ մայրենի, իմ բարբառ, քեզ գինու հետ արարել
Եվ գինու պես սրբազան քեզ դարեդար եմ տարել:

Եվ քեզանով արբեցած՝ դարձել տրտունջ ու բողոք,
Ծառս եմ եղել երկնքի գահերի դեմ անողոք:

Ես քեզանով իմ հոգու լույսն ու խավարն եմ հունցել
Եվ կապույտի, անհայտի, հավերժի հետ զրուցել:

Իմ մայրենի, իմ բարբառ, աշխարհում ինչ էլ լինի՝
Դու՛ր իմ կրակ, դու՛ր իմ հաց, դու՛ր սրբազան իմ գինի...

1967

ԿԱ ՄԻ ՀԱՅ ԱՂՋԻԿ

Բուենոս-Այրես հեռու քաղաքում
Կա մի հայ աղջիկ,
Նա որոնում է դեմքն իր մանկության,
Սակայն չի գտնում:

Իսկ այստեղ ահա ամեն թփի տակ
Ցողի, ճաճանչի թարմ խոտի տեսքով
Մանկություններ են անփույթ թափթփած...

Ինչպե՞ս հավաքեմ
Եվ ինչպե՞ս, արդյո՞ք, առաքեմ նրան:

Իսկ այստեղ ահա անձրև է եկել,
Հայոց ապրիլի լիաբուռն անձրև,
Եվ ոտաբոբիկ արեգակն ահա
Ճողփում, վազում է
Անձրևի թողած լույս լճակներով:

Իսկ նա երևի Բուենոս-Այրես հսկա քաղաքի
Մետաղյա ու չոր աղմուկի միջով
Անցնում է մի տաք շշուկի նման
Եվ անցնում իբրև արյան աղերսանք ու հիշողություն...
Երբ էր... Գիշեր էր...
Սևանա վանքն էր
Առեղծվածորեն երկնքից առկախ,

Եվ լծի ափին՝
Բուենոս-Այրես հեռու քաղաքից եկած մի աղջիկ,
Կոպերին՝ խոշոր-խոշոր արտասուք:

Բուենոս-Այրես հսկա քաղաքով
Հիմա երևի անցնում է նա լուռ
Ու վախենում է, որ արտասուքը կպոկվի կոպից
Ու կընկնի հանկարծ շիկացած մայթին:

Ու վախենում է, որ օվկիանոսի հողմերը աղի
Իր փոքրիկ, փխրուն ձեռքերից հանկարծ
Չխլեն բույրը հայրենի քամու, հողի և աշնան:

Անցնում է նա լուռ ու որոնում է:
Ու որոնում է դեմքն իր մանկության
Եվ իր սկիզբը, և իր արմատը...

Աստծո դռան զանգն է նա տալիս,
Բարձրանում է վեր,
Եվ գիշերն ամբողջ
Դեմառդեմ նստած զրույց են անում
Մի համր Աստված ու մի հայ աղջիկ:

Եվ այդ զրույցը գանգատ է ու քեն,
Եվ այդ զրույցը հնամյա արյան ծնկաչոք աղերս,
Եվ այդ զրույցը՝ Գեղարդա վանքի կամարների տակ
Դարեր տվայտող նույն պաղատանքը,
Հրե արցունքով լացող նույն մոմը,
Բեկված խաչքարի նույն տխրությունը
Եվ Արտամետի հին խնձորենու ծաղկաթերթերի
Նույն սուգն սպիտակ...
Եվ հետո նորից Բուենոս-Այրես հսկա քաղաքով

Անցնում է նա լուռ,
Անցնում է իբրև
Մեր հին խաչքարից զատված տխրություն
Եվ Արտամեսի հին խնձորենուց
Պոկված ծաղկաթերթ...

Իսկ շուրջը հողմեր,
Ու հողմերի մեջ՝
Այդ տխրությունը,
Այդ ծաղկաթերթը...

Անցնում է նա լուռ
Ու չի հասկանում, թե այդ ինչպես է աշխարհում եղել,
Որ ինքն իրենից զատել են այդպես
Եվ օվկիանոսներ դրել արանքում:

1968

ԽԱՉՔԱՐ

Տատասկների, քարերի մեջ
Քամիների, արևի մեջ,
Ձյունների մեջ, շոգ ու տոթի,
Այսպես մենակ, այսպես ոտի,
Այսպես խոնարհ, այսպես ըմբոստ,
Այսպես փխրուն, այսպես շիտակ,
Այսպես խրթին ու այսպես պարզ
Կանգնել է նա երկնքի տակ...
Կանգնել է նա արևի դեմ,
Որպես թախիծ ու խղճի սյուն,
Կանգնել է նա դարերի դեմ,
Որպես խաչված գեղեցկություն...

1970

ՄԱՐՄԱՇԵՆ

Ներսում, խնկահոտ չեչաքարերին
Ծնկները դրել իբրև մեղապարտ,
Մի հին թախիծ է տվայտում լոին,
Մի հին մորմոք է զարկվում պատեպատ...
Աղոթում են դեռ ոգիները հին,
Հին ստվերները դողում են շվար...

Դրսում արև է, վանքի գմբեթին
Ծիծեռնակները ձախրում են զվարթ...

1971

* * *

Քանի հազար տարի,
Քանի հազար տարի
Կարծրությունը ձեղքել
Այս բիրտ որձաքարի,
Դու շնչել ես իբրև
Ցայգածաղիկ...

Քանի հազար տարի,
Քանի հազար տարի
Մրրիկների մեջ ցուրտ
Ու հողմերում վայրի
Անրջել ես իբրև
Ցայգածաղիկ...

Իմ հայրենի, իմ հող,
Ապառաժին կպած
Եվ շուրթերդ՝ կապույտ
Արշալույսին հպած՝
Արշալույսով շնչող
Ցայգածաղիկ...

1971

ՀԵՌՎԻՑ

Ես կարծում էի,
Թե ամենայն ինչ քեզ խոստովանել,
Ասել էի քեզ խոսքերն այն բոլոր,
Որ նիրհում էին իմ արյան մեջ հին,
Ինչպես քո գինին՝
Վազերիդ կարմիր երակների մեջ,
Ինչպես քո ոգին՝
Տխուր փառքի մեջ ավերակներիդ,
Եվ ինչպես լույսդ՝
Մազաղաթներիդ խնկահոտ ծալքում...

Բայց ահա կրկին հեռու եմ քեզնից,
Ու կանչում ես դու,
Կանչում ես դու ինձ,
Եվ զգում եմ ես,
Որ անսկիզբ ու անվախձան ես դու,
Ինչպես արյունս,
Որ անսկիզբ ու անվերջ է նաև
Խոստովանանքս...

Եվ կանչում են ինձ քարանձավներիդ,
Որ հեռու-հեռվից
Խալդերենով են ինձ հետ զրուցում,
Անվերձանելի,
Բայց հասկանալի մի խալդերենով:

Եվ կանչում է ինձ

Գառնո քարափի ստվերում բուսած
Ծաղիկն այն վայրի,
Որ մինչև հիմա անանուն է դեռ:

Եվ ինձ են կանչում ապառաժների,
Կանչում պղնձե քո գրաբարով:

Եվ թվում է ինձ,
Թե քամիների ինձ են որոնում,
Որ իմ ճակատին քնքշորեն դնեն
Իրենց բարալիկ ու զով մատների
Հրաշքը տխուր:

Ինձ է որոնում քո առավուտը՝
Լեռան կատարին,
Ասես կայծքարի ծայրին բռնկված
Այդ հսկայական, կապուտակ կայծը...

Ինձ են որոնում գիշերներն ամռան,
Որոնց հրեղեն աստղաթափի տակ
Բանաստեղծներ են ծնվում երևի...

Ինձ են որոնում ամպրոպները քո,
Որ առասպելի մանուկների պես
Մեկմեկու ձեռքից շանթեր են խլում,
Մեկմեկու շուրթից
Որոտմունքներ են խլում անդադար,
Հետո ծիծաղում
Ծիածանները ծիրանի դողով:

Եվ ինձ է կանչում
Ձորակում կորած մի հին ջրաղաց,

Որ թվում է, թե մատյան է խղճի՝
Քարե մի Նարեկ:

Եվ ինձ է կանչում ժպիտդ, երկիր,
Մի բեկված, խոնարհ, տառապած ժպիտ,
Որ մորս դեմքի արտացոլանքն է:

Կանչում ես, երկիր,
Ու դառնում եմ ես
Տխուր ու փխրուն, որպես արտասուք,
Ես ոտից գլուխ դառնում եմ ասես
Հոգևոր մաքուր երաժշտություն
Եվ զրնգում եմ
Օտար աշխարհի քամիների մեջ:

Եվ հեռու հեռվից շնչում եմ ես,
– Գալիս եմ, երկիր, որ քո հին հողում
Հող դառնամ մի բուռ...

1976

ԱՎԵՐԱԿ ՎԱՆՔՈՒՄ

Լեռնային ճամփա, քար է ու կապան,
Վանք է ավերակ, ավերակ մի խուց...
Չեմ եղել այստեղ, ամեն ինչ սակայն
Սիրտ ցավելու չափ ծանոթ է վաղուց:

Քայլում եմ մամռած քարերի միջով,
Կակաչի սուգ է, եղինջի թախիծ,
Ու թվում է, թե չեչաքարն այս չոր
Մաշվել է հենց իմ ծնկների ցավից:

Տեսնում եմ ասես, չոքել եմ մենակ,
Մոմի ստվերն է թրթռում պատին,
Եվ Աստվածամոր տեսքով տխրունակ
Սեր եմ նկարում ես մագաղաթին:

Քարերը լուում, դարերը լուում,
Բուրում են ծխով ու բուրում խունկով,
Իսկ մոմի բոցը հոգնած թրթռում,
Հեկեկում է դեռ հրե արցունքով...

1980

ՀԱՅՈՑ ԼԵՉՈՒ

Քանի գնում, այնքան քաղցրանում ես քիմքիս,
Հին գինի ես դառնում, արշալույսի տաք հաց...
Իմ մայրենի բարբառ՝ որձաքարը հիմքիս,
Դու սրբազան իմ հող, ակոս իմ բաց...

«Հող» եմ ասում ահա, և դու մխում ես լուռ,
Եվ մխանքից քո տաք նախնյաց հոտ է գալիս,
Եվ մխում են նորից սպիներդ տխուր,
Եվ մխում է ցավը կորուսյալի:

«Մայր» եմ ասում, և դու քնքշանում ես այնպես,
Թրթռում ես որպես խղձի շշուկ ու հույս,
Ցավ ես դառնում խոնարհ, դառնում աղոթք մի հեզ
Ու հեռվից տուն կանչող իրիկնալույս:

«Սեր» եմ ասում, և դու արձագանքում ես «սուրբ»,
Ալեվետում ես դու մի ոգեղեն դողով,
Դու քրմորեն ծնկում ու համբուրում ես լուռ
Հողն ու արշալույսի ձեռքը ցողոտ:

Ես «Արյուն» եմ ասում, և դու այրվում ես հիր,
Բոցկլտում ես հեռու մուժից նախնադարյան,
Հոհասեղան դառնում Ավարայրում կարմիր,
Խենթ ոգի ես դառնում, երգում «հարյավ»...

Ես «Ցորյան» եմ ասում, դու աստղի պես ցլում,
Գեղեցկանում ես դու որպես վաստակ,

Ջրաղաց ես դառնում, զրնգում ես ձորում
Ու բուրում ես իբրև ալյուրը տաք:

Ես «Ողկույզ» եմ ասում, դու օրհնվում լույսով,
Բուրումներն ես փռում շողուն շոգի,
Հողի համն ես բերում, աստղի ցղանքը զով,
Բերում արարչական մի մեծ ոգի:

Ես «Հավատ» եմ ասում, հնչյուններիդ բոլոր
Ասես ծունկի իջնում Արարատի հանդեպ,
Բռնկվում են ասես մի սրբազան դողով,
Շիկանում են ասես, դառնում շանթեր:

Ես «Երդում» եմ ասում, և իմ աջը դանդաղ
Բարձրանում է, հանգչում սրտիս վրա...
Քեզ իմ շունչը վերջին, իմ արյունը արդար,
Քեզ, իմ ոգի, իմ հող, հաց ու կրակ...

1978

ՔԱՐ Է ՈՒ ԼՈՅՍ

Քար է ու լոյս,
Լոյս է ու քար...

Խելակորույս
Ու խելագար՝
Քարը ելնում,
Երկինք սուրում,
Բիրտ շուրթերով
Լոյսն համբուրում,
Փշրվում է
Վիհերն ի վար...

Քար է ու լոյս,
Լոյս է ու քար...

1978

ՔԵՉ ՀԵՏ ԵՄ, ԵՐԿԻՐ...

Քեզ հետ եմ, երկիր, քո մեջ եմ, իմ հող,
Կատար եմ ու վիհ, քարափ ու անդունդ,
Կիրճերում կորած գետ եմ տվայտող,
Որ իր քարեղեն ավերն է քանդում:

Ժայռերիդ բուսած հրեղեն մի թուփ,
Հրե ծաղիկ եմ ու վայրի ցորեն,
Քարանձավներիդ թախծությունն եմ մութ,
Որ աղոթում է ձգնակեցորեն:

Լճակներիդ մեջ կապույտ եմ ու դող,
Ծարավի ձիչ եմ հայրենի հանդում,
Բայց ամենից շատ գետ եմ տվայտող,
Որ իր քարեղեն ավերն է քանդում:

1979

ՉԱՅՆ ԻՄ ԱՐՅԱԼ

Դու ամբողջ գիշեր գլխիս տակ էիր, իմ զարկերակ,
Ես ամբողջ գիշեր քեզ էի լսում, ձայն իմ արյան,
Քո շշուկի մեջ ինչ-որ կոհինչ կար նախնադարյան,
Ծարավի ձիչ կար, որ գալարվում էր որպես կրակ:

Հողմի հառաչ կար ու խուլ շառաչ կար որձաքարի,
Բիրտ բարբառիդ մեջ ինչ-որ սուլոց կար սկյութական,
Եվ մի աղոթք կար, որ անմեկին էր ու դյութական,
Եվ զրուցում էր սոսիների հետ սուրբ անտառի:

Եվ մի աղոթք կար, որ մերթ ձախրում էր ու վերանում
Ու մերթ ծնկում էր կապույտների մեջ լուսաբացի,
Որ օրհներգում էր լույսի հրաշքն ու համը հացի,
Գինու հրաշքն ու ծխանի ծուխն էր փառաբանում:

Եվ ինչ-որ զարկ կար, ինչ-որ զնգոց կար տառապագին,
Ինչ-որ զնդան էր, ինչ-որ կուան էր անվերջ զնգում,
Եվ արձագանքը աղջամուղջի մեջ ծանր տնքում,
Ահագնանում էր անդունդների մեջ Արարատի:

Եվ խուլ մռունչ կար, որ որձաքար էր ասես ծամում,
Ինչ-որ տրտունջ կար, որ սաստկանում ու դառնում էր ողբ,
Եվ ողբն ահեղ էր, ողբը ցասում էր, ցասումը՝ ոխ,
Եվ ոխը շանթ էր, որ շառաչում էր ու կարծրանում:

Եվ մի մրրիկ կար, որ անարատ էր խղձի նման,
Որ բարձրանում ու երկնքի դուռն էր ասես բախում,

Որ ասուպի պես իր հրե հարցն էր վերից կախում
Եվ փշրվում էր, և մոխրանում էր անպատասխան:

Եվ նորից ծիչ էր, նորից կոհնչ էր նախնադարյան,
Կռանի զարկ էր, ողբի հառաչ էր, ոխի շառաչ,
Լույսի աղոթք էր, խղձի շշուկ էր, կարոտի կանչ...
Եվ այդ ամենը և անսկիզբ էր, և անվախձան...

1980

* * *

Որձաքարի բեկոր՝
Վրան այրված մամուռ,
Ու քարաքոս,
Ու ժանգ...

Սակայն անթարթ նայիր՝
Երակների մեջ բիրտ
Լոյս է,
Կայծ է
Ու շանթ...

1977

ՄՈՐՍ ՀԻՇԱՏԱԿԻՆ

1.

Մայր, ես դեռ կյանքում ոչ մի երգ չունեմ քո մասին գրած,
ես չեմ կամեցել երկյուղած սերս փոխարկել բառի,
խորհել եմ միայն, թե կա՞ աշխարհում մի այլ արարած
Այսքան տառապած ու այսքան բարի:

Գիշեր է հիմա... Լույսը նիրհում է ու ցավն արթնանում,
Եվ հանգչում ես դու հին ավերակի թախծալի փառքով,
Մի բուռ ես դարձել, ոչ հառաչում ես ու ոչ ձայն հանում,
Մարում ես խաղաղ մի հոգեվարքով:

Երեկ կանչեցիր, որ նստեմ կողքիդ ու Նարեկ կարդամ...
Կարդում էի ես, իսկ դու քո Աստծո հետ էիր խոսում,
Եվ ծավալվում էր ճակատիդ վրա այն լույսը արդար,
Որ տեսել եմ լոկ վանքերում մեր սուրբ:

Այդ լույսերի մեջ երևի մեր հին բարդին էր խշշում,
Արծաթ էր կտրում ու լույս էր տանում հեռավոր մի գետ,
Մեր տան հատակին ընկել արևի ոսկե մի փշուր
Ու խաղ էր անում իմ մանկության հետ:

Դու մանկությունս կտանես քեզ հետ իբրև սուրբ նշխար,
Հանգչող ձայները կտանես հեռու այն մթնշաղի,
Կտանես քեզ հետ մի կարմիր, կանաչ, մի կորած աշխարհի
Եվ համը հացի, և համը աղի:

Մարում ես, մայրիկ, դու խիղճ իմ արդար, խորան իմ ցավի,
Մարում ես, մայրիկ, դու սուրբ նահատակ, դու տանջված վկա,
Գալիք օրերում, երբ ոտքս արնի ու սիրտս ցավի,
Արտասուքներս որտե՞ղ հեկեկամ...

Ու երբ մեր շենքին կանգ առնի հանկարծ վիշտ մի անանուն,
Ո՛վ պիտի դեմը մեր դուռը, սիրտը, մեր խիղճը բանա...
Մարում ես, մայրիկ... Լսո՞ւմ ես, սակայն, այդ ի՞նչ ես անում,
ես՝ ոչինչ, խիղճը պիտի որբանա...

2.

Եվ դու մահացար գարնան մի արդար կիրակնալույսի,
Ասես արարման յոթերորդ օրը դու հանգստացար,
Քո տառապանքը փոխվել մի թեթև, ներող մի լույսի
Ու դեմքիդ վրա ցլում էր պայծառ...

Մնարիդ վրա կանգնել էի ես գլուխս կախած,
Արցունքն ու խիղճն էր իրար խառնված հոգուս մեջ տնքում,
Քեզ ի՞նչ քնքշանքներ կարող էի տալ, որ սակայն, ավաղ,
Չգիտեմ ինչու, չտվի կյանքում...

Ի՞նչ անեմ հիմա բեռն այդ քնքշության, այդ ցավը վերին,
Ի՞նչ անեմ հիմա, քեզ ինչպե՞ս ասեմ խոսքերն իմ չասված,
Ի՞նչ անեմ, ասա, կեսգիշերային այն լուռ ժամերին,
Երբ մենակ մնանք ես, դու և Աստված...

Կեսգիշերային այն լուռ ժամերին, երբ խորհեմ ահով,
Որ մենակ ես դու, հողի տակ ես դու, ու ցուրտ է այնտեղ,
Ինչպե՞ս փայփայեմ ձեռքերդ մրսած ու սիրտդ ցավոտ,
Ինչպե՞ս ծնկաչոք իջնեմ քո հանդեպ:

Մայր, հող ես դառնում... Ու ես քնքշանքս հողին պիտի տամ,
Մայր, հող ես դառնում... Պիտի քնքշանքս ստանամ հողից...
Եվ այդպես օրեր... Լսո՞ւմ ես, մայրիկ, մինչև ես էլ գամ,
Ու մենք սուրբ հողում միանանք նորից...

1980

ԶՎԱՐԹՆՈՑ

Զվարթնոց: Գիշեր: Լոռություն է մեծ,
Հին ավերակի քարե տվայտանք...
Իսկ մկրտության ավազանի մեջ
Անձրևաջուր է ու աստղի ցոլանք:

...Աստղերի նման մանուկներ են մերկ
Մկրտվում քարե այս ավազանում,
Խունկի մխանք է, օրհնություն ու երգ,
Հոյսն ու հավատը աղոթք են անում:

Լոռություն է մեծ... Ոչ հուշ, ոչ անուն,
Անձրևաջուրը ցուցում է ջինջ,
Իսկ աստղը վերից այնպես է նայում,
Որ ասես ինքն էլ չի հիշում ոչինչ...

1980

ՄԱՅՐ

Մայր իմ, նոր եմ հասկանում, որ Հայաստանն էիր դու,
Որի սրտով աշխարհի բոլոր հողմերը անցան,
Որ դու էիր հերարձակ ու արցունքոտ, ու տրտում
Նստել ավեր Անիի բեկորներին սրբազան:

Մայր իմ, նոր եմ հասկանում, որ Հայաստանն էիր դու,
Այդքան փխրուն ու ամուր, այդքան տանջված ու արդար,
Խորհրդավոր մեր ոգին, մեր արյան ձայնն էիր դու,
Որի գաղտնիքը, ավաղ, անզոր եղա ես կարդալ:

Մայր իմ, նոր եմ հասկանում, որ Հայաստանն էիր դու,
Որի առջև երկյուղած կարկամել եմ ու լռել,
Եվ սիրո խոսքն իմ չասված, խոստովանանքն իմ տրտում
Արթնանում է գիշերով ու մղկտում ինքնիրեն...

1980

ՌԻՐ ԵՍ ԳՆՈՒՄ...

Մուշեղ Գալշոյանի հիշատակին

Աշնան օրն է տխուր մարում
Ծաղիկների շողքից,
Պառկել ես դու այնտեղ՝ սարում,
Հրացանը կողքիդ:

Վերում կապոյտ-կապոյտ երկինք,
Կարոտի չափ տրտում.
Հեռու-հեռվում մի լուրթ երկիր,
Սասնա կորած մի տուն:

Ծուխն է ելնում բարակ-բարակ,
Անուշ հոտ կա հացի,
Ու կա մաքուր մի աղբյուրակ,
Նման անուշ լացի...

Ռ՛վ է կանչում հեռվից քեզ, ռ՛վ,
Ռ՛վ է ձայնում, իմ ծուռ,
Աչքերդ փակ՝ սև կածանով
Ռ՛ր ես գնում, ախ, ռ՛ր...

Սար ու հանդին մուժ է իջել,
Չկա դարձի հնար,
Կանգնիր, տղա՛, քո հերթը չէ,
Նախ ես պիտի գնամ:
Բայց գնում ես աչքերդ փակ,

Ու վիհն այդ շատ է շեղ,
Ախ, ետ դարձիր, իմ կապուտաչ,
Գալշոյի ծուռ Մուշեղ:

Այդ առավոտ Սասնա սարում
Մի աստղ ընկավ հանգած,
Լացն իր լացեց մի ջինջ աղբյուր
Ու չորացավ հանկարծ:

Կարմրել են ծաղիկ ու սեզ
Քո արյան տաք շողքից,
Պառկել ես դու ֆիդայու պես՝
Հրացանը կողքիդ...

1980

ՆԵՐԲՈՂ ՄԱՅՐԵՆԻ ԼԵԶՎԻՆ

Դու՛ սեր առաջին, առաջին մորմոք, առաջին աղոթք,
Որ տառապանքով փոխվեցիր բառի ու դարձար լեզու...
Ու երբ «Մայրենիք» անունը տվինք հողին այս քարոտ,
«Մայրենի» դրինք անունը քո սուրբ...

Եվ դու դարեդար մեզ շնորհեցիր կանչը քո արյան,
Համը քո հացի, եոքը քո գինու, ցոլքը քո հրի,
Տվիր պղնձե այս քարափների կոհնչը վայրագ
Ու քնքշությունը լացող մամուռի:

Մեզ նավասարդյան առավոտների լույսով օծեցիր
Եվ մկրտեցիր առասպելների ուժ ու զորությամբ,
Աստվածների հետ քո աստվածային լեզվով խոսեցիր,
Ոսոխների հետ՝ որոտով քո բամբ:

Ու մենք դարձրինք քեզ երդում, ոգի, դարձրինք աստված,
Թեև գիտեինք, որ աստվածները զոհ են պահանջում,
Եվ Ավարայրում ընկանք արնաքամ, ընկանք ծվատված,
Բայց չզիջեցինք և ոչ մի հնչյուն:

Ու երբ փով եկավ մեր կամարների թռիչքը հպարտ,
Կամար ոգեղեն՝ դու մեր ոգու հետ հարատևեցիր,
Երբ սյունները մեր ծնկները ծալած ընկան դիտապաստ,
Դու՛ սյուն հրեղեն, երկինք թևեցիր:

Երբ ողկույզը մեր առան արշավող սմբակների տակ,
Գինի սրբազան, մեր շրթունքները դու համբուրեցիր,

Ու երբ խլեցին ու խափանեցին թոնիրը մեր տաք,
Դու՛ հաց անսպառ, նորից բուրեցիր:

Եվ մենք քեզ համար, մեր մեսրոպատառ, խորհուրդ մեր խորին,
Եվ մենք քեզ համար, մեր մեծասքանչ, մեր ոսկեղենիկ,
Ելանք ազգովին, բռնեցինք ահեղ ճամփան Դեր-Չորի,
Մեր կեսը տվինք, բայց քեզ չտվինք:

Քանզի գիտեինք, որ քեզ սրբորեն կոչել մայրենի,
Քեզանով ենք մենք դարեդար հառնել, առել շունչ ու կյանք
Ու թե քեզ դավենք, ուրեմն չունենք հող ու հայրենիք,
Ու թե քեզ դավենք, ուրեմն չկանք:

Եվ հիմա, հիմա, անթեղի նման քեզ պիտի տանենք,
Քեզ պիտի տանենք իբրև հրդեհից ազատված մանկան,
Հողմերից փրկված կանթեղի նման քեզ պիտի տանենք
Եվ տանենք իբրև երդում ու պատգամ:

Եվ տանենք պիտի իբրև առաջին հավատ ու աղոթք,
Եվ տանենք պիտի իբրև սրբազան հաց, գինի ու հուր...
Եվ հիշենք, որ երբ «Հայրենիք» ասինք հողին այս քարոտ,
«Մայրենի» դրինք անունը քո սուրբ:

1980

* * *

Լուռ է լինում ու խավար, քունն է կանչում այն ափից,
Բայց հանկարծ վեր եմ թռչում ինչ-որ մի խուլ տազնապից:

Մորս ոգին է արդյոք, որ արթնանում այդ ժամին
Ու հեծկտում է տխուր, ինչպես անձրևն ու քամին:

Թե՞ մի գաղտնիք է մթին, որ ծվարել մշուշում
Ու շշուկով մի դաժան ինչ-որ չարիք է գուժում:

Իմ արյան մեջ է գուցե տնքում տազնապը այդ խուլ,
Որ դարերից է գալիս ու երկարում է տխուր:

Ու երկարում է այնքան, որ թվում է կվայի...
– Տե՛ր իմ, ինչո՞ւ ինձ տվիր ծանր արյունը հայի:

1981

* * *

Նա այդ գիշեր մինչև լույս խոնարհված էր սնարիս...

Դեռ ինձանից հողմի հոտ ու ծխի հոտ էր գալիս,
Վառողի հոտ էր գալիս սպիներից իմ ցավոտ,
Իսկ իմ բարձից՝ մանկության ու մայրական ձեռքի հոտ:

Նա այդ գիշեր մինչև լույս խոնարհված էր սնարիս...

Լսում էի կիսարթուն՝ Աստծո անունն էր տալիս,
Հավատում էր, թե իրոք նա պահպանել իր որդուն
Ու փրկել է հրաշքով, ու բերել է ահա տուն:

Նա այդ գիշեր մինչև լույս խոնարհված էր սնարիս...

Զարթնում էի... Ծշուկով դեռ աղոթում, դեռ լալիս,
Դեռ սպիներս էր շոյում, թեքվում, ծածկում էր վրաս,
Չէր հավատում դեռ կարգին՝ իրականն է, թե՞ երազ:

Նա այդ գիշեր մինչև լույս խոնարհված էր սնարիս...

Ու չկա մայրս հիմա... Նա երազիս է գալիս,
Թեքվում, ծածկում է վրաս, Աստծո անունն է տալիս,
Նոր սպիներս է շոյում, աղոթում է ու լալիս...

Եվ թվում է, հավիտյան խոնարհված է սնարիս...

1981

ՀՈՂ ԻՄ ԿԻՍՎԱԾ...

Ալեքսան Կիրակոսյանին

Հող իմ կիսված՝ սիրտ չկիսվող,
Կքել եմ ես քո պարտքի տակ,
Ցավում եմ ես խղճի նման,
Վերքի նման մխում եմ տաք:

Ախ, ինչ ասեմ, ո՛ւշ ծնեցիր,
Ես քեզ արյուն պիտի տայի,
Էրզրումի ցուրտ լեռներում
Ես՝ արնաքամ մի ֆիդայի:

Արյունն իմ հին քո հողի մեջ
Սուզվեր պիտի երակ-երակ,
Նիրհեր այնտեղ, սակայն նիրհեր
Ինչպես կրակն անթեղի տակ:

Նիրհեր պիտի որպես կարոտ,
Որպես մորմոք, որպես թախիծ,
Որպես լեռան սրտում ապրող
Հրաբուխի կարմիր ծաղիկ:

Խառնվեի պիտի հողիդ,
Արածանուդ ահեղ լացին,
Միանայի հուր հավիտյան
Քո հարության առեղծվածին:

Ախ, ինչ ասեմ, ուշ ծնեցիր,
Ես քեզ արյուն պիտի տայի,
Չցավեի խղճի նման,
Վերքի նման չմխայի:

1981

ԵՐԿԻՐ, ԳԱՂՏՆԱՐԱՆ...

Երկիր Հայաստան, նորից լեռնային ճամփադ է իմ դեմ,
Քարափ է, վիհ է, որ ամեհի է, ու աղբյուր է ջինջ...
Ես կարծում էի, թե ոտից գլուխ քեզ անգիր գիտեմ,
Եվ, սակայն, ներիր, չգիտեմ ոչինչ:

Մութ քարանձավ է, փուշն ու մացառը բերանն են փակում,
Ներսում բյուրեղ է, փիրուզ է, մարջան, հեքիաթի քարեր,
Եվ այս ամենը ինչպե՞ս ես պահել ինձանից թաքուն,
Աշխարհից թաքուն ինչպե՞ս ես պահել:

Ավերակ բերդը նստել քարափին ու նայում է ցած,
Ես նայել հեռվից ու կարծել էի՝ դա ժայռ է անել,
Եվ սակայն նայիր, սա մագաղաթ է ասես քարացած,
Որ պիտի բացել, պիտի վերձանել:

Եվ վիհ է ցածում՝ կապույտով լեցուն անհուն մի թախիծ,
Ի՞նչ կա խորքի մեջ... Երևի գետի արծաթե մի թել,
Բայց խոսք են խոսում, թե ցերեկ օրով նրա հատակից
Կարող ես ոսկե աստղերը դիտել:

Երկիր, հրաշքի ցուքերով լեցուն քարանձավ իմ մութ,
Երկիր, գաղտնարան, որ մինչև հիմա դեռ փակ է իմ դեմ,
Երկիր, առեղծված, դեռ պիտի իջնեմ վիհերը ոգուդ,
Այնտեղից՝ ոսկե աստղերդ դիտեմ...

1982

* * *

Ձորի մշուշ, վիհի մխանք,
Լեռան կապույտ ու ձյան ալիք՝
Իրիկնային մուժում կորչող
Մի քարեղեն հրաշալիք...
Ու ես գիտեմ, վիհերն ի վար
Խենթ ջրերի ծուխ է ու ձայն,
Քարի արցունք, մամուռի լաց,
Կաթող ծաղիկ ու ծիածան:
Եվ անձավներ ու ոգիներ՝
Անձավներում այդ կապուտակ,
Որ արթնանում կեսգիշերով,
Թափառում են լուսնյակի տակ:

Ձորի մշուշ, վիհի մխանք,
Լեռան կապույտ ու ձյան ալիք,
Կապույտի մեջ ու ձյունի մեջ՝
Իրար կպած աստղ ու ծաղիկ:
Ու ես գիտեմ, վիհերն ի վեր
Վանք է ավեր, գիր է եղծված,
Ու վանքից վեր, երկնքից վեր՝
Ինչ-որ թախիծ ու առեղծված,
Ինչ-որ հավքի թևաբախում,
Ինչ-որ աստղի մի տաք մխանք՝
Տառապանքի նման մի սեր
Ու սիրո պես մի տառապանք...

1981

ԵՐԳՈՂ ԽԱՉՔԱՐ

Լուսինե Զաքարյանին

Որտեղից եկավ նա այսքան անեղծ,
Այսքան ոգեղեն, այսքան անմեկին...
Եվ ինչ հրաշքով խաչքարից հանեց
Նրա մեջ նիրհող մաքուր մեղեդին:

Եվ մաքրությունն այդ ծավալվում վերում,
Հալչում էր իբրև ղողանջը զանգի,
Կանչում էր ասես երկիր մի հեռու
Եվ կանչում էր մեզ խոստովանանքի:

Մեզ, որ օրերի վազքի մեջ անքուն
Մոռացել էինք ինքներս անգամ,
Որ մեր հոգու մեջ այդքան սրբություն
Ու թախիծներ կան դեռ անանձնական...

Երգեց... Ու այնտեղ՝ կապույտում վերին,
Ինչ-որ մի խորին խորհուրդ էր թևում,
Աստղային լույսը խոնարհ կոպերին՝
Մայր Հայաստանն էր ասես երևում:

Ծիրանի ծառը բուրում էր բարակ,
Եվ անրջում էր ակոսը տրտում,
Կաթկթում էին ցողերն անարատ,
Մեղավորներին լույսով մկրտում:

Երգեց... Եվ հուշեց ձայնն այդ մոգական,
Որ թե այդ փխրուն աղջկա հոգում
Դարերից ձգվող ոգի կա այդքան,
Ուրեմն շատ ենք համառ ու տոկուն:

Որտեղից եկավ նա այսքան անեղծ,
Այսքան ոգեղեն, այսքան անմեկին...
Եվ ինչ հրաշքով խորքերից հանեց
Մեր հոգում նիրհող մաքուր մեղեդին:

...Ծավալվում անվերջ երգի լույսն անեղծ
Ու թրթռում է կապույտ եզերքում...
Կանգնած հողմերի ու արևի մեջ
Ասես մի փխրուն խաչքար է երգում...

1981

ԿԱՅԾՔԱՐ

Դու՝ ժայռեղեն իմ երկիր, իմ հողմահար, իմ վայրի...
Եվ ժայռ չեղար դու սակայն, նման եղար կայծքարի:

Ու երբ պայտած սմբակներ ու նիզակներ դիպան քեզ,
Քո մեջ նիրհող հրեղեն առեղծվածը բռնկեց:

Երբ ուզեցին քեզ փշրել, պեծին տվիր ու կայծին,
Եվ կայծիդ մեջ քո հոգու հրաշքները ցուլացին:

Եվ արյունդ հնամյա, որ այդքան ծանր է տնքում,
Երակ ունի կայծքարի ու կայծքարի բռնկում:

Եվ չտեսան, որ անգամ կարոտներիդ մեջ փխրուն,
Որ արցունքիդ մեջ անգամ կայծքարի ցուլքն է տխրում:

... Շանտ եմ խորհել քո մասին, կշռել եմ չարն ու բարին
Եվ հավատում եմ, սակայն, ես քո ոգու կայծքարին:

1981

ՊԱՐՏՔ

Լեռան լանջից նայում եմ քեզ, ել, Հայաստան, կապույտ հագիր,
Ես քո ամեն առավոտին երազանքի կապույտ եմ պարտք,
Դու՝ քարեղեն իմ առեղծված, իմ քարեղեն ձակատագիր,
Քո քարեղեն տառապանքին որդու գորով ու գութ եմ պարտք:

Գետերդ ի վար, ձորերդ ի վար ուռիներդ են շարվել տրտում,
Քո տրտմության ուռիներին ես քնքշության շոյանք եմ պարտք,
Կատարներիդ լճեր կան լուրթ, ուր քո ոգին է մկրտվում,
Այդ լճերի ծփանքներին ես մաքրության ցլանք եմ պարտք:

Փլված կամար, վեմ տապալված, եղինջներով բուրող Անի,
Քո այդ փլված կամարներին ես խոյակներ ու սյուն եմ պարտք,
Դար ու դարեր բոցկլտացող հրաշք կանթեղ՝ իմ մայրենի,
Ոսկեղենիկ քո կանթեղին ես յուղի տեղ արյուն եմ պարտք:

Ես ծունկի եմ իջել հոգնած Դեր-Չորի սև ավազներին,
Բայց զոհերիդ անհայտ ու որբ շիրիմներին դեռ խունկ եմ պարտք,
Սիրտս բացել, բույն եմ տվել քո վիրավոր երազներին,
Տուն հայրենի, ես քո շենքին որդիական արցունք եմ պարտք:

Արարատն է նայում հեռվից՝ կրծքին խորունկ վիհը վերքի,
Ես քո ցավին այդ վիհերից վեր ելնելու խոյանք եմ պարտք,
Կապույտի մեջ քո հարության սուրբ հրաշքն է ցլում, երկիր,
Քո հարության այդ հրաշքին ես ողջակեզ ու կյանք եմ պարտք...

1982

ՑՈՐԵՆ

Երբ ասում են, թե դու, հող հայրենի,
Հայրենիքն ես հասկի ու ցորենի,
Հավատում եմ դրան ես սրբորեն...
Ցորենի հոտ ունի արևը քո,
Ցորենի համ ունեն բառերը քո,
Եվ մաքուր է խիղճդ որպես ցորեն:

Ցորեն արտի նման քեզ տրորել,
Հողմերին են տվել, հունդդ ցրել,
Բայց միշտ կանաչել է նորից արտդ,
Խոր ակոս են դարձել ցավերը քո,
Ոսկե սերմ են դարձել տառերը քո,
Ցորեն արտ է դարձել մագաղաթդ:

Հասկի նման կանգնել ոսկեծակատ,
Հասկի հույս ես եղել, հասկի հավատ,
Եվ արդար է եղել ոգուդ հերկը,
Ցորենի խիղճ ունի Լարեկը քո,
Ցորենի ուժ՝ քո տաղն ու երգը,
Ցորենի հոտ ունեք մորս ձեռքը:

Իմ Հայաստան, իմ հող, իմ հայրենի,
Դու օրորան, ակոս դու ցորենի,
Հավատում եմ ոգուդ ես սրբորեն, –
Ցորենի հոտ ունի արևը քո,
Ցորենի համ ունեն բառերը քո,
Եվ հավերժող ես դու՝ որպես ցորեն..

1981

ԻՆՔՆԵՐԳՈՒԹՅՈՒՆ

Հայոց իմ հող, հայոց երկիր՝
Լեռ ու կատար, վիհ ու անկում,
Դու ինձ կյանքում ստեղծեցիր
Քո պատկերով ու քո հանգույն:

Դու կապուտակ կատարներիս
Տվիր մաքուր ցուանք ու ձյուն,
Անդունդներիս ու վիհերիս
Խուռն ու խռով մի թախծություն:

Ինձ արցունքոտ լույսը տվիր
Քո արցունքոտ լճակների,
Շնորհեցիր ծաղիկը հիր
Քո մամռոտած փչակների:

Քարափներիդ ծարավը տաք
Ու ձիչը տաք տվիր դու ինձ
Եվ կախեցիր կոպերիս տակ
Աղբյուրներիդ երազը ջինջ:

Հողիդ փխրուն բարությունից
Գորով տվիր դու մատներիս,
Որձաքարիդ զորությունից
Երակ տվիր արմատներիս:

Հայոց երկիր, հայոց իմ հող,
Դու՝ անմեկին, դու՝ գաղտնարան,

Արայի պես նետահարվող,
Բայց և հառնող, որպես Արան...

Դու իմ արյան հյուլեներին
Տվիր մի փակ, ցավոտ այրում,
Բայց և տվիր գաղտնիք մի հին,
Որ դու գիտես լոկ աշխարհում:

Հանդեսներից նավասարդյան
Տվիր գինու և հացի տոն
Ու խուցերից քո ձգնության՝
Մի ծնկաչոք ծարավ ու ծոմ:

Մկրտեցիր ինձ Նարեկիդ
Տառապանքով անեզրական,
Բայց և տվիր դու Քուչակիդ
Սերը զվարթ ու մեղսական:

Կորուստներիդ ցավի հետ լուռ
Հույսի հացը տվիր դու ինձ,
Տառապանքից լույս քամելու
Առեղծվածը տվիր դու ինձ:

1982

* * *

Արագածն է այնտեղ, այնտեղ՝ Արան,
Այնտեղ արշալույսն է լեռնաշխարհի...
Նա մաքուր է՝ որպես ապաշխարանք,
Գեղեցիկ է՝ որպես սիրո թախիծ:

Արագածն է այնտեղ, այնտեղ՝ Արան,
Բոցկլտում է այնտեղ ծաղիկ մի հուր...
Նա կապույտ է՝ որպես աղոթարան,
Գեղեցիկ է՝ որպես լուսաստղը լուրթ:

Արագածն է այնտեղ, այնտեղ՝ Արան,
Այնտեղ հասկն է ցոլում՝ ճակատը բաց,
Նա խոնարհ է՝ որպես խիղճը արյան,
Գեղեցիկ է՝ որպես մանուկ Աստված:

Արագածն է այնտեղ, այնտեղ՝ Արան,
Հրախաղ է այնտեղ, լույսի ալիք...
Իմ հայրենիք, իմ խաչ, իմ քավարան,
Իմ արշալույս, իմ հասկ ու իմ ծաղիկ...

1982

ԳԱՌՆՈ ՁՈՐԸ

Ես Գառնո ձորը հիշեցի նորից...
Քարափի վրա ծաղկած մասրենին
Թրթռաց,
Դողաց
Ու հուրհրատեց...

Ես Գառնո ձորը հիշեցի նորից...
Խաչքարի թևից խաչված երազի
Կսկիճը կաթեց:

1976

* * *

Հողի շեկ շուրթին՝ ոսկեվոր մի արտ,
Երկնքի շուրթին՝ սրբաքար մի վանք...
Երկիր իմ խոնարհ, երկիր իմ հպարտ,
Հողի ու ոգու դու խոստովանանք:

Հողմեր են սուլել ու հավերժորեն
Ծեծել են այս արտն ու վանքն այս քարե...
Դու հողի շուրթին դարձել ես ցորեն,
Երկնքի շուրթին դարձել ես Նարեկ...

1982

ԻՆՁ ԹՎՈՒՄ Է ՄԻՇՏ...

Ինձ թվում է միշտ՝ մեկ էլ եմ ապրել
ես դարեր առաջ
Ու գողթան երգով ծունկի եմ չոքել
Արևի առաջ:

Ապրել ու մի օր ահեղ կովի մեջ
Ընկել սրահար,
Եվ կորցրել է շենս մի գուսան
Ու մի սիրահար...

Եվ ապրել եմ ես ձեր կապույտի մեջ,
Իմ Կարնո սարեր,
Հոտաղ եմ եղել, մաձկալ եմ եղել
Ու հող եմ վարել:

Ապրել ու մի օր ահեղ կովի մեջ
Ընկել սրահար,
Եվ կորցրել է գյուղս մի մաձկալ
Ու մի սիրահար...

Եվ ապրել եմ ես իմ այն սրբաքար
Քաղաքում Անի,
Չինվոր եմ եղել պարիսպների տակ
Իմ մայր ոստանի:

Ապրել ու մի օր ահեղ կովի մեջ
Ընկել սրահար,
Եվ կորցրել է Անիս մի զինվոր
Ու մի սիրահար...

ՀԱՅՈՑ ԼԵՈՒՆԵՐ

Տուն եմ դարձել, բայց ողջ գիշեր
Իմ աչքերում տենդոտ
Դեղին լեռներ, լեռներ են շեկ,
Լեռան ծարավ ու տոթ:

Մեկն ուզում է ծունկը ծալի
Ու խոնարհվի խոհեմ,
Որ մեկ հատիկ փրկված ծառի
Հողն արցունքով ցողեմ:

Այն մեկն ուղտի համբերությամբ
Իր ծարավն է ծամում,
Երազում է ծանրիկ մի ամպ
Եվ սպասում քամուն:

Այն մեկն ըմբոստ վեր է սուրում
Լեռնապարի միջից
Ու երկնքի սիրտն է խրում
Պղնձացած մի ձիջ:

Մեկը՝ նվազ ու տենդահար,
Դարձել դեղին թախիծ,
Կարկամել է՝ անդունդն ի վար
Տապալվելու ահից:

Գալիս այդպես, գալիս հերթով
Աչքերիս դեմ չոքում
Ու ծարավից ձաքած շուրթով
Իրենց ցավն են ոգում:

Եվ զգում եմ, լեռներ իմ հին,
Իմ տառապած լեռներ,
Որ ձեզ համար ուզած պահին
Կարող եմ ես մեռնել...

1982

ՄԵՆԱՎՈՐ ԾԱՌ

Կանգնել է նա ժայռի ծերպին,
Կանգնել բարակ, թեթև
Ու խշշում է՝ սաղարթներին
Մի կապուտակ եթեր:

Աշուն է ուշ... Ոտից, գլուխ
Բռնկվել է ոսկով
Ու այնպես է նա ցուցլում,
Որ չես պատմի խոսքով:

Մագաղաթյա ոսկեբանված
Մի հին մատյան գիտեմ,
Ասես նրա էջից հանված
Հրաշք թուփ է իմ դեմ:

Հազար ափսոս, շատ է անհաս,
Հենց երկնքի քունքին,
Ուխտավորի պես բարձրանաս,
Դեմը իջնես ծունկի...

1982

ՄԵՐ ՏԱՌԵՐԸ

Տեսիլքից են ծնվել տառերը մեր,
Հողմերով են սնվել տառերը մեր,
Ջրդեղվել են, դարձել երկաթագիր,
Քարերին են գրվել տառերը մեր,
Երբ փորձել են ջնջել ու եղծանել,
Կայծակին են տվել տառերը մեր...

1982

* * *

Գրոհը կարճ տևեց... Գիշերը խիտ էր, թավ,
Ու գիշերվա միջով շարքերն առաջ անցան...
Չնկատեց ոչ ոք, որ մի զինվոր ընկավ
Եվ աչքերը փակեց անհառաչ ու անձայն:

Բայց մի հեռու գյուղում, տեսած մի չար երագ,
Սպիտակած մի մայր, սև շորերը հագին,
Անհույս հառաչանքով նստեց ծամփի վրա
Ու ողջունեց լացով ծագող արեգակին:

1942

* * *

Ո՛հ, ես չեմ կարող մոռանալ նրան,
Այն խարտիշահեր, ջահել զինվորին...
Նա ընկած էր բաց դաշտի մեջ գարնան՝
Գլուխը դրած հայրենի հողին:
Սրտին էր դիպել գնդակն արձիձե,
Ճակատի վրա դեռ քրտինք կար պաղ,
Եվ հինձ թվում էր, թե նինջն է իջել
Նրա կոպերին՝ մանկորեն խաղաղ,
Եվ հինձ թվում էր, թե նա չի մեռել,
Թե պառկել է նա ծաղկունքի մեջ սուրբ
Ու իր ականջը մայր հողին դրել,
Հեռվից տուն կանչող մոր ձայնն է լսում...

1945

ԲԱԼԼԱԴ

Մի ժամ էր արդեն, ինչ հողագնդում
Լռել էր որոտը ահեղ,
Մի ժամ էր արդեն, ինչ վերքը սրտում
Մեռնում էր զինվորը ջահել:

Հաղթության կանչից աշխարհն էր թնդում՝
Անգոր իր հրձվանքը պահել,
Բայց կովի վերջին գնդակը սրտում
Մեռնում էր զինվորը ջահել:

Շատ էր երազել այդ օրվա մասին,
Երազել գարուն ու արև,
Եվ սակայն, հասած իր մեծ երազին,
Մեռնում էր զինվորը ջահել:

Շուրջը գարուն էր, ծաղկունք ու մայիս,
Անցել էր գիշերը ահեղ,
Հրձվանքից ժպտում ու ցավից լալիս,
Մեռնում էր զինվորը ջահել:

1945

ԶԻՆՎՈՐԸ ՎԵՐՋԻՆ ԲԱՐՁՈՒՆՔԻ ՎՐԱ

Հեռվում լռել էր վերջին որոտը,
Շուրջը բուրում էր մայիսը տաք,
Իսկ նա շնչում էր գարնան տաք օդը՝
Վերջին բարձունքը ոտքերի տակ:

Բայց մինչ բարձունքն այդ ծամփան երկար էր,
Ճամփան դժվար էր, դառն ու ահեղ,
Նրա սրտի մեջ թե հազար կյանք կար,
Բյուր հազար մահ էր հետքից քայլել:

Նրան ծեծել էր աշնան անձրևը,
Նրան կիզել էր արևը տաք,
Ու նրա դեմքը արդեն դարձել էր
Բրոնզից ձուլած խրոխտ քանդակ:

Եվ քանդակին այդ խոր դրոշմել էր
Վիշտը իր հետքը որպես կնձիռ,
Իսկ հաղթությունը այնտեղ թողել էր
Իր վեհությունը պայծառ ու ջինջ:

Սակայն լռել էր վերջին որոտը,
Շուրջը բուրում էր մայիսը տաք,
Ու նա շնչում էր գարնան թարմ օդը՝
Ոսոխի հողն իր ոտքերի տակ:

Աչքում ցուլում էր բախտի արցունքը,
Իսկ դեմքը խիստ էր որպես քանդակ,
Եվ ինձ թվում էր ոչ թե բարձունք է,
Այլ պատվանդան է ոտքերի տակ...

1947



ԳԻՆՈՒ ԵՐԳԸ



**Ճառագի՛ր, արդար,
Մարդասեր, շողա,
Շատանա բարին:**

ՆԱԽԵՐԳ

Այնտեղ արտույտն է կախվում ճառագայթից արևի
Ու թրթռում կապույտի ոլորտների մեջ անհաս,
Արևի շիթն է կաթում բարդու կանաչ տերևին,
Ուտից գլուխ աստղոտում բարդու հասակը կանաչ:

Այնտեղ առու կա մաքուր, որ բերկրությամբ կարկաչում
Ու դաղձի ուտքն է թրջում արտասուքով իր ցողի,
Այնտեղ խոհուն ու խոնարհ խաղողի վազն է աճում,
Բարի արմատը խրած բարության մեջ այս հողի:

Եվ այգեպանն է այնտեղ՝ սպիտակած արարիչ,
Բայց արարիչ, որ միայն քաղցրություն է արարում,
Աշխարհի սերն է այնտեղ, որ աղջիկ է բարավիկ,
Կրծքի մեջ դողն արբունքի, շուրթերին՝ թաց մի այրում:

Եվ այդ հողից, անձրևից, այդ ջրերից զրնգուն
Ու մի ոգուց, որ իր հետ բերում է լույսն այդ առատ,
Այնտեղ ծնունդ է առնում գինին՝ սիրո պես մաքուր,
Եվ այնտեղ սերն է ծնվում՝ գինու նման անարատ:

ԱՅԳԵՊԱՆԸ

Դեմքը թուխ է հողի պես, բայց լույսով է վարարում,
Արարչական մի լույսով, որ քրտինքից է առել,
Եվ ինձ այնպես է թվում, թե այդ նա է աշխարհում
Առաջին լույսն արարել:

Ելել, կանգնել է մի օր մթնշաղի դեմ կապույտ,
Ելել, կանգնել է գարնան գարթոնքի դեմ գեղեցիկ,
Բահը խրել հողի մեջ, սրբել քրտինքը մաքուր,
Ասել է. «Լ՛նյա եղիցի»...

Ու լ՛նյա, ու լ՛նյա է եղել, վազը լույսով է լացել,
Ու կանաչ լույս է կաթել բողբոջների աչքերից,
Լույսի նման է իջել ու լույսով է շառաչել
Գարնան անձրևը վերից:

Ու լ՛նյա, ու լ՛նյա է եղել, ամռան լույսն է վարարել
Եվ կաթել է շիթ առ շիթ տաք սրտի մեջ ողկույզի,
Կարասների մեջ կավե հետո ծնունդ է առել
Գինին՝ աղջիկը լույսի...

ԱՅԳԵՊԱՆԻ ԱՂՋԻԿԸ

Դուրս է եկել, ոտաբորիկ կանգնել հողին
Ու նայում է, նայում հեռուն,
Հողից խայտանք է բարձրանում, փոխվում դողի
Ու կրծքի տակ քաղցը ետում:

Սև են ծամերն, իսկ երեսից լույս է ծորում,
Բարալիկ է՝ նման վազի,
Այս գարնան հետ աչքերի մեջ նրա խորունկ
Ցուքն է ուրիշ մի երազի:

Այս գարնան հետ, ախր, շատ է գեղեցկացել,
Դարձել թախիժ ու կարոտանք,
Չթե շապիկն այս գարնան հետ նեղ է դարձել,
Սեղմել կրծքի ալիքը տաք:

Ինչ-որ դողից թրթռում է թևը հոնքի,
Ու նա աչքերն է լուռ փակում,
Բորիկ է նա, հողը հրաշքն իր զարթոնքի
Նրա մեջ է շարունակում...

ԱՅԳԵՂԱՆԻ ԽՈՍՔՆ ԱՐԵԳԱԿԻՆ

Գարնան արեգակ,
Արդար արեգակ՝
Ակունք բարության,
Շողա՛ վերստին
Եվ աշխարհին արար
Բարությամբ օծիր:

Արագիլ հավքին
Ավետիք հղիր՝
Հարավից թող գա,
Հյուսի բույնն իր նոր
Քո շողից պոկած
Ծղոտով ոսկե:

Սառույցով կնքված
Ակնաղբյուրն է փակ՝
Լուծանող եղիր,
Թող ծիծաղն իր ջինջ
Ղողանջի նորից
Բխումով գվարթ:

Ճառագայթ հղիր
Դեռ ննջող սերմին,
Բողբոջին դեռ փակ.
Թող զարթնի սիրո
Արարիչ խորհուրդն
Ու ցնծա խայտմամբ:

Թող ծաղկած դեղձին
Հարսանյաց մաքուր
Առագաստ դառնա,
Եվ թող վազը հեզ
Մայրության անուշ
Արտասուք հեղի:

Ճառագի՛ր, արդար,
Մարդասեր, շողմ,
Շատանա բարին,
Բարություն լինի,
Լավություն լինի
Աշխարհում արար...

ԱՅԳԵԲԱՑ

Արեգակի շողերից, ադամանդե ցողերից
Այսօր աչք է կուրանում,
Եվ այգեպանը, վազեր, այսօր ձեր տաք կողերից
Հողե վերմակն է առնում:

Այգեբաց է, ու բացվում, արթնանում եք դուք, վազեր,
Եվ բոլորդ թաց եք, թաց,
Եվ բոլորդ, բոլորդ թուխ մանուկներ եք ասես
Քաղցր քնի մեջ քրտնած:

Քնից զարթնում եք հիմա, ծմլում աչքերը ձեր փակ
Եվ թևերն եք կոտրտում,
Հետո ձեր շուրջն եք նայում, արևը՝ մեծ, օրը՝ տաք,
Եվ արագիլն է օդում:

Իսկ այգեպանը, վազեր, բացում է ձեզ, ու սակայն
Դողում է սիրտը բարի,
Որ պարտվածի նենգությամբ սառնամանիքը հանկարծ
Ձեր դեմ նոր դավ չլարի:

Բայց արեգակը, նայեք, վստահությամբ արդարի
Բարդու ճյուղին է թառում,
Բացվեք, վազեր, ու ծաղկեք, թող երազին ձեր բարի
Լինի բարի կատարում...

ԾԱՂԿՈՒՄ

Ես չիմացա՝ դեղձենին արշալույսից բռնկվեց,
Թե՛ արշալույսը՝ նրա բռնկումից այս ծաղկած...
Եվ կանգնել է ծառն ահա այգաբացի լույսի մեջ՝
Իբրև փոքրիկ այգաբաց:

Կանգնել վառվում է մենակ, կանգնել վառվում է լոին,
Օ, լռելյայն է հնչում աշխարհում երգն այրումի,
Չով այգաբացն իր ձեռքով ցող է մաղել բոցերին,
Որ խենթ այրումը մեղմի:

Սակայն լուրն այս ծաղկումի, իբրև բարի ավետում,
Այդ ղ՛վ տարավ այդքան շուտ մեղուներին ոսկեթև,
Որ եկել են ու իրենց բոցերի մեջ են նետում՝
Իբրև փոքրիկ ասպետներ:

Ու երգում է ծառը, տեն, քաղցր մի երգ է երգում,
Երգում է երգը սիրո, նվիրումի ու այրման,
Եվ այդ երգից, այդ երգից ջրերն անզուսպ հեկեկում,
Քարը լալիս է անձայն:

Եվ մեղուները ոսկե, և մեղուները զեղուն
Հեռանում են՝ քաղցրության բեռն ու պաշարը կապած,
Ու վառվում է դեղձենին այգաբացի լույսերում՝
Իբրև փոքրիկ այգաբաց:

ԳԱՐՆԱՆ ԱՆՁՐԵՎ

Երկնքով գլոր-գլոր թավալվեց մի խոլ որոտ,
Ու շողաց կայծակ մի շեկ, որ ասես շեղբ էր խոփի,
Նշենին ահից դողաց, ինչ անի ձերմակ շորով,
Իր ձերմակ, իր նոր շորով ղուր փախչի այս ամպրոպից:

Իսկ ամպրոպն ահագնացավ, իսկ ամպրոպն ապստամբեց,
Ամպերում իրար եկան, զարկեցին լույս ու խավար,
Անձրևի խոշոր մի շիթ շողալով հողը շանթեց,
Իսկ հետո սկիզբ առավ մի ցնծուն տեղատարափ:

Իսկ հետո պարան-պարան ադամանդ ու լույս տեղաց,
Ու տեղաց որպես շնորհ, ու տեղաց որպես մաղթանք,
Նշենին, ծնկների մեջ իր ձերմակ շորը պահած,
Անձրևին տվեց իրեն, և անձրևն, ախ, շատ էր տաք:

Իսկ հետո արև եղավ, հեղեղներ անցան ձորով,
Կայծակի բույր կար օդում, կայծակի, լույսի, հողի,
Նշենին արևի տակ մխում էր իր թաց շորով
Ու ժպտում, ժպտում էր լուռ արբունքի քաղցր դողից:

ՎԱՁՆ Է ԼԱԼԻՍ...

Վազն է լալիս այգում, լալիս հուլունք-հուլունք,
Ինչպես աղջիկները հարսնանալուց առաջ,
Կամ աշխարհում, արդյոք, այդքան անզուսպ ու լուռ,
Այդքան ուրախությամբ լեցուն ուրիշ մի լաց:

Այդ լացի մեջ լռին՝ մայրանալու հրձվանք,
Այդ լացի մեջ պայծառ՝ հուզմունքն արարողի,
Այդ լացի մեջ գարնան բուրումն ու շունչը տաք
Ու տարփանքները տաք՝ հասունացած հողի:

Եվ այդ լացին պայծառ, արտասուքին այդ լուռ
Չի հասնի ոչ մի խենթ ուրախության շառաչ...
Վազն է լալիս այգում, լալիս հուլունք-հուլունք,
Ինչպես աղջիկները հարսնանալուց առաջ:

ԱՅԳԵՊԱՆԻ ԽՈՍՔԸ ՀՈՂԻՆ

Դու միակ բեղուն,
Դու միակ օրհնյալ
Ու միակ բարի,
Արբունքից հարբած,
Հարսնացի՜ր կրկին
Արևին այս խենթ:

Հարսնացի՜ր ու մերկ
Առագաստ մտիր
Արևի հետ տաք,
Առագաստը ձեր
Թող զուգված լինի
Մանուշակ ծաղկով:

Թող զուգված լինի
Ուտենու ծյուղով
Ու շաղով առատ,
Եվ վայելքը ձեր,
Տարփանքները ձեր
Թող օրհնյալ լինեն:

Թող օրհնյալ լինեն,
Կատարյալ լինեն
Ու լինեն բեղուն,
Եվ թող կուրծքը քո
Մայրության կաթով
Ու լույսով ցնծա:

Ու թող դուստրը ձեր՝
Ոսկեհեր գինին,
Քո շնորհն առնի,
Արևից առնի
Նրա բոցն անմար
Ու երազը հուր...

Հղացիր, բեղուն,
Մայրացիր, օրհնյալ,
Շատանա բարին,
Բարություն լինի,
Լավություն լինի
Աշխարհում արար:

ԿԱՆԱՉ ՀՐԴԵՀԸ

Հարավքամին է փչում, ու քամուց այդ տաք
Թև է առնում ծառերի ծաղիկն սպիտակ:

Թև է առնում ու հետո իջնում է խոնարհ,
Ծիրկաթիններ է փռում սևահողն ի վար:

Քամին տանում է ձերմակն ու ձերմակի տեղ
Բորբոքում է մի կանաչ, ցոլուն մի հրդեհ:

– Արագիլներ, փրկեցեք ձեր տունն ու տեղը,
Գալիս, աշխարհ է բռնում կանաչ հրդեհը:

ԱՄԱՌ

Աման... Հալած ոսկի, լույս է հալած...
Աման... Խելակորույս պայծառություն...
Եվ բարդիներն ահա թևասլաց
Ոտից գլուխ լույս են ու լույսի սյուն:

Աման... Բահի շողքը իր հրդեհով
Արեգակի հսկա աչքն է ծակում,
Ադամանդ է դարձել առուն տեղով
Առուն ծիծաղ ունի իր կոհակում:

Լռության մեջ խորին աշխարհն արար
Մի ճպուռի երգ է միայն լսում,
Իսկ արեգակն արդեն վախերն ի վար
Ցոլուն գնրուխտներ է ընդելուզում:

Հորանջում է լույսից բոցն օռոշի,
Եվ կակաչն է շոգից ուշաթափվում...
Աման, ոսկե արև, ոսկեփոշի,
Աման, զրնգացող լույս ու կապույտ:

ԿԱՐԱՆԵՐ

Օ, կարասներ կավե, արևի տակ դրված,
Արևի տակ դրված արեգակներ խոշոր,
Ձեր շաղախն են հունցել Արմավիրից պեղված,
Մեր հեթանոս նախնյաց արևավոր փոշով:

Օ, կարասներ հսկա, ձեր կավեղեն ծոցում
Հովն է հիմա երգում խորհրդավոր մի երգ,
Սակայն լսում են ես այդ մեղմ գվգվոցում
Գալիք երգ ու պարի մի փոթորկվող տարերք:

Օ, կարասներ կավե, օ, կարասներ ծարավ,
Ձեր ընդերքում դատարկ պիտի ծփա շուտով
Մի ողջ արևավոր ու հրեղեն հարավ՝
Իր ամառով, շոգով, իր արևի հյութով:

Թրծվեք, օ, լավ թրծվեք շողքով արեգական,
Ձեր մեջ լցվեն պիտի աստղեր, կրակ ու կայծ՝
Մի խենթություն, որից սիրտ է պայթում անգամ,
Կավը սիրտ չէ, ավանդ, չի դիմանա հանկարծ...

ՔՐՏԻՆՔԻ ԿԱԹԻԼ

Քրտինքի կաթիլ-շողո՛ւն արշալույս,
Քո մեջ արևն է կրկնում ինքն իրեն
Իր արարչությամբ
Ու իր բարությամբ...

Քրտինքի կաթիլ-ոսկեցո՛ղ դու հույս,
Քո մեջ ապրում է, շողում է քո մեջ
Խորհուրդը լույսի,
Հրաշքն հաճության:

Քրտինքի կաթիլ-դու փոքրիկ, դու տաք,
Բոլոր հույսերից, բոլոր լույսերից
Ամենամաքուր,
Ամենաբարի...

Դու փոքրիկ, բայց երբ ցոլում ես հստակ
Ծեր այգեպանի հոգնած ճակատին,
Ավելանում է
Լո՛յսն այս աշխարհի...

ՎԱՋՆ Ե ԽՈՍՈՒՄ

Խոնարհ եմ ու հեզ, դալար ձյուղերս
Կպած են հողին,
Երբ ծանրանում եմ, հողին եմ կպչում
Ես ամբողջովին:

Սպասեք սակայն, ու ես ավիշով
Իմ տաք ողկույզի
Կտանեմ մարդուն դեպի աստղերը,
Ուղրտը լույսի:

Ես թախիծ կտամ ու թախծության հետ
Լույսն իմ զվարթուն,
Թախիծն ու լույսն են լոկ սրբագործում
Հողեղեն մարդուն:

Խոնարհ եմ ու հեզ, դալար ձյուղերս
Կպած են հողին,
Բայց ինչ-որ բանով նման եմ Աստծուն՝
Լույսն արարողին:

ՇՈԳԸ

Ճյուղից ծյուղ ձգված աննշմար ու սուրբ թելը ոստայնի
Շողում է որպես հրեղեն մի լար,
Լուռություն է մեծ, շոգից հալվել է շշուկն իսկ ձայնի,
Ու կարկամել է տերևը դալար:

Երկինքը ջինջ է: Արարատ լեռան ձյուներին մոտիկ
Ճախրում է միայն արծիվը վայրի,
Ասես ելել է, բարձրացել է վեր, որ ահեղ տոթից
Հանկարծ թավարծի թևերը չայրի:

Ժայռերը հեռվում շիկացել, դարձել կիսահալ պղինձ
Ու դողդողում են, երերում կամաց,
Անգույն խարույկներ, անգույն բոցերի լեզուներ է ջինջ
Ծածանում օդում հողը կարկամած:

Եվ լուռության մեջ, որ ծովացել է անհունով իր լուրթ
Եվ ծովացել է ոսկով իր շոգի,
Անտես, աննկատ կատարվում է մեծ, խորին մի խորհուրդ՝
Ծնունդ է առնում գինու խենթ ոգին:

Ծնունդ է առնում ինչպես սերը, երգն, արցունքը մանկան,
Ինչպես ներշնչումն, աստղը հրեղեն,
Ծնունդ է առնում այնպես աննկատ ու սովորական,
Ինչպես աշխարհի հրաշքներն ամեն:

ԱՅԳԵՊԱՆԻ ԽՈՍՔԸ ՋՐԻՆ

Բարության բաշխիչ,
Հարության սկիզբ,
Բերկրության պատճառ,
Թող օրհնյալ լինի
Լեռներում կորած
Ակնակունքը քո:

Թող բխումը քո
Ուղիտորեն առատ
Ու զվարթ լինի,
Եվ ձամփիդ վրա
Թող խնկեն անուշ
Նունուֆար ու դաղձ:

Շուրթերով պապակ
Փափագում է քեզ
Անձկալի այգիս,
Քեզ իմ հողն է հեզ
Փափագում ինչպես
Ծովինարն այն կույս:

Եկ, բարու բաշխիչ,
Ես ձամփան եմ քո
Ուռենով զուգել,
Եկ, գիշերն ի լույս
Թող այգում իմ զով
Ցնծություն լինի:

Եկ, շնորհդ տուր,
Տուր քո ցողն առատ
Արմատին բարու,
Ողկույզի մեջ շեկ
Դարձիր լույս ու շող
Եվ գինու հրաշք:

Կարկաչիր, բաշխիչ,
Կենարար, շողան,
Շատանա բարին,
Բարություն լինի,
Լավություն լինի
Աշխարհում արար:

ԱՌՈՒՆԵՐ

Առուներով այս գիշեր լուսնյակի լույսն է հոսում,
Լուսնյակի լույսն է երգում առուներում այս գիշեր,
Ծղրիդներին խլացրել, միայն ինքներդ եք խոսում,
Գորտներ, հարբած դուք գժեր:

Տերևների մեջ բարդու մութն ու ճաճանչը լույսի
Պահմտոցի են խաղում մանուկների նման չար,
Անհունի մեջ այս գիշեր ցլանքներ կան փիրուզի
Ու թախծություն մի պայծառ:

Ու թախծություն մի պայծառ, ու ծարավ կա մի կիզող
Քաղցրությունից ծանրացող ողկույզների սրտերում,
Ու երազում են նրանք մխիթարանքը այն զով,
Որ առուներն են բերում:

Ու գալիս են հևհև առուները վարարած,
Արագածի ձյուների զով արցունքով են գալիս,
Համբուրում են վազերի ոտքերը մերկ ու բարակ
Ու փշրվում քնքշալի:

Ջրվոր տղան է գալիս ջրերի հետ այդ վարար,
(Լուսնկայի արծաթե հայելին է բահն ուսի),
Ախ, սիրտը շատ է կարոտ, ախ, սիրտը շատ է ծարավ,
Ծարավ՝ նման ողկույզի:

Ու չգիտի, չգիտի, որ հոլիկի կտուրին,
Ուր երազներ է հյուսում իր շողերով լուսնկան,
Ինքը երազ է դարձել, ինքը գրկել է լոին
Այգեպանի աղջկան:

Ու երբ լուսաստղն է ծագում, ու շիկնում է այգն ամռան,
Քնում է նա հոգնաբեկ՝ գլուխը թաց մի խուրձի.
Հոգում դեռ աստղ է կաթում, և աստղերից, ով զարմանք,
Գալիս է բճյրը ուրցի...

ԴԱՐՁՅԱԼ ՎԱՋՆ Է ԽՈՍՈՒՄ

Մի արդար ծերուկ իջել կատարից Արարատ լեռան
Ու այս հովտի մեջ իմ շիվն է տնկել:

Հին է արմատս, իր ջուրն առաջին նա ջրհեղեղյան
Վերջին ցամաքող առվից է ըմպել:

Հին է արմատս և կարմիր՝ նման արյան երակի,
Երակի պես պիրկ ու խորագնա,

Եվ հին է գինիս, մարդու ստեղծած այն սուրբ կրակի
Երկվորյակն է նա:

Իմ էության մեջ այս Արարատյան հողն ու ջուրն առել,
Առել եմ լույսի խորհուրդն անքնին,

Եվ դար ու դարեր ես իմ ինքնության ողկույզն արարել
Եվ արարել եմ իմ ոգու գինին:

Դարեր են եկել ու շառաչելով դարեր են անցել,
Ես՝ հողին կառչած, ապրում եմ ու կամ,

Թեև ողկույզն իմ տառապանքներից չի էլ դառնացել,
Սակայն գինուս մեջ թախիժ կա այնքան:

ՍԻՐՈ ԳԻՇԵՐ

Լուսնկայի դեմ դողում էր բարդին,
Ու բարդու վրա
Տերևներն էին սրտի պես դողում,
Ամեն տերևին թառել էր ասես
Աստղ մի հուրհրան,
Եվ աստղերի մեջ բարդին էր շողում:
Ամեն ինչ այնպես պարզ եղավ ու հեշտ...
Հանկարծ ձեռք մի տաք
Աղջկա բարակ իրանը վառեց,
Գալարվեց նա լուռ, թպրտաց, դողաց
Ու այդ ձեռքի տակ
Տատրակի նման անզոր ծվարեց:
Ղողանջում էին ջրերը կապույտ,
Աստղերն անհամար,
Տերևներն էին անգամ ղողանջում,
Իսկ ծաղիկները աղոթում էին
Այդ սիրո համար
Ու կանչում էին, ուր էին կանչում...
– Իմ լավս, – ասաց տղան շշուկով,
Ասաց ու լռեց,
Իսկ մնացյալը ջրերը ասին,
Իսկ մնացյալը հովերը ասին,
Աստղերը հրե,
Եվ ասաց ամռան հսկա մի լուսին:
Եվ լուսադեմին, երբ հոգնած, շիկնած
Ու գաղտագողի
Աղջիկը այգու հովիկը գնաց,
Շուրթերին՝ կրակ, թուխ մազերի մեջ
Հակինթ կար ցողի,
Իսկ չթե շորը շաղերով էր թաց...

ԱՅԳԵԿՈՒԹ

Աշնանային առավոտն իբրև զվարթ լուսարար
Կանգնել կապույտ տաճարում
Եվ արևի ծածանչով բարդիների սրածայր,
Հսկա ջահերն է վառում:

Իսկ մի կարմիր աքաղաղ, որ երևի հրդեհվող
Արշալույսից է փախել,
Կանգնել հողե կտուրին և աշխարհի վրա ողջ
Մի կարմիր ձիչ է կախել:

Կարմիր ձիչեր կան օդում, աղաղակներ կան դեղին,
Ու շուկներ կան խարտյաշ,
Այդ ծաքած նուռն է ձչում, վազն է կանչում խաղողի
Ու փշատին բեռնաբարձ:

Այգեկութ է, այգեկութ... Հողն իր բոլոր ձեռքերով
Պարզել է ողջն, ինչ ունի,
Իր բարությունն է պարզել, պարզել է սեր ու գորով
Եվ տաքությունն այրումի:

Պարզել է բաց ու շռայլ, իմաստնորեն ու հանդարտ,
Ինչպես Աստծոն է վայել...
Օ, շռայլման, նվիրման աստվածային ակնթարթ,
Դու գոհություն, դու վայելք:

Եվ աղջիկները ահա տաք բարությունն են հողի
Տանում կողով առ կողով,
Զամբյուղներով ուռեհյուս տանում բոցը խաղողի,
Սերն են տանում ու գորով...

Եվ դեռ ձիչեր կան օդում, աղաղակներ կան դեղին,
Ու շուկներ կան խարտյաշ,
Այդ ծաքած նուռն է ձչում, վազն է կանչում խաղողի
Ու փշատին բեռնաբարձ...

ԳԻՆՈՎ Ե ԼՅՎՈՒՄ...

Ուռենու վրա լրած լուսնկան
Իջել է որպես արծաթե սափոր,
Եվ ուռին կարծես աղջիկ է չքնաղ,
Ջրի է գնում առվակի ափով:

Հեռվում մի հոգնած, քնատ մի ջրվոր
Երգում է խումար աչքերի մասին,
Ու նրա երգը ջինջ ու հեռավոր
Երազ է հյուսում գյուղի երազին:

Իսկ այգեպանը աստղերի տակ հեզ
Ննջում է հանդարտ՝ գլուխը հողին,
Ու երազի մեջ լսում, թե ինչպես
Գինով է լցվում սիրտը խաղողի:

ԲԱՐԴԻՆԵՐ

Գուրգեն Մահարուն

Աշնան գույներն են խառնվել
Առուների ջրում հստակ,
Փշատի ծառն է բեռնվել
Ու խոնարհվել է ոսկու տակ:
Հնձաններից բույրն է հորդում,
Այդ բույրերից ասես հարբել
Եվ օրորվում են կապույտում
Սեգ բարդիներ, շեկ բարդիներ:

Թուխ ծամերը գցած հետև՝
Առավոտվա շաղ ու շողով
Մի աղջիկ է անցնում թեթև՝
Ուսի վրա մի լի կողով,
Անցնում, կորչում է նա այգում,
Ասես տեսիլք ու հուշ լիներ,
Եվ օրորվում են կապույտում
Սեգ բարդիներ, շեկ բարդիներ:
Լսվում է երգ մի հեռավոր
Լուսաբացի մաքուր օդում,
Գուցե մի թուխ ջահել ջրվոր
Այդ աղջկան է կարոտում
Եվ կարոտը խառնած երգին՝
Առվի ափով քայլում է վեր,
Եվ օրորվում են ծամփեքին
Սեգ բարդիներ, շեկ բարդիներ:

ՈՂԿՈՒՅՉՆԵՐ

Ողկույզներ են սևահատիկ
Ու ոսկեգույն, շեկ ողկույզներ՝
Գիշերներ են կաթիլ-կաթիլ,
Հատիկ-հատիկ արշալույսներ:

Եվ գիշերվա ամեն կաթիլ
Մի աստղ ունի ծոցում պահած,
Արշալույսը ոսկեհատիկ՝
Բարակ շաղով է շղարշած:

Ողկույզներ են շող ու շաղոտ.
Մեկը սաթե ու մեկն ագաթ,
Ողկույզներ են մթնշաղոտ,
Աստեղնացուլ ու շողակաթ:

Արեգակ կա մեկի այտին,
Մեկի այտին՝ շիկնանք մի կույս,
Գիշերներ են կաթիլ-կաթիլ,
Արշալույսներ՝ ողկույզ-ողկույզ:

Եվ բոլորի մեջ՝ անձրևի
Վճիտ շիթեր ու արեգակ,
Եվ բոլորը՝ սրտի ձևի,
Եվ բոլորը՝ սրտի պես տաք:

ԱՇՈՒՆ Է...

Ոսկե տերև է հոսում առվի վճիտ ջուրն ի վար,
Ոսկե տերև է հոսում, ոսկե փշատ ու ընկույզ,
Արդեն աշուն է, աշուն, աշուն է շեկ ու շռայլ,
Ու կապույտի մեջ աշնան՝ նորից երգն է զրնգում:

Արդեն աշուն է, աշուն, աշուն է շեկ ու շռայլ,
Իմ լեռնաշխարհն է շողում իր ոսկեղեն փառքի մեջ,
Արևը սուր ծածանչով ձեղքել է սիրտը նուան,
Ոտից գլուխ հրդեհել բարդիները փողփողէջ...

Բռնկվել է նոնենին, հագել բեհեզ ու կրակ,
Բռնկվել են, բռնկվել դեղձենիները շարքով...
Հրդեհվում են այգիներն, ու փշատին է մենակ,
Որ հրդեհից այդ բոսոր ազատվել է հրաշքով:

Արդեն աշուն է, աշուն... Քաղցրության տակ իր բեռան
Մի բռնկված, մի ծոցվոր, ոսկեվոր դաշտ է հևում,
Նորից աշունն է վառվում մինչև լանջերը լեռան
Եվ իմաստուն այրումով քաղցրություն է հեղեղում:

ԱՅՍՕՐ ԽԱՂՈՂ Է ՃՄԼՈՒՄ...

Ուտքերի տակ իր բոբիկ ասես աստղեր է առել
Ու պարհում է, պարի մեջ բարակ իրանն օրորում,
Եվ ուտքերից նրա մերկ աստղի կաթիլք ու արև,
Շիր-շիթ արև է ծորում:

Այգեպանի թուխ աղջիկն այսօր խաղող է ծմլում,
Ու սրտիկն է թրթռում աստղի նման ու զանգի,
Ուտքերի տակ՝ ծփացող եռք է, կայծ է ու փրփուր.
Գինին է իր հարսանքի:

Աշնանաբույր զգեստի չթե փեշը հավաքել,
Ծնկներից վեր է առել ու քիչ էլ վեր ավելի,
Ջրվոր տղան է տեսել, ու սիրտն, ու սիրտն է ծակել
Ինչ-որ անուշ ցավերից:

Ուտքերի տակ իր բոբիկ ասես աստղերն է առել,
Ասես այդ սիրտն է առել ու ծմլում է, տրորում,
Եվ ուտքերից նրա մերկ աստղի կաթիլք ու արև,
Շիր-շիթ արև է ծորում:

ԳԻՆԻՆ

Արդեն ծփում է, վառվում է արդեն նա կարասներում,
Ինչպես թոնրի մեջ բոցերը խարտյաշ,
Ինչպես արթնացող առյուծի շեկ բաշ՝
Փշաքաղվում է, պեծին է տալիս, վառվում ու եռում:

Պղպշումի մեջ բուրմունք կա հողի ու աստղի ցլանք,
Հողի և աստղի խորհուրդ մի վերին,
Որ մարդու սիրտը առած թևերին,
Կարող է տանել դեպի աստղային անսահման մի լայնք:

Երա մեջ՝ ինչ-որ անհասկանալի, անքնին ոգի,
Գարնան անձրևի թախիծը մաքուր,
Ամռան արևի երազանքը հուր
Եվ կիրքը, կիրքը մեր Արարատյան հողի ու շոգի:

Եա՛ սևահողի ու արեգակի դաշինքն անարատ
Եվ ներշնչանքի քույրն է նա բարի,
Եա գիտե ճամփան մի այլ աշխարհի,
Ուր բարությունը առատ է այնքան, ու սերն է առատ:

ՄԱՌԱԸ

Երբ նրա դուռը բացես, քեզ ընդառաջ կվազի
Խոտումներով բռնկված խարտյաշ ալիքը աշնան,
Այնտեղ ծիծաղն է հողի, այնտեղ բերկրանքն է վազի,
Տճնն է այնտեղ քաղցրության:

Ողկույզները՝ հրեղեն ասուպներից գոյացած,
Հսկա ջահեր են կարծես, որ կախվել են օծորքից,
Ասուպներ են, որ կախվել ու չեն ընկնում սակայն ցած,
Որ վառվում են ու սակայն չեն հատնում կայծ ու շողքից:

Ապա նոններն են կախվել՝ մի-մի կարմիր մոլորակ,
Ու եթե մեկն ընկնի ցած ու փշրվի հատակին,
Շուրջը աստղեր կցրի, կայծկլտումներ ու կրակ՝
Հողե հատակը փոխած ամռան աստղոտ երկնքի:

Ու սերկևիլն է այստեղ կախվել ողկույզ առ ողկույզ՝
Աշնան վերջին արևի հատնող ցուլանքը վրան,
Ծիրանի չիրն է փռվել իբրև թանձր աստղալույս,
Ու փշատը՝ մի այտին շիկնությունը հուրհրան:

Եվ լավաշները դեզ-դեզ, լավաշները նորաթուխ,
Որ գրտնակի տակ ընկած լուսնկաներ են պայծառ,
Իրենց բուրմունքն են խառնել բուրումներին այս
հորդուն,
Սրբագործել են մառանն իբրև օրհնանք մի արդար:

Եվ մառանն է շողշողում՝ չորս պատերի մեջ պահած
Գարնան անձրևը առատ, ամռան արևը բարի,
Արտի ծփանքը խաղաղ, այգու ծիծաղը կանաչ
Ու բարությունն աշխարհի...

ՀԱՐՍԱՆԻՔ

Այս գիշեր երգ է ու տոն... Եվ բարդին հարբել այգում,
Լիրն առած լուսնկայի արծաթե դափն է զարկում:

Իսկ աշնան զնգուն մի հով սարերի ծոցից փախել
Ու հարբած այգու վրա սրնգի երգ է կախել:

Երկնքից ընկնում աստղերն ու գինու բաժակներում
Գինու հետ ցոլք են տալիս, գինու մեջ հալված՝ եռում:

Սպիտակ քող է առել թուփս աղջիկն այգեպանի,
Թարթիչներն ահով կախել, չգիտի, ար, ի՞նչ անի:

Օրորվող լույսերի մեջ աշխարհը կա ու չկա,
Հարբել է աշնան գիշերն, ու հարբել սիրտն աղջկա.

Հարբել է, անուշ հարբել, թվում է պիտի մարի,
Իսկ դափը զնգում է զիլ ու կանչում հարսնեպարի:

Նա տեղից ելնում է լուռ, կոպերը ահով փակած,
Ախ, ասես ծառ է նշի՝ սպիտակ ծաղիկ հագած:

Եվ հանկարծ քամին խլում ուսերի շղարշը նուրբ,
Գիշերվա կապույտի մեջ ձգում է իբրև ասուպ:

Մանրաքայլ առաջ գալիս, բացում է կոպերը փակ,
Կոպերին, աստղերի պես, հարսնության արցունքն է տաք:

Հարսնության արցունքն է տաք, հարսնության արցունքն է ջինջ,
Այդ լացից քաղցր ու պայծառ երևի չկա ոչինչ:

Այդպիսի արտասուքով, արևին հարսնանալիս,
Հիշում եք, գարնան մի օր խաղողի վազն էր լալիս:

Ու լալիս, լճյս է լալիս թուխ աղջիկն այգեպանի,
Սրտիկը շատ է տխուր, շատ ուրախ, ախ, ինչ անի...

Ու շվար աղջիկն հանկարծ ետ նետում գլուխն արագ,
Պարզում է թևերն իր բաց, ձոձում է մեջքը բարակ:

Եվ հանկարծ ոտից գլուխ դառնում է նազանք ու սեր,
Դողում է կուրծքն, ու կրծքին դողում են մի զույգ հյուսեր:

Եվ հանկարծ աշխարհն է ողջ քարանում հրաշքի դեմ,
Չեն թարթում աստղերն ասես, որ հրաշք պարը դիտեն:

Եվ միայն հարբած բարդին օրորվում նորից այգում,
Լիրն առած լուսնկայի արծաթե դափն է զարկում:

ԱՅԳԵՊԱՆԻ ԽՈՍՔԸ ՄԱՐԴՈՒՆ

Բարության վազից
Տքնությանը քամած
Իմ արդար գինին
Վաստակած հոգուս
Բերկրությանը զվարթ
Առաքում եմ քեզ:

Այս գինու մեջ սուրբ՝
Արևի նշխար
Եվ հողի մասունք,
Հոգևոր մի երգ,
Անքնին մի հուր,
Անմեկին ոգի:

Այս գինու մեջ սուրբ՝
Աստղերից իջած
Մի աստղոտ երազ
Ու թախիծ մի ջինջ,
Որ մխալ գիտե
Արարիչ լույսով:

Գինի չէ, օ, ոչ,
Արևի, հողի
Ու իմ երգն է սա,
Նվիրում է սա,
Ողջակեզ մի բոց,
Մի խոնարհ այրում:

Բաց սեղանը քո,
Եվ սեղանդ բաց
Թող գինով ցնծա,
Որ խաղաղ հոգուս
Բերկրությանը զվարթ
Առաքում եմ քեզ:

Երազով հարբիր
Ու հարբիր լույսով՝
Շատանա բարին,
Բարություն լինի,
Լավություն լինի
Աշխարհում արար:

ՎԵՐՋԵՐԳ

Այսօր բարակ եղյամից ձերմակել են թուփ ու սեզ,
Ու պաղ քամին ծառերի վերջին ոսկին է թափում,
Աշնան երկինքը այսօր թախծության երգ է ասես,
Եվ առունները բարակ՝ հեկեկանքներ են կապույտ...

Այգեպանը այգու մեջ այսօր տերև է այրում,
(Արդյոք ծխից է կոպին արցունքի շիթը այդ ջինջ),
Իսկ ծուխը, ծուխն օդի մեջ այնպես անհետք է հալվում,
Որ կարծես տեղը չկար ու չէր եղել, ախ, ոչինչ:

Չէին եղել ծաղիկներ՝ լի արցունքով ու լույսով՝
Ամեն մեկը մի մաքուր հարսանեկան առագաստ,
Հետո աստղերը վազից չէին կախվել ողկույզով,
Ու չէր վառվել նոնենին՝ արևներով ձառագած:

Սակայն անցավ ամեն ինչ... Թաց տերևներն են մխում,
(Արցունքիդ շիթն, այգեպան, լոկ ծխից չէ երևի):
Գուցե ոչինչ ավելի թախծալի չէ ու տխուր,
Քան մերկ այգին ու վերջին թրթոցը տերևի:

Ու դու տխրում ես, աշուն, սակայն իզուր ես տխրում,
Կարասներում ետմահու քո կյանքն ու փառքն է բարի...
Օրինյալ լինի թող հավետ նա, ով սրտից իր փխրուն
Երգ ու գինի է քամում ու շնորհում աշխարհին:

1964-1965



ՏԱՂԵՐ



*Շնորհիւր նորից այն խոսքը միակ,
Որով գնում են խոստովանության...*

ՏԱՂ ԵՐՇՆՉՄԱՆ

Ինձ շռայլորեն շնորհիր նորից
Խոսքն այն նախնական,
Ուր մարմին բառը բուրում է կավով ու արեգակով,
Եվ ոգի բառը թրթռում է դեռ խորհրդով լույսի:

Այն բառերը տուր,
Որ ցորենի պես արդար են ու տաք,
Եվ այն բառերը, որ ցուլցում են աստղերի նման...
Եվ իրար խառնիր դու աստղ ու ցորեն,
Որ երկինք ու հող խառնվեն իրար:

Այն բառերը տուր,
Որ վայրկյանի պես հսկում են վրաս,
Ու հսկումի տակ գտնում ենք իրար առեղծվածն ու ես:

Եվ այն բառերը,
Որ երակների թախիծը հանկարծ փոխում են լույսի
Եվ ինձ դարձնում
Այնքան համասփյուռ ու անանձնական,
Որքան աստղալույսն ու որքան քամին,
Որքան անձրևը ու որքան խոտը...
Այն բառերը տուր, որ վերժանում են,
Թե ինչ է ասում ծղրիդն իր երգով, աստղը՝ լուությանմբ:

Եվ այն բառը տուր,
Որ թղթի ձերմակ թախծության միջով
Գնում է որպես ծարավից այրվող անապատական
Եվ որոնում է կարկաչը ջրի,
Եվ որոնում է հեռաստանների թրթիռը կանաչ:

Ծնորհիր նորից այն խոսքը միակ,
Որով գնում են խոստովանության...

ՏԱՂ ԱՆԱՆՁՆԱԿԱՆ

Եվ ես ասում եմ.

Օրինյալ են նրանք ու երանելի,
Ովքեր օրերի թախծության միջով
Ընթանալ գիտեն դեպի ակունքը,
Որ խղճի պես է, հավատի նման...

Եվ նրանք, ովքեր հավքի թևի մեջ
Զգում են իրենց սեփական հոգին
Եվ թպրտում են կապույտի տենչով
Ու հեռուների կարոտով մաքուր:

Եվ նրանք, ովքեր
Զվող հավքերի հեռու կանչերում
Եվ սոսափներից նրանց թևերի
Աշխարհի տխուր, ամենատխուր երգերն են լսում:

Եվ նրանք, ովքեր
Գիտեն վայելքը խոստովանության
Եվ ծանրությունը գիտեն արցունքի,
Եվ գիտեն նրա թեթևությունը:

Եվ նրանք, ովքեր զարմանալ գիտեն
Խոտով, անձրևով ու ձառագայթով
Եվ գիտեն քամու շշուկների մեջ
Վաղուց մահացած մարգարեների հառաչը լսել:

Եվ նրանք, ովքեր
Վերծանել գիտեն ու գիտեն կարդալ
Անծանոթ կնոջ գաղտնագիրը լույս,
Եվ նրանք, ովքեր չգիտեն կարդալ ու մոլորվում են:
Եվ նրանք, ովքեր
Արևածագը խմում են որպես ներշնչման գինի
Ու մայրամուտին գեղեցկանում են ու սրբանում են,
Ինչպես վաստակած սերմնացանները...

ՏԱՂ ԱՄՊՐՈՊԻ

Նախ որոտում ես, խոստովանում ես ասես աշխարհին,
խոստովանում ես կայծակիդ մաքուր, հրեղեն տողով...
Քո որոտի մեջ ցասումիդ մութն ու ընդվզումն է հին,
Եվ կայծակիդ մեջ քո սիրո լույսն է իր քնքուշ դողով:

Եվ այդ սիրո դեմ ցածում խոտերը խոնարհվում են վար,
Եվ այդ սիրո դեմ հողն է սարսուռում,
Եվ այդ սիրո դեմ խոռվում կաղնու սաղարթը խավար,
Մերթ շառաչում է ու մերթ սպասման տագնապից լուրում:

Եվ վար է ընկնում լույսով թաթախված կաթիլն առաջին,
Եվ վար են ընկնում տաք արտասուքներ,
Եվ սրտի նման երկինքը փչում սիրո հառաչից,
Տեղում է աստղի, կապույտի, ամպի մաքուր մասունքներ:

Եվ օրորվում են, տարուբերվում են պարտեզներ կախված,
Եվ օրորվում են, տարուբերվում են թափանցիկ զանգեր,
Եվ վար է հոսում երկինքն անհունի խորհրդով շաղված,
Եվ վար են հոսում տաք երազանքներ...

Եվ կաղնին ահա կայծակի հանդեպ իր կուրծքն է բացում,
Լավ է մի վայրկյան ապրել բոցի պես, քան փտել դարեր.
Հրդեհվում է նա, կրակե թևով երկինք համբարձում,
Իբրև կրակի մաքուր մարգարե...

Եվ աշխարհն արար ասես սրբորեն իջնում է ծունկի,
Եվ աշխարհն արար ասես երգում է փառք ու գոհությոն,
Եվ աշխարհն արար դառնում է լույսի, ցողի, արցունքի
Մի զարմանալի արարողություն:

Հետո ամեն ինչ կիսով կապույտ է ու կիսով ոսկե,
Հետո ջրերն են տխուր ծիծաղում և ուրախ լալիս,
Իսկ մի թուխ արտույտ երկինք բարձրացած օրհներգում է քեզ
Եվ տրտնջում է, որ ուշ-ուշ ես դու մեզ այցի գալիս...

ՏԱՂ ԿԱՐՈՏԻ

Գարնան օրն ասես
Դեղձենուց պոկված ծաղկաթերթ էր թաց,
Գարնան օրն ասես
Անձրևի վերջին արտասուքն էր ջինջ...
Մի խարտյաշ աղջիկ ամեն ինչ առել,
Տանում էր անդարձ
Ու չէր շնորհում, չէր տալիս ոչինչ:

Այդ գարնան օրը,
Այդ աղջիկն ես դու:

Այնտեղ`
Քարափի պղնձե շուրթին
Մի վանք կար ավեր,
Ու վանքից ներքև մի հովիտ կար տաք,
Եվ այդ տաք հովտի կանաչների մեջ
Լուռ արածում էր մի ալ հովատակ:

Այդ հովիտն ես դու,
Այդ հովատակը:

Վերում թափառող ամենամաքուր երազը առել,
Փշրում էր Աստված
Ու վար էր թափում իբրև լույս մի ձյուն...
Առաջին ձյունն էր...
Իջնում էր թեթև
Ու բերում իր հետ
Խոստովանելու մի տաք ցանկություն:

Այդ մաքուր ձյունն ես,
Այդ ցանկությունը:

Եվ ինչ-որ մեկը ասես ականջիս
Հանկարծ դնում է ծովային խեցի...
Ու ծովն է խշշում,
Ու ծովի ափին
Այդ ռ՛վ է այդպես մերկ ու գեղեցիկ...

Դու ես երևի,
Այդ դու ես նորից:

Կար մի խուլ ձորակ,
Բարդիններ կային,
Եվ մի ջրաղաց, որ լուռ էր վաղուց,
Եվ մի ջրաղաց, որ կքել ցավից
Ու իր թախիծն էր մեն-մենակ աղում:

Այդ ձորակը խուլ,
Այդ թախիծն ես դու:

Այդ էրբ էր,
Որտե՞ղ...
Ժայռի բռան մեջ աղբյուր կար մաքուր,
Մեջը երկնքի ու արեգակի
Բեկորներ էին փշրելով թափել,
Դու կարող էիր ծնկաչոք իջած,
Մաքրություն,
Կապույտ
Ու լույս հավաքել:

Այդ աղբյուրն ես դու:

ՏԱՂ ԱՌԱՋԻՆ ՁՅԱԼ

Իջնում ես նորից...

Բայց այն օրերին ուրիշ էիր դու,

Դու այն օրերին ասես ավելի սպիտակ էիր,

Ավելի թեթև, ավելի մաքուր,

Դու այն օրերին ասես տաք էիր:

Իջնում էիր դու...

Եվ անցնում էր նա թեթև ու հպարտ,

Եվ անցնում այնպես, ասես կրկնում էր քո նազանքը, ձյուն,

Նա, որ աղջիկ էր սեթևեթ ու չար,

Բայց ուներ քնքուշ մի ծաղկի անուն:

Եվ ամբողջ օրը շրջում էի ես մենակ ու տրտում,

Եվ ամբողջ օրը ձերմակ երազդ իջնում էր ծունկի,

Եվ ամբողջ օրը շուրթերիս վրա հալչում էիր դու

Ու թողնում այնտեղ համը երկնքի:

...Ես շատ եմ ապրել...

Կորստի ցավ կա իմ երակներում,

Եվ կարոտներ կան,

Որ թաքուն լալիս ու տնքում են խուլ

Եվ կանչում են ինձ, կանչում այն հեռուն,

Ուր դու ես իջնում

Առաջվա նման թեթև ու տխուր:

Գնամ, մոլորվեմ
Քո այդ սպիտակ թեթևության մեջ,

Որ առաջվա պես ինձ ոտից գլուխ քո լույսը կնքի,
Որ շուրթիս վրա հալիլի նորից քո փաթիլն անեղծ
Ու թողնի այնտեղ համը երկնքի...

Գնամ, մոլորվեմ...

Ու իմ քայլերից թող զարթնի հանկարծ
Քո հողմն սպիտակ, որ քուն է մտել դաշտում ամայի,
Եվ կորուստներիս ու կարոտներիս կսկիծը առած,
Թող վայի մենակ ու տխուր վայի...

ՏԱՂ ՀՈՂԻ

Եվ այրող մի տենդ իր կարմիր, դեղին, կապուտակ ցուքով
Ինձ պոկել հողից ու դեպի վերին ոլորտն էր տարել...
Մերթ ընդ մերթ միայն աստղափոշին էր սուրում իմ կողքով,
Սուրում և սակայն չէր կարողանում իմ տենդը մարել:

Եվ սուրում էի... Ամպեր չկային, ու ամպրոպ չկար,
Չկար անձրևի հրաշքը մաքուր, չկային ջրեր,
Եվ չկար քամի, որ կապույտի մեջ տխուր զոնգար,
Եվ չկար արտույտ, որ արևի մեջ իր թևը խրեր:

Եվ չկար բուրմունք... Չկային բույրեր հողի ու խոտի
Եվ լուսաբացի ծխի հետ ձգվող հացի բույրը տաք,
Եվ չկար բույրը այն ամառային մեծ առավոտի,
Որ արևի մեջ բզզում է իբրև ոսկեղեն փեթակ:

Չունեի մարմին... Ես, որ հունցվել եմ մի բուռ հում կավից
Եվ ոգու ցավից ծանրացել այնքան,
Այնքան ծանրացել հրաշքի, լույսի, ցողի ծարավից,
Որ ծանրությունն այդ տարել եմ իբրև փառքն իմ անձնական:

Վար էի նայում ու տեսնում հողի կնձիռները խոր,
Որ լույսով լեցուն՝ ինձ թվում էին հանձարեղ տողեր,
Եվ տեսնում էի ես անդունդներն ու վիհերն ահավոր,
Որ կայծակների շեղբերն են թողել:

Եվ տեսնում էի կապույտ գետերի երակները ձիգ,
Որ մոր ձեռքերի երակներ էին մաքուր ու մաշված,
Եվ տեսնում էի լուսապսակը նրա գեղեցիկ,
Նման պսակին, որ ուներ գլխին որդին իր խաչված:

Եվ ես՝ մոռացած, թե որքան ցավ ես պատճառել ինձ, հող,
Ու որքան կսկիծ ու որքան ծարավ,
Երազում էի քո անձրևների լույսը արարող
Եվ քո վիհերի խորհուրդը խավար:

Երազում էի քո շոգը դեղին, շունչը քո բուքի,
Քարեքար զարկվող առեղծվածներիդ տանջանքը ցավոտ.
Համը քո աղի, համը արցունքի,
Իմ ծանրությունը, սերն իմ հանցավոր:

Շջնջում էի՝ դու սև, և սակայն քո սև ծալքերում
Մանուշակների երազն է կապույտ,
Քո մեջ հանգչում է գերեզմանների թախծությունը լուռ,
Եվ սակայն վրադ արտույտն իր երգով անհունն է չափում:

Եվ անհունի մեջ օրհներգում էի, օրհնում էի քեզ,
Դու հավետ ծարավ, հավետ ճաքձքած.
Հավետ ցրտահար, հավետ տոթակեզ,
Հավետ ոտքի տակ, բայց հավետ՝ Աստված...

ՏԱՂ ՁՆԾԱՂԿԻ

Հողի մեջ քնած գարունն արթնացավ առավոտ կանուխ
Ու դստերն ասաց.

– Ելիր, ձնծաղիկ...

Ծաղիկը ելավ, շուրջը ձյուն է դեռ ու դող է քամու,
Իսկ ինքը մենակ, ինքը՝ մերկ ու բաց, ինքը՝ բարալիկ...

Եվ կանգնեց այդպես նա աշխարհի դեմ մենակ ու մաքուր,
Եվ կանգնեց այդպես՝ փխրուն, արցունքոտ ու ձառագայթող,
Վերից կարկուտը սպառնաց նրան գնդակով իր կույր,
Ու վարից հողմը՝ իր ծանր թաթով:

Եվ կանգնած այդպես ցուրտ հողմերի մեջ, երազում էր նա.
Ծուտով, ախ, շուտով գարուն կլինի ու կանաչ թրթիռ,
Իր հետքով կգա մանուշակների ծփանքը անափ,
Ու քարի կրծքին կվառվի մասրին իբրև ալ հրթիռ:

Ձյունի արցունքը, հողի գոլ կանչով սարերից եկած,
Ծիծաղ կդառնա, կանաչ ծիծաղով հողից կհառնի,
Դեղձին կբացի մաքուր ասագաստն իր հարսանեկան
Ու հարբած մեղվին իր ծոցը կառնի:

Ձանգակ ծաղիկը կնագի՝ կապույտ ծարիրը կոպին,
Եվ կապույտ նագով խոստումներ կտա սրան ու նրան,
Զմրուխտ կհագնի ու ալ կհագնի քարափն իսկ կոպիտ՝
Ջրվեժի ձերմակ օրհնանքը վրան:

Ու տոն կլինի... Կզնգա աշխարհն արևի զանգից,
Հողը կդառնա հաց մի անսպառ, ու լույսը՝ գինի...
Բոլորը կգան, բոլորը կգան այդ խրախձանքին,
Բայց ինքը, ավաղ,

Մեռած կլինի...

ՏԱՂ ՆԺՈՒՅԳԻ

Սլանում ես դու հեռու լեռների կանաչ երիզով,
Ուր արշալույսը շող ու շաղով է սեզերը օծել,
Քո աչքերի մեջ այդ արշալույսի տխրությունն է զով,
Կողերիդ վրա՝ հալիլող, մարող-բռնկող բոցեր:

Սլանում ես դու, սուրում հովի հետ, բայց ո՞ր, չգիտես...
Ու ծառս ես լինում, ու հողն ես փորում, ու խուլ վրնջում,
Հետո գլխահակ կանգնում ամայի լեռներին ի տես,
Եվ պայտերիդ մեջ նորից կայծերն են թախծելով ննջում:

Իմ հպարտ, իմ հեզ, բաշդ հիշում է սույլը հողմերի,
Ականջներիդ մեջ քամին է զնգում ցնծության ձիչով,
Ու երազի մեջ սուրում, սլանում, թռչում ես էլի
Առավոտների ու կապույտների մաքրության միջով:

Ու երազիդ մեջ ձեռքերն են շոյում պարանոցդ տաք,
Շոյում աչքերիդ տխրությունը հեզ, շոյում քո ագին,
Դու երազի մեջ կանգնում ես հետո լուռ ու գլխահակ
Ու լաց ես լինում ընկած ասպետիդ արնոտ դիակին:

Իմ տխուր, իմ լավ, այս ինչ խոշոր է արտասուքը քո,
Ինչ քնքշանքով ես թեքել դու ահա պարանոցդ ձիգ,
Եվ բաշդ, բաշդ, որ վար է հոսում անձայն մի սուգով,
Ասես սիրեցյալ կնոջ վարսերի սուգ է գեղեցիկ:

Իմ հավատարիմ, իմ տխուր, իմ լավ, հիմա լեռներում
Թափառում մենակ, աչքով չափում ես անդունդը դեմի,
Եվ երբ կայծակն է, բնագոյիդ նման, երկինքը ձևում,
Դու քո արյունը, քո ընդվզումն ես հիշում վաղեմի:

Ու երբ ձորերից ելնում, փովում է գիշերը խավար,
Ու հեռվից հեռու, երբ չոր մետաղի սուլոց է գալիս,
Դու բաշդ ցնցում, դու վրնջում ես բարձունքներն ի վար,
Եվ քո աչքերը բարձունքներն ի վար աստղեր են լալիս...

ՏԱՂ ԿՆՈՋ

Դեռ չգիտեի ես այն ժամանակ, որ Տերը մի օր
Քեզ իմ կողից է ստեղծել այդպես, իմ կողի ցավից,
Գիտեի միայն, որ քո աչքերի տխրությունը խոր
Իմ երազից է ստացել իր լույսն ու ցուրը ծավի:

Դու այն ժամանակ հյուսեր ունեիր երկար ու ոսկե
Եվ չթե մի պարզ զգեստ ունեիր դու այն ժամանակ,
Ու չգիտեիր դու սիրո խոսքեր,
Ինքդ, դու ինքդ սեր էիր համակ:

Գինով էի ես... Իմ գորովանքից ասես հատնելով,
Բարդու կատարին շողում, դողում էր լուսաստղը մաքուր,
Ես քո օձիքը, քո կուրծքը բացի իմ տաք մատներով,
Եվ նրա լույսը թախծություն դարձավ ու ծարավ մի կույր:

...Անապատների հեռվում են ծնվում միրաժները զով
Ու կանչում են քեզ ու քեզ կանչելով, իրենք հեռանում,
Քամին ելնում է, քամին աչքերդ է ծեփում ավազով
Ու տանում է քեզ ու այդպես ծարավ ո՛ր է քեզ տանում:

Կանգնել էիր դու... Եվ կանգնել էիր հեզ ու հպատակ,
Բայց աչքերիդ մեջ մշուշ կար արդեն, թափառիկ մի ամպ,
Առաջվա նման փխրուն էիր, տաք,
Բայց շիկնել էիր ու շիկնել դավող մի գեղեցկությամբ...

Եվ տվայտում էր երակներիս մեջ տխրությունը ծեր,
Խանդն էր արթնանում իր մութ անձավում,
Գիտեի արդեն՝ քեզ իմ կողից է Տերը ստեղծել,
Բայց չգիտեի՝ ինչո՞ւ էր այդպես իմ սիրտը ցավում...

ԵՐԿՐՈՐԴ ՏԱՂ ԿԵՈՋ

Փարիզյան գիշերն ասես թե կին էր՝ լուսե լանջը բաց,
Ու լանջի վրա՝
Գոհարի, ոսկու, մարջանի շարեր,
Ու թվում էր, թե ուր որ է, վերջին շղարշը նետած,
Մերկանար պիտի
Ու պիտի պարեր...

Իսկ մայթերն ի վար այդ նրանք էին՝
Բաց ու մեղսական,
Շպարի շուքով կանչող,
Սակարկող,
Անդող ու անկայծ...
Լսել էի ես ու մտքով տեսել... Չիմացա սակայն,
Թե ինչը բռնեց
Ու ծառի նման ցնցեց ինձ հանկարծ...

Կինը՝ և այսպես...
Կինը՝
Գաղտնիքը,
Կրակե ուրուն,
Կինը՝
Շաղախված լույս ու խորհրդով...
Թե համբուրեիր,
Քեզ թվար պիտի լույս ես համբուրում,
Կամ օրհներգության խոսքեր ես ասում երկյուղած շուրթով:

Կինը...
Հրահրքը...
Ու եթե հանկարծ մերկ ծունկը բացվեր,
Պիտի արյունդ ձչար տազնապով

Ու կարոտդ լար,
Եվ օրդ պիտի արևածագի լույսով լվացվեր,
Եթե օձիքից կրծքի ծվենը հանկարծ ցլցլար:

Իսկ այստեղ ահա
Գաղտնիքն ինքն իրեն մայթերին փռել,
Հոգեվարում է կրունկների տակ,
Իսկ այստեղ ահա
Խորհուրդն է մեռել,
Ու դողն է մեռել,
Թաղվել,
Շպարը դարձրած պատանք:

Իսկ այստեղ ահա
Կանացի շիկնանք – հրաշքն է մեռել,
Սարսուռն է մեռել,
Սկիզբն է մեռել...
– Մարդկություն, ոտի...
Ինչպես կելնեիր,
Թե իմանայիր, որ այսուհետև
Էլ չի ծագելու
Լույսն առավոտի:

Ապակու միջով
Պաղ արյունի պես նեոնն է հոսում.
Չար քմծիծաղ է
Ու ցուրտ ծիծաղ է նա դարի դեմքին...
Իսկ սրանք ահա
Նազում են անկիրք,
Տխուր աղերսում,
Եվ ինչ-որ մի տեղ նրանց սրտի մեջ
Լալիս են դու, Կին...

ՏԱՂ ԱՆԾԱՆՈԹՈՒՀՈՒ

Եվ այս տաղն ահա քեզ պիտի ձոնեմ,
Քեզ, որ հայացքիդ մեն մի շողով ես օծել իմ ուղին,
Որ եղել տարբեր, եղել բյուրանուն, եղել բազմադեմ,
Բայց մի անուն ես ունեցել միայն՝ Անծանոթուհի...

Եվ պատահել է, որ քո հայացքը զրույց է եղել,
Հավիտենական սկզբից ձգվող հայացք մի թովիչ,
Դողացել դանդաղ ու խոնարհվել են կոպերդ թեթև,
Թաղելով անդարձ առեղծվածներիդ լույսը վրդովիչ:

Եվ պատահել է, որ մինչև անգամ դու ետ ես նայել,
Ու նայել հլու, նայել քնքշության թաքուն կանչերով,
Բայց և նույն պահին դարձել ես հպարտ ու ինքնավայել,
Անցել, քայլիդ տակ իմ հիացումի լույսը տանջելով:

Դու մերթ ծովային կապույտից առած շոր ես ունեցել,
Եվ քո նազանքը եղել է ավիք,
Դու հեռվից եկել, մի վայրկյան միայն ափերն իմ ծեծել
Ու հեռացել ես՝ տանելով անհայտն ու զարմանալին:

Ու մերթ քո մեջքի գալարումն ասես բոցից ես առել,
Բոցից ես կտրել շորը քո հագի,
Լիլիթի նման անցել, փողոցը ծայրեծայր վառել
Ու հեռացել ես՝ քեզ հետ տանելով գյուտը կրակի:

Ու մերթ գիշերվա սևի թավիշն ես ասես դու հագել,
Այդ սևի միջից լույսով է բխել պարանոցդ տաք

Ու մատնել է նա, թե քո հրաշքը ինչպես կծագեր,
Թե սևն այդ սահեր ու քո ուսերից ընկներ ոտքիդ տակ:

Եվ սկսվել է հավերժից ձգվող գրույցը մեր հին,
Եվ սկսվել է ավերախումը լույսի ու մութի,
Անցել ես հպարտ՝ դու՝ հազարանուն Անծանոթուհիդ,
Արար աշխարհը փոխելով հարբած գլխապտույտի:

Անցնում ես այդպես, այդպես գնում ես, անդարձ հեռանում,
Կորչում ես, ինչպես անհայտ ծովերում փշրված ալիք,
Եվ գիտես, սակայն, որ հնարավոր հրաշքն ես տանում,
Եվ գիտես, սակայն, որ ոտքերիդ տակ գաղտնիքն է լալիս...

ՏԱՂ ԵՐԳԻ

Девышка пела в церковном хоре...

А. БЛОК

Երգում էր աղջիկն ավերակ վանքում,
Սպիտակ հագած աղջիկն այն բարակ
Մխում էր ասես,
Եվ արթնանում էր խորհուրդը քարի,
Գաղտնիքն էր զանգում,
Եվ ժամանակն էր հսկումի կանգնում ճառագայթի պես:

Այդպես լինում է լեռների վրա,
Ուր ցողն է առատ,
Ուր ծաղիկները վայրի են այնպես
Ու բուրմունքը՝ սուր,
Ուր քամին իր զով շնչառությունը երկնքից առած,
Այնպես մաքուր է ու այնպես լազուր:

Այդպես լինում է հովիտների մեջ այն արևավոր,
Ուր ժամանակը կանգնում է ասես ու էլ չի զարկում,
Ուր մեղուները ներշնչանքի մեջ իրենց թևավոր,
Երգում են խաղաղ ու արեգակը մեղրի փոխարկում:

Երգում էր այդպես,
Երգում էր աղջիկն ավերակ վանքում,
Եվ ավերակը ասես թե դանդաղ ելնում էր ծունկի,
Գմբեթներն ասես կամավորվում էին քարե ճախրանքում,
Եվ քարից քամվում, դողդողում էին շիթերն արցունքի:

Ու թվում էր, թե գնում ես դեպի հողն այն նախնական,

Հասնում հովիտներն այն արևավոր,
Ուր մարդն արդար է
Արևի,
Հողի
Ու սիրո նման.
Եվ հողը,
Սերը
Ու արեգակը
Աստվածներ են նոր:

Եվ արթնանում էր
Մի զարմանալի, մաքուր տխրություն,
Եվ տխրության մեջ զիլ զրնգում էր փառքը գոյության,
Ու ինքդ, ինքդ լույսով մաքրվում,
Դառնում սխրություն,
Բարձրանում ասես ու գնում էիր ինքնագոհության...

ՏԱՂ ԵՐԱԶԻ

Ես երագիս մեջ ջրերի վրա մեն-մենակ շրջում,
Դեգերում էի, չափչփում էի մոլորակն այս հին,
Լուսավոր էի ու տրտում էի որպես ներշնչում,
Ոգեղեն էի, ինչպես լինում են արարման պահին:

Եվ ճանապարհիս արարում էի ինքս ինձ համար,
Խավարը այրում անկեզ մորենու ցուլցուն բոցով,
Քարանձավների ցուրտ մթությունը լցնում ծայրեծայր
Մեղվապարսերի տաք գրնգոցով...

Հովերի թևին դնում բարություն մի անանձնական,
Խիղճ էի խառնում վայրի հողմերին ու հեղեղներին,
Որ սուրան նրանք իբրև օրհնություն ու իբրև մաղթանք
Եվ ոտից գլուխ իրենցով օծեն մոլորակն այս հին...

Եվ ահա կանգնել
Ու ծովին իջնող շնորհն անձրևի
Տեղափոխում եմ անապատների շիկնած շուրթերին,
Ու այնտեղ հանկարծ ծառերն են ծաղկում հրաշքի ձևի՝
Աստղերի ցողը ծաղկաթերթերին...

Եվ այնտեղ ահա լճեր են ծփում թեթև ու ծավի,
Անհայտ հավքերը իրենց գմբուխտով կապույտն են վառում...
...<Ետո Լիլիթից ու այն հողեբույր, հողե Եվայից
Ուրիշ, մի ուրիշ կին եմ արարում...

Նախ աչքերի մեջ իրար եմ խառնում գորով ու գինի,
Մեջքը բարալիկ, կոնքերը նուրբ եմ ստեղծում այնքան,

Որ մի տերևն իսկ, թզի տերևն իսկ բավական լինի,
Դառնալու նրա շորը նախնական:

Ապա եվայից առնում եմ նրա հողի բույրը տաք,
Խառնում Լիլիթի խուսափող հրին ու հեքին վայրի,
Որ նա հողի պես լինի քնքշորեն հեզ ու հպատակ,
Բայց և հրեղեն իր առեղծվածով հավիտյան այրի:

Հողմի տարերքը, աստղերի դողը և հողի ոգին
Իրար շաղախած, հրաշքն եմ հունցում բանաստեղծության
Ես գինու միջից հանում եմ թույնի խայթը մոլեգին
Եվ թողնում միայն երանությունը թավշե թախծության:

Հիացքով օծում հովատակներին պղնձամկան
Եվ խարազանի շառայուններն եմ կողերից վանում,
Առանց խարազան, առանց թամբ ու սանձ և առանց լկամ
Որքան ազատ են ու գեղեցիկ են նրանք սլանում...

...Այդպես ողջ գիշեր ջրերի վրա մեն-մենակ շրջում,
Դեգերում էի, չափչփում էի մոլորակն այս հին,
Սլանում էի, վեր էի սուրում իբրև ներշնչում
Ու ներշնչման պես անծանոթ էի անկումի ահին...

ՏԱՂ ԱՐՅԱԼ

Դու իմ մարմնի մեջ,
Ինչպես կանաչը ցորեն արտի մեջ,
Վառվում, շողում ես քո թաքուն սևով,
Դու՝ գիշերային իմ անքնության տվայտանքը մեծ,
Դու՝ արշալույսի բերկրությունը զով:

Եթե հրաշքով հյուլեիդ կարմիր գաղտնիքը բացվի,
Երա մեջ պիտի բարբարոս թախիծն ու կարոտը լա,
Ու շողա պիտի սկիզբը կայծի,
Առասպելների լույսը ցուցլա:

Դու հին, հնամյա...

Դու Աստծո խանդով, խանդով թռչունի
Դեպի աստղային ոլորտն ես միտել դարեր ու դարեր,
Եվ դու մեղեդի, որ մինչև հիմա դեռ անուն չունի,
Բանաստեղծություն, որ մինչև հիմա դեռ չունի բառեր:

Դու՝ զարմանալի,

Դու տառապանքը իմ սիրտը մղում,
Արտամղում ես մի թեթևություն, որ կոչվում է հույս...
Դու այսքան հոգնած, դու այսքան ծանր, դու այսքան տխուր,
Բայց դու՝ մարմնիս մեջ փակված արշալույս:

ՏԱՂ ՃԱՆԱՊԱՐՀԻ

Թախծություն, նետիր քո սքեմը սև,
Ու գնանք դեպի անձրևները ջինջ,
Երանք հարության գաղտնիքը կասեն,
Իսկ մեզ դա է պետք, և ուրիշ ոչինչ:

Գնանք, թաթախվենք նրանց լույս փոշով,
Մկրտվենք նրանց շնորհի մեջ տաք,
Աստղի պես բռնենք կաթիլը խոշոր
Ու կշռենք նրա հրաշքը հստակ:

Ու գնանք դեպի արտերի հեռուն
Եվ շնչենք նորից բույրը բարության,
Փշրենք հասկը շեկ ու մեր ափերում
Ջգանք կարոտը անսպառության:

Եվ գնանք դեպի ծառերը կանաչ,
Նայենք, թե իրար ինչպես են փարվում,
Թե ազատ քամին, արևը հսկա ու կապույտն անափ
Ինչպես են փոքրիկ տերևին թառում:

Ու գնանք դեպի քարանձավը մով,
Մխրձվենք սիրտը ապառաժ քարի,
Ուր մեղունների ինքնագոհումով
Խոստանում է լույսն ու մեղրը վայրի:

Ու հետո այդպես անձրևաթաթախ,
Այդպես արևոտ և օրինաբերան
Ընթանանք դեպի բարձունքը խաղաղ
Ու ոգենք այնտեղ աղոթքը լեռան...

ՏԱՂ ԾԱՌԻ

Ես զարմանալի առնչությունն եմ հող ու երկնքի,
Հող ու երկնքի
Անիմանալի շնչառությունը,
Կանաչ թրթիռ եմ,
Կանաչ շնորհ եմ,
Կանաչ կիրակի,
Ես ինքս եմ հրաշք այն հարությունը:

Լեփ-լեցուն եմ ես ճառագայթների դողով ու խաղով
Եվ ծվեններով առեղծվածների
Ու երազանքի,
Ես ոտից գլուխ օրինանք եմ դառնում,
Կանաչ մի աղոթք,
Երբ հավքերն իմ մեջ
Կատարում են ծեսն իրենց տարփանքի:

Իմ ձյուղերի մեջ
Աստղերը իրենց գաղտնիքն են լալիս,
Անձրևներն՝ իրենց տխրությունը ջինջ,
Եվ մեղուները
Քաղցրության համար իմ գիրկն են գալիս,
Առնում են, տանում
Ու չի պակասում ինձանից ոչինչ:

Հողի երազը,
Հողի շնորհը
Ու լույսը հողի
Ես վեր եմ պարզում
Կանաչ, թրթռուն իմ այս մատներին,
Բայց տառապանքը,
Լուռ տառապանքն ու ցավն արարողի
Հայտնի են միայն իմ արմատներին...

ՏԱՂ ԿՐԱԿԻ

Այրվում ես ահա...
Բոցդ ոսկի է ու բոցդ բոսոր,
Եվ բոցիդ ծայրը
Նման է այնպես կապույտ թախծության,
Նման է այնպես
Յոթ երկնքի հետ շշուկով խոսող
Բանաստեղծության:

Այրվում ես, այրվում...
Եվ գեղեցիկ է տառապանքը քո,
Եվ գեղեցիկ է որպես արարում
Ու որպես սկիզբ,
Որպես ներշնչանք
Ու որպես կարոտ
Ու որպես սիրո անավարտ կսկիծ:

Այրվում ես, այրվում...
Եվ օրհնյալ ես դու, հրեղեն հառաչ,
Եվ օրհնյալ ես դու, կապույտ թախծություն,
Ծուխդ՝ երկնքին,
Մոխիրդ հողին խառնելուց առաջ,
Դառնում ես կապույտ բանաստեղծություն...

ՏԱՂ ՄՊԱՍՄԱՆ

Նա երբ է ծնվել...
Այն օրը գուցե, երբ գաղտնիքը քեզ
Կանչեց, հմայեց
Ու խուսափելով, սուրաց գեղեցիկ...
Եվ սպասում ես...
Բայց նա թևավոր,
Բայց նա՝ հրակեզ,
Իսկ դու՝ հողեղեն, հողաբույր խեցի...

Եվ սպասում ես...

Եվ սպասում ես դու ամեն վայրկյան...
Անքնության մեջ
Քո սպասումը արշալույս է զով,
Չմեռների մեջ՝ հողի տաք խայտանք,
Ամպրոպի շունչ է,
Կայծակի բույր է,
Ծաղկաթերթ ու ցող:

Եվ սպասում ես...

Եվ սպասումդ
Լույս է աղբյուրի հեկեկանքի մեջ,
Եվ Հարդագողի հրեղեն հառաչ, բարբառ է անհուն,
Կռունկի կանչ է,
Ակոսի տող է,
Դող է զանգի մեջ

Ու չվերծանվող բանաստեղծություն:
Եվ սպասում ես...

Կինն է քեզ նայում
Ու նայում այնպես,
Որ թվում է, թե
Պիտի արգելված պտուղը քաղի,
Բայց խուսափում է,
Հեռանում անդարձ,
Ու նորից անտես
Թախիծն է գալիս
Ու ծարավն աղի...

Եվ սպասում ես...

Եվ սպասում ես դու ներշնչանքիս,
Իսկ նա գալիս է,
Գալիս սիրուի հու քմահաճ խաղով,
Գալիս,
Մատնում է ողջակիզումի անլուր տանջանքին,
Բայց թողածն ի՞նչ է, –
Մի բուռ մոխիր է,
Մի անբառ աղոթք...

Եվ սպասում ես...

ՏԱՂ ԺԱՄԱՆԱԿԻ

Ո՞ր ես սլանում,
Այդ ո՞ր ես սուրում...

Կանգնեիր մի պահ,
Կանգնեիր գոնե լոկ այն վայրկյանին,
Երբ թռիչքի մեջ արծիվն է հանկարծ
Վսեմ մի դողով կանգնել լազուրում...

Ո՞ր ես սլանում,
Այդ ո՞ր ես սուրում...

Կանգնեիր մի պահ,
Կանգնեիր գոնե լոկ այն վայրկյանին,
Երբ իր արծաթե սոսափյունի մեջ
Բարդին է հանկարծ լռել լազուրում...

Ո՞ր ես սլանում,
Այդ ո՞ր ես սուրում...

Կանգնեիր մի պահ,
Կանգնեիր գոնե լոկ այն վայրկյանին,
Երբ իմ գրկի մեջ սերն է նվաղել,
Եվ հրաշքներ են շրջել լազուրում...

Ո՞ր ես սլանում,
Այդ ո՞ր ես սուրում...

ՏԱՂ ՀԱՅՐԵՆԻ ՏԱՆ

Կանչում է նա ինձ...

Իր մաշված դուան տխուր ճռինչով,
Որ հեռու հեռվից ասես երգում է
«Առավոտ լուսո»,
Կանչում է նա ինձ...

Առաջին անգամ այնտեղ եմ առել
Ես հոտը հացի ու համը աղի...
Եվ նրա կավե կտուրից եմ ես
Տեսել, թե աստղը
Ինչպես է սրբում իր արտասուքը...

Եվ իմ առաջին արցունքի միջից
Մայրական դեմքի ցլանքն եմ տեսել,
Տեսել արևը,
Երկինքը,
Բարդին
Եվ օդում կախված հավքի թրթիռը:

Եվ գիտեմ հաստատ,
Այն տան պատերի մթին ձեղքերում
Թրթռում է դեռ
Շուրթերիս ծնված այն բառն առաջին,
Որ կամ հիացում,
Կամ ցավ է եղել:

Եվ գիտեմ հաստատ,
Որ այդ տան վրա
Ամեն առավոտ ու ամեն գիշեր
Ինչ-որ մի անհայտ,
Ինչ-որ մոլորված հավք է թպրտում
Ու ձշճում տխուր...

Հասկացիր, Աստված,
Կանչում է նա ինձ...
Իր մաշված դռան երկար ձոխնչով,
Որ հեռու հեռվից երգում է ասես
«Առավոտ լուսո»,
Կանչում է նա ինձ...

Եվ սակայն ինչպե՞ս հասկանաս,
Աստված,
Երբ ոչ մայր ունես,
Ոչ հայրենի տուն,
Ոչ ծննդավայր...

ՏԱՂ ԱՆՁՆԱԿԱՆ

Ապրել ես այսքան,
Բայց դեռ չգիտես ո՞վ ես դու և ի՞նչ...

Եվ գիտես միայն,
Որ նման ես դու
Բարբարոս ու բիրտ այն քնքշությանը,
Որ տառապում էր առաջին մարդու
Թանձր շրթունքին
Եվ չէր կարենում վերածվել բառի:

Եվ գիտես՝
Անձև քո ստվերները տվայտում են լուռ,
Որ գեղեցկանան,
Անրջանքների ու ներշնչանքի
Քույրերը դառնան,
Բայց չեն կարենում:

Գիտես,
Որ անգույն անքնության պես
Ուզում ես փոխվել մի մեծ երագի,
Որ կապուտակ է
Ու թեթև՝ որպես
Եթեր
Ու ծաղիկ:

Եվ գիտես նաև,
Որ հիվանդ ես դու կապույտի ցավով,

Որ բնակվում է էությունդ մեջ
Անլուր տագնապը վիրավոր հավքի...

Որ հիվանդ ես դու և այլ մի ցավով,
Որ գիշերային երազներիդ մեջ
Լեռնալանջն ի վար աղբյուր է արծաթ,
Մամուռը՝ ոսկի, ու գուռն է արծաթ,
Եվ մի թուխ աղջիկ առավոտ լուսին
Աղբյուր է եկել կավե կուժն ուսին,
Աղբյուր է եկել,
Ջրին կոացել
Ու թուխ ծոցիկն է
Լույսի դեմ բացել...

Եվ գիտես նաև,
Որ երբ երեկոն
Երկնքի կապույտ լուսամուտի մեջ
Առաջին աստղի թրթիռն է վառում,
Քեզ թվում է միշտ,
Թե ինչ-որ հեռու, անհայտ աշխարհում
Մի ոսկեվորիկ ծրագ են վառել,
Սպասում են քեզ:

Եվ գիտես նաև,
Որ քեզ տանջում է
Մի զարմանալի ու խենթ ցանկություն,
Որ ուզում ես դու ամենայն ինչի
Տալ նոր մի անուն.
Սիրո անունը
Առեղծված դնել,
Քարի անունը
Դնել քնքշություն,

Հացը,
Սուրբ հացը
Անվանել հրաշք...

Եվ գիտես նաև,
Որ շնչում ես դու
Մաքուր՝ որպես խիղճ,
Ցավոտ՝ որպես խիղճ,
Թեթև՝ որպես խիղճ,
Ծանր՝ որպես խիղճ:

Եվ գիտես նաև,
Որ այս աշխարհում
Ամենից առաջ ու ամենից շատ
Այս հողն ես սիրում,
Փոքրիկ այս հողը,
Որի քարն ասես
Արծվի կոհնչ է բիրտ ու բրածո,
Եվ որի խոտը խոնարհություն է...
Փոքրիկ այս հողը,
Որ բնակվում է սրտիդ այն խորշում,
Ուր բնակվում են
Երդումն ու ցավը...

1975–1976



**ԵՐԳԻ
ԾՎԵՆՆԵՐ**



*...Ախ, ծիածանը՝
Մեռած անձրևի
Այս կարմիր-կանաչ տապանագիրը...*

* * *

Բոլոր բառերից ամենաշատը
«Կապույտն» եմ սիրում:

Կապույտ աստղի պես
Հանգչում ես հեռվում,
Տուն իմ հայրենի...

* * *

Երկիր, ես քո դեմ ծունկի եմ իջնում,
Որ խոստովանեմ
Քո հողին,
Քարին,
Ջրի շառաչին...
Ու պետք չեն բառեր,
Ինձ շշուկն այն տուր,
Որ ունեցել է մարդու ստեղծած
Աղոթքն առաջին:

* * *

Գարնան ամպրոպը՝
Ցասում ու գանգատ.
Գարնան ամպրոպը՝
Տառապանք ու լույս,
Գարնան ամպրոպը՝
Շանթի շեկ մոլուցք
Եվ արցունք բարի...

Գարնան ամպրոպը՝
Մայրենի լեզուն
Իմ լեռնաշխարհի...

* * *

Գնամ...
Հեթանոս իմ նախնիների՝
Մեր կաղնիների
Խիտ սաղարթներից
Պոկեմ վայրենի բերկրություն ու ծիչ...

Եվ աղբյուրների՝
Ջինջ ու զրնգուն մանկությունների
Ակունքների մոտ
Ծնկաչոք իջած՝
Հավաքեմ արդար արեգակ ու խիղճ...

* * *

Իմ հայոց երկինք՝
Կապույտ վեհարան...

Արծիվն է այստեղ
Անհունը չափում,

Եվ Արարատն է
Նստում խորհրդի՝
Արևածագի
Ծիրանին վրան...

Իմ հայոց երկինք՝
Կապույտ վեհարան...

* * *

Աղքատ եմ նորից...

Կոպերս փակեմ,
Գնամ,
Մանկության մաքուր գետակից
Արծաթ հավաքեմ:

* * *

Արշալույսն այնտեղ
Իրար է խառնում աստղեր ու ծաղիկ,
Արշալույսն այնտեղ
Խարտյաշ հասկերի խոնարհ հարսնություն
Ու փեթակների բզզոց է բարի...

– Սիրտ իմ,
Պանդուխտն ես դու այդ աշխարհի:

* * *

Տոնն իմ հայրենի,
Ամեն երեկո առ աստղ մի տրտում
Ու սեմիդ վրա մոմի պես վառիր:

– Իմ հեռավորս,
Կորածս,
Հինս,
Դուրդ բաց պահիր:

* * *

Աղբյուրը...
Լեռան աղբյուրն արևոտ...

Բոբիկ մանկան պես
Ասես, թե ոտքը
Չարկել է քարի
Ու ծիծաղում է
Արցունքի միջից:

Աղբյուրը...
Լեռան աղբյուրը վճիտ...

* * *

Այս ծաղիկները երևի հողի
Բառերն են անձայն,
Այս շուշանները
Երևի սիրո շուկներ են սուրբ,
Մանուշակները՝ թախծության խոսքեր,
Եվ զանգակները
Կապույտ կարոտի կապույտ կանչերն են...

Իսկ կակաչները,
Որ խենթանում են երաշտից առաջ,
Երևի հողի ալ հառաչներն են..

* * *

Անձրևը անցավ...
Ու ծիածանը
Կախել է ահա ծիրանի ծիրը...

Ա՛խ, ծիածանը,
Մեռած անձրևի
Այս կարմիր-կանաչ տապանագիրը...

* * *

Գարնան անձրևի առաջին կաթիլ,
Դու անհայտ հավքի
Վճիտ ծվլոց
Ու լճյա հայտնության,
Հայտնության թախիծ...

Եվ քո լույսի դեմ
Ծունկի է իջել,
Լուռ աղոթում է կապույտ մի ծաղիկ...

* * *

Գյուղի առավոտ...
Կապույտ ու բարդի:
Թոնիրների մեջ հացն է արթնանում,
Ինչ-որ տեղ գառն է մայունով լալիս...

Ու խղճի հոտ է
Աշխարհից գալիս:

* * *

Ամառ է:
Տոթ է:
Ոչ քամի, ոչ հով,
Բայց սոսափում է մենավոր բարդին...

Երևի օդում թաքուն թափառող
Ինչ-որ տազնապ է թառել սաղարթին:

* * *

Մայրամուտն ասես հնդիկ է մի թուխ,
Սրինգ է սուլում,
Ու նվագի տակ
Բարակ օձի պես պարում է քամին:

Շնորհապարտ եմ, սիրտ իմ, քեզ այնպես,
Որ հեքիաթներ ես հորինում անգամ
Այս գորշ ու տխուր իրիկնաժամին:

* * *

Յողի կաթիլը
Արցունքի նման կախվել է ծառից...

Էհ, ի՞նչ իմանաս,
Գուցե ծնվել է վաղուց մոխրացած
Ինչ-որ մի աստղի ոսկե ծիծաղից:

* * *

Բարդիններ,
Քուրմներ,
Ես ձեզ երգ եմ պարտք:

Առավոտ կանուխ
Բարձրացել էիք ձեր մերկ թաթերին,
Որ առաջինը լույսը համբուրեք
Եվ ձոնեք նրան օրհնություն ու փառք...

Բարդիններ,
Քուրմներ,
Ես ձեզ երգ եմ պարտք:

* * *

Ծիծեռնակները վերադարձել են,
Ճախրում, ձչում են
Խենթ հարբածները...

Եվ միայն ճամփի հողմերը գիտեն,
Որ նրանք այն նույն
Տառապածներն են:

* * *

Աղբյուրը...
Լեռան աղբյուրը մաքուր
Ուշաթափվում է ասես ծիծաղից:

Բայց երկար նայիր,
Ընդերքից ելած տառապանք է լույս
Ու տառապանքով մաքրված թախիծ...

* * *

Ամենատխուր,
Ամենամաքուր
Ու վսեմ
Երգը
Երևի երգն է մեռնող կարապի...

Ու ես չեմ լսել երգը կարապի:

* * *

Ես երեկ արտում մի կակաչ տեսա...

Ու մինչև հիմա մեն-մենակ կանգնած
Բոցկլտում,
Այրվում,
Թախծում է իմ դեմ:

Ու չեմ մոռանում:
Ինչո՞ւ:
Չգիտեմ...

* * *

Ժայռի շրթունքին՝ աղբյուրի ծիծաղ,
Ձորի կոկորդում՝ գետի հեկեկանք...

Եվ դա երևի հենց դու ես,
Իմ երգ,
Եվ դա երևի հենց դու ես,
Իմ կյանք:

* * *

Շանթի հետքեր կան ժայռի կողերին,
Եվ կնձիռներ կան ճակատի վրա...
Այդ կնձիռներում թրթռում թեթև,
Ոգիանում է
Լույսը արևի...

Նայիր դու անթարթ, նայիր այդ ժայռին,
Ու կնմանվի նա մարգարեի:

* * *

Արցունքի կաթիլ
Փոքրիկ,
Շողարձակ...

Ու մեջը՝ կսկիծ,
Ու մեջը՝ կարոտ,
Ու մեջը՝ ամպրոպ
Ու մեջը՝ կայծակ...

* * *

– Թռչուններ, ասե՛ք,
Դուք էլ երազներ տեսնո՞ւմ եք կյանքում,
Երբ կապույտներից իջնում եք ներքև
Եվ գորշ բներում ննջում եք հանգիստ...
– Տեսնում ենք, այո՛,
Տարբերում նույնիսկ
Մեր գորշ երազը մեր կապույտ կյանքից:

* * *

Բառը դողում է
ու դառնում երդում,
Հավքը դողում է
ու դառնում թռիչք,
Կինը դողում է
ու դառնում մեղսանք...

Դրանք, երևի,
Ամենավերին վայրկյաններիդ են, կյանք...

* * *

Երբ լուսաբացին ճանապարհ ընկնես,
Լուսաստղը վերցրու իբրև թալիսման
Եվ լուսաստղի հետ մի բառ վերցրու՝
«Խիղճը» կամ «սերը»...

Իսկ ավելի ձիշտ՝
«Խիղճը» և «սերը»:

* * *

Եվ փաթիլը ձյան իմ բաց ափի մեջ
Այսօր այնպիսի հրաշքով թառեց,
Ինչպես կթառեր
Անհայտությունից իջած աստղը ջինջ...

Օրհնություն քեզ, բախտ,
Ուրեմն դեռ դու ունես ամեն ինչ:

* * *

Վաղն առավոտյան ինձ շուտ արթնացրեք,
Ձնհալի հոտից զգում է հոգիս,
Որ հողը ձայնել
Ու կոունկներին արդեն կանչել է...

Կգան, կգան,
Չեմ տեսնի հանկարծ,
Չեմ լսի նրանց անուշ կանչերը:

* * *

Գարնն է,
Մեղքն է քայլում աշխարհով,
Ծառերը ասես
Սիրուց արտասվող աղջիկներ լինեն...

Այդպես երևի լացել է մի օր
Մեղավոր ու սուրբ այն Մագդաղինեն:

* * *

Բարձրացել էիր ոտներիդ ծայրին,
Որ խնձոր քաղես...
Բացվել,
Ցուլում էր ծնկածալդ թուխ...

Ու ես հիշեցի,
Եվա է եղել,
Եղել արգելված,
Սակայն ի վերջո ճաշակված պտուղ:

* * *

– Անձրև հուլիսյան,
Մտիր ծառերի տաճարը կանաչ,
Թող մաքրությունդ
Այնտեղ լուսաբուխ իր աղոթքն անի...

Եվ չմոռանաս,
Կա Երևանում լուսաչյա մի կին,
Վարսերին իջիր,
Լա օրհնությանդ շատ է արժանի:

* * *

Դու նման էիր այնտեղ բոլորին,
Եվ սակայն հանկարծ ինչ-որ մի խոսքից
Այնպես շիկնեցիր,
Որ թվաց պիտի գարունը բուրի...

Ու ես հասկացա՝
Կնոջ շիկնանքը կին է մի ուրիշ:

* * *

Ու նախ անծրևի մի կաթիլ իջավ,
Հետո՝ երկրորդը,
Հետո՝ երրորդը,
Հետո բոլորը իջան վարսերիդ՝
Իբրև աստղային անարատ նվեր...

Ու կանգնել էիր դու աստղերի մեջ,
Ու կանգնել էիր դու աստղերից վեր:

* * *

Թե իմ պատճառով
Սև հագնես մի օր ու անզարդ մնաս,
Օրհնեմ,
Սիրելիս,
Որ առավելս դու գեղեցկանաս...

* * *

Նորից ու նորից կարոտը գալիս,
Վառվում է,
Ծխում,
Մխում է իբրև
Հոգնաբեկ մի ամպ:

Գեղեցիկ է նա
Ու տառապալի...

Գեղեցիկ է նա իմ տառապանքով
Ու տառապալի՝ քո գեղեցկությամբ:

* * *

Ամառ է,
Տաղտուկ...
Եվ հորանջում է փողոցը հանգած...

Բայց կինը անցավ,
Եվ օրը ասես
Թրթռաց իբրև արծաթե զանգակ:

* * *

Գիշերը դրսում անձրև էր գալիս...

Ու երազիս մեջ այնպես էր թվում,
Թե այդ գիշերը
Կին է հիասքանչ,
Որ իր անձրևե վարսերն է սանրում
Եվ ժպտում է ինձ
Մեղավոր ու տաք...

Գիշերը դրսում անձրև էր գալիս,
Գարնան առաջին անձրևը հստակ...

* * *

Գարունն է անցնում,
Անցնում խենթ,
Տխուր,
Քսան տարեկան...
Անցնում,
Բոցի պես իր սերն է տանում...

Եվ աղջիկները նայում են նրան,
Նայում են, այրվում
Ու գեղեցկանում...

* * *

Եվ ես ասում եմ.
– Նայեցեք ահա,
Այս ոսկեծակատ,
Փոքրիկ այս հասկը,
Աշխարհի հոգսը
Ու բեռն է ուսել...

Քամիներ,
Հովեր,
Օգնական եղեր,
Նուրբ է ցողունը
Եվ ուսի բեռը՝
Գթություն ու սեր:

* * *

Գիշերը հողմ էր, գիշերը մրրիկ,
Գիշերը դաշտով արհավիրքն անցավ,
Արտի մեջ քնած կապույտ մի ծաղիկ
Հենց քնի մեջ էլ տխուր մահացավ,
Արտույտն իր բնում՝ տաք, փոքրիկ մի սիրտ,
Տագնապ էր ու դող, մորմոք էր ու ցավ...

Բայց օրը նորից
Արտույտի ոսկե երգով լուսացավ:

* * *

Եվ լինե՛ր այնպես,
Որ բանաստեղծը համոզեր Աստծուն,
Ու նա ողջ գիշեր աշխարհի վրա
Մաղեր անձրևի օրհնությունը զով
Ու ցերեկն ամբողջ
Արևի ոսկե
Երազը հիներ...

Ինչ կարմիր-կանաչ աշխարհ կլինե՛ր...

* * *

Երգել եմ ուզում...
Սիրտս ծակծկում,
Սիրտս այրում է կսկիծ մի հրե...

Ու գիտեմ,
Սրինգ դառնալուց առաջ
Եղեգն էլ այս նույն կսկիծն է կրել...

* * *

Թեթև, որպես լույս ու որպես ներում,
Թափառում էի ես վերևներում...
Լճու էր ամեն ինչ,
Միայն բարձունքում
Վայրի ծաղիկն էր մեն-մենակ զնգում,
Մղկտում, որպես կարոտն իմ արյան...

Երազ չէր դա, ո՛չ,
Երգ էր համարյա...

* * *

Երբ երգ եմ գրում, ինձ թվում է միշտ,
Թե ծունկի իջել
Ու անձրևի տակ կրակ եմ վառում...

Եվ ծուխը սև է,
Եվ ծուխը դառն է,
Եվ ծուխը կծու,
Մաքուր են սակայն արտասուքներս
Որ իմ երգերի կոպին են թառում:

* * *

Բանաստեղծություն,
Նման լինեիր ամռան գիշերվա
Խորունկ երկնքին
Կամ ոտից գլուխ երկինք հագնեիր...

Եվ բառերը քո,
Ո՛չ,
Բոլորը չէ –
Բառերն այն, որոնք երդում են ու խիղճ,
Բառերն այն, որոնք հավատ են ու սեր,
Շողային՝ նման մոլորակների:

* * *

Ամպրոպն անցել է, -
Անձրևը՝ անցել:

Եվ լյառն Արարատ թեթև է այնքան,
Ասես չքացել մարմինը նրա,
Ու սուրբ հոգին է միայն մնացել...

* * *

Ես սրտիս ցավից արթնացա հանկարծ...
Լուսամուտիս մեջ,
Իմ ցավի նման,
Ինչ-որ մենավոր աստղ էր թրթռում...

Իմ ցավի նման՝ այրվում կարեվեր
Ու լռում, լռում...

* * *

Լեռների վրա զրնգաց տխուր
Գարնան անձրևը՝
Արծաթե զանգակ...

Եվ ծիածանը հիմա ջինջ օդում
Կախվել է, որպես կապույտ արծազանք...

* * *

Մի զարմանալի, մենավոր թռչուն
Թառել թփերին,
Երգում է իր սերն ու ցավն անհատնում:

Չգիտե սակայն այդ զարմանալին,
Որ զարմանալի երգով ու տաղով
Իր տեղն է մատնում...

* * *

Աստղերը նայում
Մեր մոլորակին,
Դառնում են զարմանք
Ու հրե հարցում.
– Այս որքան հրաշք,
Այս որքան ծաղիկ,
Եվ որքան արյուն,
Եվ որքան արցունք...

1975–82



**ՀՈՒՅՍ
ԱՌԱՎՈՏԻ**



*Գիտեմ, ախ, գիտեմ, նա չի ծերանում
Ու չի էլ թողնում, որ ես ծերանամ...*

* * *

Լոյս առավոտի,
Դու, որ նման ես երաժշտության,
Եկ ու ինձ փրկիր այս գիշերային անդաշնությունից,
Շաղոտ շուրթերով շշնջա նորից խոսքը հաշտության
Ու սիրտս զտիր,
Որ պղտորվել ու ելել է հունից:

Ամբողջ գիշերը
Ես նման էի մի մութ անձավի,
Որ կասկածների քամին էր հեծում,
Կսկիծն էր զարթնել ինչ-որ մի անցած, մոռացված ցավի
Ու մոլոր հավքի հուսահատությամբ պատերս էր ծեծում:

Եվ թվում էր ինձ,
Ձայներ եմ լսում ես ինչ-որ տեղից,
Որ աղերսում են արևի գինի, մուրում սեր ու հաց...
Ես գնում էի
Արևի,
Գինու,
Հացի հետևից,
Բայց վերադառնում ունայն ու հոգնած:

Լոյս առավոտի,
Դու, որ նման ես երաժշտության,
Եկ ու փարատիր այս տագնապը խուլ,
Շաղոտ շուրթերով շշնջա նորից խոսքը հաշտության

Ու դիր ձակատիս
Բարակ մատներիդ հրաշքը տխուր:

Գիտնս դու,
Գիշերն իմ այս տարիքում ցավ է ու կասկած,
Եկ, արտույտի պես ինձ վրա թևիր,
Դիր ափերիս մեջ հավատն իբրև հաց,
Ու գնանք նորից
Արևի,
Գինու,
Հացի հետևից...

* * *

Լոյս առավոտի,
Դու, որ նման ես Հարությանն այն մեծ,
Չեղյալ անեիր եղեռնը արնոտ,
Ու ես ծնվեի,
Ու ես ապրեի պապերիս տան մեջ,
Ու ես հերկեի երկնքին կպած դաշտը մեր Կարնո:

Թռչունի նման
Չարթնեի ծագող արևից առաջ
Ու լվացվեի լեռներից պոկված կապուտակ քամով...
Ու դաշտ գնայի՝ ուսերիս առած
Արտոյտի օրհնանքն ու երկինքը մով:
Եվ տողերի տեղ,
Որ հաճախ այնքան դատարկ են ու սին,
Մխացող ու տաք իմ ակոսները հողում շարեի
Եվ բառերի տեղ այս մաշված ու հին,
Սերմի ծանր ու ձույլ ոսկին շաղեի:

Զիներ կյանքում
Այսքան երկարող մորմոքն այս դեղին,
Զիներ կյանքում կասկածանքն այս կոյր,
Ապավինեի միայն մայր հողին,
Անձրևին,
Ցողին,
Աստղերին մաքուր:

Մեկին սիրեի,
Սիրեի խորունկ, սիրեի հավետ
Ու չվատնեի շնորհն այդ վերին,

Եվ ոչ ոք կյանքում սերս չդավեր ու չխարդավեր,
Ոչ ոք չմատներ խանդի խաղերին:

Ու երբ տխրեի,
Դաշտերի խոտը խունկի պես բուրեր,
Ու երբ թախծեի,
Լեռան աղբյուրը ինձ հետ հեկեկար,
Հովն իր արծաթե սրինգը սուլեր,
Եվ օրհնության պես մայրամուտը գար:

Հետո,
Երդիկից ցողի հետ կաթող աստղալույսի տակ,
Քնեի խաղաղ, խորն ու մանկորեն,
Ու խիղձս, խիղձս լիներ անարատ,
Ինչպես աստղ ու ցող ու ինչպես ցորեն...

Ու երբ օրը գար,
Ես այդպես խաղաղ, այդպես մանկորեն
Քնեի հավետ պապերիս հողում
Ու ցող դառնայի,
Դառնայի ցորեն,
Դառնայի հավքի ոսկե ձովողյուն...

* * *

Լոյս առավոտի,
Դու, որ նման ես մի մեծ կրկնության,
Սակայն կրկնության, որ ամեն անգամ նոր է ու պայծառ,
Կրկնեիր այդպես երգը հեռավոր իմ պատանության,
Որ իմ շուրթերից պոկեց ու տարավ մրրիկը այն չար:

Իմ այդ երգի մեջ
Աստղերի մաքուր հեկեկանքը կար,
Բարդիներ կային, կար լույս ու թախիծ,
Կար մեր տան շեմքին բառաչով մորթվող սպիտակ մի գառ
Ու ցաված մի սիրտ, ու ցաված մի խիղճ:

Դեղձիներ կային –
Որ թերթեր էին քնքշորեն թափում,
Եվ առավոտներ,
Որ մաքուր էին, որպես արտասուք,
Գիշերներ կային՝ խենթորեն կապույտ,
Ու կապույտի մեջ՝
Բարակ մի աղջիկ, բարակ մի ասուպ:

Ո՛ր է նա հիմա,
Ո՛ւմ հետ է լույսի իր խաղերն անում,
Ո՛ւմ է նա կանչում ու խուսափելով հեռանում անձայն...
Գիտեմ, ախ, գիտեմ, նա չի ծերանում
Ու չի էլ թողնում, որ ես ծերանամ:

Ասում եմ, անգամ օրը ցերեկով խորունկ ջրհորից
Կարող ես տեսնել երկինքը՝ լեցուն աստղ ու ասուպով,
Լոյս առավոտի,
Այդ շնորհն արա՝ աչքերս նորից
Աստղերով լցրու
Ու մորթվող գառի սուրբ արտասուքով...

* * *

Լնյա առավոտի,
Դու, որ նման ես ոսկե կածանի,
Տա՛ր ինձ, քո երգվյալ ու հին ճամփորդին...
Եվ այնպես արա,
Որ ոտքս չառնի փուշ ու մացառի,
Որ ծովով անգամ ընթանամ, ինչպես Աստըծո որդին:

Ես պիտի գնամ,
Կորուսյալներիս փնտրեմ մշուշում,
Վաղուց, ա՛խ, վաղուց նրանց չեմ տեսել,
Նրանցից մեկը կնոջ տեսք ուներ, սակայն չեմ հիշում,
Կարո՞տ էր կոչվում,
Տառապամ՞ք,
Թե՞ սեր...

Եվ մեկ ուրիշը նժույգ էր ասես՝ կողերը ցուլուն,
Իսկ աչքերի մեջ հեռաստանների լույսն էր թախծալի,
Ո՞ր է նա հիմա,
Ո՞ր լեռներում է շանթի պես ցուլում,
Ո՞ր է սլանում առանց հեծյալի:

Եվ մեկ ուրիշը պարզապես ծառ էր,
Ուռի էր բարակ,
Նա աղջկա պես բորիկ ոտքերն ու փեշերը թրջել,
Կանգնել էր մենակ, տխրոր, շվարանձ,
Չէր կարողանում գետակը թռչել:

Եվ մեկ ուրիշը ինչ-որ հովիտ էր՝
Հողի ծուխ ու ցող,
Ամպերը լացել ու հեկեկացել ու անցել էին,
Արտույտներն օդում ցող էին կտցում ոսկե կտուցով,
Իսկ կակաչները խենթացել էին:

Իսկ մեկ ուրիշը թե էր կապուտակ մի ծխածանի,
Որ հեռու մի օր իմ սիրո ճամփին կախվել էր վերից...

Լոյս առավոտի,
Դու, որ նման ես ոսկե կածանի,
Տար, որ միանամ կորուսյալներիս...

* * *

Լնյա առավուտի,
Դու, որ նման ես օրինաբանության,
Իջիր աշխարհին, իջիր լիաբուռ,
Իջիր ու թաքուն փոխվիր բարության,
Հասկ դարձիր,
Փեթակ
Ու լեռան աղբյուր:

Ժայռի պղնձից բուսել է ահա կապույտ մի ծաղիկ,
Դժվար է բուսել,
Բուսել է ցավով ու շատ է ծարավ,
Վրան երկնային քո ցողը մաղիր,
Արմատը շաղիդ արժանի արա:

Եվ թող հեթանոս այս արտույտները գալուստդ տոնեն,
Թող արշալույսի բուրմունք խառնվի նորաթուխ հացին,
Իսկ թե բառերը մաշվում են իրոք,
«Խիղճ» բառը գոնե
Թող քո շուրթերին միշտ ցլա՝ որպես աստղը նորածին:

Իջիր,
Մշուշի ծվենը վերջին դարձրու երազանք,
Քո շառավիղը ձամփա դարձրու լույսին ու բարուն,
Եվ այնպես արա,
Որ երկաթը՝ խոփ,
Որ պղինձը՝ զանգ,
Աղջիկն հարսնացու դառնա աշխարհում:

Իսկ ինձնից, շուայլ,
Չիլես երբեք այս թրթիոն անքուն,
Որ կարողանամ դեռ սիրահարվել,
Քանզի շուրթերն այն, որ կնոջ շուրթից չեն այրվում կյանքում,
Չեն կարող նաև մարգարեական խոսքերով այրվել:

Եվ այսպես դանդաղ,
Այսպես տխրորեն մխալու տեղակ,
Տուր ինձ մի վսեմ, անմոխիր այրում,
Կայծակով խոցված
Եվ արտասուքի ցողով ջրդեղված
Ինձ այն բախտը տուր,
Որից հրաշք է ծնվում աշխարհում...

* * *

Լնյս առավոտի,
Դու, որ նման ես կնոջ շիկնանքի,
Հավատա,
Վաղուց չէի հանդիպել ես շիկնող կնոջ...
Ու ինձ թվում էր, թե պակասել է հրաշքը կյանքի,
Թե պակասել է վերին մի շնորհ:

Թե պակասել է արշալույսների թիվը աշխարհում,
Ու պակասել է շշուկն աստղերի ու աստվածների...
Եվ սիրո համար մի չար աղետ էր սիրտս գուշակում,
Գուշակում մահը առեղծվածների:

Բայց թույլ տուր հիմա,
Որ քեզ շնջամ գաղտնիք մի վերին,
Գաղտնիք, որ անգամ վախենում եմ ես ինքս ինձ բացել.
Կա Երևանում փխրուն,
Բարալիկ,
Լուսաշյա մի կին,
Որ դեռ քեզ նման լուռ շիկնել գիտե
Ու գիտե թախծել...

Նա՝ զարմանալի,
Նա՝ լույս ու մութի անմեկին շաղախ,-
Ու վրաս մի մեծ թախիծ է իջել...
Ու մոլորվել եմ,
Ու կարկամել եմ ես նորից ահա
Նրա շիկնանքի
Ու իմ հին արյան ծարավի միջև:

Եվ այս ամենը տառապալի է ու շատ է ցավոտ, –
Մանուկ եմ ասես, ու բոբիկ ոտքս առել է քարի,
Բայց այդ ցավի մեջ
Ինչ-որ մի բան կա մաքուր ու շաղոտ,
Որ նորոգում է հրաշքն աշխարհի:

Լոյս առավոտի,
Ի՞նչ անեմ, ասա, ոչինչ չգիտեմ,
Լոյս առավոտի՝
Իմ սուրբ գաղտնարան ու աղոթարան,
Այսպես մոլորված,
Այսպես շփոթված կանգնել եմ քո դեմ,
Փանփ եմ շշնջում,
Օրհնանք եմ տալիս ես քեզ ու նրան...

* * *

Լնյս առավոտի,
Դու, որ նման ես մի մեծ շնորհի,
Եկ ու շնորհիր ինձ հանդիպումի բերկրությունը տաք...
Եվ այնպես արա,
Որ նա քնքշորեն ծվարի նորից
Վաղուց որբացած իմ թևերի տակ:

Նա թուխ է, փխրուն...
Առաջին անգամ երբ նրան տեսա,
Թվաց՝ եկել է կղզուց մի անհայտ,
Հեռու մի կղզուց,
Որ ծառերը բոց, զմրուխտ են ու զառ,
Եվ ոսկեգույն են կիսամերկ կանայք:

Դու ինձ հավատա,
Որ չէի ուզում ես արդեն ոչինչ,
Որ հաշտ էի ես արդեն աշխարհի
Ու իմ բախտի հետ...
Բայց այդ մաշկը թուխ,
Այդ սև աչքերի առեղծվածը ջինջ,
Եվ բեկվող մեջքի քնքշությունն այդ խենթ...

Չնհալ է հիմա...
Ջրերը դարձել լույս ու հեկեկանք
Ու ծիծաղում են, ծիծաղում տխուր...
Եվ իմ մեջ զարթնել,
Մխում է իմ մեջ արցունքոտ մի բախտ,
Եվ հողի նման կարոտն է մխում:

Ու ես չգիտեմ,
Թե ինչպես զարթնեց մեղավոր մի սեր,
Չգիտեմ՝ դժբախտ,
Թե պատանորեն բախտավոր եմ ես...
Ու գիտեմ միայն, որ նա ինձ համար սուրբ վանք է
դարձել,
Եվ նորից ահա ուխտավոր եմ ես:

Լոյս առավոտի,
Երբ նա արթնանա, թառիր կոպերին
Եվ փոփր վրան իբրև օրհնություն մի արևավոր...
Ու լուռ շշնջա, որ ների հոգում,
Քնքշորեն ների
Սերն իմ ուշացած, սերն իմ մեղավոր...

* * *

Լնյա առավուտի,
Դու, որ նման ես երկրպագության
Եվ ծնկաչոք ես աշխարհի առաջ, ծաղկի ու խոտի,
Ծունկի եկ նորից ու արա նորից դողով մաքրության
Արարողությունն այս առավուտի:

Տեն, արտ է այնտեղ,
Արտի եզերքին կանգնած է մի այր
Եվ ափերի մեջ հասկ է տրորում,
Հետո մատներով, որ ձաքձքած են ու խորշակահար,
Ցորենի սիրտն է քնքշորեն շոյում:

Նա ոտից գլուխ բուրում է որպես ակոս ու ցորեն,
Ու թե աշխարհում սրբեր կան իրոք, ինքն է արդարև,
Նրա դեմ ծնկիր երկյուղածորեն,
Համբուրիի նրա մատները քարե:

Մացառների մեջ խաչքար է ընկած՝
Ազնիվ մի բյուրեղ,
Ո՞ւմ տքնությամբ է փոխվել հրաշքի, –
Ոչ անուն, ոչ գիր...
Եթե ուզում ես հրաշք համբուրել,
Դեմը ծունկի եկ ու երկրպագիր:

Նայիր,
Սենյակում խարտյաշ մի կին է հենց նոր արթնացել
Ու դեռ թափանցիկ շղարշ է հագին,
Ասեմ քեզ թաքուն,

Որ նա գիշերս է միայն կին դարձել,
Չոքիր նրա դեմ ու երկրպագիր:

Եվ նո՛ւրը, նայիր,
Արշալույսների առել է վրան
Ու տքնում է լուռ,
Որ կեղևի տակ արև հավաքի,
Խոնարհվիր նրան և օգնիր նրան,
Որ քաղցրությունից սրտիկը ձաքի:

Լո՛ւյս առավոտի,
Ծաղիկների մեջ բզզոց կա բարի,
Ծունկի եկ խոնարհ այդ բզզոցի դեմ, այդ տաք փեթակի...
Հացն է արթնանում,
Նրա բուրմունքը խիղճն է աշխարհի,
Ամենից առաջ նրան խոնարհվիր ու երկրպագիր...

* * *

Լնյա առավոտի,
Դու, որ նման եմ սուրբ ձշմարտության,
Եկ ու փարատիր աղջամուղջային այս մշուշը կույր,
Իմ գիշերային խարխափումները մատնիր պարտության
Եվ այն խոսքը տուր,
Որ խղձի նման մեծ է ու մաքուր:

Ի՞նչ անեմ, ասա՛,
Ես գիշերային անքուն տքնությամբ
Որոնում բառեր,
Խոսքեր եմ փնտրում ու թղթին տալիս,
Բայց քո գալու հետ, լնյա առավոտի, տեսնում եմ սակայն,
Որ ցավն ու ոգին մնացել դրսում,
Անբառ եմ լալիս:

Նայիր այս ժայռին,
Այնքան է զարկվել հողմ ու կայծակով,
Որ մարգարեի ու առաքյալի կերպար է առել...
Ու եթե խոսեր,
Ինչէր կպատմեր շուրթերով ձաքող
Եվ սակայն, ավանդ, չունի նա բառեր:

Կամ թեկուզ փոքրիկ,
Թեկուզ ցուցլուն այս ցողին նայիր,
Թե կարողանար ինչ-որ հրաշքով իր սիրտը բացել,
Երևի պատմեր, թե ինչ երկնային
Տառապանքով է ինքը գոյացել:

Երգել եմ անվերջ,
Բայց և փակ եմ դեռ, որպես գաղտնարան,
Եվ դեռ լողում է իմ էության մեջ աղջամուղջը կույր,
Առանց բառերի
Հեկեկում է դեռ գաղտնիքն իմ արյան,
Անմեկնելին է իմ մեջ հեկեկում:

Կարապն, ասում են,
Լոկ մի անգամ է երգում աշխարհում,
Եվ դա, երևի, միակ ձշմարիտ երգն է աշխարհի,
Լոյս առավոտի,
Շնորհաբաշխդ,
Ոչինչ չեմ ուզում,
Հոգնած կոպերս փակելուց առաջ
Այդ երգն ինձ տայիր...

* * *

Լոյս առավոտի,
Դու, որ նման ես մի մեծ հայտնության,
Իսկ ավելի ձիջտ՝
Միակ հայտնությունն հենց ինքդ ես, որ կաս,
Եկ, բռնիր նորից ձանապարհները քո արդարության,
Նորից արյունդ գինի դարձրու ու մարմինդ՝ հաց:

Եվ ինձ էլ քեզ հետ տար ձամփաներով, որպես առաքյալ,
Ու հավատա ինձ,
Արժանի եմ ես այդ մեծ շնորհին,
Նայիր ձակատիս, ցոլում է այնտեղ լույս մի տառապյալ,
Աչքերիս նայիր, այնտեղ դարերի թախիճն է խորին:

Ես շատ եմ ապրել..
Այն ջրհեղեղի վերջին հառաչից
Ես իմ առաջին աղոթքանման բառերն եմ հանել,
Ես եմ, երևի, աշխարհում քամել գինին առաջին,
Ցորենն առաջին ես եմ սերմանել:

Բայց, հավատա ինձ,
Աշխարհում միայն ես ունեմ խաչքար,
Թե Գողգոթայի ձամփորդը փայտե խաչ է լոկ տարել,
Իմը քարակոփ,
Իմը քարակուռ,
Իմը քարածալ,
Իմը քարի հետ դարեդար ձգվող հառաչ էր քարե:

Տես, այնտեղ, հեռվում մենավոր վանքս է կանգնել քարափին,
Կանգնել բարալիկ,
Տխուր ու փխրուն միանձնուհու պես,
Ու չէն զարմանում, թե ինչպես ապրեց հողմերի մեջ բիրտ,
Նենգ ու վավաշոտ հայացքների դեմ նա ինչպէս ապրեց...

Բայց ապրել են ես,
Ես որոնել են ավերը հուսո,
Ես իմ արյունն են գինի դարձրել ու մարմինը՝ հաց,
Քանզի դու էիր իմ շրթունքներին, «Առավոտ լուսո»,
Քանզի դու էիր, «Ճառագայթ փառաց»...

Լոյս առավուտի,
Փոթորկված է դարն ու դարը՝ ահեղ,
Իմ տագնապները զարթնում գիշերով, փոխվում են լացի,
Եվ սակայն քեզ են իմ շրթունքներին ես նորից պահել,
Հավատում են ես քո առեղծվածին...

* * *

Լնյս առավոտի,
Դու, որ նման ես անմոխիր այրման
Եվ նման այնպես ողջակիզության այն սուրբ խորհրդին,
Ինձ էլ դարձրու քեզ պես անմարմին ու անանձնական,
Այրում դարձրու հայոց աշխարհի ճաքձքած շուրթին:

Արարատ լեռն է կանգնել կապոյտում՝ կրծքին վիհ ու վերք,
Այդ վերքի վրա ինձ կախիր որպես անկեզ մորենի,
Թող նա բոցկլտա գիշեր ու ցերեկ
Եվ աշխարհներին թող տեսանելի ու հայտնի լինի:

Քարերը այստեղ
Նահատակների շիրիմներ են սուրբ,
Մառախուղները
Դեռ թաղումների խունկով են մխում,
Այդ քարերն ի վեր ինձ պարզիր իբրև հրեղեն մի սյուն,
Որ այնպես թվա,
Թե նրանց սրտից դեռ լույս է բխում:

Փլված որմերին
Գրեր կան խամրող, բառեր կան հանգած,
Խոսքեր կան մամռած, որ սուրբ են իբրև երդում ու պատգամ,
Այդ բառերի մեջ ինձ շող դարձրու,
Դարձրու շանթ ու կայծ,
Որ ցուլան իրենց լույսով նախնական:

Լեռան թեք լանջին տաճար է ավեր,

Ընկած որմ ու սյուն,
Եվ մկրտության ավազանի մեջ եղինջ է բուսել,
Ինձ լույսի մաքուր անձրև դարձրու այդ ավազանում,
Որ մեջս նորից աստղեր մկրտվեն ու ոգի ու սեր...

Թող այրվեն թեթև մասրենիներիդ թրթռոցներում,
Սոսափյունի մեջ սոսյաց անտառի,
Երկնքին կպած քո լճակների կապույտ բոցերում,
Բռնկումի մեջ ծիրանի ծառի...

Ծիրանի ծանդ...
Ծաղկել, վառվում է նորից քաղցրորեն,
Բայց տագնապում է ձյունի, կարկուտի, հողմի խուլ շնչից,
Ինձ գոլ դարձրու,
Թող առէջքներին աննկատ ծորեն,
Ծվարեն այնտեղ ցողերի հետ ջինջ:

Լո՛ւյս առավուտի,
Ինձ ոտից գլուխ դարձրու այրում,
Հավատ դարձրու, երդում դարձրու ողջակիզության,
Թող այնպես թվա, թե զինվոր եմ ես դեռ Ավարայրում
Ու չունեն հանգիստ,
Ու չունեն դադար,
Ու չունեն վախճան...

* * *

Լոյս առավոտի,
Դու, որ նման ես հսկա արտույտի,
Հավատացյալդ եմ
Ու կույր բվերի երդվյալ թշնամին,
Այդ նրանից է, որ շատ եմ խմել մրուրը մութի,
Այդ նրանից է, որ շատ է զարկել ինձ ահեղ քամին:

Տեն, նոր արարված Եվայի նման գեղեցիկ ու մերկ
Քո դուստրը չքնաղ՝ քո արշալույսն է կանգնել աշխարհում,
Բայց քանի անգամ ազատության պես նա առևանգվել,
Քանի անգամ է սև ու սուգ հագել ու հագել արյուն:

Ինձ հղացել են սև տրտմության տակ սև առաստաղի,
Տվել եղեռնի սևով մակարդված մի ծանր արյուն,
Ու ես երևի ապրեի պիտի գայլի պես վայրի՝
Երակներիս մեջ միայն մաղձ ու թույն:

Բայց իմ արյան մեջ, երևի անգամ ինձանից թաքուն,
Ապրել է մաքուր լույսը հավատի ու այգաբացի,
Դարերից ձգվող արևի մի սուրբ երկրպագություն,
Երկրպագություն գինու և հացի:

Երկրպագություն՝ ծաղկած դեղձենուց թափվող քնքշանքի,
Երկրպագություն՝ տաք ակոսներից ելնող գոլորշու,
Աղբյուրի տեսքով քարափից կախված կապուտակ զանգի,
Կապուտակ ծաղկի,
Որ ցուցյում է ժայռի շեկ խորշում:

Ու թեև հաճախ գիշերով զարթնում մորմոքն իմ արյան,
Մերթ ոռնում երկար ու մերթ որբի պես նա լաց է լինում,
Բայց, հող հայրենի,
Խաչ ու հարություն իմ բազմադարյան,
Լուսերգությանդ եմ ես ապավինում:

Թող արտույտներիդ թևերին դողան լույսերը վերին,
Ոգուդ հերկերին թող պատարագի կապույտը անհուն,
Բվի կոխնչով
Եղինջ է բուսնում ավերակներին,
Արտույտի երգով
Արտն է հարսնանում...

* * *

Լո՛յս առավոտի,
Դու, որ նման ես մի մեծ մաքրության,
Եվ ու ինձ մաքրիր, ինչպես Նարեկա այն տառապյալին,
Սրտիս մեջ վառիր լույսն անանձնության
Եվ ինձ դարձրու
Լեռան առավոտ,
Աղբյուրի ալիք...

Նայիր,
Թե սրտիս ինչ-որ մի խորշում փուշ կա նախանձի,
Հանիր քո բարակ ու նուրբ մատներով,
Թե քեն ու ոխի սև մացառ տեսնես,
Անխնա խանձիր
Քո արդարության ծառագայթներով:

Գիտես, որ շուտով ես պիտի գնամ խառնվեմ հողին,
Իսկ հողը այնպես կարոտ է սիրո,
Քնքշության կարոտ,
Դու սեր գումարիք քո ամեն շողին
Եվ տուր, որ տանեմ,
Խառնեմ աշխարհի սրտին քարքարոտ:

Եվ ինձ ներումի մեծ շնորհը տուր,
Սերն ու ներումը որբացել վաղուց
Ու շատ են տխրում,
Տուր շռայլորեն,
Ինչքան որ ունես, ինձ բոլորը տուր,
Որ հողը դառնա մի քիչ ավելի խոնարհ ու փխրուն:
Եվ տուր ինձ խղձի ցորենը մաքուր ու անանձնական,
Որ նա հասկ դառնա թեկուզ շիրիմիս այս փոքրիկ հերկում,
Հասկի կարոտով թող լուսաբացին արտույտները գան,
Իսկ դու լավ գիտես,
Թե լուսաբացին
Արտույտներն այդ խենթ ինչեր են երգում...

* * *

Լո՛ւյս առավոտի,
Դու, որ նման ես հավիտենության,
Եվ ու աշխարհը քո խաղաղության անձրևով ցողիր...
Ինչպե՛ս թաքցնեմ քեզանից մորմոքն իմ սև մենության
Եվ գիշերային իմ տագնապների խռովքը խորին:

Գիշերը ամբողջ՝ ընկնող աստղերի արցունքը կոպին
Եվ ոտքերի տակ ձերմակ մշուշի մոխիրն ավելետ,
Լյառն իմ Արարատ նման էր այնպես տառապյալ Հորին
Եվ Հորի նման ահեղ զրույց էր բացել Աստծո հետ:

Եվ ասում էր նա.

- Տե՛ր, հարկ է, որ ես տրտունջ ու բողոք
Կրծքիս տակ նիրհող հրաբուխներով դեմքիդ նետեի,
Սակայն կոկորդս խցկել ես, ավաղ, դու քար ու հողով
Եվ թողել ես ինձ միայն մարդկային բարբառն այս թերի:

Դե լսիր, քննո՛ղ,

Ի՞նչ էի արել, ասա, քո հանդեպ,
Որ կուրծքս այսպես այս վերք-վիհերով պատառոտեցիր,
Որ իմ ձակատին փշրեցիր անվերջ կայծակ ու շանթեր
Եվ զավակներիս արյունն աչքիս դեմ այսպես որեցիր:

Ի՞նչ էի արել...

Իմ զավակներին շուրջս բոլորած,
Ես գինի էի քամում իմ ոգու արդար ողկույզից,
Արշալույսների մաքուր քուրայից հանում խիղճ ու հաց,
Տաճարներ էի կերտում հավատի քարից ու լույսից:

Իմ անդունդներում

Ես չարի ոգին հավիտյան բանտել,
Շղթաներ էի դրել ձեռքերին այն չար արքայի,

Պատգամել էի իմ դարբիններին, որ հավետ զարկեն
Ու այնպես զարկեն, որ չարը երբեք չնստի գահի:

Ինչո՞ւ ուզեցիր,
Որ ձյունս դառնա արցունքի հեղեղ,
Ինչո՞ւ իմ կրծքին բացիր վիհերն այս վերքի ու խոցի,
Իմ բարձունքները դարեդար արծվի բներ են եղել,
Ինչո՞ւ թողեցիր, որ սողա այնտեղ վտառը օձի:

Ինչո՞ւ տվեցիր
Վատթարագույնը բոլոր ցավերից՝
Իմ իսկ հողի մեջ պանդուխտ լինելու մորմոքը անքուն,
Եվ հառաչանքս իմ իսկ հողներից ծանր է ավելի,
Եվ հեծությունս մթին է՝ որպես անդունդի անկում:

Այն սև օրերին
Աղաղակեցի ես հուսակտուր,
Այն սև օրերին ինքս ինձ փոխեցի վիթխարի զանգի,
Բայց խուլ էր աշխարհն...
Իսկ երբ աշխարհի սիրտն ու խիղճն է խուլ,
Ահագնանում է ու խտանում է ամպը մեղսանքի:

Երբ քնում է խիղճն,
Աշխարհի վրա մահն է արթնանում,
Երբ զանգն է լուում,
Սուտը նստում է սև խրախճանքի...
Տեսնում եմ նորից.
Մահը սնկաձև իր խայթն է հանում,
Որ վերջին անգամ գրոհի ընդդեմ լույսի ու կյանքի:

Ընդդեմ անձրևի,
Որ անհայտության հեռու ոլորտից
Մաքրության խորհուրդն ու ծլարձակման հրաշքն է բերում,

Եվ ընդդեմ հողի այն տաք գոլորշու, այն տաք կարոտի,
Որ սերմի փառքը թևերին առած, Ճախրում է վերում:

Տեր, Քեզ եմ դիմում՝

Կրծքիս տակ նիրհող հրաբուխներով
Ես քեզ եմ դիմում՝ հողմի պես ձգվող ահեղ հեծությամբ,
Գոնե այս անգամ դու եղիր արդար ու եղիր ներող,
Չարը խափանիր բարուդ մեծությամբ:

Տնոր ամենեցուն դու խաղաղության շնորհը վերին,
Հեղին ամենուր արդարությունդ որպես մանանա.
Իսկ ինձ քիչ է պետք.
Թող գեթ սառուցյալ իմ բարձունքներին
Հույսի մանուշակն իր աչքը բանա:

...Գիշերը ամբողջ՝ ընկնող աստղերի արցունքը կոպին
Եվ ոտքերի տակ ձերմակ մշուշի մոխիրն ալեվետ,
Լյառն իմ Արարատ՝ նման մոխրի մեջ տվայտող Հոբին,
Այսպես էր խոսում
Աշխարհի,
Դարի
Ու հավերժի հետ:

Լո՛ւյս առավոտի,
Դու, որ նման ես հավիտենության,
Դու, որ հավերժն ես,
Չորավիզ եղիր իմ Արարատին,
Վառիր ձակատին քո լույսը կապույտ այն ծաղկի նման,
Արժանի արա նրան քո վերին ու արդար դատին:

1981-1982



**ԲԱՆԱՍՏԵՂԾԻ
ԱՍՏՂԸ**



*...Բանաստեղծի ճամփի նման
Վտանգավոր ու զեղեցիկ...*

ԲԱՆԱՏԵՂԾԻ ԱՍՏՂ

Բացվել էին երկնքի բոլոր դռներն այդ գիշեր,
Երկնքով լույս էր հոսում,
Աշխարհն ասես ծայրեծայր սիրո շշուկ էր ու սեր
Ու Աստծո հետ էր խոսում:

Եվ ծղրիղները բոլոր հարբել լույսից ու բույրից,
Տաղեր էին հորինում,
Իսկ ես մանկան թախիծով մեր տան կավե կտուրից
Իմ աստղն էի որոնում:

Եվ մեկը կար, մեկը կար, որ այնպես մեծ էր ու մով
Ու դող ուներ իր շուրթին,
Բայց բռնկվեց նա հանկարծ ու գեղեցիկ անկումով
Կախվեց մթին անդունդին:

Ես աչքերս փակեցի... Ինչ-որ հավք էր մորմոքում,
Ինչ-որ թախիծ էր ու ցավ...
Հենց այդ գիշեր երևի իմ արյան մեջ ու հոգում
Բանաստեղծը արթնացավ...

1982

ՏՐՏՈՒՆՉ

Դու ծնվեցիր կյանքում մի լավ երգի համար,
Երգ, որի մեջ միայն ալերախեր ոգին,
Երգ, որ սրտիդ նման լոկ կապույտով մխար
Ու ապաստան դառնար քո մորմոքին:

Երգ, որի մեջ սգար մանկության տունն ավեր,
Մանկության աստղը մով կախվեր որպես արցունք,
Որ կորստի խայթից վերքի նման ցավեր
Ու տվայտեր, որպես անպատասխան հարցում:

Երգ, որի մեջ ձչար անտուն ու որբ մի սեր,
Ու մորմոքար անքուն սրնգահար մի կույր,
Երգ, որ կարողանար հացն ու լույսը կիսել
Ու տալ ամենեցուն այդ շնորհը մաքուր...

Երգ, որ խղձի նման ծունկի իջներ հողին,
Արդարություն հայցեր ու աղերսեր հրաշք,
Երգ, որ փոխվեր ամպի, ամպրոպային ցողի
Ու հեկեկար բոլոր կորուստներիդ վրա:

Երգ, որի մեջ ոչինչ չպահեիր թաքուն,
Ոչ տառապանք, ոչ ցավ, ոչ կասկածներ լոին,
Երգ, որ խղձի նման ու սիրո պես մաքուր
Դու պարզեիր մարդուն, քո աշխարհին, դարին:

Սակայն հիմա հասած ծանապարհիդ կեսին,
Դու ցավով ես նայում քո օրերին անցած,

Սև զղջումի նման դու տառապում ես, սիրտ,
Եվ հրկիզում է քեզ մի ակամա հանցանք:

Իսկ երգերդ չերգած հաճախ դուռդ են բախում,
Երազիդ մեջ հաճախ քեզ այցի են գալիս,
Դու ուզում ես բռնել, սակայն նրանք սահում,
Ծուխ են դառնում, տեսիլ ու հեռացող ալիք:

Եվ մարում են նրանց շշուկները, ավանդ,
Որ խոսեին պիտի սիրուց, խղճից, բարուց,
Ամոքեին պիտի մարդու սիրտը ցաված,
Ցավ, որ շատ էր այնքան քո այս ահեղ դարում:

Եվ մեղքի տակ կքած դու քայլում ես կրկին,
Տանում ծարավ մի խոր և տառապանք, և թույն...
Քեզ ոգին է կանչում քո որոնած երգի,
Խոստանալով հրաշք ու քավություն...

1962

ԱՆՔՆՈՒԹՅՈՒՆ

Իմ դեմ հորանջում, ծանր շնչում է մի մթին անտառ,
Ու ձանձրանում է անքնությունից գունատ մի լուսին,
Դրսում վայում է անտուն մի քամի, ու դանդաղ, դանդաղ,
Դանդաղ են զարկում ժամանակ ու սիրտ:
Չգիտեմ ինչու, միշտ գիշերով են ցավերն արթնանում
Ու լռության մեջ մխում են կամաց,
Չգիտեմ ինչու, հենց այն հուշն է քեզ բռնում ու տանում,
Որ կուզենայիր մոռանալ հավետ,
Սակայն հիշում ես, տանջվում ակամա:
Չգիտեմ ինչու, արթնացել հանկարծ ու մխում է խուլ
Վաղուց մոռացված ու սպիացած վերքը գնդակի,
Գուցե վերքը չէ դա ամենևին, այլ հուշ մի տխուր,
Գուցե հուշ էլ չէ, այլ մի մոլորված, կորած մի թախիծ:
Ախ, եթե լիներ հիմա մի կտոր շաղոտ ծիածան,
Վիրակապի պես ես կդնեի այս այրվող տեղին.
Կամ լիներ, լիներ գարնան ամպրոպի հեռավոր մի ձայն,
Մի կտոր արև, մի արծաթ ծիծաղ,
Աշնան առավոտ մի ոսկեղեղին...
Բայց մութ է, գիշեր: Ծանր շնչում է մի մթին անտառ,
Ու ձանձրանում է անքնությունից գունատ մի լուսին,
Դրսում վայում է անտուն մի քամի, ու դանդաղ, դանդաղ,
Դանդաղ են զարկում ժամանակ ու սիրտ...

1962

ԱՆՔՆՈՒԹՅԱՆ ՊԱՀԵՐԻՆ

Կես է գիշերն արդեն... Ու խավարում այս գաղջ
Ծխախոտիս նման հուշն է մխում...

Ի՞նչ իմանամ, հոգիս,
Հեքիաթներ կան ուրախ,
Բայց այս մեկը տխուր, շա՛տ է տխուր:

Ու չգիտեմ ինչո՞ւ, ու չգիտեմ ինչպե՞ս
Ինձ այցի է գալիս հարբած մի մարդ,
Ցնցոտիներ հագած մի շրջմովիկ,
Մի խենթ,
Ցնցոտիներ հագած, բայց քրմի պես հպարտ:

Ծաղիկներ էր ծախում նա մայթերի վրա,
Իսկ ավելի հաճախ բաժանում էր ձրի,
Գինետուն էր մտնում
Ու այնտեղից ելած,
Տերն էր դառնում բոլոր ծաղիկների:

Ու նա ոչինչ չունե՛ր ծաղիկներից բացի
Ու երկնքից բացի՝ այլ տեղ ու տուն...
Միայն հուշեր ունե՛ր նա «Չարյանցից»,
Որ պատմում էր հարբած ու մղկտում:

Ու նա հարբած էր միշտ,
Հարբած, ինչպես քամին,
Ինչպես երգը,
Սերը
Ու ծովն անեզրական...

Ու նա ազատ էր միշտ,
Ազատ, ինչպես քամին,
Ինչպես երգը,
Մերը
Ու ծովն անեզրական:

Խոստովանանք լինի, որ ես ինքս էլ կյանքում
Շատ ուզեցի հասնել մարդուն այդ խենթ
Ու չհասա սակայն:

Եվ նա մեռավ մի օր,
Մենակ,
Արձակ դաշտում,
Ծաղիկների մեջ թաց
Ու անձրևի ներքո աստղակաթի:

Ախ, ինչ ասեմ քեզ, Տեր,
Ախ, ինչ ասեմ քեզ, կյանք,
Որ չտվիր ինձ բախտն այդ հեքիաթի:

Մեկն իմ ծաղիկների քնքշությունը խլեց
Եվ հողմերին տվեց ժամանակի,
Մեկը առևանգեց խենթությունն իմ հրե,
Մեկը լեղի խառնեց իմ բաժակին:

Կես է գիշերն արդեն... Ու խավարում այս գաղջ
Ծխախոտիս նման ցավն է մխում...
Ի՞նչ իմանամ, հոգիս,
Հեքիաթներ կան ուրախ,
Սակայն իմը տխուր, շատ է տխուր...

* * *

Սիրտ, ես գլուխս եմ խոնարհում քո դեմ...

Դու այսքան փոքրիկ, բայց մի մեծ խղճի
Ապաստան դարձար,
Այրվեցիր այսքան, այսքան մխացիր,
Բայց չմոխրացար:

Գլխիս հետ հավետ վեճի մեջ մտած
Դու քեզ վատնեցիր,
Երբ արդար չեղա, դու շիկնանք դարձար
Ու ինձ մատնեցիր:

Ո՛ր տեղս էլ ցավեց, զարմանքով տեսա,
Որ այնտեղ ես, սիրտ,
Որ ասպետորեն ցավերն իմ բոլոր
Առնում ես ուսիդ:

Դու այսքան փոքրիկ, բայց ամբողջովին
Երգ ես ու արյուն...

Սիրտ, ես գլուխս եմ քո դեմ խոնարհում:

1969

* * *

Սիրտ իմ, նման ես Գեղարդա վանքի...

Բավ է շշուկն իսկ, որ արծագանքի,
Թրթռոց դառնա, երգ դառնա ու դող,
Որ դեպի վերին ոլորտը միտող
Ալեբախություն ու թախիժ դառնա,
Որ հնչյունի պես երկինք համբառնա,
Ջնգա ղողանջով հեռավոր զանգի...

Սիրտ իմ, նման ես Գեղարդա վանքի:

1971

ՈՒ ՑԱՎՈՒՄ ԵՄ, ՍԻՐՏ...

Սիրտ իմ, հաճախ ես ցավել դու կյանքում,
Ցավել ես սիրուց, կորստից ցավել,
Տանջել է հաճախ քեզ կարոտն անգութ,
Հաճախ զղջումով մեղքեր ես քավել,
Սակայն ամոքվել ու ապաքինվել,
Ասես հրաշքով նորից ես ծնվել
Ու բախել նորից դաշնորեն ու հաշտ...

Սակայն մի ցավից, ցավից մի անհուն,
Որ գուցե կյանքում չունի և անուն,
Չես ապաքինվում դու այսքան տարի...
Սիրտ իմ, լի ես դու, լի ես աշխարհի
Բոլոր գույներով, բոլոր ձայներով,
Բոլոր հողմերով, ծիածաններով,
Աշխարհի լավով,
Աշխարհի ցավով,
Լեցուն այնպիսի սուրբ հրաշքներով,
Որ եթե հանկարծ դու կարողանաս
Ու հրաշքներն այդ աշխարհին բանաս,
Շլանա պիտի հայացքն աշխարհի...
Բայց տառապում ես դու այսքան տարի
Եվ այդ ամենի մի երանգն անգամ,
Հեռու հեռավոր արձագանքն անգամ
Չես կարողանում հետ տալ աշխարհին
Ու ցավում ես, սիրտ:

1962

* * *

Ինչ-որ հեռու տեղ մոլորված գառի
Լալագին ու որբ մայունը հանգավ,
Եվ աստղը նորից բարդու կատարին
Թրթռաց, իբրև արծաթե զանգակ:

Կապույտ է հոսում վիհերով Մասյաց,
Եվ աստղալույս է լանջերով հոսում,
Մի աստվածային ներշնչման հասած,
Անտես ծղրիդն է հեռվից սաղմոսում:

Ճամփան մտորում, գնում է անվերջ,
Ուզում է, ասես, ինքն իրեն հասնել,
Մի ծեր տանձենի չոր ձյուղերի մեջ
Տարութերում է ծաղկած երագներ:

Հողն իր մխացող խոր հարդը հանել,
Հյուսում է բարակ աստղային թևին,
Ծեր Արարատը մրավիլ վանել,
Քննում է անհայտն ու անքննելին:

Ուշացած հավքն է թևածում ճիչով,
Խռովում նիրհած մորմոքը մթան,
Իսկ ինչ-որ մեկը անհունի միջով
Գնում է անհայտ մի լողարկության:

1970

ՃԱՆԱԴԱՐՀ

Աշուն է ուշ... Ճամփիս վրա
Բարդիները կանգնել շարքով,
Սրսփում են կապույտն ի վեր
Մի ոսկեվոր հոգեվարքով:

Ես վաղուց եմ ընկել ճամփա,
Խենթ որոտներ կային օդում,
Լեռան շուրթին շանթերը շեկ
Աստղեր էին ասես զոդում:

Ջրնգում էր մի զով քամի,
Վրնջում էր մի հովատակ,
Եվ ինձ առած տանում էին
Անհայտության հովիտը տաք:

Ու ես հավքեր էի տեսնում՝
Փետուրներին կապույտ ու բոց,
Կտուցներին՝ երկինքն արար
Իբրև հսկա մի ծվլոց:

Իսկ ծաղիկներն այնքան անհայտ,
Ջարմանալի էին այնքան,
Որ թվում էր դաշտում ցրված
Երազանքներ են մանկական:

...Հիմա արդեն աշուն է ուշ,
Իր հեռավոր մթնշաղից

Ձին դոփում է որպես կարոտ,
Քամին զնգում որպես թախիծ:

Գնում եմ ես... Աշնան բարդին
Գլխին առել ոսկե մի խույր,
Խոսք է հուշում ինձ շշուկով,
Ու շշուկը շա՛տ է տխուր...

1975

* * *

Կատարներ կան այնտեղ,
Այնտեղ կապույտ կա զով,
Որ հունցված է Աստծո
Եվ աստղերի լույսով:

Այս հոգնության բեռից
Ոչինչ, ոչինչ չառած,
Ախ, լինեի այնտեղ
Արշալույսից առաջ...

1971

* * *

Աշնան բարակած ջրերը լալիս,
Աշնան ոսկին են իրենց հետ տանում,
Ու դուք, կռունկներ, անհայտից գալիս,
Դեպի անհայտն եք նորից հեռանում:

Կապույտ լույսով է հեռուն բռնկել,
Քամին մենավոր մի ծուխ է բեկում,
Ու ձեր կանչի մեջ, չվող կռունկներ,
Ինչ-որ կարոտ է անվերջ հեկեկում:

Կապույտը կտրած գնում եք անվերջ,
Ու աշնան ձեր չուն նման է լալու...
Ինձ էլ տեղ պահեք ձեր երամի մեջ,
Կռունկներ, շուտով ես էլ եմ գալու...

1972

ՏԵՐԵՎ ԵՆ ԱՅՐՈՒՄ

Ոսկի է ու ծուխ...
Տերև են այրում,
Այրում են աշնան
Երազը ոսկի,
Ծովաը դողում է,
Բարակ գալարվում
Կարոտի նման
Ու չասված խոսքի...

Տերև են այրում...
Ու դառնում է ծուխ,
Դառնում է մի բուռ
Ալևոր մոխիր,
Այն, ինչ սոսափ էր,
Սիրո դող էր սուրբ,
Սրտի թրթիռ էր,
Թրթիռ էր հողի...

Տերև են այրում...
Մի կծու մխանք,
Կսկիծ է կծու
Ու մի բուռ մոխիր...

1975

ԵՐԳԸ

Անքուն գիշեր է,
Մի լուռ մխանք է...
Ու բերածն ինչ է,-
Մի քանի հանգ է:

Կապուտակ տենդ է,
Սարսուռ ու դող է...
Ու թողածն ինչ է,-
Մի քանի տող է:

Հոգու մրրիկ է,
Սիրո տարերք է,
Եվ թղթի վրա
Փոքրիկ մի երգ է...

1976

ԱՆՈՐՈՇՈՒԹՅՈՒՆ

Եվ այս ամենը նման է այնպես
Ինչ-որ հեռավոր աստղից արձակվող
Լուսե տազնապի ու լուսե դողի...

Եվ նման այնպես այն բառ ու հանգին,
Որ թայրտում է երակներիդ մեջ,
Սակայն ոչ մի կերպ չի փոխվում տողի:

Եվ նման այնպես այն տվայտանքին,
Որ գիշերային հավքի տեսք առած,
Չարկվում պատեպատ, վայում է մթնում...

Եվ նման այնպես այն արտասուքին,
Որ թաքուն ծնվում էությունդ մեջ,
Սակայն դուրս գալու ճամփան չի գտնում:

1976

ԱՆԱՆՁՆՈՒԹՅՈՒՆ

Լոեր խոռվքն այս, ու ինձ թվար,
Թե ես աղբյուր եմ մամուռն ի վար,
Գարնան անձրև եմ ու առավոտ,
Ցողաթաթախ եմ ու շաղավոտ,
Լեռնային լիճ եմ, այնքան եմ ջինջ,
Որ մեջս լույս է ու էլ ոչինչ,
Ցորենի հասկ եմ, որ լուռ հակվում,
Ճառագայթով է շարունակվում,
Լեցուն փեթակ եմ, ոսկե փեթակ,
Որ զրնգում է արևի տակ,
Կապույտ ծաղիկ եմ, խոտ եմ ու սեզ,
Այնքան խոնարհ եմ, հո՛ղ եմ ասես,
Այնքան թեթև եմ, անանձնական,
Որ բարի լույս եմ, որ ես չկամ...

1976

ՔԱՐԸ

Հուշ կդառնամ մի օր... Դարը կիջնի դարի,
Եվ այս քարոտ հողում ես կփոխվեմ քարի:

Ինձ կզարկի կայծակն, ինձ արևը կայրի,
Կշառաչեն կողիս մրրիկները վայրի,
Կկարծրանամ ցրտից, կշիկանամ շոգից,
Ու իմ քարե խորքում լուռ կմնա հոգիս:

Բայց երբ կանաչ-կանաչ մամուռն իջնի վրաս,
Իջնի իբրև քնքշանք, իբրև սիրո երազ,
Ու երբ մաղի անձրևն իր թախիծը թավիշ,
Ես իմ քարե խորքում կհեկեկամ ցավից...

1976

ՊՈՆՏԱԿԱՆ ԽՐԱԽՃԱՆՔ

*Ահա կգա Բողլերը, կերևա էդգար Պոն:
Ե. Չարենց*

Անքնության մուժը դարձավ դեղին մորմոք,
Անքնության մուժը դարձավ դեղին թախիժ...
Եվ Բողլերը չեկավ,
Չերևաց Պոն,
Չարենցն ինքը ելավ մթնշաղից:

Ֆայտոն նստեց,
Անցավ Երևանով խաղաղ,
Հետո Նորքի այգում՝ դուդուկի տակ,
Ամենամեծ աստղը իբրև բաժակ առավ
Ու գինու պես խմեց թախիժը տաք:

Խմեց,
Ու երբ հեռվից լսեց անհայտ կանչեր,
Երբ մորմոքեց հավքը գիշերային,
Ձայնեց, հեռու հեռվից Վարուժանին կանչեց,
Եսենինին կանչեց ու Լորկային:

Եկան նրանք գունատ,
Եկան հպարտ ու լուռ,
Ու երբ հնչեց հանկարծ երգը թառի,
Լորկան տեղից ելավ ու մատներով տխուր
Շոյեց զնգուն լարերն իր կիթառի:

Եվ մեղեդին ծորաց նման արտասուքի.
– Երբ մահանամ, թաղեք կիթառի հետ...
Վարուժանը շոյեց սպիներն իր քունքի,
Ու խենթացավ նորից Չարենցը խենթ...

Հետո Բուդդայի պես աստղերի դեմ չոքեց,
Չոքեց կապույտի դեմ անեզրական
Ու բարբառեց գունատ.
– Ուրիշ ոտքեր
Կախաղանին երբեք թող մոտ չգան...

Եսենինը թեթել շեկ գլուխը ուսին
Ու թախծում էր, ինչպես հասկը արտում...
Բարձրանում էր դանդաղ մի վիրավոր լուսին,
Որ տրտմորեն թառի Նորքի բարդուն...

1977

ՎԱՅՐԿՅԱԼ

Զրնգացող լույսի նման
Մի ձայն հնչեց իմ ականջում,
Եվ ցոլացին մոգություններ
Զարմանալի ու թախծալի,
Թվաց հեռվում ինձ են հիշել,
Թվաց հեռվից ինձ են կանչում,
Թվաց հեռվից աչքով արեց
Մի արևոտ ցայգածաղիկ:

Մանուկ օրվա կապույտի պես
Մի քնքշություն ալեվետեց,
Սահեց, գնաց ու խառնվեց
Աղբյուրների ուրախ լացին...
Ու մեկն անցավ հեռուներով,
Վրաս տխուր մի լույս նետեց,
Անցավ հպարտ՝ այնպես նման
Այն քնքշորեն հեռացածին...

Հետո գույներ՝ կանաչ ու հիր,
Գույներ նուան ու մարջանի,
Գույներ, գույներ, որ քամու հետ
Թափառում են արոտներով...
Ու թռչուններ չտեսնված՝
Փետուրներում կայծ ու քամի,
Ու գազաններ հրաշամորթ,
Հրաշալի մոռութներով:

Ու ես գնում էի թեթև,
Աղբյուրների խմբերգն առած,
Ինձ հետ հավքերն էին գնում,
Գնում էին դաշտ ու լեռներ,
Չկար գաղտնիք ու չկար մութ,
Չկար ստվեր ու առեղծված,
Եվ գիտեի ես սիրուց լալ,
Եվ գիտեի սիրուց մեռնել...

Չրնգացող լույսի նման
Փայլատակեց մի հուր վայրկյան,
Չրնգացող լույսի նման
Մի ձայն մարեց իմ ականջում,
Եվ ավերիս պարապի մեջ
Մի թախծություն մնաց հանգած,
Մնաց մի տաք լույսի մոխիր,
Մնաց մի տաք աստղի աձյուն...

1977

ԿԱՐՈՏ

Ամեն ինչից ավելի դու տրվեցիր ինձ կյանքում,
Դու արյան հետ տրվեցիր ու տրվեցիր արյան պես...
Դու տրվեցիր որպես ձայն ու տրվեցիր որպես գույն,
Որպես կապույտ տրվեցիր, որ անկումներն իմ չափես:

Դու կանչ եղար մորմոքի, ղողանջ եղար հեռավոր,
Հասկի ոսկե սոսափյուն, աստղի շշուկ եղար դու,
Եղար քարի մեջ նիրհող այն մրմունջը դարավոր,
Որ արթնանում է հանկարծ ու զնգում է Գեղարդում:

Սակայն ծաղիկը եղար, որ գույն ունի կրակի
Եվ հուրհրում է հանկարծ հրաբուխի շուրթերին...
Մերթ կնոջ տեսք առար դու, մերթ հեռավոր տնակի,
Մերթ օրհնության թևերով ելար ոլորտը վերին:

Եվ այնտեղից ասացիր, որ ինչ-որ տեղ, ներքևում
Ինձ վայրկյանն է սպասում ու գաղտնիքը մերկացող,
Որ ուզածս կգտնեմ... արշալույսի ձեռքերում՝
Ցորենի պես գեղեցիկ ու գեղեցիկ, որպես ցող...

Հիմա աշուն է արդեն, հովերը ցուրտ են ու ջինջ,
Խոտն է մրսում մանկան պես, սարսում են սեզ ու ցող...
Դու էլ ո՞ր ես ինձ տանում, դու էլ ո՞ր ես կանչում ինձ՝
Ցորենի պես գեղեցիկ, գաղտնիքի պես մերկացող...

1977

ՔՆՔՇԱՆՔ

Հեովից մի զանգ է ասես ղողանջում,
Հեովից բուրում է ծաղիկ մի տխուր,
Եվ այս քնքշանքը ինձ նորից տանջում,
Երակներիս մեջ հեկեկում է խուլ...

Ի՞նչ անեմ, ասա, չտանեմ ու տամ
Հեռու դաշտերում մահացող խոտին,
Ծառերին այս մերկ, ջրերին տարտամ,
Այս աշնանային վաղ առավոտին:

Ի՞նչ անեմ, ասա, մխում է նա թաց,
Մխում է անվերջ ու չի մոխրանում,
Շուրթերիս վրա դողում է հանկարծ
Որպես հեռավոր ու կորած անուն:

Գնում է, վերջին տերևին թառում,
Նրա հետ դողում անկումի ահից
Ու ձեռքերիս մեջ հանկարծ նվաղում
Մեկին շոյելու մաքուր ծարավից:

1979

ՆԵՐՇՆՉԱՆՔ

Մթնշաղի ու շաղի հոտ են առնում ես օդից
Ու ամպի հոտ են առնում, հոտ են առնում ամպրոպի...
Շուտով շանթը կշողա, ու նրա շեկ որոտից
Տեղատարափը պիտի ահագնանա ու դոփի:

Պիտի թվա, թե նորից դեմ հանդիման են ելել
Ճակատագիր ու Աստված, ելել են նյութ ու ոգի...
Առեղծվածը կխոսի իր բարբառով հրեղեն,
Եվ հրաշքը կշողա, և գաղտնիքը կըռփի...

Պիտի թվա, թե նորից ինչ-որ մոտիկ մի հովտում
Ինձ անհայտն է սպասում և սպասում որպես կին,
Ու թե գնամ, կժպտա նա աչքերով իր տրտում
Եվ կառնչի ինձ նորից իր թախծալի հրաշքին:

Պիտի թվա, թե հեռվում կայծկլտում են ցող ու հուր,
Եվ Աստըծո ոգու պես պայծառանում է հեռուն,
Թե քարերն են հեկեկում, ու բառաչով մի տխուր
Ծիածանի թևի տակ ձագ է բերում եղջերուն:

Ու կտեսնեն ես նորից, թե անկումի ցավի մեջ
Ջրվեժները խելագար ինչ ցնորքներ են կախում,
Թե լոկ մեկ օր ապրելու ողբերգությունը իր մեծ
Փոքրիկ թիթենն ինչ թեթև ու գեղեցիկ է խաղում:

Եվ վայրկյանը կդառնա անպարագիծ ժամանակ,
Եվ վայրկյանը կդառնա մի անվախձան ձառագայթ...

Կավի խոնավ բուրմունքից ու մամուռից մթամած՝
Նա կծգվի, կհասնի մինչև խորհուրդը անհայտ:

Ու ես մի պարզ հրաշքով անլսելին կլսեմ,
Լույսի կշիռը կզգամ ես ավերի մեջ իմ բաց,
Եվ վայրկյանում այդ վերին, ակնթարթում այդ վսեմ
Կհաշտվեն իրար հետ ճակատագիր ու Աստված:

1978

ԵՐԳԻՑ ՀԵՏՈ

Վերջին տողը գրվեց: Ծխախոտս հանգավ,
Եվ մոխրամանն իմ լի դեռ բուրում է կծու...
Այդ նա գիտի միայն, թե ես քանի անգամ
Խավարի հետ եղա և Աստղծու...

Սիրտս քանի անգամ անհայտ ցավով ծակեց,
Քանի անգամ լցվեց երանության դողով,
Ճառագայթը բռնած՝ ակնթարթը չափեց,
Դարձավ թռիչք, անկում, տենդ ու բողոք:

Անդունդներով անցավ, անցավ հովիտ ու կիրձ,
Նորից գնաց դեպի այն աշխարհը կորած,
Գտավ տնակն իր հին ու ներս մտավ շեմքից,
Մտավ այնպես, ասես մտավ խորան...

Ինչ-որ տեղից լսեց մի հրեղեն բարբառ,
Ինչ-որ լեռան վրա տեսավ այրվող մի թուփ
Ու թռչուններ տեսավ, որ կապույտով հարբած,
Դեպի անհայտն էին անվերջ միտում:

Եվ որտեղից որտեղ հիշեց մի թուփ կնոջ,
Թուփ այտերի վրա կախարդանքի փոսեր,
Նա, որ ժպտաց իբրև անակնկալ շնորհ,
Նա, որ ստեղծվածի լեզվով խոսեց:

Հետո ձորում կորած մի ջրաղաց հիշեց.
Որ մեն-մենակ կքել ու թախիծ էր աղում,

Մտաբերեց մի մութ, մի ահավոր գիշեր,
երբ մոտիկ էր թվում շունչը մահու:

Նորից բույրեր առավ երիցուկի, խունկի,
Տեսավ այրվող մոմի արտասուքը հստակ,
Եվ այն վերքը հիշեց, որ Պարույրի քունքին
Մարող աստղի նման մխում էր տաք:

Նորից տվեց-առավ ու տվայտեց անքուն,
Ինքն իր խղձի առաջ նորից իջավ ծունկի,
Ապաշխարեց ասես Նարեկա սև վանքում
Ու մաքրվեց լույսով իր արցունքի:

Վերջին տողը գրվեց: Հետո թախիծ եղավ,
Հետո այցի եկավ կասկածանքի ոգին...
Ինչ իմանաս, երգդ տենդ ու դողով գրված՝
Գուցե պետք չէ կյանքում և ոչ ոքի...

Ինչ իմանաս... Սակայն պիտի տքնես անքուն,
Պիտի այդպես անվերջ փոխվես տենդ ու դողի,
Այդպես կամաց-կամաց պիտի մխաս կյանքում,
Այդպես կամաց-կամաց դառնաս մոխիր....

1979

ԵՂԻՇԵ ՉԱՐԵՆՑԻ ՀԵՏ

Առասպել ես ասես ու անսկիզբ լեգենդ,
Նահրեցի մի բիրտ ու բարբարոս մի խալդ,
Հազարամյա թախիծ, հազարամյա մի տենդ
Եվ արշալույս ես հիր, և արշալույս ես ալ:

Ցավը նվում էր խուլ ու հոլովվում դարեր,
Ցավը տնքում, զնգում ու փոխվում էր ոգու:
Ու դու եկար... Դեմքիդ մի թախիծ էր թառել
Ու մի լույս էր թառել, որ վերուստ է չոքում:

Ճանապարհն էր մեռնում հոգեվարքով դեղին,
Ու երազն էր մեռնում ծանապարհի փոշում...
Ցուլցում էր վերում Հարդագողի ուղին,
Ու աստղային ձայնով աղջամուղջն էր խոսում:

Ու հարբեցիր... Գինին աստղերից էր քամած...
Ու խենթացար... Թվաց՝ լույս է բխում վերքից...
Դու վիհերից ելար՝ աչքերիդ մեջ առած
Մի հարության հրաշք ու մի ավեր երկիր...

...Ու չտեսա ես քեզ (երևի բախտն էր չար):
Վերջին երգդ գրած պատին քո սև խուղի,
Նորից լեգենդ դարձար ու առասպել դարձար
Ու բռնեցիր նորից Հարդագողի ուղին:

Եվ քեզ ոտից գլուխ անգիր ու գոց արած,
Թափառել է անքուն պատանությունն իմ որբ

Ու որոնել է քեզ՝ կոպերի տակ առած
Մահվան մի սև տեսիլ ու արեգակ մի բորբ:

Ու որոնել է քեզ... Ու մերթ տեսել մեր հին
Մատյանների ծալքում՝ իբրև վկա ու սուրբ,
Մերթ սերմնացան որպես, որ հայրենի հերկին
Իր ցորյանն է տեղում՝ մաքուր, որպես ասուպ:

...Մի գանգրահեր տղա շիրիմների մեջ հին
Քո շիրիմն է փնտրում ու չի գտնում սակայն...
Ու կանչում է նրան Հարդագողի ուղին,
Ու կանչում է, կանչում կապույտն անեզրական:

1977

ՄԻՍԱՔ ՄԵԾԱՐԵՆՑԻ ՀԵՏ

Եկար գունատ ու տրտում
Աղոթեցիր ու անցար...
...Եվ թռչուններ մնացին
Կապույտի մեջ ու լույսի,
Ցավի ծաղիկը մնաց
Ցողաթաթախ ու անչար,
Եվ մնացին շշուկներ
Ու մշուշներ սնդուսի...

Ոսկե ծառեր մնացին,
Մնաց լուսե մի կաճան,
Արևի մեջ աղոթող
Մի ոսկեվոր կիրակի,
Մնաց մամուռ ու արցունք,
Մամուռն ի վար՝ ծիածան,
Ու կանչող ծուխը մնաց
Քո հեռավոր հյուղակի:

Եկար գունատ ու տրտում,
Աղոթեցիր ու անցար...
...Եվ բուրումներ մնացին
Երիցուկի և ուրցի,
Ու ասես ցավն աշխարհում
Դարձավ աղոթք մի պայծառ,
Ու ասես մահն աշխարհում
Փոխվեց անմահ զրույցի...

1977

ՍԵՐԳԵՅ ԵՍԵՆԻՆԻ ՀԵՏ

Նորից կանչերը լուռ մորմոքեցին...
Ու ես կանգնել եմ շիրիմիդ առաջ,
Մարմարը սև է, ձերմակ է կեչին,
Կեչին՝ դաշտերի հեռավոր հառաչ:

Կեչին, որ սեր էր, աղջիկ էր բարակ,
Կեչին, քո կեչին, որ մնաց այրի...
Նա իր վարսերն է տարածել վրադ,
Որ կարոտը լա ծննդավայրիդ...

Որ կարոտը լա խոտի ու թփի
Ու հին տնակիդ մորմոքը անքուն
Եվ արցունքի պես վրադ թափթփի
Երեկոները մանուշակագույն:

Որ իր ձեռքերով բարակ ու երեր
Քեզ վրա հողի օրհնանքը մաղի...
Ու թվում է, թե հենց ինքն է բերել
Եվ դրել քարիդ ծաղիկն այս ծավի...

Ծաղիկն այս կապույտ, այս ծաղիկը թաց,
Տափաստանային քնքշանքն այս վայրի...
...Ու ես չգիտեմ, ինչու է հանկարծ
Արթնանում ցավն իմ ծննդավայրի...

Օ, ո՛չ, նման չէ նա քո Ռյազանին,
Այնտեղ քարափ է, վիհ է ու անդունդ,

Այնտեղ վայում է լեռնային քամին,
Ու խենթ եփրատը ժայռեր է քանդում:

Այնտեղ թախծում է որբացած մի տուն,
Եվ հողը, հրդն է ծարավից շիկնել,
Քարերը ոխով երկինք են միտում,
Բայց այնտեղ էլ կան կապույտ ծաղիկներ:

Ու գիտեմ, մի օր, երբ ձեռքն իմ թափուր
Քարանա հանկարծ, ու սիրտս մարի,
Ոչ ոք չի բերի ծաղիկն այդ կապույտ,
Որ դնի իմ սև շիրիմի քարին:

...Կանգնել եմ ահա շիրիմիդ առաջ,
Երկինքն ամպել է, անձրև կմաղի...
Ձգվում է իմ մեջ խոնավ մի հառաչ,
Ու մորմոքում է մի կապույտ ծաղիկ...

1978

ԳԱՐՍԻԱ ԼՈՐԿԱՅԻ ՀԵՏ

Բանաստեղծների
Սիրտը երևի
Լույսով է հունցել
Երկնային Տերը...
Սև խավարի մեջ
Գնդակները սև
Ինչ հեշտ են գտնում
Նրանց սրտերը...

Չգիտեմ, ե՞րբ են
Այդ սև գնդակը
Սրտիդ մեջ մեխել...
Եվ գիտեմ սակայն,
Որ շուրջն ամեն ինչ
Խավար է եղել
Ու սև է եղել:

Ինչ-որ հեռու տեղ
Կիթաոն է լացել,
Ու լաց են եղել
Արևածագի
Այն ժույգները...
Գեղեցիկ ու մերկ՝
Հենվել նարնջի
Ոսկեվոր ծառին,
Ու լաց է եղել
Հենց ինքը՝ Սերը...

Ախ, խավարի մեջ
Գնդակները սև
Ինչ հեշտ են գտնում
Բանաստեղծների
Լուսե սրտերը:

Ճաքած նոներից
Ասուպ է կաթում,
Կաթկթում են հուր
Արտասուքները...
Եվ լաց են լինում,
Եվ լաց են լինում
Արևածագի
Ալ նժույգները...
Հետո ցնցում են
Բաշերը իրենց,
Թամբերին առնում...
Վիրավոր Սերը,
Արար աշխարհով
Սուրում են անսանձ
Արևածագի
Ալ նժույգները...

1977

ԳՈՒՐԳԵՆ ՄԱՀԱՐՈՒ ՀԵՏ

Դրսում խշշում է աշնան բարդին,
Ու մի ծղրիդ է անքուն սուլում...
Արդեն հասել ես դու դրախտին,
Թե՞ թափառում ես դեռ լազուրում:

Եթե հասել ես, ապա գիտեմ,
Որ նա նման է քո հին Վանին,
Այգեստաններն են այրվում քո դեմ,
Ծովից կապույտ է բերում քամին:

Եվ շարմաշուղը՝ շողը վրան,
Լուռ շեփորում է արշալույսին,
Եվ բարդիներ կան բարակիրան,
Եվ սաղմոսում է մի մեծ լուսին:

Եթե հասել ես, ապա գիտեմ,
Որ երբ դրել ես ոտքդ շեմքին,
Հանկարծ Չարենցն է ելել քո դեմ
Եղերերգության լույսը դեմքին:

Անուշ մայրիկդ է երևացել,
Եվ լույսերի մեջ նա այդ վերին
Այրվող վերքերդ է մեկ-մեկ բացել,
Չով ամպը դրել քո վերքերին:

Ինչպե՞ս դիմացար, ի՞նչ հրաշքով
Անուշ մայրիկիդ արտասուքին,
Ինչպե՞ս դողացին շուրթերը քո
Դիպած Բակունցի պայծառ քունքին:

Աշնան գիշերվա կապույտ թևով
Մի լուր ուղարկիր ինձ, Գուրգեն խան,
Ուղարկիր աստղի, շողի ձևով,
Ու քեզ չեն թողնի անպատասխան:

Ասա, այդտեղ էլ երգեր գրում,
Աստղերի դողը փոխում տողի,
Թե՛ լոկ լուում եք, լուում, լուում
Փռչինների մեջ Հարդագողի:

Եկ քիչ էլ խոսենք «վասն սիրո»,
Շատ էիր սիրում նման բաներ...
Հրեշտակները, թե կան իրոք,
Քեզ թույլ տալի՞ս են սիրաբանել...

Գիտեմ, ժպտում ես դու խորամանկ
Քո սև մութից այդ, քո դարանից...
Բայց դե դրախտը գտել ես փակ,
Մտիր դժոխքը, մի՛ վարանիր...

Ո՛վ պիտի քեզնից լավ իմանա,
Որ դա չարիք չէ մի ահավոր,
Չէ՞ որ այնտեղ են և այն կանայք,
Որ գեղեցիկ են ու մեղավոր:

Եվ գիտեմ, նորից ժպտում ես կեռ
Կամ ծիծաղում ես դառն ու աղի,
Եվ այն ասուպը, որ վար սահեց,
Գուցե արցունքն է քո ծիծաղի...

1977

ՀԱՄՈՍԱՀՅԱՆԻ ՀԵՏ

Հաց է եղել ու գինի, ու լուսություն է եղել,
Ու թախիծն է կաթկթել, որ մաքուր էր որպես ցող,
Մենք նստել ենք իրար դեմ ու թախիծով այդ ցողել՝
Ես՝ իմ աշխարհը կորած, դու՝ քո աշխարհը կորչող:

Ինչ տխուր է լեռներում չվող կանչը կռունկի,
Եվ սիզախոտը այրված ինչ թախծագին է բուրում,
Թափառական մի կարոտ այնտեղ իջնում է ծունկի,
Հեկեկացող աղբյուրի մանկությունը համբուրում:

Վանք է եղել ավերակ, չորացած հուն ու ակունք,
Ու եղինջները կարծես բոբիկ ոտքերդ են վառել,
Դու լռել ես քարի պես, բայց ես նայել եմ թաքուն
Ու աչքերիդ չհասած արցունքները նշմարել:

Ո՛ր են տանում, չգիտեմ, արահետներն այս քարոտ,
Բարդիներն այս արծաթե ո՛ր են այսպես հեռանում...
Այնտեղ շրջում է անվերջ թափառական մի կարոտ,
Ծխանի հոտ, հացի հոտ, ուրցի հոտ է որոնում:

...Ես չգիտեմ, մեզանից ո՞վ պիտի շուտ հեռանա
Դեպի եզերքն անհայտի, ուր տառապանքն է լուր,
Բայց մեզանից մեկը, գիտեմ, պիտի կրկին որբանա,
Ես՝ աշխարհում իմ կորած, դու՝ քո կորչող աշխարհում:

1980

ՏԵՆԴ

Գիշերը երագիս ճամփին կորցրել մի ուրիշ երագ,
Քրքրում անհունը կապույտ, որոնում ու չէի գտնում,
Մերթ ասես ասուպ էր դառնում, մոխրանում, թափվում էր վրաս,
Մերթ իբրև թափառիկ կրակ հեռանում, մարում էր մթնում:

Մերթ կնոջ տեսքով էր գալիս, անծանոթ ու ծանոթ կնոջ,
Մի վայրկյան շղարշն իր բացում ու հետո փակում էր անդարձ,
Կոպերով կանչում էր ասես, խոստանում մի վերին ցնորք
Ու հետո հոնքերով վանում, հեռանում, գնում էր անդարձ:

Իսկ ճամփան կածան էր մի նեղ, մացառը կածանը պատել,
Ծեծում էր ծնկներս հոգնած, ծեծում ու քերծում էր վայրի,
Եվ սակայն չէր ծորում արյուն... Ա՛խ, գոնե, արյունս կաթեր,
Ասում են՝ արյունը հեղվող մարում է խորհուրդը չարի:

Ա՛խ, գոնե ընկնեի վերից, ջարդեի կողերս բոլոր
Եվ ցավի կսկիծը առած, տնքայի, զգայի, որ կամ...
Բայց, ավանդ, գամվել եմ տեղում, կարկամել, գամվել եմ մոլոր,
Հառաչը կոկորդս խցկել, կորել է շշուկս անգամ:

Եվ հետո կածան էր նորից, մացառը կածանը պատել,
Գնում էր, գնում էր անվերջ, չգիտեմ, թե ուր էր տանում...
Իսկ կորած երագս նորից կարմիր ու կանաչ էր հագել,
Իսկ կորած երագս կանգնել ու հեռվից ձեռքով էր անում...

1978

ԱՌԱՆՑ ՀԵԾՅԱԼԻ

Առանց հեծյալի տուն վերադարձած նժույգի նման
Աշնան գիշերը իմ սեմի վրա վրնջում է խուլ...

Ո՛ր է հեծյալդ, նժույգ իմ տխուր...

Նա ելավ մի օր,
Քո բաշը գրկած սլացավ հեռու,
Գնաց փնտրելու այն գետն արծաթե,
Ուր դեռ ապրում են ջրահարսերը:

Գնաց փնտրելու այն եղեգը հուր,
Որ արշալույսին երգում ինքն իրեն,
Կարոտ է մաղում
Եվ լույսն ստանում իբրև արծագանք:

Գնաց փնտրելու հովիտն այն կանաչ,
Ուր սերը մերկ է,
Եվ բոլոր մարդիկ
Դեռ խառն են ապրում աստվածների հետ...

Առանց հեծյալի տուն վերադարձած նժույգի նման
Աշնան գիշերը իմ սեմի վրա վրնջում է խուլ...

Ո՛ր է հեծյալդ, նժույգ իմ տխուր...

1979

ՆԻԱԳԱՐԱ

Նիագարա... Մոլեգնում են ջուրն ու քարը,
Մոլեգնում է այս ձգնավոր խելագարը...

Նիագարա, ոգի դարձած դու ջուր ահեղ,
Նիագարա, դու գետերի Նարեկացի,
Ես դեռ մանկութ քո տեսիլքն եմ իմ մեջ պահել
Ու եկել եմ, անակնկալ եկել այցի:

Կարծում էի՝ խրախճանք ու տոն ես երգի,
Կարծում էի՝ գեղեցկության հանդես ես լոկ,
Մինչդեռ ձերմակ ձգնավորն ես տիեզերքի
Ու աշխարհի մեղքն ես քավում դու ծնկաչոք:

Նիագարա... ձերմակ ողբ ես, ձերմակ սուգ ես,
Խենթ բողոք ես ու զայրույթի արտասուք ես:

Նիագարա, որոտում ես ու թնդում ես,
Բարձունքում ես ու նույն պահին անդնդում ես,
Խոլ թոփչք ու խելակորույս անկում ես դու,
Անկումիդ մեջ անվախճան ու անքուն ես դու:

Անկումիդ մեջ տառապում ու մաքրվում ես,
Ասես լույս ես, լույսի սյուն ես, լույսի քուրմ ես,
Լույսի հիմն ես, լույսի ձայն ես ու աղոթք ես,
Երազանքդ ծիածան է, որ շաղոտ է:

Նիագարա... Դու մաքրության աղերսանք ես,
Խղձի ձայն ես ու տագնապի ահեղ զանգ ես:
Նիագարա, ես կուզեի բաշղ շոյել,
Ես կուզեի խոսքեր ասել քո ականջին,
– Ել մթամած այս անդունդից, ահեղ պոետ,
Ել ու գնա այս աշխարհի տխուր կանջին:

Ել ու գնա. նա մաքրության է ծարավի,
Ծարավի է հրաշալի մի հարության,
Սրբիր փոշին, խլացրու ձայնը ցավի,
Կախիր ծավի ծիածանը արդարության...

Նիագարա... Մոլեգնում են ջուրն ու քարը,
Մոլեգնում է այս ձգնավոր խելագարը...

1979

ԻՆՔՍ ԻՄ ԴԵՄ

Ներշնչումներիս լույս մշուշի մեջ
Ես այնպես հաճախ տեսնում եմ նրան:

Աչքերն եմ տեսնում՝
Աստվածաշնչյան առավոտի պես մաքուր են նրանք,
Աստվածաշնչյան առավոտի պես զարմացած ու մեծ:

Իսկ իմ աչքերը լեցուն են, ավաղ,
Կասկածանքների մութ ծվեններով
Եվ հարցումներով, որ մինչև հիմա չունեն պատասխան:

Շուրթերն եմ տեսնում՝
«Հաց» բառը այնտեղ նոր է արարվում ցորենի բույրից,
«Աղ»-ը դեռ ծովի համն ու հոտն ունի,
Եվ թրթռում է «Սեր»-ը առաջին աղոթքի նման:

Իսկ իմ շուրթերին
Մաշվել են, ավաղ, բառերն այդ բոլոր,
Կորցրել համը, կորցրել հոտը ու թրթիռը սուրբ:

Եվ սիրտն եմ տեսնում՝
Բանաստեղծության բույն է նա ասես,
Եվ թռչունները՝ կապույտ թռչուններ, ոսկե թռչուններ,
Ելումուտ անում, ձախրում են որպես թևավոր օրհնանք...

Իսկ իմ սիրտն, ավաղ,
Չասված խոսքերի

Ու նահատակված բանաստեղծության շիրիմ է ասես:
Հոգին եմ տեսնում,
Խաղաղ է այնտեղ, ինչպես լինում է ամպրոպից հետո,
Եվ մահը մահ չէ, այլ լուսաբացին, ցորենին, ցողին
Հավետ ձուլվելու արարողություն:

Իսկ իմ հոգու մեջ
Մարմին ու ոգի բզկտում իրար,
Դեռ ոխ են դառնում ու դառնում են քեն:

Ներշնչումներիս լույս մշուշի մեջ
Ես այնպես հաճախ տեսնում եմ նրան,
Ու գնում, գնում, որ հասնեմ նրան...

1980

ՍՐԵԳԱՀԱՐԸ

Արևը մայր մտավ, հանգան հրդեհ ու հուր,
Կապույտի փակ կոպին աստղը դարձավ արցունք...
Իրիկնային քամին՝ սրնգահար մի կույր,
Կախեց մի հին թախիժ ու մի տխուր հարցում...

Ո՞ր է, հիշո՞ւմ ես դու, կար մի պայծառ տղա
Ու բանաստեղծ էր նա. երգեր ուներ անտիպ,
Անծանոթ էր նա դեռ կասկածանքին մռայլ
Եվ անծանոթ գինուն, և անծանոթ խանդին...

Եվ կար մի հին փողոց, նաիրյան հին մի բակ,
Ու բարդիներ կային կապույտի հետ խոսող,
Եվ այդ բակում մի լույս ու գաղտնիք կար մի փակ,
Որ ծանր ծամ ուներ, աչքեր ուներ խոշոր:

Եվ կար պատին հենված սրնգահար մի կույր՝
Մի թափառիկ թախիժ, մի մոլորված կարոտ,
Նրա երգը ծնվում աստղերի հետ մաքուր
Ու մարում էր հետո աստղերի հետ մարող...

...Մշուշվեցին հեռվում գիշերներն այն զնգուն
Ու բարդիներն այն ձիգ կապույտի հետ խոսող...
Եվ փակ մնաց հավետ այն գաղտնիքը քնքուշ,
Որ ծանր ծամ ուներ, աչքեր ուներ խոշոր:

Քամին ցրեց, տարավ այն երգերը անտիպ...
Քամին հարցեր կախեց անպատասխան,

Ու մշուշվեց ցավից, ու մշուշվեց խանդից,
Ու մշուշվեց գինուց, այն լավ տղան:

Եվ նա հետո կյանքում ուրիշ երգեր գրեց,
Բայց ոչ մի երգ չայրվեց այն կապուտակ բոցով,
Ուրիշներով հարբեց, ուրիշներին սիրեց,
Բայց ոչ մի սեր չեղավ այնպես խոցող:

Մնտ է գիշերն արդեն... Ու կապույտին կպած
Դողդողում է աստղի արտասուքը մաքուր...
Հեռու հեռվից իբրև ծակատագիր ու բախտ
Սուլում է դեռ, սուլում սրնգահարն այն կույր:

1979

ԵՐԱՁ

Դմբ է անցել, թե՛ տարի... Ես արդեն չկամ:
Աշնան գիշերն է նորից իջել քաղաքին:
Եվ նշմարում եմ հեռվից ես այն աղջկան,
Որ շրջում է սպիտակ շղարշը հագին:

Անպաշտպան է որպես խիղճ, որպես սեր ու գուրթ,
Ու գեղեցիկ, գեղեցիկ, որպես թախծություն...
Քամին ելնում է ահա ու շնչով իր ցուրտ
Խոստանում է մոտալուտ փոթորիկ ու ձյուն:

Իսկ նա շղարշը հագին թափառում է դեռ,
Թափառում է սիրո պես ու մարող հուշի,
Թարթիչներին աստղային արցունքն է սառել,
Ու մազերի մեջ խոնավ բույրն է մշուշի:

Բայց աչքերի մեջ մաքուր շողք է ու արև,
Ոսկե ցնորք է կախում երգը արտույտի,
Աստվածային ինչ-որ ձեռք իրար է խառնել
Սերը լույսի հետ առատ ու լույսը՝ գուրթի:

Ես ծանաչում եմ նրան՝ իմ երազն է դա,
Որ ինձ հետ էր ողջ կյանքում իբրև խիղճ ու երգ...
Նա որբացել իմ մահով ու այդպես հիմա
Թափառում է աշխարհում անպաշտպան ու մերկ:

Ես ուզում եմ բարձրանալ հոգնած և ուժատ,
Գիրկս առնել ու շոյել ձեռքերը տխուր,
Եվ սակայն չեմ կարենում, հողը ծանր է շատ,
Ու ես ծանր հողի տակ հեկեկում եմ խուլ:

1981

ԵՐԿԵՈՍՈՒԹՅՈՒՆ

- Ո՛վ էր նա, ասա...
- Զգիտեմ ոչինչ,
Այն տեսա միայն, որ աչքերի մեջ
Հեռու անհայտի առկայծումը կար:
- Որտեղից եկավ...
- Զգիտեմ հաստատ, բայց մերկ ոտքերից
Գարնան տաք հողի բուրմունք էր գալիս,
Իսկ բաց ձակատին
Մուժի ծվեն կար ու աստղափոշի:
- Ի՞նչ ասաց նա քեզ...
- Լավ չհասկացա,
Աղոթքի էին խոսքերը նման
Եվ նման էին մի սուրբ մեղեդու,
Որ բառեր չունի:
- Ո՛ր տարավ նա քեզ...
- Նախ հովիտ էր տաք,
Ծառերը այնտեղ
Հրաշքի բոլոր ձևերն ունեին,
Եվ ամեն ծաղիկ խոստում էր բարի:
Հետո անդունդ էր, որ լի էր մութով:
- Եվ ո՞ր հեռացավ...
- Գիշերը մեծ էր ու ձամփան անհայտ,
Գիշերվա միջով նա գնում էր լուռ,
Եվ ձամփի վրա
Ոսկե աստղերը հեկեկում էին...

1979

ՀԱՎԱՏ

Պատահել է հաճախ՝ ցուրտ է եղել այնպես,
Կորցրել ես հավատ ու ներշնչանք ու սեր,
Եվ թախիծդ դեղին մի սովահար շան պես
Ունացել է տխուր ու թաթերը լիզել...

Բայց երբ լույսը նորից կոպերիդ է իջել,
Ներշնչանքդ նորից դարձել է ձուլ մի զանգ,
Դու կանգնել ես հողի ու երկնքի միջև,
Ծննջացել նորից՝ դու օրհնություն ես, կյանք...

Հառաչել է քո մեջ մի կորուսյալ աշխարհ,
Որ արյունդ արդար դեղին մաղձի փոխի,
Երազանքդ իբրև մի սրբազան նշխար
Ունատակ է եղել ու դարձել է մոխիր...

Սակայն բավ է եղել ցայգածաղիկ մի լուրթ,
Փեթակի խուլ մի ձայն, հասկի մի շեկ ցլանք,
Մի օրհնված ողկույզ, մի աստղահամ աղբյուր,
Որ շնչաս նորից՝ դու օրհնություն ես, կյանք...

Հաճախ գլխիդ վրա ինչ-որ անհայտ թևեր
Սավառնել են անտես ու շառաչել տխուր,
Ունայնության փոշոտ տազնապները բերել
Ու կանչել են, կանչել դեպի հովիտ մի խուլ...

Սակայն բավ է եղել, որ լուսամուտն ի վեր
Կամ արծաթում գետի, իբրև ոսկե պատրանք,

Քեզ պատահմամբ ցոլա կնոջ մարմինը մերկ,
Որ շշնջաս նորից՝ դու օրհնություն ես, կյանք...

Հիմա գիշեր է մեծ, ամռան հսկա գիշեր,
Ասուպներ են դառնում մոլորակներն անհայտ,
Ծավալվում է, ծփում աստղային լույս մի շեր,
Ծավալվում է, ծփում մի ահավոր տազնապ:

Ինչ է գուժում տազնապն ու ի՞նչ պիտի բերի,
Ի՞նչ են հուշում ընկնող մոլորակներն այս տաք...
Սակայն ինչ էլ հուշեն, դու հրաշք ես վերին,
Սակայն ինչ էլ լինի, դու օրհնություն ես, կյանք:

1978

ԳՈՒՇԱԿՈՒԹՅՈՒՆ

Երևի, իրոք, ինչ-որ ժամանակ ես հող եմ եղել,
Քանի որ իմ մեջ մորմոքում է դեռ ծարավ մի վերին,
Անձրև է տենչում ու կապույտ հեղեղ,
Ուզում է գնալ ու ծնկի իջնել մեր աղբյուրներին:

Իրոք, երևի, ինչ-որ ժամանակ ես հող եմ եղել,
Քանի որ գիտեմ, հողի պես գիտեմ այն գաղտնիքը մութ,
Թե սևահողի սև տառապանքից ինչպես է ելել
Ծաղկի հրաշքը կարմիր ու կապույտ:

Երևի նաև ինչ-որ ժամանակ թռչուն եմ եղել,
Քանի որ անվերջ կապույտն է կանչում,
Քանի որ անվերջ երազներիս մեջ թռչում եմ թեթև
Եվ մեջքիս վրա զգում թևերի մի խուլ շառաչուն:

Իրոք, երևի, ինչ-որ ժամանակ թռչուն եմ եղել,
Ու մինչև հիմա իմ մեջ լալիս է կապույտը վերի,
Իսկ թիկունքիս մեջ, թիակներիս մեջ ինչ-որ ցավ կա դեռ,
Երևի ցավն է կտրած թևերի...

1978

ԲԱՂՁԱՆՔ

Պատանության օրերի առաջին ձյունն իջներ ցած,
Եվ փաթիլներն օդի մեջ երազանքներ հինեին,
Թափառեի ես մենակ, թափառեի գլխաբաց
Եվ քնքշորեն ու տխուր սիրահարված լինեի:

Թափառեի, փնտրեի ես քո տեսիլքը տրտում,
Քո հասակը՝ ձյան քողով ու գաղտնիքով պարուրված,
Չգտնեի, մտնեի մի ծխամած գինետուն
Ու դուրս գայի այնտեղից մի քիչ թեթև, մի քիչ բաց:

Եվ ձյունը գար, ձյունը գար, իջներ մաքուր ու խոշոր,
Ձմռան քաղաքը խաղաղ՝ ձնծաղիկի պես բուրեր,
Եվ ձյունը գար, ձյունը գար, ծածկեր աշխարհն այն փոշոտ
Ու ամեն ինչ մաքրության երազներով պարուրեր:

Փակ լինեին աշխարհի առեղծվածները բոլոր,
Առեղծվածները սիրո դեռ չբացված լինեին,
Թափառեի ես մենակ, թափառեի ես մոլոր
Եվ քնքշորեն ու տխուր սիրահարված լինեի:

1979

ԳԻՇԵՐԱՅԻՆ ՏՐՏՈՒՆՁ

Գուցե այդ պահին տխուր էիր, Տեր,
Տառապում էիր արարման ցավից,
Իսկ ես հող էի,
Կավ էի ես դեռ,
Ու դու քո ցավը
Ակնթարթի հետ խառնեցիր կավիս:

Դրսում գիշեր է,
Անձրևն է լալիս:

Անձրևն է լալիս:
Ու թվում է ինձ՝ առել ցավն այդ հին,
Խոնավ պատերին իմ քարանձավի
Թռչող եղնիկի տեսքով տխրագին
Դրոշմում եմ դեռ պատկերն այդ ցավի,
Սակայն եղնիկը
Խուսափում, թռչում, սլանում հեռու
Ու մոտ չի գալիս...

Դրսում գիշեր է,
Անձրևն է լալիս:

Մութ գիշերվա մեջ
Ինչ-որ գնացք է սուլոցով սուրում,
Եվ այդ սուլոցից
Իմ մեջ կարոտն է հանկարծ սարսուում,
Ուզում է փոխվել տողի, հնչյունի,

Սակայն տողերը խուսափում են լուռ
Ու մոտ չեն գալիս...

Դրսում գիշեր է,
Անձրեն է լալիս:

Դիմացի հարկում
Ցուլում է հանկարծ կապուտակ մի լույս,
Եվ վարագույրին տավում, դողում է
Կիսամերկ մի կին...
Ու ես ուզում եմ
Երգս առնչել նրա գաղտնիքին,
Սակայն գաղտնիքը խուսափում է լուռ
Ու մոտ չի գալիս...

Անձրեն է լալիս...
Ինչո՞ւ այս ցավը խառնեցիր կավիս...

1979

ՈՒՐ ԵՔ...

Լույսի մաքուր մերկությամբ
Ինչ-որ տեղ սերն է նիրհել,
Ինչ-որ տեղ լույսն է նիրհել
Կնոջ մաքուր մերկությամբ,
Իսկ ինձ հետ դուք եք միայն,
Իմ մենության ստվերներ,
Ծվեններ իմ ծխացող,
Մխանքներ իմ ու իմ ամպ:

Մոմ իսկ չկա՝ բոցկլտար,
Դողար ծաղիկն իր ծավի,
Լար հրեղեն արցունքով
Եվ սպառվեր ինքն իրեն,
Որ զգայի ես նորից
Գեղեցկացումը ցավի
Եվ դիտեի հատնումի
Թրթիոները հրեղեն:

Շատ եմ հոգնել մխալուց,
Ծխալուց շատ եմ հոգնել...
Ո՞ր եք, ո՞ր եք, ասուպներ,
Վաղուց, այս, չեք երևում,
Որպես կանչող կարոտի
Խարտիշահեր ասպետներ,
Շառաչեիք մի վայրկյան
Ու մեռնեիք վերևում...

1977

* * *

Պարույրի հիշատակին

Ընկել են ջահել,
Ընկել,
Սրտերում չարի նետն առած,
Ընկել՝ հանձարեղ,
Շուրթերին՝ երգի շշուկը վերին:

Մահը,
Որ կին է չար ու պառաված,
Սիրահարված է
Ջահել,
Հանձարեղ
Բանաստեղծներին...

1971

ԿՐԿՆՎՈՂ ԵՐԱԶ

Պարույր Սևակին

Դու, որ կյանքում երբևէ չէիր կրկնում ինքդ քեզ,
Հիմա անվերջ կրկնվող իմ երազն ես դու դարձել,
Գալիս ու նույնն ես ասում՝ թե այն օրը պարզապես
Ուշաթափված էիր դու, իսկ մենք մեռած ենք կարծել:

Թե քունքիդ վերքը փոքրիկ վաղուց արդեն լավացել,
Սպիացել է վաղուց, ու չի ծորում էլ արյուն...
Հետո ուզում ես ասես ինչ-որ գաղտնիք ինձ բացել,
Սակայն մարդիկ են խուժում, աղմկում ու խանգարում:

Մեր հանդիպումը վերջին իմ այրվող ցավն է դարձել.
Դեմքիդ լույս կար մի խաղաղ, համակերպում կար մի մեծ,
Ուզում էիր դու ասես ինչ-որ գաղտնիք ինձ բացել,
Սակայն մարդիկ խուժեցին, ու շրթունքդ կարկամեց:

Շնչաջաջիր ինձ՝ «Հետո»...

Իսկ «Հետոն» ծուխ էր ու շանթ,
«Հետոն» կայծակ էր մի սև, «Հետոն» վերքն էր քո քունքի,
«Հետո» կանգնել էի ես դագաղի մոտ քո դաժան,
Դամբանականս խառնած իմ կաթկթող արցունքին...

Այս առավոտ կոպերիս նորից ցողն է արցունքի,
Եկել էիր դու նորից, իմ թուխ, իմ խենթ, իմ անսանձ...
Եվ նորից սիրտս է ցավում, որպես վերքը քո քունքի,
Եվ նորից սիրտս է մխում, որպես գաղտնիքն այն չասված...

1981

ԳԱՐՆԱՆ ԱՌԱՎՈՏ

Գարնան առավոտ, դու այսօր այնքան մեծ ես ու բարի,
Ասես հանձարեղ մի երգ ես գրել:
Կամ ասես հենց նոր՝ վաղուց երազած, վաղուց բաղձալի
Մի կնոջ հետ ես դու ժամադրվել:

Գարնան առավոտ, դու այսօր այնքան ջինջ ես ու բյուրեղ,
Ասես չես տեսել մուժ ու թախծություն...
Բայց ես չգիտեմ, ինչո՞ւ եմ ուզում նստել ու գրել
Մի սաստիկ տխուր բանաստեղծություն...

Գուցե նրանի՞ց, որ հենց այսպիսի մի օր էր, երբ ես
Առաջին անգամ սիրահարվեցի,
Ու հետո սերս թախծություն դարձավ ու կարոտ մի հեզ.
Ու սիրոս դարձավ ցավի փակ խեցի:

Գուցե նրանի՞ց, որ քամին ծառից խլում է թերթեր
Եվ փռում իբրև ձերմակ հեկեկանք,
Գուցե նրանի՞ց, որ մինչև հիմա չգիտեմ ես դեռ,
Հրամշք ես, թախի՞ծ, թե՞ մորմոք ես, կյանք...

Գարնան առավոտ, դու այսօր այնքան ջինջ ես ու բյուրեղ,
Ասես չես տեսել մուժ ու թախծություն,
Բայց ես չգիտեմ, ինչո՞ւ եմ ուզում նստել ու գրել
Մի սաստիկ տխուր բանաստեղծություն...

1980

ԱՅՐՎԱԾ ԿՏԱՎՆԵՐ

Մինաս Ավետիսյանի Հիշատակին

Շրջանակներ այրված, շրջանակներ պարապ,
Շրջանակներ, որպես սպիտակած բիբեր...
Եվ ներշնչման ոգին՝ մի նետահար կարապ,
Մոխիրների վրա հոգեվարում է դեռ:

Բոցկլտում էր այնտեղ մի հրեղեն կարոտ,
Ու տեսիլն էր ցոլում ծվեններով ծավի,
Մի ծարավ էր այրվում կածաններին քարոտ,
Եվ մի կորչող աշխարհ գեղեցկանում ցավից:

Ու ցավի մեջ այդ տաք՝ ործաքարե տներ,
Մի հոգնատանջ գեղջուկ ու թևաթափ մի մայր...
Եվ չգիտեն նրանք, որ Հիսուս են ծնել՝
Տառապանքի, ցավի ու հրաշքի համար:

Շրջանակներ այրված, շրջանակներ անդեմ,
Շրջանակներ, որպես մութ վիհերի հառաչ...
Հետո կանգնել էի գերեզմանիդ հանդեպ՝
Այդ ահավոր, վերջին շրջանակի առաջ:

Կանգնել էին նրանք՝ մի հոգնատանջ գեղջուկ
Ու թևաթափ մի մայր... Եվ անձրև էր մաղում...
Զգիտեին նրանք՝ ինչ է եղել, ինչո՞ւ,
Զգիտեին նրանք, որ Հիսուս են թաղում:
Շրջանակներ այրված, շրջանակներ պարապ,

Շրջանակներ, որպես սպիտակած բիբեր,
Ռ՛վ է նշան բռնել քեզ, ներշնչման կարապ,
Այդ ի՛նչ մրրիկ է սև քո թևերին դիպել:

Պիտի շանթը շողար, բայց անձրևն էր մաղում,
Պիտի որոտ լիներ, բայց շշուկ էր տխուր...
Երբ աշխարհում աշխարհ ու հրաշք են թաղում,
Ամպրոպ, ինչո՞ւ ես լուռ...

1981

ԻՄ ՄՈՒՍԱՅԻՆ

Դու ինձ համար կյանքում ճակատագիր եղար,
Հավատ եղար, կասկած, տագնապ ու դող,
Մշուշի մեջ կորած Հրո երկիր եղար,
Անհայտի կանչ եղար դու կախարդող:

Հեռուններում մարող հայրենի տուն եղար,
Հեռուններում լոռղ երգ ու աղոթք,
Կարոտի սև կսկիծ ու տրտմություն եղար
Ու կարոտախտ եղար դու ծվատող:

Նման եղար այնքան դու քմահաձ կնոջ,
Որ մի վայրկյան միայն իրեն բացում,
Հեռանում է հետո, թողած իբրև շնորհ
Միայն ծարավ ու քաղց ու հիացում:

Բայց թռչունի նման, որ ինքնությունն իր թանկ
Օդի մեջ է զգում, լույսի, քամու,
Ես ինձ զգում էի այն պահերին միայն,
Երբ դու գալիս էիր ու ինձ տանում:

Իսկ երբ գալիս էիր, բոլոր տաճարների
Չանգերն էին ասես մեկից ոգում,
Եվ իջնում էր վրաս քո շնորհը վերին,
Իբրև վերին վայելք ու ամոքում:

Ինչ կանեի, ասա, թե չլինեիր կյանքում
Քո հրաշքը տխուր, քո դողը սուրբ,

Այն վայրկյանը հավերժ, երբ մորմոքը անգույն
Բռնկվում է, դառնում աստղ ու ասուպ:

Երբ կարոտից ճաքած շրթունքներին քո սև
Ճառագայթը հանկարծ դառնում է տող,
Եվ սկսում ես դու երանորեն այրվել,
Իբրև մի ինքնակամ, խոնարհ մի զոհ:

Քայլի՛ր, քայլի՛ր այդպես քո պարտքի տակ կքած,
Քայլի՛ր, իբրև հոգնած մի թիապարտ...
Ես անիծում եմ քեզ, իմ տառապանք, իմ քահղց,
Ես օրհներգում եմ քեզ, վերին իմ բախտ:

1981

ԿՈՐԱԾ ՏՈՂԸ

Կիսաքնիս խառն ու խոիվ ամպի մեջ
Տող էր ծնվել ու դողում էր իմ շուրթին,
Որ, հիշում եմ, գեղեցիկ էր շանթի պես
Ու թախծալի, ինչպես անբառ մեղեդին:

Արթնացել եմ, որոնում եմ, ու չկա,
Ցնդել է նա, ցողի նման չքացել,
Եվ շուրթերիս լոկ իբրև հետք ու վկա
Լույսի թեթև մի թրթիռ է մնացել:

Սկիզբն էր նա գուցե հրաշք մի երգի
Կամ երազված հրաշք երգն էր նա գուցե,
Որ կարող էր բախել դուռը երկնքի,
Որ կարող էր անհայտի հետ զրուցել:

Տողը ոչինչ... Այնքան տողեր եմ ցրել,
Բայց սրտիս մեջ դեռ կորուստն է մորմոքում,
Թվում է, թե ինչ-որ սեր եմ կորցրել,
Ինչ-որ մեկի տաք աձյունին եմ չորում...

1982

ԵՍ ԵՎ ԵՍ

Կապույտի մեջ սոսափող բարդիներ են նաիրյան,
Առուներ են նաիրյան, լուսնկա է ու թախիծ...
Հանդիպեցինք ես ու նա... ծանաչեցի ես նրան,
Չծանաչեց, ամիս, նա ինձ:

Շրթունքներին Չարենցից ինչ-որ տող էր, ինչ-որ հանգ,
Գրպաններում ու սրտում՝ անտիպ տողեր ու գազել...
Եվ գիտեի, մի աղջիկ՝ մի գեղեցիկ տառապանք,
Քնքշորեն «ո՛հ» է ասել:

Ու գնում էր նա մենակ մուժի միջով ու ցավի,
Ու գնում էր նա մենակ, որպես կարոտ ու թախիծ,
Շշնջացի ես նրան. «Դու հարուստն ես աշխարհի»...
Չհավատաց, ամիս, նա ինձ:

Հին մայթերին ինչ-որ տեղ Կարաբալան հանդիպել
Ու տեսնելով, որ տղան խեղճ ու տխուր է սաստիկ,
Մոտեցել էր ու կապույտ մի ծաղիկ էր նվիրել,
Նման կապույտ մի աստղի:

Ու գնում էր... Նաիրյան լուսնկան էր զրնգում,
Ձեռքի ծաղիկն էր ցուլում, որպես ցնորք ու թախիծ...
«Պահիր ծաղիկն, – ասացի, – դա չես գտնի էլ կյանքում»,
Չհասկացավ, ամիս, նա ինձ...

1983

ՊԱՏՐԱՔ

Ես չգիտեմ, պատրանք է սա, թե ցնորք,
Անքնության տառապանք է, թե թախիծ...
...Երբ լուսնկան շող է կախում ու շնորհի,
Ելնում է նա քարանձավի երախից:

Մորուք ունի, ասես մամուռ է սաթե,
Աչքերի մեջ ինչ-որ հեզնանք կա թաքուն,
Ձեռքը պարզում, բռնում է հովն արծաթե
Ու շուրթերին սրինգ արած նվագում:

Լույս է ծորում այդ արծաթե եղեգից,
Ու աստղային արտասուքներ են կաթում,
Ծավալվում է խորհրդավոր մեղեդին
Եվ ամեն ինչ ոսկեզօծում բացատում:

Լույսի շող է, լույսի քող է, լույսի դող,
Տերևներն են հաշտ ու թեթև թրթռում,
Եվ աստղերը ցողերի մեջ մկրտվող
Շեկիկ ու տաք մանուկներ են ինձ թվում:

Աղբյուրն անուշ հեկեկում է իր ակից,
Հովն է շոյում գանգուրները թփերի,
Եվ ինչ-որ մութ, ինչ-որ մամուռ փշակից
Հայտնվում է զարմանալի մի փերի:

Նստում է նա, որ թաց վարսերը սանրի
Ու կանչում է, ու կանչում է ինձ հեռվից,

Բայց կախարդն այն քրքջում չար ու մանրիկ,
Մուժ է կախում, փուշ է կախում թփերից:

Ես քայլում եմ... Ծավալվում է մեղեդին,
Ես քայլում եմ, քայլում ու չեմ նկատում,
Որ փշերին, ծաղիկներին, թփերին
Իմ ծնկներից արյուն ու ցավ է կաթում:

Ու քայլում եմ, ու քայլում եմ ես մենակ,
Գլխիս վրա գիշերվա հավքն է ձչում,
Լույս մեղեդին ծավալվում է շարունակ,
Ու կախարդն է չար ու մանրիկ քրքջում:

1982

ՀԱՎԱՏՈՒՄ ԵՄ ՔԵԶ

Երեկ սև ամպն էր սպառնում վերից,
Եվ տագնապով էր ծիլը բռնկել,
Այսօր նշենու բարակ ձյուղերին
Ասես մի հսկա լուսաստղ է ընկել:

Երեկ ամայի, երեկ միգամած,
Երեկ լուռ էի, որպես թախծություն,
Այսօր շուրթերիս դողում է կամաց
Ինչ-որ մի անհայտ բանաստեղծություն:

...Ծաղիկների մեջ արցունք է կապույտ,
Հեկեկանքի մեջ լույս ունի առուն...
Հավատում եմ քեզ ու երկրպագում,
Խուլ տառապանքով արթնացող գարուն...

1981

ԱՄՊՐՈՊԸ ԼԵՌՆԵՐՈՒՄ

Լեռների վրա խոռվություն է,
Խավարի խաղ է, դող է ու տենդ,
Վայրի հեղեղը կորցրել հունը
Եվ մոլեզնում է խոռվ ու խենթ:

Լեռների վրա ողբերգություն է,
Ողջը դարձել է հիմնահատակ,
Մեռած ծաղիկը լույսի աճյուն է,
Փշրված շանթը՝ սուրբ նահատակ:

Լեռների վրա արև ու ձյուն է,
Ձնծաղիկներ են քարատակի,
Երկինքը փառք է և օրհնություն է,
Կապույտ ոգին է նահատակի:

1981

* * *

Ես փախա ցավից,
Գնացի հեռու, ուր ձոր էր, անտառ,
Հների նման ասես քաշվեցի մենավոր մի վանք,
Բայց դու շան նման հետքերս գտար
Ու եկար, իմ ցավ, իմ վիրավորանք:

Հետո գիշեր էր,
Անտառը ասես անտառ չէր, այլ մեզ,
Մահու թափոր էր, երթ էր կմախքի,
Ու թվում էր, թե
Նա իր ծոցի մեջ չի պահել երբեք
Ցուլանքը, ցողը, ծիծաղը ծաղկի:

Եվ ամբողջ գիշեր
Ասես երազս խաչին էր գամվում,
(Վաղճուց, ախ, վաղճուց այդպես չէր եղել),
Ու ձեռքերից չէր արյունը քամվում,
Սրտի մեջ էիք մխրձվել, մեխեր:

Հետո լուսինն էր դանդաղ բարձրանում,
Որ սև ծառերի ձեռքերին թառի,
Ու թվում էր, թե
Ինչ-որ սպիտակ ածյուն է տանում
Թափորն անտառի:

Տխուր քամու հետ
Սգերթն էր հոսում մութ հեղեղատով,
Հառաչում էին անդունդ ու անտառ:
...Հեռացող գիշերն իբրև Պյուղատոս
Գունատ ձեռքերն էր լվանում դանդաղ...

1983

ԴԵՂԻՆ ԱՆՔՆՈՒԹՅՈՒՆ

Ժամը՝ տարի, գիշերը՝ դար...
Ու մի դեղին տենդ է վառում,
Ինչ-որ դեղին մի տվայտանք,
Ու անդունդ է դեղին-դեղին...
Եվ բարդին է աչքերիս դեմ
Սալումեի նման պարում,
Լուսնի դեղին գլուխն առած
Երկնքի սև սկուտեղին...

Դեղին-դեղին մի տվայտանք,
Ու անդունդ է դեղին-դեղին,
Ինչ-որ հուշ է զարթնում հանկարծ,
Դառնում է մաղձ, դառնում է թույն,
Ու թվում է ողջն անիմաստ,
Ու թվում է ողջն անտեղի,
Ողջը՝ դեղին մի զառանցանք,
Ողջը՝ դեղին ունայնություն:

Ժամը՝ տարի, գիշերը՝ դար...
Դեղին տենդն այդ դեռ երկարում
Ու շուրթերին անդունդների
Տվայտանք է դառնում դեղին,
Բարդին է դեռ աչքերիս դեմ
Սալումեի նման պարում,
Լուսնի դեղին գլուխն առած
Երկնքի սև սկուտեղին...

1982

ԿԱԼՉ

Փողեր են հնչում, ինչ-որ հեռավոր ու անհայտ փողեր,
Թե՛ դա պարզապես ականջս է կանչում...
Այդ ո՞վ է, արդյոք, որ իր երազը կիսատ է թողել
Եվ իմ անունն է շուրթերին տանջում:

Ոչ ոք երևի... Մայրս քնած է հավիտյան քնով,
Իսկ մյուսներից այդ ո՞վ է արթուն...
Փողեր են հնչում... կախվում է վրաս անձև մի ցնորք
Ու իր զարմացած աչքերն է թարթում:

Փողեր են հնչում... Հնչում թախծալի, ու ահա նորից
Ես չեմ հասկանում աշխարհում ոչինչ,
Ոգի՛ն է խոսում տիեզերական անձայն ժխորից,
Թե՛ ընկնող աստղի հեկեկանքն է ջինջ...

Կանչը հեռանում, կանչը խլանում, լուր է անդարձ,
Ու ինչ-որ հարց է ինքն իրեն տանջում, –
Ինչո՞ւ էր ղողանջն այդքան թախծալի, այդքան տազնապած,
Ինչո՞ւ էր կանչում և ո՞ր էր կանչում...

1982

ԳԻՇԵՐԱՄՈՒՏ

Մայրամուտի մեջ մեն-մենակ այրվող
Ամպի թախծություն,
Սարալանջն ի վեր հոգնած գալարվող
Ճամփի թախծություն,
Թախծություն ծաղկի, որ լուռ սրսփում,
Մրսում է մթնում,
Թախծություն հավքի, որ մոլոր ծփում,
Բույնը չի գտնում,
Հեռու քարափի մթան մեջ հալվող
Վանքի թախծություն,
Անհայտության մեջ անլուր ծավալվող
Չանգի թախծություն,
Թախծություն հուշի, հուշի պես լացող
Ինչ-որ աղբյուրի,
Խտացող մուժի, մուժում ցոլացող
Անհայտ մի հրի,
Ինչ-որ կրակի, որ առկայծում է,
Չգիտես սակայն,
Կրակ է իրոք, թե թախծությունն է
Տիեզերական...

1983

ՆԵՐԵՑԵՔ, ՏՂԵՐՔ...

*Մանկության ընկերներին՝
Երվանդի և Սուրենի հիշատակին*

Երազում տեսա, որ ընկել եմ ես կովում այն ահեղ,
Երազում տեսա, որ քսան տարիս թաղված է հողում,
Օտար աշխարհի սպիտակ բուքը ոռնում խելահեղ,
Ձյունափոշով է թումբս ողողում:

Մայրս մեռել է... Աշխարհում էլ ինձ ոչ ոք չի հիշում,
Եվ իմ անունը ծանոթ չէ այնտեղ արդեն ոչ մեկին,
Ու միայն ասես ինչ-որ բան տեսած հեռու մշուշում,
Թախծում է մի պահ ձերմակող մի կին:

Եվ կողքիս ահա իմ ընկերներն են պառկած հոգնաբեկ,
Երկուսն էլ ինձ պես քսան տարեկան ու սիրահարված,
Մեկի ձակատին փոքրիկ աստղի պես ցլում է մի վերք,
Մյուսի կուրծքն է մի թեթև այրված:

Հողմը լռել է... Երևի վերում գարուն է գալիս,
Ինչ-որ շշուկ կա, երևի խոտ է մեզ վրա աճում,
Մի տաք խշշոց կա, երևի գարնան անձրևն է լալիս,
Որոտ կա՝ գարնան ամպն է շառաչում:

Ես շատ եմ սիրել կյանքում այդ շառաչն ու շանթերն այդ շեկ
Ու վեր եմ թռչում, թոթափում եմ հողն ու սևը վանում,
Բայց դուք՝ իմ կողքին մանկորեն քնած ընկերներ իմ հեզ,
Դուք հողից ելնել չեք կարողանում:

Մի կաթիլ արձիճն ինչ ահավոր է ու ինչ ծանր է, Տեր,
Ինչքան է կշռում... ոչ ոք երևի դա չի իմանում:
Ես ձեռք եմ պարզում, ես չարչարվում եմ, որ հանեմ ձեզ վեր,
Ներեցեք, տղերք, չեմ կարողանում:

...Զարթնել եմ ահա... Աշնան գիշերն է լուրս իմ դիմաց,
Մի մրսած քամի դրսում սևակնած իր սուզն է անում...
Ես շատ եմ ապրել կյանքում առանց ձեզ... Բայց ցուրտ է հիմա,
Հիմա առանց ձեզ չեմ կարողանում...

1982

ԳԻՇԵՐԱՅԻՆ ԱՅՅ

Այս գիշեր եկել էր նորից,
Եկել էր իմ մայրը մեռած,
Եկել էր, թեքվել էր վրաս
Ու ձեռքը դրել էր սրտիս,
Ասում էր.

– Քո վրա երեկ

Տեսել եմ ես մի չար երազ
Ու եկա, որ ցավդ տանեմ,
Որ վրադ աղոթեմ, որդիս:

Աչքերդ հանգել են մի քիչ,
Մազերդ մոխիր են դարձել,
Կոպերիդ, տեսնում եմ ահա,
Թառել է թախիծը դեղին,
Երևի ինձանից հետո
Քեզ մենակ ու որբ են կարծել
Ու հացիդ լեղի են խառնել,
Ու գինուդ խառնել են լեղի:

Հիշում եմ, դեռ մանկուց կյանքում
Ոչնչից չունեիր դու ահ
Ու միայն ցրտից էիր դու
Մահու չափ վախենում, որդի...
Աշխարհը ցրտել է ասես,
Ու պաղ են ձեռքերդ, ինչ պաղ,
Երևի մնացել դրսում,
Որբի պես մրսել ես ցրտից:

Ու գիտեմ, երբ ցավից խմել
Ու հարբած ուզել ես ձչալ,
Այն մեկը, առաջվա նման,
Երեսիդ անեծք է նետել,
Եկել եմ աղոթքով իմ սուրբ
Խափանեմ անեծքը այդ չար,
Եկել եմ, որ փոեմ վրադ
Մանկության երկինքը թեթև:

Եկել եմ, թևերիս առած,
Քեզ տանեմ մեր տունը հեռու,
Արևը առել է նրան,
Ու տաք են պատերը քարե,
Հիշում ես, գետակը մեր ջինջ
Սարերից կապույտ էր բերում,
Ծիծաղ ու ծաղիկ էր բերում,
Բերում էր ոսկի ու արև...

Ինչ կո՛չտ է քո բարձը, որդի,
Ինչո՞ւ են այս քարը դնում,
Եկ գնանք, ամպի հետ փափուկ
Գլխիդ տակ իմ ափը դնեմ...
Հիշում եմ, արևից առաջ
Քո քունը խորունկ էր լինում,
Եկ գնանք, որ այդպես խորունկ
Ու այդպես մանկորեն քնես...

1983

ԻՐԻԿԱՅԻՆ ՏԵՄԼ

Իրիկնամուտի հոգնաբեկ քամին տվայտում է խուլ,
Ու իմ մոխրացած գլուխը արդեն թեքվում է բարձին,
Բայց հայտնվում է ծանոթ մի տղա ու ասում տխուր.

– Ո՞ր է հրաշքն այն, որ դու խոստացար ինձ լուսաբացին...

Դու ինձ ասացիր, որ հեռու հեռվում մի հովիտ կա տաք,
Այնտեղ կապույտ է, կապույտի կոպին աստղ է նորածին,
Կանաչների մեջ քեզ է սպասում մի ալ հովատակ,
Ո՞ր է հրաշքն այն, որ դու խոստացար ինձ լուսաբացին:

– Ներիր ինձ, տղաս, կար այդ հովիտը, հովատակն այդ կար,
Մատներս նույնիսկ շոյել են նրա աչքերը հրկեզ,
Նա շատ էր վայրի, մորթին շողուն էր ու աստղանկար,
Երևի բռնել, լկամ են դրել ու տարել կրկես:

– Դու ինձ ասացիր՝ սերը հրաշք է, սերը քնքշություն,
Որ ճանապարհիս ինձ է սպասում հավերժ կանացին,
Սակայն ես գտա խուսափող մի հուր, խանդի մաղձ ու թույն,
Ո՞ր է հրաշքն այն, որ դու խոստացար ինձ լուսաբացին:

– Ներիր ինձ, տղաս, առաջին սերս հողմերը տարան
Ու տարան անփույթ, տարան իբրև ծուխ ու աշնան տերև,
Ու մինչև հիմա իմ մեջ լալիս է կարոտը արյան,
Եվ ոչինչ, ոչինչ հիմա չեմ կարող ես էլ հետ բերել:

– Դու ինձ ասացիր, որ կպարզվես լույսի հացն առատ
Եվ կգումարես աստղային գինին այդ արդար հացին,

Բայց հացիս՝ որոմ, լեղի խառնեցին գինուս անարատ,
Ո՞ր է հրաշքն այն, որ դու խոստացար ինձ լուսաբացին...

Իրիկնամուտի հոգնաբեկ քամին տվայտում է խուլ,
Եվ իմ մոխրացած գլուխը արդեն թեքվում է բարձին,
Ծայրեծայր ձգվում ու հեծկլտում է հառաչն այդ տխուր.
– Ո՞ր է հրաշքն այն, որ դու խոստացար ինձ լուսաբացին:

1983

ՀԱՐՑՈՒՄ

Տեր, եթե ինձ այսուհետև էլ չես տալու
 Բոցի հրաշքն ու հրաշքը խենթանալու,
 Թե չես տալու գլխապտույտն այն արարող,
 Որ իրար է խառնում հանկարծ երկինք ու հող,
 Կապս խլում, իմ մեջ թողնում միայն ոգի,
 Վայրկյանի մեջ ինձ վերածում ասես մոգի,
 Վայրկյանի մեջ ինձ դարձնում այնքան արդար,
 Որ կարող եմ ճակատագիրն անգամ կարդալ,
 Թե չես տալու, թող որ լինի կամքդ վերին,
 Հաշտ եմ Քեզ հետ, եկ ու ինձ տար Քո թևերին:
 Թե չես տալու ինձ կարոտի աստղը ծավի,
 Որ դողում է թարթիչներին մթնշաղի,
 Պահերն այն սուրբ, երբ մաղում է անձրևը տաք,
 Կինը փխրում, ծվարում է թևերիդ տակ,
 Բուրում հանկարծ, բուրում իբրև անհայտ եղեմ,
 Պահերն այն սուրբ, երբ կանգնում ես փակ դռան դեմ
 Ու այնպիսի դողով թակում դուռն այդ թաքուն,
 Որ թվում է, թե հենց բախտիդ դուռն ես թակում,
 Թե չես տալու, թող որ լինի կամքդ վերին,
 Հաշտ եմ Քեզ հետ, եկ ու ինձ տար Քո թևերին:
 Թե չեմ կարող էլ տեսիլքի լույսն ստանալ,
 Հեռու գետի մի արծաթով հարստանալ,
 Հարստանալ մի ծվենով կապույտ մեգի
 Ու հեկեկալ ցավով, իմ չէ, ուրիշ մեկի,
 Թե այսուհետ սիրտս լույսից չի նվալու,
 Տերևի դողն ինձ մոգություն չի թվալու,
 Ծշուկն աստղի չի թվալու հմայություն
 Ու բռնկումն արշալույսի՝ սուրբ հարություն,
 Հաշտ եմ Քեզ հետ, թող որ լինի կամքդ վերին,
 Եկ ու ինձ տար Քո թևերին...

ԱՍՏՂԱՅԻՆ ԲԱՆՏ

Երկինքն ասես այս գիշեր հողի կարոտն է հիշել
Ու աստղեր է թափթփում, աստղի անձրև, աստղի ցող...
...ես ծնվել եմ այսպիսի օգոստոսյան մի գիշեր,
Եվ ասել եմ երևի, թե ես ծնվել եմ աստղով:

Ճիշտ են ասել երևի, բախտն իմ աստղի էր նման,
Բայց այն աստղին, որ ասես արցունքի շիթ է շողուն,
Բայց այն աստղին, որ կախվել թարթիչներից թախծության
Ու դողում է կարոտից, սպասումից է դողում:

Եվ այն աստղին, որ այնպես անհուսորեն է տրտում
Սիրահարված է եղել երկնային սուրբ մի ծաղկի...
Եվ մինչև օրս իրեն իր արցունքով մկրտում
Եվ սպասում է անհույս դեռ հանդիպման հրաշքի:

Ասուպները երկնքի ասպետներն են հրեղեն,
Ասուպները երկնքի նահատակներն են այրվող,
Ու թե իմ բախտն իսկապես աստղային բախտ է եղել,
Իմ վախճանն էլ աշխարհում աստղի վախճան լինի թող:

Բան չեմ ուզում, երբ անքուն կարոտներից ու ցավից
Ասուպի պես բռնկվեմ ու մարմրեմ խավարում,
Թող ծաղիկն այն հեռավոր վերև նայի այդ պահին
Ու շջնջա ինքն իրեն. «Ինչ գեղեցիկ է այրվում»...

1982

ԱՇՆԱՆ ԱՆՏԱՌ

Քարափն ի վեր կրակ ու բոց, հրդեհ է նա վայրի...
Ու շշնջում է մեկն ասես՝ չմոտենաս՝ կայրի:

Բայց մխալուց հոգնել եմ շատ ու գալիս եմ, անտանո,
Ինձ քո կարմիր հրին խառնիր, բոցին խառնիր ու տար:

Բացատի մեջ մենակ կանգնած, թրթում է թխկին՝
Ոտքից գլուխ կրակ հագած բարակիրան մի կին:

Գամ հոգնաբեկ ու երկյուղած, հասակն ի վեր փարվեմ,
Եվ միասին հովին տանք մեզ, և միասին այրվենք:

Սաղարթների թրթոցից հովը բոց է պոկում...
Օ՛, այրումի մաքուր խորհուրդ, թեթևություն ոգու...

...Հնար լիներ խառնվեի սաղարթներին թեթև,
Թրթոայի ու նրանց հետ վերանայի եթեր...

1982

ՅՈՒ ԽՈՐՀՈՒՐԴ ԻՄ ԵՐԳԻՆ

Ա

Դու կայծակի պես
Վերևում ծնվիր,
Եղիր երկնային
Ճախր ու սլացում,
Բայց և նախնական
Այն կայծակի պես
Իջիր և օջախ
Դարձիր դու ցածում:

Բ

Ջրհորի նման
Այնքան խորացիր,
Որ մեջդ հողի
Արմատները լան...
Ու գիտեն հաստատ,
Հետո քո խորքից
Օրը ցերեկով
Աստղեր կցուլան:

Գ

Երբ տողդ ձգվի
Իբրև տառապանք
Ու վայի իբրև
Թախիծը վայրի,
Պարզիր արևին,

Թող տողիդ վրա
Արևի թեթև
Թրթիռը թառի:

Դ
Եվ նոր եղիր դու
Հին գինու նման
Եվ հին եղիր դու
Առավոտի պես,
Ու քո խորքերից
Կելնի, կցովա
Նորի հրաշքը
Թաքուն ու անտես:

Ե
Ճյուղերդ պարզիր
Հեռու և վերև,
Անձրևներն օտար
Քեզ շիթեր թող տան,
Բայց արմատներիդ
Ծարավը մարիր
Ջրով հայրենի,
Ջրով քո Գողթան:

Զ
Դաշնավոր եղիր,
Եղիր նվագուն,
Քո չափերը առ
Ձարկերից սրտիս,
Բայց այն զարկերից,
Որ դողում տենդով,

Որ խենթանում են
Ու դառնում թրթիռ...

Է
Եվ ամեն անգամ
Ինքդ քեզ խորհիր,
Որ վերջինն ես, երգ,
Ու վերջինն ես, հանգ...
Եվ որպես վերջին
Մերկ եղիր ու բաց,
Սուրբ երդում եղիր
Ու խոստովանանք...

ԼԵՈՒՆ ԶԱՄՓԱ

Անդունդների մութը խմած,
Ժայռերն ի վեր ելնում է ձիգ,
Բանաստեղծի ճամփի նման
Վտանգավոր ու գեղեցիկ:

Լա մերթ շանթ է դառնում ասես,
Մերթ խառնվում մութ ու մեզին,
Բանաստեղծի ներշնչման պես
Անբռնելի ու անմեկին:

Քրքրվում է փշերի մեջ,
Դեմ է առնում քար ու քերծի,
Տառապալի ու հողմածեծ,
Որպես բախտը բանաստեղծի:

Կայծակներ է գծում անվերջ,
Կայծակելով՝ ընթոստանում
Եվ հետմահու լույս փառքի պես
Դեպի երկինք է նա տանում:

1983



ՀՐԱՇՈՒՄ



*Ես հավատում եմ,
Աշխարհում դեռ կան անհայտ կղզիներ...*

ՀՐԱՇՔԸ

...Եվ այսքան հրաշք տեսնելուց հետո
Ինձ համար դարձյալ հրաշքը վերին
Տաք հողի միջով բոբիկ քայլելու
Այն վաղնջական երանությունն է...
 Դարձյալ ու դարձյալ
 Այն վայրկյանն է սուրբ,
Երբ աչքերի մեջ բաղձալի կնոջ
Վարանումները մարմրում անզոր,
Դառնում են անմեղ-մեղավոր խոստում:
 Եվ դա էլ դարձյալ,
 Դա էլ երևի
Տաք հողի միջով բոբիկ քայլելու
Նույն վաղնջական երանությունն է...

1978

ԳԱՐՆԱՆԱՅԻՆ

Խշշում է նորից վտակը այն խենթ,
Որ խաղընկերն է իմ մանկության,
Գգվում է հովը մանուշակի հետ,
Որ կապույտ սերն էր իմ մանկության:
Ավազն է փայլում գետափին նորից,
Որ ոսկե գանձն էր իմ մանկության,
Ու ես չգիտեմ՝ գարոնն է գալիս,
Թե՞ վերադարձն է իմ մանկության...

1946

* * *

Աշուն, տխրացյա աղջիկ ես դու,
Վձիտ անձրևը արցունքն է քո,
Որ լուռ մաղում է այս երեկո,
Աշուն, տխրացյա աղջիկ ես դու,
Հմայքդ տված ամեն մարդու՝
Հիմա թախծում ես քաղցր մեղքով,
Աշուն, տխրացյա աղջիկ ես դու,
Վձիտ անձրևը արցունքն է քո...

1940

ՆԺՈՒՅԳՆԵՐ

Պատանության կանաչ մարգում
Ալ նժույգներ էին վարգում,
Բաշերը՝ ծուփ կրակ,
Վարգում էին, թռչում էին,
Ասես հրե թռչուն էին,
Թռչում էին նրանք...
Աչքերի մեջ նրանց խոշոր
Բոցկլտում էր արևը շոգ
Ու քնքշանքը տխուր,
Այդպես տխուր ու գեղեցիկ,
Քամուն տալով բաշերը ձիգ,
Ո՞ր հեռացան, ախ, ո՞ր...

1960

* * *

Այնպես տխրում է հոգիս, այնպես թախծում է լռին,
Երբ հրաժեշտ եմ տալիս աշնան չվող հավքերին:

Ինձ թվում է, թե նրանք կատարներով այս լազուր
Ինձնից մի բան են տանում՝ պայծառ ու տաք մի մասունք:

Տանում են լուռ մի կարոտ, ինչ-որ ծարավ անմեկին,
Զգտնված ինչ-որ խոսք, որ չես ասել դեռ մեկին:

Տանում, հեռու են տանում բախումներով թևերի.
Տանում են ու երբևէ հետ չեն բերի երևի:

Այնպես տխրում է հոգիս, այնպես թախծում է լռին,
Երբ հրաժեշտ եմ տալիս աշնան չվող հավքերին:

1961

ԱՌԱՋԻՆ ԶՅՈՒՆԸ

Զյուն է տեղացել,
Մաքուր, անարատ, մարմարե մի ձյուն.
Ու ձյունի վրա՝ ոչ մի ոտնահետք....
Ուզում եմ քայլել,
Բայց մի անմեկին երկյուղածություն
Ինձ գամել շենքին ու պահում է ետ:
Զյուն է տեղացել...
Եվ իմ հոգու մեջ
Լուռ դողդողում է սրբազան մի լույս...
Երևի այդ նույն դողն են զգացել
Իմ նախնիները
Տաճար մտնելուց...

1962

* * *

Հինա է դրել բարալիկ թխկին,
Լորին ուներին ալ քող է առել,
Աշնան քամու տակ անտառը կրկին
Նազում է շիկնած, ուզում է պարել:

Ու նազանքի դեմ աշնան անտառի
Մշուշը կապույտ իր խունկն է ծխում:
Ցնծում է անտառն, ու միայն վայրի
Կաղնին է կանգնել խոհուն ու տխուր:

Ձմեռ է շուտով... Թխկին ու լորին
Սովոր են պարել ամեն քամու տակ,
Իսկ կաղնին կանգնած խորհում է լռին
Ու մտաբերում հողմերն սպիտակ:

1962

* * *

Ամառ է,
Արտ է,
Ու լուսաբաց է...

Արտույտներ,
Փոքրիկ, թևավոր քուրմեր,
Փառաբանեցե՛ք այս լույսն ու հացը:

Ամառ է,
Արտ է,
Ու լուսաբաց է...

Արտույտներ,
Աստծո արդար որդու պես
Մի զարմանալի,
Մի պարզ հրաշքով
Անսպառ արեք այս լույսն ու հացը:

Ամառ է,
Արտ է,
Ու լուսաբաց է...

1965

* * *

Ապառաժ է վայրի,
Որձաքար է կոպիտ,
Եվ արցունք է ծորում
Որձաքարի կոպից:

Եվ արցունքը ծանր է,
Եվ արցունքից ծավի
Ցածում ծնվում է լուռ
Մի անանուն ծաղիկ:

Մի անանուն ծաղիկ՝
Մենավոր ու կապույտ...
Որձաքարի կոպից
Արտասուք է կաթում:

1969

* * *

Դեղին տոթ է ու քար,
Դեղին խոզան ու խոտ...
Իսկ լեռների վրա՝
Կանանչ-կանանչ աղոթք:

Կանանչ-կանանչ քամի
Ու թրթիռ է կանաչ,
Եվ կանաչի վրա
Ցիլուն ցող է ցանած:

Եվ ոտնահետք չկա
Կանաչներում շաղոտ...
Կանանչ-կանանչ հով է,
Կանանչ-կանանչ աղոթք:

1970

* * *

Ամառային մի արշալույս՝
Ոտից գլուխ կապույտ հագած,
Քայլ է անում ճամփաներով
Եվ բաժանում լույսն իբրև հաց:

Պարզ հրաշքով բացում է նա
Աղջամուղջի աչքերը կույր,
Տերևների բաց ափի մեջ
Դնում է նա ցողն իր մաքուր:

Քայլում է նա ճամփաներով,
Մտնում ամեն դարպաս ու տուն
Եվ ծավալում է ծայրեծայր
Մաքրոր, որպես մկրտություն:

Փռվում է նա ցորեն արտին,
Ջրերի հետ է նա ծփում
Եվ արևոտ իր ձեռքերից
Մանկություն է նա թափթփում:

Մոտիկները տանում հեռու,
Հեռուները բերում մոտիկ,
Հետո տատասկ-փշի միջով
Քայլում է նա ոտաբոբիկ...

1971

ԿԱՆՉՈՒՄ Է...

Կանչում է...

Գնամ:

Գնամ ու ձամփիս

Մի լավ խոսք ասեմ մասրենու թփին,

Ու թող նա շիկնի աղջկա նման:

Գնամ,

Աղբյուրի շուրթերի վրա

Երկինք համբուրեմ ու լույս համբուրեմ:

Քարափին բուսած կարմիր թփի հետ

Բոցկլտամ մի քիչ

Ու մամուռն ի վար շիթ-շիթ գլորվեմ:

Գնամ

Ու քամին,

Բարալիկ քամին թևերիս առնեմ

Ու տանեմ իբրև թեթև աղջկա:

Կանչում է, գնամ...

1973

ՏԵՍԻԼՔ

Գիշերային մշուշները թոթափած,
Ես մեն-մենակ գնում էի դաշտերով...

Բարդիները զնգում էին լույսի մեջ,
Ճառագայթը հեկեկում էր ոտքիս տակ,
Եվ լուսայգի թարթիչներին մնացած
Ինչ-որ աստղ էր արցունքի պես դեռ դողում:

Միանալով քրմանման ծառերին,
Արևի դեմ երգում էի ոգեծայն,
Եվ իմ երգը օրհնություն էր ու գորով:

Գնում էի... Ոսկեփետուր մի թռչուն,
Կաղնիների փչակները մտնելով,
Դուրս էր թռչում և կտուցից, թևերից
Ջարմանալի հրաշքներ էր թափթփում:

Արեգակը անդունդների հատակից
Ծիրանագույն առասպելներ էր հանում
Ու փռում էր արշալույսի թևերին:

Գնում էի... Մի շողշողուն հովատակ
Վրնջում էր, ու թվում էր, թե օդում
Հրնգում են զանգակները արծաթե:

Աշնան դաշտը հրդեհվել էր ծայրեծայր,
Աշնան դաշտը զոհասեղան էր ասես,

Ու Մասիսը նրա բոցն էր սպիտակ...
Եվ այդ բոցը այնքան քաղցր էր ու արդար,
Որ իմ հոգին խառնվում էր նրա հետ
Ու այրվում էր երանորեն ու տխուր:

Գնում էի... Ինչ-որ տեղից շարունակ
Զրնգում էր արևահար մի ծղրիդ
Ու կապույտի, հավերժի հետ էր խոսում:

Գնում էի լույսի միջով ու շողի,
Գնում էի... Չկար մահ ու ժամանակ,
Կային միայն թրթռոցներ ոսկեղեն,
Առասպելներ
Ու հրաշքներ արևոտ,
Եվ կար միայն հավերժություն մի անհուն:

1973

ՈՐՏԵՂ ՈՐՈՆԵՄ...

Հրաշքն էր մի օր անցնում քո բախտով՝
Աչքերի խորքում ճառագայթ ու ցավ...
Եվ այդպես ցավոտ ու ճառագայթող
Ո՛ր գնաց, ասա, ո՞ր անհետացավ:

Եվ ճանապարհդ էր մի օր ոլորվում
Աստեղնալույսի մոգության միջով,
Որտե՞ղ է հիմա հոգնած մոլորվում,
Որտե՞ղ է հանգչում փոշոտ մի ձիչով:

Եվ մի աղբյուր կար լեռների վրա,
Որ խղձի պես էր ու արտասուքի,
Դու է՞րբ կորցրիր ակունքը նրա,
Որտե՞ղ որոնես ու իջնես ծունկի:

Մամուռը լալիս, քարերն է թրջում,
Մխում է մշուշն իրիկնաժամի,
Անհետ սուրում է մի կապույտ թռչուն,
Ու տվայտում է մի հոգնած քամի...

1973

ԱՉՆԱՆ ՕՐ

Աջնան հեռացող արագիլների
Թևերի ձերմակ սոսափն եմ լսում,
Որ թախծագին ու խորհրդավոր է...

Եվ ջինջ է օրը:

Մենավոր բարդին կրակ է հագել,
Վառվում է, վառվում...
Ուր որ է շուտով
Մոխրանա պիտի այդ մենավորը:

Եվ ջինջ է օրը:

Մամուռից վերջին արցունքն է կաթում,
Եվ քարափի տակ ծաղիկ մի ծավի
Լսում է հովի վերջին օրորը:

Եվ ջինջ է օրը:

1974

ԱՌԱՎՈՏ

Լեռներն արևի ոգին շնչելով,
Թոթափում են լուռ մուժն իրենց հագի,
Քարանձավները մամռոտ դնչերով
Կապույտն են խմում արևածագի:

Արցունք է կաթում քարափներն ի վար,
Մարջան է կաթում ու կաթում արև,
Թռչուններն օդում խառնվել իրար,
Չեն կարողանում շողերին թառել:

Վայրի մի ծաղիկ հողից նոր ելած,
Նայում է իր շուրջն ու լուռ զարմանում,
Մուժի ծվեն է, ծիծաղ է ու լաց,
Իսկ ինքը, ինքը չունի դեռ անուն:

Ու մոլորվել է աղբյուրակը ջինջ,
Ո՛ր գնա արդյոք, ո՞ր գետի կանչին...
Այսօր անհայտ է ասես ամեն ինչ,
Եվ արարչության օրն է առաջին:

Ու եթե հանկարծ ձերմակ, բարալիկ՝
Դու աչքերիս դեմ ելնեիր նորից,
Կհավատայի, որ հրաշալիդ
Հենց նոր արարվեց կողիս ոսկորից...

1974

ԴՈՒ՝ ԻՄ ՀԱՆՑԱՎՈՐ

Հալ ընկած ձյուն է,
Ծիծաղ է ու լաց,
Հալ ընկած ձյուն է,
Լույս է ու թախիծ,
Ինչ-որ տեղ հիմա
Թաց հողից ելած՝
Աշխարհ է գալիս
Մի կապույտ ծաղիկ...

Հալ ընկած ձյուն է,
Հեկեկոց է տաք,
Ու մի հեռավոր
Ջնգոց է գալիս...
Ինչ-որ տեղ հիմա
Աչքերը դեռ փակ
Մի քարանձավ է
Ինքն իրեն լալիս:

Հալ ընկած ձյուն է,
Լույս է ու մխանք...
Եվ հիվանդ եմ ես
Լուսեղեն ցավով...
Այդ դու ես, գարուն,
Իմ հին տառապանք,
Դու՛ իմ լուսեղեն,
Դու՛ իմ հանցավոր...

1975

ՕՐՀՆՈՒԹՅՈՒՆ ՔԵՉ, ԿՅԱՆՔ...

Գիտեմ, նա կգա տխուր մի շուքով
Ու ինձ կտանի իր սև նժույգով...

Եվ հետո նորից կլինի գարուն,
Լույսը թախծության թերթեր կմաղի,
Ու անծայրածիր, կապույտն աշխարհում
Մերթ լաց կլինի, մերթ կծիծաղի:

Դաշտերով կանցնի մի խարտյաշ հմա,
Ու կբռնվեն հավքերը վեճի...
Գարուն կլինի, այն գարնան նման,
Երբ ես աշխարհում սիրահարվեցի:

Հետո մամուռը կիջնի դարեդար,
Կընդծի անհետ տարեթիվ ու տառ:

Եվ նորից պայծառ գիշեր կլինի,
Ծայրեծայր կանցնի մի ոսկե ասուպ,
Ու կապույտն ինչպես աստղային գինի
Կցոլա նորից անհունի թասում:

Գիշեր կլինի, այն գիշերվա պես,
Երբ ես հին այգուց նայել եմ լույսիդ,
Նայել, թե ինչպես կանգնել կիսամերկ,
Վարսերդ ես քանդել ու թափել ուսիդ...

Եվ հողի խորքից մի խուլ արծագանք
Կզնգա տխուր. «Օրհնություն քեզ, կյանք»...

1976

ՇՆՈՐՀ

Մաքուր՝ որպես խիղձ,
Արդար՝ որպես հաց,
Տրվեցիր դու ինձ,
Ամռան լուսաբաց:

Ամբողջ գիշերը
Իմ երակներում
Մխում էր մի հին
Ցավոտ մի ներում:

Կախվում էր իմ մեջ
Մի ծանր արցունք
Ու դողում որպես
Կսկիծ ու հարցում:

Ամբողջ գիշերը
Իմ մոխրամանում
Չասվող ցավի հետ
Տողն էր մոխրանում:

Ու տրվեցիր ինձ,
Ամռան լուսաբաց,
Մաքուր՝ որպես խիղձ.
Արդար՝ որպես հաց:

1976

ԾԱՂԻԿՆԵՐԸ

Ծաղիկների խոսք ու շշուկ,
Ծաղիկների դող է այնտեղ,
Մեկը՝ ծիծաղ, մեկը՝ թախիծ,
Մեկը՝ կերոն, մեկը՝ կանթեղ...

Գտնեմ ծաղիկն ամենաբիլ՝
Մթնշաղի շաղը շուրթին,
Ու երկյուղած նայեմ անվերջ
Նրա շաղին ու կապույտին:

Թող նա դողա հայացքիս դեմ
Որպես թրթիռ, որպես աղոթք...
Ու զարմանամ, ու զարմանամ
Այդ կապույտով ու այդ շաղով...

1977

ԱՂԲՅՈՒՐԸ

Լոյս է բխում քարի տակից
Ու երկինք է ասես բխում...
Ծունկի իջնեն ու համբուրեն
Քեզ, իմ կապույտ, քեզ, իմ տխուր...

Ծունկի իջնեն ու ափերով
Առնեն մի ջինջ, ցլուն ալիք,
Ու թող դողա նա ձեռքիս մեջ
Իբրև գերված հրաշալիք:

Դողա իբրև խոշոր ասուպ,
Իբրև ճաճանջ, իբրև եթեր,
Դողա իբրև կապույտ թռչուն,
Որ չի բռնել ոչ մեկը դեռ...

1977

ԼԻՃԸ

Երազներ է առնում վերից,
Երազներ է վեր առաքում,
Կապույտի մեջ ու մաքրության
Մաքրություն է պատարագում:

Ճայը թառել նրա դողին,
Օրորվում է երանորեն
Ու երբ պոկվի, թևերն ի վար
Կապույտ աստղեր պիտի ծորեն:

Մի մեծ երազ ես ունեի,
Մի անմարմին, անհուն արև,
Երբ է պոկվել նա իմ սրտից
Ու լեռների շուրթին թառել...

1977

* * *

Սիրտս հաշվում է ժամ ու ժամանակ
Ու անձկության մեջ
Մարում է անձայն:

Գուցե ինչ-որ տեղ հիմա դաշտերով
Կարմիր ու կանաչ
Քամիներ անցան...

Գուցե ինչ-որ տեղ անձրևից հետո
Ցողը գինի է,
Ճառագայթը՝ հաց...

Ու սիրտս նորից
Ուխտավոր դարձավ
Ու նորից դեպի անհայտը գնաց...

1977

ԱՅՆ ՀԵՌԱՎՈՐ ԼԱՉՈՒՐՈՒՄ

Այն հեռավոր լազուրում արծաթ գետեր են սուրում,
Արծաթ հավքեր են սուրում այն հեռավոր լազուրում,
Չորզորա զով աղբյուրի արծաթ զանգերն են զնգում,
Ու բարդիներ են զնգում այն հեռավոր երկնքում:

Եվ մի հովիտ կա այնտեղ, մի արևոտ քարատակ,
Կակաչներ կան՝ ժայռից ասուպների պես կախված,
Դեռ արածում է այնտեղ մի հրեղեն հովատակ,
Քամիներով, արևով ու կապույտով թաթախված:

Գիտեմ, ամառը այնտեղ լույս ու խրիսինջ է ցրել,
Ճառագայթներ փշրված ու հրաշքներ անհամար...
...Ես հեռավոր այն հովտում մի գաղտնիք եմ կորցրել,
Մի երազ եմ կորցրել՝ մի ծովաչյա Ծովինար...

Մի գիշեր եմ կորցրել ու մի ցողոտ լուսաբաց,
Մի քարանձավ, ուր ասված-չասված խոսքեր են լում:
...Այս տարիքը թոթափած, այս հոգնությունը թափած,
Ելնեմ, գնամ, մոլորվեմ այն հեռավոր լազուրում...

Այն հեռավոր լազուրում, ուր խենթ գետեր են սուրում,
Արծաթ հավքեր են սուրում, անհետանում լազուրում...

1978

ԵԼՆԵԻ ԿԱՆՈՒԽ

Ելնեի կանուխ... Առաջին անգամ տեսնեի կյանքում,
Թե ոսկե աստղը ինչպես է ցայլում իր իսկ արցունքով,
Արարման ոգին ներշնչանքի հետ սավառներ անքուն,
Եվ աշխարհին արար բուրեր մշուշով ու բուրեր խունկով:

Ու խոտը բուրեր... Դաշտում չլինեի ոչ մի ոտնահետք
Բոբիկ Աստղծո և արշալույսի հետքերից բացի,
Առաջին ծուխը ելնեի, խառնվեի կապույտ ոգու հետ,
Առաջին անգամ բույրը առնեի նորաթուխ հացի:

Եվ նոր լինեին բառերը բոլոր այդ հացի նման
Ու ցուցլային հենց նոր օրհնված ողկույզի լույսով,
Հեթանոսորեն դեռ նոր ոգեի երգերը գողթան,
Երկյուղածորեն նոր մրմնջայի «Առավոտ լուսոն»:

Եվ հանկարծ, հանկարծ որոտար վսեմ ամպրոպը գարնան,
Շանթը շողշողար, լույսը հեծկլտար, մութը հառաչեր,
Եվ մաքրության մեջ ու արցունքի մեջ նախաստեղծության
Հավատի նման կաղնին շառաչեր...

1978

ԻՐԻԿՆԱՄՈՒՏ

Իրիկնամուտի արևն է այրվում
Լեռների կապույտ զոհասեղանին...
Դեղին դողի պես բարդուն է փարվում
Անհայտից եկած թափառիկ քամին:

Ե՞րբ էր... Լուսնյակի օղը ականջին
Եվ հասակն ի վար սև-սաթե հյուսեր,
Գիշեր-գնչուիին գալիս իմ կանջին,
Գուշակում էր ինձ բախտ, հրաշք ու սեր...

Գիշեր է շուտով... Ամպերում բոց է,
Մի լուրթ աշխարհ է այրվում ամպերում...
Եվ ինչ-որ հեռու մի հեկեկոց է
Ամպ ու ծխի հետ ծավալվում վերում:

Հենց նոր ինքնաթիռ անցավ վերևով,
Ժամանակի պես սուրաց շեշտակի,
Ո՞վ գիտե, գուցե ահեղ թևերով
Դիպավ սպիտակ մի հրեշտակի...

Այդ նա է գուցե մղկտում վերում,
Թևերն արնոտած տրտմորեն լալիս,
Կամ գուցե, գուցե առաջին սիրո
Հեռու երկրից է այդ լացը գալիս...

Գիշեր է շուտով... տխուր գալարվում,
Հառաչ է դառնում թափառիկ քամին...
Իրիկնամուտի արևն է այրվում
Լեռների կապույտ զոհասեղանին:

1978

ԿԱՆՉ

Ես հեռու հեռվից
Լացող արծաթի ձայներ եմ լսում:

Երբ գարունը գա, ու ձյունը հալչի,
Կգնամ վերև,
Կգնամ դեպի լեռները Կանաչ:

Ես այնտեղ մաքուր մի աղբյուր գիտեմ,
Որ քնից զարթնած մանկան է նման,
Կոպերի վրա՝ արցունք ու ծիծաղ:

Ես հոգնած եմ շատ ու մի քիչ հիվանդ,
Ինձ այդ ծիծաղը ու այդ արցունքի
Մանկությունն է պետք:

Ես այնտեղ փոքրիկ մի հովիտ գիտեմ:
Ամբողջ գիշերը գլուխս դրած
Մի արևաբույր ու մամռոտ քարի,
Կքնեմ խաղաղ:

Եվ անքնության մորմոքը դեղին
Ինձ չի այցելի,
Եվ լուսադեմին ոչ ոք չի հանի
Մանուկ օրերի իմ երազներից:

Ու երբ արթնանամ, ինձ պիտի թվա,
Թե առավուտը արցունք է խոշոր,

Եվ աշխարհն արար
Շրջվել է խոշոր այդ արցունքի մեջ՝
Իմ հոգնությունը
Վաստակած հոգու բերկրանք է դարձել,
Ցավը՝ ներշնչանք,
Կասկածը՝ հավատ...

Ես հեռու հեռվից
Լացող արծաթի ձայներ եմ լսում...

1979

ԱՅՍՔԱՆԸ ՄԻԱՅՆ

Անձրևի բարակ ձեռքերը բռնած,
Դաշտերն ընկնեի ու պարզ հրաշքով
Հասկի փոխեի մացառը ցավի:

Ինքս ինձանով հաստեի նորից,
Որ տառապանքի ակոսից է սև
Բարձրանում լույսի ծաղիկը ծավի:

Եվ նրանց, ովքեր երազ չեն տեսնում,
Կարմիր ու կանաչ երազներ տալի:

Այսքանը միայն... ու հեռանայի...

1980

* * *

Ես հավատում եմ,
Աշխարհում դեռ կան անհայտ կղզիներ,
Ծովերում կորած ցամաքներ կան դեռ,
Ուր առավոտը այնքան նախնական ու այնքան է մեծ,
Որ թվում է, թե հենց նոր են ոգել այն «Լույս եղիցին»...
Եվ այնտեղ իրենց զմրուխտ որջերից
Ելնում հիասքանչ, շողուն գազաններ,
Չորս կողմն են նայում վայրի հայացքով,
Ապա հիացքից ոռնում են տխուր:

Ծառեր կան այնտեղ`
Ճյուղերի վրա պտուղն արգելված,
Որ չի արգելված:

Եվ ցողն է ցուլում
Իբրև փշրված բանաստեղծություն:

Եվ սերը մերկ է, վայրենի ու մերկ,
Մարմինը նրա թուփ է հողի պես,
Սակայն երկնքի բուրումներ ունի:

Ես հավատում եմ`
Աշխարհում դեռ կան անհայտ կղզիներ,
Ուր մայրամուտը նման է այնպես
Հարության չքնաղ այն առասպելին:

1979

ԱՄՊՐՈՊ ԿԼԻՆԻ

Լուսամուտներս բաց թողեք այսօր,
Բաց թողեք քամու,
Երկնքի,
Բարդու
Ու գիշերվա դեմ:

Գիշերը ամպրոպ կլինի,
Գիտեմ:
Եվ թող ամպրոպն այդ
Շանթերի շողքով
Եվ արտասուքի շիթերով խոշոր
Տեղա փոշոտված երազներս ի վար...

Ու հետո, հետո
Թող երազիս մեջ խշշա հողմավար
Կայծակով,
Շանթով
Ու արտասուքով
Մկրտված բարդին:

1975

ԼԵՌԱՆ ԱՂԲՅՈՒՐ

Մամուած կածան է,
Արահետ է նեղ,
Ջուրը լալիս է,
Եղինջը՝ վառում...

...Երևի մի օր
Վարդավառն այստեղ
Խենթ ծիծաղում էր,
Ծիծաղից մարում:

Արևն ընկնում էր
Ակնադբյուրի մեջ,
Ծիծաղում մանրիկ
Ու ծափ էր տալիս:

Տղան հարցում էր
Անում աղջկան.
– Ի՞նչ ես կորցրել,
Ի՞նչ ես ման գալիս...

– Ականջիս օղն եմ
Կորցրել, կտրիճ,
Օղս ոսկի էր,
Քարը՝ կապուտակ...

– Եկ, գնանք ինձ հետ,
Հեռանանք մի քիչ
Ու օղդ փնտրենք
Քար ու թփի տակ...

– Չէ, վախենում եմ
Օղս մոռանաս,
Ծոցիկս բանաս,
Սիրտս գողանաս:

Արևը խաղում
Ալիքների հետ,
Ջուրը ծիծաղում
Ու ծափ է տալիս...

...Մամռած կածան է,
Փակված արահետ,
Եղինջը վառում,
Ու ջուրն է լալիս...

1979

ԱԿՆԹԱՐԹ

Լսում ես... Հեովից ձայներ են գալիս,
Աստղը զնգում է, միրհավը լալիս...

Ուր որ է ահա ջրահարսերը
Կցայեն գետում ոսկե վարսերը:

Փչակից կելնի այծամարդն ինքը,
Կսուլի հովի արծաթ սրինգը:

Կգան գազաններն այն հրաշամորթ
Ու ծունկի կիջնեն աղբյուրների մոտ:

Հետո երկնքից աստղեր ձանկելով,
Կխաղան նրանց ոսկե զանգերով:

Ծաղիկ կքաղեն ջրահարսերը,
Կզուգեն իրենց ցողոտ վարսերը:

Եվ այծամարդու մութ հայացքի տակ
Կդողան այդպես մերկ ու սպիտակ:

...Հանգչում է սակայն ականաթաթն այդ ջինջ,
Մացառ է, քար է և ուրիշ ոչինչ...

Մեռնում է պատրանքն ու մահանալիս,
Լալիս է հեռվում, տխրորեն լալիս...

1979

ԹԵԿՈՒՉ ԳԻՏԵՄ...

Թեկուզ գիտեմ, որ այնտեղ ընկել եղնիկը վերջին,
Ու մեռել է կարոտից վերջին տխուր եղջերուն,
Սակայն գնամ, միանամ նրանց տխուր բառաչին
Եվ սլանամ նրանց հետ դեպի կապույտն ու հեռուն:

Ու գիշերով, երբ սարից ելնի լրած լուսնկան,
Արծաթ կախի ու նարոտ հասակն ի վար թփերի,
Գնամ բացատ ու նայեմ գաղտագողի ու ծնկած,
Թե ինչպես են լուսնի տակ պարում նայադ ու փերի...

Գնամ... թեկուզ և գիտեմ, որ ինչ-որ մեկն այդ ժամին
Չոքում, նշան է բռնում երազներիս երամին...

1980

ԱՅՆՏԵՂ

Կապույտն այնտեղ՝ կապույտ մի դող,
Աղբյուրները՝ պատարագ,
Բարդիները լույս պաղատող
Սրբի ձեռքեր են բարակ:

Շողը այնտեղ դիպչում ցողին,
Աստղ է ծնում ու ասուպ,
Աղբյուրները ամբողջովին
Լույս են, լույսի արտասուք...

Հեռուն այնտեղ այնքան մոտիկ,
Մոտիկն այնքան է հեռու,
Որ թե գնաս ոտաբոբիկ,
Պիտի հավվես լույսերում:

Պիտի թվա, թե աշխարհում
Չկա մահվան շունչը ցուրտ,
Կա լույսի հետ խառնվելու
Պարզ ու պայծառ մի խորհուրդ...

1980

ԱՇՆԱՆԱՅԻՆ

Հրաշալի է արշալույսն այսօր...

Հրաշալի է, որպես թաց շուշան,
Հրաշալի է այն կնոջ նման,
Որ արձակել է վարսերն իր ոսկե:
Հրաշալի է որպես ճաքած նուռ,
Որպես ցող, որպես հեթանոս Աստված...

Հրաշալի է արշալույսն այսօր
Ու տխուր, տխուր...

Ու տխուր, որպես հեռացող երամ,
Ու տխուր որպես գիշերվա թողած
Աստղը մենավոր ու քաղված այգին...
Ու տխուր, տխուր,
Այն հրաժեշտի խոսքերի նման,
Որ ժամանակին ու անժամանակ
Եղնջացել են իմ սիրածներին...

Հրաշալի է արշալույսն այսօր
Ու տխուր, տխուր...

1980

ՍՊԱՍԻՐ ՄԻ ՔԻՉ

Ունայնության պես ու հոգնության պես փոշոտ մի քամի
Ինձ է որոնում, բայց ես ասում եմ՝ սպասիր մի քիչ...
Դեռ չի ավարտվել այրվող հրաշքը իրիկնաժամի՝
Ուշացած սիրո հրաշքն ամոքիչ:

Ու դեռ ինձ հետ են անձրևն արծաթե, արծաթե բարդին,
Լուսաստղը, հասկը, խոնավ բուրմունքը նոր հնձած խոտի,
Իրիկնամուտի ոսկե թրթիռը՝ թառած սաղարթին,
Ամպը, նժույգը, ցողն առավոտի:

Ու դեռ ինձ հետ են այս խոնարհ հողի խորհուրդը տրտում,
Խաչքարի թախիծն ու ավեր վանքի մտորմունքը լուռ,
Արևագալը, որ աղբյուրի մեջ իրեն մկրտում
Ու լեռան լանջին կանգնում է մաքուր:

Ես շատ ապրեցի, բանաստեղծները չեն ապրում այսքան,
Բայց շրթունքներիս խոսքեր կան տանջող, որ կիսատ թողի,
Թեև լավ գիտեմ, որ այդ խոսքերը հասարակ են, քան
Հասկի շշուկն ու ցոլանքը ցողի...

Իսկ ասելիքս այն է, որ մի քիչ շատ սիրենք ու լավ,
Որ կարողանանք քնքշորեն փխրել աստղից ու հասկից,
Որ կարողանանք խենթանալ խոտի բուրմունքից խոնավ
Եվ այս ուշացած սիրո հրաշքից...

1981

ԱՄՊՐՈՊԻ ԿԱՐՈՏ

Քիչ է մնում այս տաղտուկից սիրտս նորից ցավի,
Ո՛ր ես, ամպրոպ, ո՞ր ես պահել կայծակների ծավի:

Եկ, շրխկա, շրխկոցով պատուհանս փեղկիր
Եվ առնչիր ինձ երկնային քո լուսավոր մեղքին:

Եկ, ամպեղեն քո շուրթերով շաղիր շողեր ու շանթ,
Թող մայթերի թաց սևի մեջ ցլան աստղ ու շուշան:

Նայիր, կին է անցնում մայթով, ճանապարհը փակիր,
Օրինիր նրան ոտից գլուխ, չոքած՝ երկրպագիր:

Վարսերի մեջ քո այն խոշոր շիթերը թող շողան,
Թող նա վազի ու շորի տակ հրաշքները դողան:

Հետո հեռու քարափներից հեղեղներդ կախիր,
Հեկեկալով թեթևացիր, դարձիր կապույտ թախիծ:

Քո կարոտի արցունքներով մամուռները թող լան,
Բարդիները կապույտի մեջ կանաչ բոցով ցլան:

Արտույտները թող խենթանան, ու արևի ոսկին
Հինա դնի ուռիների ցողաթաթախ հյուսքին:

Հովը բարակ իր մատներով կակաչի բոցն առնի,
Աղջկա պես թող սլանա, կապույտներին խառնի...

Հետո այդպես ցողոտ, շաղոտ, այդպես մաքուր, շոայլ
Գնա գտիր ու բաց արա լուսամուտը նրա:

Ոչինչ չասես, պարզիր մի թաց ծիածանի ծվեն,
Կհասկանա, որ ես եմ դա հղել իրեն նվեր...

1982

ԱՂԲՅՈՒՐԻ ԿԱՐՈՏ

Դու՛ մաքուր...
Ասես ինչ-որ մարգարե
Քո ակունքի մեջ իր խիղճն է թողել,
Ինքը՝ հեռացել...

Դու՛ ցոլուն...
Ասես ամպրոպը գարնան
Քեզ պահ է տվել իր շանթերը շեկ,
Հետո մոռացել...

Դու՛ կապույտ...
Ասես ոսկեթել ցանցով
Հեքիաթի կապույտ թռչունը բռնել
Ու բաց չես թողնում...

Դու՛ ծիծաղ,
Դու՛ լաց...
Ասես մի հրաշք մանուկ է զարթնել
Կապույտ անկողնում...

Հիշում եմ, աղբյուր,
Աստղերից քամված
Մաքրությունը քո
Ձնգում էր սարում:

Ջուրդ խմելու
Այլ հնար չկար,-
Ու ծունկի իջա,
Ինչպես տաճարում:

ԼԵՌԱՆ ԿԱՐՈՏ

Լեռներում ծուխ է, լեռներում մուժ է մանուշակագույն,
Ու թվում է, թե աշխարհը նոր է այդ մուժից ծագում:

Ամեն ինչ այնտեղ նման է այնպես նախաստեղծության,
Ու խառն է ասես նյութը ոգու հետ, լույսը՝ թախծության:

Թվում է՝ այնտեղ քարանձավների դեռ տաք երախից
Բառեր են ծնվում, հնչյունների մեջ՝ վայրի մի թախիծ:

Թվում է՝ այնտեղ դեռ չեն բաժանվել երկինք ու գետին...
Գնամ, ոտք դնեմ Կաթնծիրների լույս արահետին:

Գնամ, հավաքեմ ծնվող աստղերի ցոլանքը գունեղ
Եվ բառեր, որոնք Աստծո մեծությունն ու խորհուրդն ունեն:

Գնամ, մկրտվեմ այդ լույսերի մեջ ու այդ մշուշի,
Ոտքերիս վրա հողի հոտ բերեմ ու աստղափոշի...

1982

ՁՅԱՆ ԿԱՐՈՏ

Առաջին սիրուս թախծության վրա
Փաթիլներ կային առաջին ձյունի,
Ու թե աշխարհում էլ չկա հրաշք,
Թող գոնե ձմռան երկինքը ձյունի:

Օդում աստղաձև լույսեր թող պարեն,
Թող բուրի օդում ձնծաղիկը տաք,
Ելնեմ, մայթերում նորից թափառեմ,
Հենց այնպես, անմիտ ու աննպատակ:

Աղջիկներ անցնեն թեթև ու գերիշ,
Վարսերին՝ ձյունն ու ոսկին հինայի,
Եվ գուցե մեկի տխուր աչքերից
Առաջին սերս վախվորած նայի:

Պարզել եմ աջն իմ որպես մուրացկան,
Քո քնքշությունն եմ աղերսում ես, ձյուն,
Աղերսածն իմ քիչ ու շատ է այնքան՝
Մի բուռ փաթիլ է, մի մեծ մաքրություն...

ԳՈՒՅՆԵՐԻ ԿԱՐՈՏ

Այս գորշ օրով բան չեմ ուզում,
Արեգակի ոսկին տուր ինձ,
Ոսկեփողին ճամփաների,
Քարափների բոցը տուր ինձ,
Տուր հասկերի շշուկը շեկ,
Կալի մղեղն արևավոր,
Տուր ձախրանքներն արտույտների,
Որ ոսկիներ են թևավոր:

Բան չեմ ուզում... Ծաղիկներից
Ամենաբիլն ու լուրթը տուր,
Լեռան ալիք ու վիհ դարձած
Կապույտների կապույտը տուր,
Կապույտը տուր ինձ թախծության,
Կապույտը տուր քարանձավի,
Տուր ոգու պես վեր համբարձող
Լճակներիդ բոցը ծավի:

Բան չեմ ուզում... Ալը նռան,
Նռան ճաքումն ու ձիչը տուր,
Հովերի մեջ խելագարվող
Կակաչների քրքիջը տուր,
Տուր ինձ անկեզ այն մորենին,
Տուր բռնկված ծառը հոնի
Ու ծայրեծայր ծփանք տվող
Հրդեհը տուր հորիզոնի:
Բան չեմ ուզում... Արծաթ լեռան

Արծաթաշող ամպերը տուր,
Քարափների կրծքին կախվող
Աղբյուրների ծամթելը տուր,
Տուր կարոտի պես զնգացող
Ինչ-որ զանգի արծաթի ձայն
Ու արծաթե հեռուն տանող
Մի արծաթե անհայտ կածան...

* * *

Նա եկել է նորից,
Ինձ գտել է նորից
Այս թախիծը փոշոտ,
Այս տաղտուկը,
Հի՛նը...
Իմանայի միայն,
Թե որտե՞ղ է բացվում
Ձնծաղիկը ձյունոտ,
Առաջի՛նը...

1971

ԱՆՏԱՌԻ ԿԱՐՈՏ

Գալիս եմ, անտառ, ու դանդաղորեն
Քո մեջ խորանում,
Որ կարոտիս հետ ծունկի գամ նորեն
Քո զով խորանում:

Հոգնած եմ, փոշոտ, քո աստղանման
Ցողերը հեղիր,
Վրաս օրհնության ու թեթևության
Սոսափյուն եղիր:

Օգնիր, որ գտնեմ ծաղիկն այն կապույտ,
Ծաղիկն այն թաքուն,
Որ բնակվում է հինավուրց կաղնուղ
Մամռած փչակում:

Մեկնիր, թե մթին քո ծմակներում
Իրիկնաժամին
Իրար ականջի ինչ են շշնջում
Տերևն ու քամին:

Թե տեսիլներ կան քո մեջ մոլորված,
Իմ դեմ ծածանիր,
Անտառապահի տնակն այն կորած
Աչքիս դեմ հանիր:

Անտառապահը թող մի ոսկեհեր
Աղջիկ ունենա,

Ու թող նա քնքուշ ու քնքշության հետ
Վայրի լինի նա:

Թող նստի շեմքին, սանրի վարսերի
Հրաշքը թել-թել...
Հասկացիր, անտառ, հեքիաթների է
Սիրտս կարոտել...

* * *

Լիներ այնպես, լուսաբացին
Լավ երազով արթնանայի,
Եվ իմ հոգնած ականջներում
Ոչ մի օտար ձայն չլիներ,
Լիներ բարդու սոսափը պարզ,
Ջրի գրույցն հասկանալի
Եվ կապույտով վերադարձող
Կռունկների կանչը լիներ...

1971

ԴԱՇՏԻ ԿԱՐՈՏ

Ախ, երևի ամպը լացել,
Խաղաղվել է այնտեղ,
Արտույտներն են վեր սլացել,
Դարձել թևող կանթեղ:

Ու երևի սուր են բուրում
Այնտեղ ծաղիկ ու սեզ,
Ցողերն այնպես են փայլվիլում,
Ճովողում են ասես:

Ուռին, որ խենթ քամու գրկում
Գալարվում էր դողով,
Մերկությունն է հիմա ծածկում
Իր վարսերի քողով:

Իսկ օրն ամռան՝ շողն արևի
Լկամի պես ծամում
Ու իր բաշին կանաչ-կարմիր
Երազներ է տանում:

Կակաչները կանաչի մեջ՝
Կայծկլտացող անթեղ,
Ոտաբոբիկ լինեի ես
Ու լինեի այնտեղ:

ԳԱՐՆԱՆ ԳԻՇԵՐՆ ԱՆՏԱՌՈՒՄ

Մեծ արջը քնել երկնքի որջում,
Լիզում է թաթերն իր աստղաթաթախ...
Ու դու, մերկ անտառ, մթան մեջ կորչում,
Թվում է՝ դու էլ ննջում ես խաղաղ:

Բայց վաղը, գիտեմ, երբ քո գիրկը գամ,
Հրաշքով պիտի ելնես ընդառաջ,
Ինձ պիտի պարզես բոցդ մոզական,
Որ արեգակի ծվենն է կանաչ:

Եվ պիտի պարզես դողն այն երկնային,
Որով կդողա տերևդ վառման,
Եվ այն ծաղիկը, որ ինձ կնայի՝
Թաց աչքերի մեջ մի կապույտ զարմանք:

Եվ պիտի խորհեն, թե դու ես, գարուն,
Դու ես պարզապես անտառին փարվել...
Եվ չի հասկանա ոչ ոք աշխարհում,
Թե մի գիշերում ինչ է կատարվել...

1983

Հասնում,
Չէ՛ր հասնում,
Հասնում,
Չէ՛ր հասնում,
Չէ՛ր հասնում նրան...

ԱՐԱՐՉՈՒԹՅՈՒՆ

Ա

...Եվ դրախտ չեղավ աշխարհի վրա:

Յուրտ հողմեր եղան,

Ու թախիծ եղավ քարանձավային:

Անծանոթ ու սև գազանի նման

Գիշերը եկավ,

Թաթերը դրեց անձավի քարին

Եվ հողմերի մեջ

Ու հողմերի հետ

Տխրորեն ոռնաց:

Եվ հողմերի մեջ

Ու հողմերի հետ

Հողմասուն ու սև գայլեր ոռնացին,

Եվ գայլերի հետ

Ոռնաց մարդկային թախիծը վայրի:

Եվ սարսուռի մեջ իր ցուրտ քարայրի

Նա ուզեց հանկարծ

Ու սաստիկ ուզեց,

Որ շողեր կաթեն

Հողին ու քարին,

Ծլվոց կաթի

Հավքերի լեզվից,

Ու տերևներից՝
Մանանա ու ցող...

Եվ հողմերի տակ բիրտ ու ոռնացող,
Երբ ծանր ու մթին կոպերը փակեց,
Շող էր կաթկթում
Հողին ու քարին,
Եվ մանանա էր
Ծառերից կաթում,
Ու կաթում էր ցող:

Քնից վեր թռած,
Նա ուզեց բռնել լույսն այդ հեռացող,
Բայց ափերի մեջ պարապը մնաց:

Ու նա տեսիլքի ետևից գնաց:

Եվ եղավ երազ:

Երեկո եղավ,
Եղավ վաղորդայն,
Եվ դա օրերի օրն էր առաջին:

Բ

Եվ եղավ երազ...
Ու երազի հետ
Նաև մենության թախիծը եղավ,
Եղավ ծարավը հնքնաբաշխումի,
Թեկուզ դեռ նրանք չունեին անուն:
Եվ մարդը տեսավ,
Որ իր կրծքի տակ

Ինչ-որ մի բան է
Հանկարծ խենթանում,
Երբ գալիս է նա...

Իսկ նա...
Աղջիկ էր նա սովորական,
Անգամ ամենից գեղեցիկը չէր
Եվ մինչև անգամ
Նենգ էր նա մի քիչ...

Բայց ուրիշ էին աչքերը նրա,
Մեջքի բեկումը
Ու քայլքը՝ ուրիշ:
Թրթռում էին ստինքներն առույգ,
Եվ կոնքերը կոր
Մայրության զորեղ աղերսն ունեին:

Ու երբ ժայռից ժայռ
Սլանում էր նա
Գեղեցիկ ու մերկ,
Սլանում էր նա
Գեղեցիկ ու նենգ,
Մարդը հևիհև հասավ ետևից,
Գլուխը նրա առավ իր զորեղ
Չույգ ավերի մեջ,
Ասաց.
- Իմն ես դու...

Աղջկա զնգուն ծիծաղը եղավ,
Որ նենգ էր մի քիչ:

Եվ հետո նորից
Սլանում էր նա ժայռերի միջով,

Սլանում էր նա
Գեղեցիկ ու մերկ,
Սլանում էր նա
Գեղեցիկ ու նենգ...
Մարդը վազում ու չէր հասնում նրան,
Հասնում,
Չէր հասնում,
Հասնում,
Չէր հասնում...

Չէր հասնում նրան...

Եվ եղավ սերը...

Երեկո եղավ,
Եղավ վաղորդայն,
Եվ օրն էր երկրորդ:

Գ

Եվ եղավ սերը...
Եվ այդ սիրո հետ
Սրտի մեջ եղավ այնպիսի մի բան,
Որ նման էր շատ
Ժանիքի թողած մխացող վերքին:

Եվ նա չիմացավ,
Թե ինչ է ուզում,
Իմացավ սակայն,
Որ ինչ ուզում է, աշխարհում չկա:

Իմացավ սակայն,
Որ ինքն ուզում է այնպիսի մի բան,

Որի մեջ տխուր անձրևը շողար,
Լիներ արեգակ,
Ու խոտը բուրեր...
Այնպիսի մի բան,
Որ պատահողոված իր շրթունքների
Համը ունենար
Եվ սակայն նաև գեղեցիկ լիներ,
Ինչպես արցունքը,
Ինչպես նժույգը
Եվ ինչպես շանթը...

Հետո չիմացավ,
Սրտի մեջ էր դա,
Թե՞ շրթունքներին,
Որ շողաց,
Դողաց
Անծանոթ մի բան:
Որ շողաց
Դողաց,
Զրնգաց ինչպես ջրվեժը՝
Վայրի,
Թրթռաց ինչպես տերևը՝
Թեթև,
Եվ տեղաց ինչպես անձրևը՝
Տխուր...

Եվ եղավ երգը...
Երեկո եղավ
Եղավ վաղորդայն,
Եվ օրն էր երրորդ:

Եվ եղավ երգը...
Ու երգն էր բարի...

Ու երբ աշխարհին
Ծանրացավ նորից թևը խավարի,
Այդ երգն էր բարի,
Որ հանկարծ մարդու ձեռքում կարծրացավ
Ու փոխվեց մի զույգ
Հրնգուն քարի:

Ու երգն էր բարի,
Որ իրար զարկեց
Հնգուն բեկորներն այդ որձաքարի,
Եվ խավարի մեջ բռնկվեց հանկարծ
Ինքը՝ սկիզբը,
Ինքը՝ մաքուրը,
Եվ գեղեցիկը...

Բոցերը խարտյաշ աղջիկների պես
Նախ ելան ոտի
Ու երբ պատի մեջ տաքացան լրիվ,
Իրենց ուսերից
Նետեցին ծխի սև մորթիները
Եվ սկսեցին մերկանդամ պարել...

Եվ կարմիր՝ նման արևածագի,
Եվ բոսոր՝ ինչպես ծաղիկը նուան,
Եվ դեղին՝ ինչպես աշնան բռնկում,
Խենթացավ անվերջ
Ինքը՝ սկիզբը,
Ինքը՝ ըմբոստը,
Ինքը՝ ազատը...

Եվ բոցերի մեջ կապույտ կար այնքան...
Ու մարդուն թվաց,
Որ եթե ձեռքը բոցերին պարզի,

Կարող է քաղել
Մով մանուշակներ,
Երազ ու երկինք...

Եվ եղավ կրակ...

Երեկո եղավ,
Եղավ վաղորդայն,
Եվ օրն էր չորրորդ:

Դ

Եվ եղավ կրակ...
Բայց մարդը տեսավ,
Որ ահա կրկին աշխարհի վրա
Դառնությունն է շատ,
Քաղցրությունը՝ քիչ:

Ու տեսավ նաև, որ հողն է բարի,
Եվ արեգակն է միայն ամոքիչ:

Եվ ուզեց քամել
Եվ ըմպել ուզեց
Հուրն արեգական
Եվ հյութը հողի...

Եվ նա իր աղի, լեղի քրտինքով
Ոռոգեց առատ որթը խաղողի,
Որ մոտիկ լինեն
Ճյուղերն արևին,
Եվ խորունկ լինի
Արմատը հողում...

Լցվեց, ծանրացավ
Ողկույզը շողուն:

Եվ ողկույզի մեջ
Թախիծն էր հողի,
Եվ ողկույզի մեջ՝
Լույս արեգական,
Եվ ողկույզի մեջ՝
Մի ալ խենթություն,
Եվ ողկույզի մեջ՝
Դառնություն ու թոյն...

Եվ քաղցր եղավ ըմպումը նրա,
Եվ բարձր եղավ խենթությունը խոլ
Եվ արթնացումը՝
Դառն ու անքնին...

Եվ եղավ գինին...

Երեկո եղավ,
Եղավ վաղորդայն,
Օրն էր հինգերորդ:

Ե

Եվ եղավ գինին...
Ու մարդն արարիչ,
Երբ այդ ամենը արարեց այդպես,
Չարմանքով տեսավ,
Որ անաստված է աշխարհը դարձյալ...

Որ հողմ է դարձյալ,
Թախիծ է ու վերք:

Եվ կոպիտ ձեռքով
Նա իր երազից ծվեններ առավ,
Գումարեց սիրո լույսին ու ցավին,
Գումարեց երգին,
Կրակին,
Գինուն
Ու աշխարհի բերեց անհուն մի ոգի:

Եվ ապա ասաց.
- Հարկ է, որ սրան
Իմ նմանությունն ու պատկերը տամ,
Որ իմ եղբայրը լինի զորավոր,
Հավանոր,
Սերը...

Ու երբ որ կանչեմ,
Լսի ինձ ու գա...
Եվ մարդը, իրավ,
Իր նմանությունն
Ու իր պատկերը տվեց այդ ոգուն,
Պարուրեց լույսով,
Հանեց ամպերից,
Աստղերից էլ վեր
Եվ կոչեց Աստված...

Եվ եղավ Աստված...

Երեկո եղավ,
Եղավ վաղորդայն,
Օրն էր վեցերորդ:

2

Եվ եղավ Աստված...

Բայց յոթերորդ օրն աշխարհի վրա
Չեղավ կիրակի,

Տուրտ հողմեր եղան
Ու թախիժ եղավ քարանձավային:

Անծանոթ մի սև գազանի նման
Գիշերը եկավ,
Թաթերը դրեց անձավի քարին
Եվ հողմերի մեջ
Ու հողմերի հետ
Տխրորեն ոռնաց:

Մարդը ձայն տվեց,
Կանչեց Աստծուն,
Բայց Աստված սուզված
Ամպերի ձերմակ երանության մեջ,
Զլսեց նրան:
Մարդը աղոթեց:
Ոգեց,
Աղերսեց,
Բայց Աստված չեկավ:

Եվ սարսուռի մեջ իր ցուրտ քարայրի
Նա ուզեց դարձյալ
Եվ սաստիկ ուզեց,
Որ շողեր կաթեն
Հողին ու քարին,
Ծվլլոց կաթի
Հավքերի լեզվից,
Ու տերևներից՝
Մանանա ու ցող...

Եվ հողմերի տակ՝ բիրտ ու ոռնացող,
Երբ ծանր ու մթին կոպերը փակեց,
Շող էր կաթկթում

Հողին ու քարին,
Եվ մանանա էր
Ծառերից կաթում,
Եվ կաթում էր ցող...

Նա ուզեց բռնել
Լույսն այդ հեռացող,
Բայց ափերի մեջ պարապը մնաց:
Եվ նա
Երազի ետևից գնաց...

Երեկո եղավ,
Եղավ վաղորդայն,
Եվ եղավ հոգնած հավիտենություն...

1970



ԱՆՔՆՈՒԹՅՈՒՆ



*Որիչ է բախտը բանաստեղծներին...
Այդ նրանց ցավն է,
Որ դառնում է վառք,
Դառնում է անուն:*

*Եվ որքան խորն են վերքերը նրանց,
Այնքան նրանցով խորն են հիանում:*

ԱՆՔՆՈՒԹՅՈՒՆ

Անքնություն,
Դեղին թախիծ,
Դու, որ կյանքում հետապնդել
Ու հալածել ես ինձ անվերջ, իբրև ոսոխս իմ անձնական,
Ինչպե՞ս դարձար այսքան մոտիկ,
Ինչպե՞ս դարձար այսքան ընտել
Ու սիրելի դարձար անգամ...

Կան այդպիսի համառ կանայք,
Սիրահարվում կյանքում մեկին,
Հետապնդում խոնարհ ու լուռ,
Թվում են թույլ, թվում անկամ,
Բայց տեսնում ես կամաց-կամաց,
Որ զորությամբ մի անմեկին
Դառնում մոտիկ ու մտերիմ,
Բաղձալի են դառնում անգամ:

Անքնություն,
Դեղին մորմոռ,
Դու չսիրած-սիրած իմ կին,
Եթե չգաս ամեն գիշեր ու սնարիս լուռ չհսկես,
Ինչպե՞ս պիտի գտնեն իրար
Ու հասկանան իրար կրկին
Ցերեկների տենդում կորած իմ եսն ու ես...

Թե դու չգաս,
Ես առանց քեզ ինչպե՞ս անեն հոգեհարցում,

Ինչպե՞ս խոսեմ անհայտի հետ,
Կապույտի հետ,
Ցողի,
Խոտի,
Փռշեկալած իմ հոգու մեջ
Ինչպե՞ս գտնեմ խիղճ ու արցունք,
Ինչո՞վ ցողեմ բացվող դեմքը առավուտի:

Թե դու չգաս,
Ինչպե՞ս լսեմ քամու հառաչն անպատմելի,
Ինչպե՞ս, ասա,
Ականջ դնեմ զղջումներիս հեռու լացին,
Ինչպե՞ս բռնեմ ընկնող ասուպն ու կսկիծով իմ մատների
Տանեմ նորից պատանության իմ սիրածին:

Ինչպե՞ս գնամ ծննդավայր,
Ինչպե՞ս գտնեմ գետակն իմ զով.
Մեր դուռը փակ,
Որ նա իմ դեմ բացվի որպես ավետարան,
Ծուխ ծխանին,
Թոնիրը տաք, որ լեցուն էր արշալույսով
Եվ այս ամենն, ինչ ինձանից
Դարի հողմերն անհետ տարան:

Ուրեմն,
Փակք ու գոհություն
Քեզ, իմ տանջված, քեզ, իմ արդար,
Դու՝ ցավող սիրտ,
Արթուն կարոտ,
Անջնջելի խղճի խարան,
Դու՝ կորստի ու զղջումի տառապալի հաշվեհարդար,
Դու՝ աստղային իմ քավարան...

* * *

Անքուն գիշեր,
Դեղին գիշեր,
Բերել ես դու, կախել վրաս
Լիալուսին մի ոսկեգույն, իբրև հսկա մի հմայիլ...
Նա, որ գիտե
Թովչուհու պես իրար խառնել կյանք ու երազ,
Որ շուրթերին սիրո շշուկ
Ու շշուկներ ունի մահի...

Նա, որ ծովեր է փոթորկում,
Օվկիանոսներ հանում ծունկի,
Որ ջրերի մութ անդունդներն է խուզարկում,
Ա՛խ, նա գիտե,
Լավ գիտե նա՝
Թաքուն լիճն եմ ես արցունքի,
Ու ողջ գիշեր ավետափ է հոգիս զարկում:

Խաղ է անում ուզածի պես,
Իրար խառնում ջուր ու ավազ,
Իմ հատակից նավաբեկյալ երազներ է անվերջ հանում,
Ալիքներիս վրա դառնում խարտիշահեր մի ծովահարս
Եվ կանչում է հմայելով,
Եվ տանջելով՝ անխանում:

Ամպի տակից հայտնվելով,
Նորից թովում,
Նազում է նա,
Հին օրերի մտերմությամբ

Պչրանքներ է փորձում ցրել...
Եվ նայում է այնպես մաքուր,
Նայում այնպես անմեղսունակ,
Որ թվում է, թե երեկ չէր,
Որ կուսությունն իր կորցրեց...

Ու ողջ գիշեր
Սահում խաղաղ,
Օվկիանոսներ հանում ծունկի,
Մութ անդունդներն է խուզարկում չար ոգու պես...

Եվ նա գիտե,
Լավ գիտե նա՝
Թաքուն լիճ եմ ես արցունքի,
Ու մինչև լույս ուզածի պես
Խաղ է անում իմ հոգու հետ...

* * *

Գիշերն ահա երևակվում
Ու դառնում է կամաց-կամաց
Ինչ-որ հեռու լեռնահովիտ,
Ուր արծաթե գետն է սուրում,
Ուր բարավիկ մի տխրություն
Իբրև աղջիկ
Մի տխրամած,
Կանգնել փայտե կամրջակին
Ու սրինգ է անվերջ սուլում:

Հետո ասես հեռուներից
Ջրնգում է արծաթ մի զանգ,
Բռնկում է ակնթարթում
Լույս մի մաքուր...
Վերին-վերին մի ակնթարթ,
Մաքուր-մաքուր մի կարոտանք,
Որի կապույտ մառախուղից
Ներշնչանքի աստղն է ծագում:

Հետո անցնում է համրորեն
Իմ մենության անապատով
Մի զորավոր գեղեցկություն,
Ծածանելով բոցը բաշի,
Ծառանում է վայելչորեն
Ու իր վայրի,
Ծանր թաթով
Մեջքն է կոտրում այս տաղտկության,
Այս զառամյալ գետնաքարշի...

...Ձյուն է տեղում հանկարծակի,
Աստըծո պես ձերմամկ մի ձյուն,
Տեղում առատ,
Մեծափաթիլ՝
Լույսի նման ու նշխարի...
Հետո գարնան արեգակով
Հավվում է նա,
Դառնում շաչյուն,
Եվ շաչյունով տանում իր հետ
Կեղտն ու փոշին այս աշխարհի...

Ծնորհապարտ եմ քեզ,
Գիշեր,
Իմ տառապած մտերմուհի,
Այդ վայրենի գեղեցկության,
Այդ ձյան համար մեծ ու մաքուր,
Այդ տխրության,
Այդ աղջկա
Եվ այն բարակ մառախուղի,
Որի կապույտ
Ծփանքի մեջ
Ներշնչանքի աստղն է ծագում...

* * *

Ես սեպագիր եմ հողմերից եղծված,
Ես վերծանվել եմ կիսատ ու թերի,
Ո՛ր եմ կսկիծներն իմ մեջ անթեղված,
Ո՛ր եմ հետքերը մարած շանթերի...

Չպեղված Անի՝ փոշիներիս տակ
Գեղեցկությունը դեռ լալիս է լուռ,
Հրդեհից ծաքած արծաթե զանգակ՝
Որ պիտի զնգար վսեմ ու տխուր:

Եվ մշուշ եմ ես անանուն ցավի,
Իմ մեջ դեռ անհայտ աստղեր են դողում,
Տառապանքն եմ այն հավատացյալի,
Որի սրտի մեջ կասկածն է սողում:

Ու կարապներ են հեկեկում իմ մեջ՝
Վիրավոր, որպես սերը աշխարհի,
Եվ տանջում է ինձ այն երաշտը մեծ,
Որ պիտի ոգու թևերը այրի:

Ու դեռ փնտրում եմ ես այն բանալին,
Որ գաղտնարանի դռներն է բացում,
Այն երգը միակ, այն զարմանալին,
Որ խիղճ է ու սեր, ցավ ու հիացում:

Հոգնած սերմնացան՝ գիտեմ, ո՛ւշ է շատ,
Գիշերս է իջնում նման մորմոքի...
Ո՛ր ես, հայտնվիր, հրդեհիր ինձ, շանթ,
Եվ ոտից գլուխ դարձրու ոգի:

ՏՐՏՈՒՆՉ

Ես քնքշության ծորտն եմ եղել,
Գորովանքի խոնարհ գերին,
Եվ քնքշանքի խոսքեր եմ ես
Ասել անգամ անշուք կանանց...
Ես այնպես եմ հաճախ նայել
Նրանց տխուր, որք աչքերին,
Որ մի վայրկյան շիկնեն նրանք
Եվ շիկնելով՝ գեղեցկանան...

Ախ, ես գիտեմ, ապրելն այնքան
Գեղեցիկ է ու ահավոր,
Սերն ու բարին այս աշխարհում
Գեղեցիկ են, որպես ցորեն,
Բայց ծովերի մեծ սիրտն անգամ
Տրոփում է հիմա ցավով,
Եվ ինչ-որ բան այս աշխարհում
Մահանում է անհուտորեն:

Եվ ուզում եմ ես ինձ փրկել
Տեսիլներով պատանության,
Կարոտներով այն աղջկա,
Որ նման էր արծաթ զանգի,
Լողարկել եմ ուզում անվերջ
Ալիքներով անհայտության
Ու կղզիներ գտնել ցողոտ,
Ու թավուտներ երազանքի:

Եվ իմ ձեռքն եմ պարզում անվերջ
Ճառագայթին ու կապույտին,
Երազում եմ, որ իմ հոգում
Լճիսը լողա, որպես կարապ,
Սակայն անզոր սպասումից
Խառնարան եմ դառնում մութի,
Ու մնում է ձեռքերիս մեջ
Ինչ-որ ստվեր, ինչ-որ պարապ:

Անագորույն տարիների,
Ո՛չ, դարերի բեռն է ուսիս,
Սակայն, ավաղ, ներիր ինձ, կյանք,
Դեռ չգիտեմ՝ ինչպե՞ս ապրել...
Ախ, կուզեի, շատ կուզեի
Ապավինել միայն լույսին,
Բայց ցողունս շատ է բարակ,
Իսկ հողմերը՝ խորշակաբեր...

* * *

Նորից օդն է բռնկվել ինչ-որ կապույտ սոսափով,
Հովի բարակ ձեռքերում ինչ-որ քնքշանք կա ծավի...
Եվ իմ մարմինը նորից դարձել կավե մի սափոր
Ու լցվել է արցունքով կարոտների ու ցավի...

Գարրն, իմ հին տառապանք ու քնքշություն դու ահեղ,
Գարրն, իմ հին ներշնչանք՝ անհղացում ու անբառ...
Կարծում էի, թե իրար մենք կորցրել ենք հավետ,
Ինչպե՞ս, ասա, հիշեցիր, ինչպե՞ս գտար իմ ճամփան...

Նման էիր դու այնպես հմայության հրաշքին,
Դու ինձ տանջել գիտեիր երանելի մի ցավով,
Կանգնում էիր դու իմ դեմ անմեկնելի, որպես կին,
Ժպտում էիր ինձ անմեղ, ժպտում էիր հանցավոր:

Եվ դու հպարտ էիր շատ, քո պարեգոտը, գարուն,
Արշալույսից էր ձևված ու կապույտի կոհակից,
Ի՞նչ մրրիկներ են հիմա խենթ շառաչել աշխարհում,
Որ ծվատել են այդպես լույսն ու կապույտը հագիդ:

Եվ կանգնել ենք իրար դեմ մենք հոգնաբեկ ու տրտում,
Արտասուքներ են դողում մեր խոնարհված կուպերին...
Քո կարապները քեզ հետ, ախ, չեն դարձել նորից տուն,
Իմ երազներն ինչ-որ տեղ հոգեվարում են լին:

Եվ ծաղիկներդ հիմա, մանուկների նման որբ,
Դեպի լեռներն են ելնում, որ աղբյուրներ որոնեն,
Ու գնում են նրանց հետ կարոտներն իմ վիրավոր,
Որ նրանց որբ ծարավին իրենց արցունքը ձոնեն:

Եվ դու տխուր ես, գարուն, ծվատված ես խղճի պես,
Քո հովերի մեջ հիմա շշուկներ կան մահահոտ...
Ու չգիտեմ, չգիտեմ, դո՞ւ պիտի ինձ սփոփես,
Թե՞ ես պիտի քեզ վրա կարդամ տրտում մի աղոթք...

ԲԱՌԵՐԻ ԻՆՔՆԱԿԵՆՍԱԳՐՈՒԹՅՈՒՆԻՑ

«ՀԱՎԱՏ»

Ես հազար անգամ ծնվել աշխարհում
Ու մահացել եմ ես հազար անգամ:
Եվ մեծագույնը տառապյալներից
Ես եմ երևի,
Քանզի երկունքն իմ դժվար է անչափ,
Կյանքս՝ փորձություն,
Եվ հոգեվարքս անչափ տանջալի:

Ծնվելու պահին
Մանկորեն մաքուր
Ու մերկ եմ լինում,
Խղձի պես արդար
Եվ արդարության նման գեղեցիկ:

Եվ սակայն, ավանդ,
Տեսնում եմ հանկարծ,
Որ դարձել եմ կուռք,
Փոխվել եմ քարի,
Պղնձի, ոսկու,
Չոհասեղան եմ դարձել ես արնոտ,
Եվ զոհն առաջին հենց ինքս եմ որ կամ: _

Ես կուռք չեմ, օ, ո՛հ,
Խաչ չեմ ես բնավ,
Ես մանուկ եմ մերկ,
Հող եմ ու ծաղիկ,
Աղբյուր եմ ու լույս,
Եվ անհնար է ապրել առանց ինձ...

«ՀՈՂ»

Ես սևն եմ սևի,
Բայց ես եմ տալիս արար աշխարհին
Բոլոր գույների թիթեռը ցուրն՝
Խարտյաշը հասկի,
Կարմիր ծիծաղը ճաքճքած նուան,
Մանուշակների թախիծը կապույտ,
Արծաթը բարդու
Եվ կանաչ, կանաչ
Այն քնքշությունը,
Որ մայրն է բարյաց:

Ես անհուն, ես մեծ, ամենակարող,
Բայց խղճի պես թույլ,
Բարու պես անզոր
Եվ գեղեցկության նման անպաշտպան...

Հոշոտում են ինձ,
Ծվատում են ինձ,
Իմ ծաղիկներն են տանում արմատով,
Մուր ու մոխիրով ցողերս եղծում...

Եվ այս աշխարհում իմ երկվորյակը
Երևի միայն սիրտն է հանձարի:

* * *

Լեռներում ձնհալ է,
Լալիս է բարձունքը,
Այս որքան զուլալ է
Մեծերի արցունքը:

Իջնում է հեղեղը,
Ամեն ինչ քանդում է,
Հովիտը ինչ նեղ է,
Ինչ նեղ է անդունդը:

Լալիս է բարձունքը,
Շաչում է հեղեղը,
Մեծերի արցունքը
Այս որքան ահեղ է..

ԱՐՇԱԼՈՒՅՍ

– Քանի չի զարթնել դեռ աղմուկը բիրտ,
Տնիր ինձ լուռության ոսկե մի փշուր...

Եվ աչքով արեց ինձ լուսաստղը հուր:

– Քանի չեն շնչում դեռ ծուխն ու փոշին,
Տնիր ինձ մաքրության մի կապույտ կաթիլ...

Եվ ցողը զնգաց ձայնով արծաթի:

– Քանի փակ են դեռ շուրթերը ստի,
Տնիր ճշմարտության մի քանի խոսքեր...

Եվ երկինք ելավ արտույտը ոսկե:

«ՍԱՂՄՈՍԱՐԱՆ» շարքից

ՍԱՂՄՈՍ Ա.

Տեր, հանիր այսօր ունկերդ խցող ամպերն սպիտակ,
Կապույտի փառքը ինձանից փակող մռայլը վանիր,
Քանզի ուզում եմ զրուցել քեզ հետ...

Եվ խոսքն առաջին, որ դողդողում է շուրթերիս վրա՝
Հարց է մեղավոր, հերձվածող մի հարց.
– Ինչպե՞ս է եղել, որ արարելով չքնաղ Եվային,
Չես սիրահարվել հենց ինքդ նրան...

Ներիր նվաստիս, եթե հանդգնեմ քո դեմքին ասել,
Որ քո սրտի մեջ երևի սերը չի էլ գիշերել,
Եվ դրանից է, որ քո արարած աշխարհը թերի,
Անկատար է խիստ,
Եվ անկատար եմ ես այդ աշխարհում:

Ես գիտեմ վերին մի ճշմարտություն.
Ինչ արարվում է առանց տաք սիրո՝
Աշխարհ լինի դա,
Մանուկ
Թե սափոր,
Անկատար է միշտ...

Խնջ ես ինձ տվել...

Միայն ու միայն հինգ զգայարան:
Մինչդեռ կուզեի իմանալ այնպես համն արշալույսի...
Երևի թե նա համ ունի նուան,
Հասկի համ ունի

Կամ աղբյուրի համ...
Կուզեի զգալ բուրմունքն աստղերի,
Երևի նրանք առաջին սիրո բուրումներն ունեն
Կամ բուրումն ունեն հենց նոր արարված առաջին բառի...

Ինչո՞վ շոշափեն գաղտնիքն սկզբի,
Ես գեղեցկության անքնին ոգին ինչո՞վ վերծանեմ
Եվ ինչո՞վ բռնեմ ես այն երազը,
Որ լուսաբացին այցելում է ինձ
Ոսկեվարս, թեթև աղջկա տեսքով
Եվ փախչում, ինչպես իր երկվորյակը
Իմ պատանության լացող ձեռքերից...

Ես ինչո՞վ, ինչպե՞ս իմանամ, ասա,
Թե ի՞նչ գույն ունի
Ինքը՝ ձձմարիտ ձձմարտությունը,
Քանզի հաճախ է նա փոխում գույներ ու փոխում զգեստ,
Եվ մոլորվում եմ...

Շատ է պատահում՝
Քայլում է ահա կինը՝ չքնաղը.
Եվ քո աչքերի ճառագայթներով վայրկյանների մեջ
Թոթափում է նա զգեստներն ամեն
Եվ ընթանում է արշալույսի պես մերկ ու հիասքանչ:

Տայիր ինձ, տայիր
Մի այլ ճառագայթ,
Եվ այն կենտ, միակ ձձմարտությունը
Ամենքին ի տես այդպես մերկանար,
Քայլեր գեղեցիկ՝ որպես արշալույս,
Եվ անհերքելի՝ որպես արշալույս...

Օգնական եղիր,
Իմ վաղնջական տառապանքներին
Գումարիր նորը, մեծը գումարիր,
Տո՛ր ինձ լիաբուռն ահեղը սիրո,
Ո՛վ գիտե, գուցե նրանց բախումից
Ծնվի տենչալին,
Եվ զգամ հանկարծ համն արշալույսի,
Բուրմունքը աստղի,
Շոշափեմ հանկարծ ոգի ու կրակ,
Շոշափեմ հանկարծ ոգի ու գաղտնիք...

ՍԱՂՄՈՍ 2.

Տե՛ր, սիրտս ահա... Ամոքիչ եղիր,
Շա՛տ է ծվատվել նա կասկածներից,
Սիրուց ու խանդից, գինուց ու շանթից
Շատ է ծվատվել...

Նրա խորքերում
Ավերակներ կան արշալույսների:

Նրա մի խորշում սկզբից ի վեր
Բնավորվել է կապույտ մի թռչուն,
Այնքան հարազատ և իմը այնքան,
Որ հաճախ անգամ մոռանում եմ ես,
Թե նրա խորշում սկզբից ի վեր
Բնավորվել է մի կապույտ թռչուն:

Տե՛ր, սիրտս ահա, իմն է նա թեև,
Բայց ես չգիտեմ գաղտնիքը նրա,
Այն գիտեմ միայն, որ նա բյուր անգամ
Լավն է ինձանից...

Անգամ կարեվեր խոցվելուց հետո

Լվացվում է նա իր իսկ արցունքով
Ու դառնում նորից անքեն ու ներող,
Որպես առավոտ ու որպես Հիսուս...

Խորան է փոքրիկ,
Եվ սակայն սիրո աղոթքը այնտեղ
Նման է այնպես
Ալեքսիսուօթյանն ահեղ ծովերի:

Երբ նվաղում է կամ ցավում է նա,
Այնպես է նայում իմ աչքերի մեջ,
Ասես մանուկ է մեղավոր ու որբ:

Ու ես շշուկով ասում եմ նրան.
Շտապելուց ես դու այդպես ցավում,
Ո՞ր ես շտապում,
Գիշեր է շուտով,
Եվ դու կննջես անխոռով ու լուռ:

Բայց նա չի ննջում,
Եվ գիտեմ ինչու՝ երգ ունի նա դեռ,
Դեռ չի ավարտել
Նա երգը կյանքի ու երգը մահի...

Եվ ցավում է խիստ...
Վերջերս հաճախ ու խիստ է ցավում...
Ու եթե հանկարծ չլռի հավետ,
Գուցե իր խորքից
Հանի լեռնային մի մաքուր աղբյուր,
Մի նոր արշալույս
Կամ նոր մի հավատ...

* * *

Ես ճամփա ընկա, որ այս տանջալի կասկածը մարեմ,
Որ ապավինեմ ապառաժներիդ անխախտ հավատին,
Որ ջրերիդ հետ քարեքար ընկած անփույթ թափառեմ,
Քամիներիդ մեջ խշխշամ, ինչպես արծաթե բարդին:

Մայրամուտ եղավ... թվաց՝ ուր որ է կզարկվի ժայռին
Ու կզրնգա անդունդից ելնող լրած լուսնկան...
Չգիտեմ հաստատ, զարկվեց նա իրոք, և սակայն վայրի
Անդունդներն ի վար արծաթի մաքուր բեկորներ ընկան:

Եվ հրաբուխի հոտ էի առնում ես քո քարերից,
Եվ ջրհեղեղի հոտ էի առնում կավից քո տոչոր,
Ինչ-որ անմեկին շշուկ էր գալիս մթին այրերից,
Ինչ-որ բան էին շշնջում իրար մացառները չոր:

Ու ես չիմացա, ցնորք էր, տեսիլք... Եվ սակայն հանկարծ
Դարեր թաքնված հեթանոսները դուրս եկան այրից:
Աստվածների պես կիսամերկ էին ու կարծրամկան,
Ու գրաբարյան պղինձն էր զնգում նրանց բարբառից:

Կրակ վառեցին... Դափի դոփյուն էր ու փողերի կանչ,
Որոտում էին քարանձավներն ու վիհերը լեռան,
Կաքավում էին ու նազում էին կանայք հիասքանչ,
Իսկ մեկը, մեկը հույժ էր գեղեցիկ ու երգեր ձեռամբ:

Եվ նրանց համար չկար աշխարհում դրախտ ու դժոխք,
Եվ նրանց համար գոյություն չուներ մեղք ու քավարան,

Աշխարհն այս արար լոկ հող էր ու ջուր, կրակ էր ու շողք՝
Գեղեցիկ, ինչպես հարության Աստվածն՝ այն մանուկ Արան...

Խառնվել նրանց ու ազատ էի ես նրանց նման,
Եվ նրանց նման՝ հարբած աստղերով, կապույտով վերին,
Սոսու սոսափով ինձ սեր ու բախտ էր գուշակում հման,
Ու ես հմայված հավատում էի նրա խոսքերին:

Առավոտ եղավ... Ու թվում էր ինձ կասկածն իմ մարել,
Եվ սիրտս նորից ապավինել է լույս ու հավատին...
Ես ջրերի հետ զրնգում էի՝ շուրթերիս արև,
Քամիների մեջ խշխշում, ինչպես արծաթե բարդին...

* * *

Կապույտ մշուշն է ելնում վիհերն ի վեր, ձորն ի վեր,
Եվ անդունդներն են նորից անհունորեն խորանում,
Այնտեղ՝ հեռու քարափին ինչ-որ մի վանք կա ավեր,
Ու գաղտնիքն է երևի նիրհում մամռած խորանում:

Վիհերն ի վեր, ձորն ի վեր ելնում կապույտ մի մշուշ,
Նստում այրված քարափին, բարդիներին է թառում,
Ու թվում է, թե այնտեղ վաղնջական ինչ-որ հուշ
Ոգիների հետ զարթնել ու ծեսեր է կատարում...

Կապույտ մշուշն է ելնում վիհերն ի վեր, ձորն ի վեր,
Ոտից գլուխ ինձ նորից թախիծով է մկրտում,
Եվ թվում է սրտիս մեջ ինչ-որ մի վանք կա ավեր,
Ու ես ինքս էլ չգիտեմ նրա գաղտնիքը տրտում...

ԵՐԳ ՀՈՂԻ ՈՒ ԵՐԿԼՔԻ

Պառկել եմ մենակ իրիկնամուտին,
Հանգչող արևի սուրբ ծեսն եմ դիտում,
Արծիվն իջնում է, խառնվում մութին
Եվ իսկույն նորից երկինք է միտում:

Երկնքի մեջ են գյուղերը քարե
Ու կորնգանի արտերը լազուր,
Երկնքի մեջ է վանքը ծվարել,
Երկինք է խրել իր գմբեթը սուր:

Եվ ինչ-որ մի ցավ՝ խոնավ ու տրտում,
Կարծես ինքն իրեն փոխվում է երգի,
– Ինչո՞ւ ինձ այսքան քիչ հող տվիր դու
Եվ ինչո՞ւ տվիր ինձ այսքան երկինք...

Քո ձգնակեցը՝ քո Նարեկացին,
Համարյա միայն երկնքում ապրեց,
Քո դեմ երկնքի դռները բացին,
Երբ տառապանքդ Աստծո չափ էր մեծ:

Ախ, գիտեմ, երկիր, նոր բան չեմ ասում,
Երևի մորը չեն ասում նոր բան...
Ուզում եմ շոյել այս արտը հասուն,
Ուզում եմ բռնել երկնքի ծամփան:

Երևի վանքի քարերին՝ մամուռ
Եվ պատերի տակ թփեր կան ուրցի...

Հին ոգիներն են գիշերվա մեջ լուռ
Երևի նստել խոնարհ զրույցի:

Կամարների տակ մութն է խտանում,
Կապուտակ աստղը փոխվում է մոմի,
Երևի նրանք զրույց են անում
Վասն աստղերի ու Պղատոնի...

Չգիտեմ... գուցե, իմ մայր, իմ երկիր,
Քեզ երկինք էր պետք հողից ավելի,
Գուցե բախտ է դա ու ճակատագիր,
Գուցե խաչն է դա առաքյալների:

Ներիր նվաստիս այս խոսքը տրտում,
Որ սփոփանքն է գուցե իմ վերքի,
– Թեև ինձ այսքան քիչ հող տվիր դու,
Բայց և փանք, տվիր ինձ այսքան երկինք...

* * *

...Եվ ամեն գիշեր ես խոսք եմ բացում քո անդունդների,
Քո ընդերքներում նիրհող պղնձի զնգոցի հետ խուլ,
Ցուլանքների հետ քո ադամանդյա առասպելների,
Աղբյուրների հետ քո լացակումած,
Իմ իսկ արյան հետ,
Եվ սակայն, ավաղ,
Լավ չեմ հասկանում դեռ նրանց լեզուն:

Եվ այնքան եմ ես հասկանում միայն,
Որ քո բիրտ քարի մթին խորքերում,
Ոսկե ու կապույտ թռչունների պես,
Շանթեր կան պահված...

Եվ այնքան եմ ես հասկանում միայն,
Որ անդունդների վերքեր են խորին,
Արշալույսները՝
Վերքերդ լիզող շեկ հարալեզներ...

Եվ այնքան եմ ես հասկանում միայն,
Որ թեև այնտեղ՝
Մութ վիհերիդ մեջ,
Քարե խոովք է
Ու անհաշտություն,
Բայց քարափն ի վեր վանք է սրբատաշ՝
Բյուրեղյա ու նուրբ ներդաշնակություն...

Եվ այնքան եմ ես հասկանում միայն,
Որ գիշերային կայծակների մեջ
Քո անդունդները
Դառնում են հանկարծ առավել խորին,
Եվ առավել է անմեկին դառնում գաղտնիքդ, իմ հող...

ԵՍ ԽԱՁԵՐՆ ԵՄ ՎԵՐԾԱՆՈՒՄ

Խորհուրդ՝ հիասքանչ ու զարմանալի...

Ես գիշերային կիսաքնիս մեջ
Վերծանում էի դարերով լուծ խազերը մեր հին,
Ու մեղեդին էր հնչում աշխարհում:

Լա գարնանաբեր հարավի հեղոն ու շունչը ուներ
Եվ հունչը ուներ որձաքարերից բխող աղբյուրի,
Կապույտի նման անսկիզբ էր նա
Եվ անվախձան էր ճառագայթի պես:

Քրմորեն արդար ծունկի էր իջնում նա արևի դեմ,
Փառաբանում էր շողն արեգական
Ու կրկին, կրկին՝ շողն արեգական...
Հղում էր ապա օրհնանքն իր անբառ
Գարնան ամպրոպին,
Ծիրանի ծաղկին
Ու շեկ հասկերի ծանրությանը ձույլ:

Եվ հուշում էր նա,
Որ գեղեցկագույն դեմքը աշխարհում
Դա ազատության դեմքն է սրբազան,
Ամենամաքուր ձեռքերն աշխարհում
Ձեռքերն են խղձի,
Եվ արարիչը ամենագորեղ
Քրտինքի ցողն է՝ փոքրիկ ու ցլուն...

Խորհուրդ՝ հիասքանչ ու ցավո՛տ, ցավո՛տ...

Տնքում էր հետո մեղեդին այդ սուրբ,
Ասես սրտի մեջ նիզակ էր խրվել,
Ասես թե նրա թրթիռը ոսկե
Ընկել էր վարգող սմբակների տակ,
Եվ ասես նրա թելը հրեղեն
Հատել էր ուզում ինչ-որ կեռ մի թուր...

Եվ թվում էր ինձ, երկիր հայրենի,
Թե ես հենց ինքս եմ մեղեդին այդ սուրբ,
Ես, որ քո լույսի գուսանն եմ երգվյալ,
Քո թախիծը հին,
Արյունը ցաված,
Ուխտավորն եմ քո անաղարտ խղձի
Եվ տառապանքիդ ձգնավորը հեզ...

Խորհուրդ՝ հիասքանչ ու ցավո՞տ, ցավո՞տ...

Եվ թվում էր ինձ,
Թե այդ մեղեդու խորքերից անհուն,
Կանխագուշակման ու տագնապի պես
Ինչ-որ պղնձե զանգեր են հնչում
Եվ այսպես ոգում ձայնով պղնձե.
– Ես ասում եմ ձեզ,
Եթե պղտորեք ակունքը խղձի,
Մոլեգնի պիտի մեղքը սանձակո՞ծ,
Ոգին մահանա,
Եվ ամենուրեք
Ծծումբի շունչը պիտի տարածվի...

Խորհուրդ հիասքանչ ու զարմանալի...

Եվ կրկին թերթում մագաղաթների էջերը դեղնած,
Ես լսում էի մեղեդի մի այլ,

Եվ այդ մեղեդին այնքան էր մաքուր,
Այնքան ոգեղեն,
Որ թվում էր ինձ, թե հույսի նման ու լույսի նման
Այցի է եկել ինձ սերն առաջին,
Այցի է եկել խոստովանության այն պահը ահեղ,
Երբ խառնվում են
Երկինք ու գետին,
Արցունք ու կրակ,
Ճառագայթ ու ծուխ,
Եվ թվում է, թե ուր որ է ահա
Բարձրանաս պիտի, գնաս սխրության...

Եվ գնում էի ես ահա կրկին
Մաքրոր,
Ոգեղեն
Ու սիրահարված...

Եվ ինքս էլ, ինքս էլ չիմացա անգամ.
Որտեղից ելան
Ու սկսեցին ընթանալ ինձ հետ
Կապույտին տվող ու ոսկուն տվող մի հին առասպել,
Թոնրի հրաշեկ շրթունքից պոկված հացաբույր մի բոց,
Հարսնեշոր հագած ծիրանի մի ծառ...

Եվ գալիս էին ինձ հետ աղբյուրներ,
Եվ գալիս էր մի մոլորված եղնիկ,
Եվ գարնանային մի մաքուր անձրև,
Թևին՝ ծիածան...

Եվ այդ ամենը
Գալիս, խառնվում այն հին մեղեդուն,
Դառնում էր անհուն մի համանվագ,

Որ այնքան էր սուրբ,
Այնքան էր վսեմ,
Որ թվում էր ինձ, թե բոլոր մարդիկ
Ուր որ է ահա
Նրա լույսի մեջ
Կօծվեն,
Կսրբվեն
Ու կաստվածանան,
Իսկ աստվածները ցած կիջնեն վերից
Ու գոնե մի քիչ,
Ու գոնե մի քիչ
Կմարդեղանան...

* * *

Նա գալիս է գիշերով ու ականջիս շնչում.
–Դու հոգնած ես, դու հիվանդ ու տրտմորեն կարեվեր,
Եկ, քեզ հովիտն այն տանեմ, ուր տառապանքն է ննջում,
Ուր անթախիծ մի ոգի անհուններն է արևել:

Ի՞նչ եմ տվել քեզ կյանքում, որ դու կառչել ես կյանքից.
Ես խլեցի քեզանից մի ողջ աշխարհ ու մի տուն,
Մանկությունդ նմանվեց մի տխրագին զանգակի,
Որի հեռու ղողանջից դեռ արցունք է կաթկթում:

Բիրտ թաթերիս մեջ առա պատանությունը ես քո
Եվ արձիճե հողմերի շառայունին զարկեցի,
Մերթ կանգնեցի քո դիմաց սարսափի սև այն տեսքով,
Մերթ կասկածի կրակով անխղճորեն խարկեցի:

Երբ սիրեցիր, տվեցի քեզ տառապանքն անհասի,
Առեղծվածի բանալին չտվեցի քեզ սակայն,
Մոլորվեցիր դու հաճախ աչքերի մեջ կանացի,
Մաքրությունդ փոխեցիր գիշերներով մեղսական:

Եվ դու ապրում ես հիմա տագնապներով բեռնավոր,
Անքնությունն է անվերջ գիշերներդ ծվատում,
Քեզ պատեպատ ես զարկում իբրև անմեղ-մեղավոր
Երբ մեռած խիղճ ես տեսնում ու բարուն չես հավատում...

Եկ, քեզ տանեմ այն հովիտն, ուր տառապանքն է ննջում,
Վերքդ ցողով լվանամ, զով ամպերով իմ կապեմ...
Իսկ ես ժպտում եմ նրան ու կիսաձայն շնչում.
–Շնորհ արա, հեռացիր, թող մի քիչ էլ տառապեմ...

ԶՐՈՒՅՑ ԶՎԱՐԹՆՈՑԻ ՀԵՏ

Ես չգիտեի, որ քանի գնա, այնքան ավելի
Նմանվեմ պիտի, Չվարթնոց իմ, քեզ,
Որ իմ մեջ պիտի ծանրանա անվերջ քարը ցավերիդ
Եվ արծիվներիդ թախծությունը վես:

Ու չգիտեի, որ գիշերներով, երբ գամ քեզ այցի,
Քեզ, ոգու հրաշք, տապալված գետին,
Ես պիտի լսեմ շշուկների մեջ աստղային լացի
Հրեշտակներիդ տխուր մեղեդին:

Երբ սյունդ շոյեմ, ինձ պիտի թվա, թե նրա մեջ դեռ
Անկումի թաքուն տազնապ կա ու դող,
Այն տազնապը նույն, որ գուժկանի պես իմ սիրտը մտել,
Մորմոք է դարձել, ցավ մի տվալտող:

Ու երբ գիշերվա ինքնաթիռների շառայուններից
Հրեշտակներիդ երամն ահառած
Բեկված թևերով ու բեկված երգով ցած իջնի վերից,
Լաց պիտի լինի իմ սրտին թառած:

Եվ պիտի թվա, թե լալիս է դա քո բեկված ոգին,
Թե իմ հավատն է տրտմորեն ծնկել,
Թե քո քարակոփ այն ողկույզները լուսնյակի շողքից
Շողում են որպես խոշոր արցունքներ:

Ու երբ խոնարհվեմ քո մկրտության սուրբ ավազանին,
Որի մեջ միշտ էլ աստղեր կան տրտում,

Կթվա, թե դա սիրտս է, որ հլու բարության ձայնին
Դեռ երազներ ու սեր է մկրտում...

Եվ չգիտեի, որ վաղուց այնպես նման ենք իրար,
Որ հարազատ ենք ու արյունակից,
Որ քո փշրված հրաշքի նման ինչ-որ մի հրաշք
Հուրհուրում է դեռ որմերիս տակից...

ԳԻՇԵՐԱՅԻՆ ԹՈՒՉՔ

Թեև չեմ հավատում ես ոգու հարության ցնորքին,
Բայց կարոտն աշխարհում երևի զորավոր է մահից...
Ու խավար մի գիշեր աճյունից անջատված իմ ոգին
Կգնա թևելու եթերում իմ կորած աշխարհի:

Կփովեն ներքևում հայրենի հովիտները կանաչ,
Արծաթե մշուշում կթախծեն ուռիները մեր հեզ...
Իմ կիսված հայրենիք, գեղեցիկ՝ որպես սերը անհաս,
Ավերված իմ եզերք, դու ցավո՛տ՝ տապալված փառքի պես:

Եվ կիջնի իմ հոգին Անիի սրբատաշ քարերին,
Վիրավոր հավքի պես կձչա գիշերվա խավարում
Ու կզգա նա իսկույն, որ կրակն անթեղված դարերի
Կարոտից ծանրացած իր թևերն ու իր կուրծքն է այրում:

Այդ այրված, այդ խանձված թևերի տխրագին շառաչով
Կգնա նա նորից չափելու սահմանները ցավի...
Մամուսպատ մատուռներ՝ մեսրոպյան գրերով հառաչող,
Եվ ձաքած խաչքարից ծիլ տված մանուշակ մի ծավի:

Երևի Նարեկա հանձարեղ ննջեցյալը հանկարծ
Ջգալով, որ վերից հարազատ մի ոգի է թոչում,
Կշարժվի շիրիմում, կբացի շրթունքներն իր հանգած
Եվ աղոթք կըողի՝ մի ցավոտ հեծություն ու զղում:

Ու այնտեղ՝ Եփրատի ափերին, հայրենի իմ տնակ,
Անմեկին հրաշքով քո ծրագը հանկարծ կվառես,

Ու քեզ հետ ողջ գիշեր կմնամ ես տխուր ու մենակ,
Ողջ գիշեր քո կոպիտ քարերի քնքշանքին կփարվեմ:

Առավոտ կլինի... Մեր այգու յասամանը ցողոտ
Կսկսի իր կապույտ աստղերի շշուկով սոսափել,
Ես կուզեմ այդ թփերը շոյել սրբազան մի դողով
Եվ սակայն չեմ շոյի, որ աստղերը հանկարծ չթափեմ...

Որ հետո, որ հետո, երբ դառնամ ես իմ հողը մի բուռ,
Այդ ցողերն արցունքի ծանրությամբ հետքերիս վրա լան,
Եվ աստղերն այդ կապույտ՝ կարոտի ու հույսի պես մաքուր,
Հեռավոր մշուշից հավերժող կրակով ցլցլան...

ԵՓՐԱՏԻ ԿԻՐՃՈՒՄ

Այս գիշեր նորից թափառում էի Եփրատի կիրճում
Եվ ոտից գլուխ ողողված էի ես ջրափոշով,
Երամն աստղերի մոլորել ասես երկնային իր չուն,
Փշրել էր ձորում արցունքն իր խոշոր...

Ժեռ քարափները զրնգում էին զանգերի պես ձույլ,
Եփրատի շուրթին բամբ որոտմունքն էր իր բառ ու բանի,
Մենակ էինք մենք... Ու մերթ նման էր նա ձերմակ Աստծու,
Ու մերթ՝ ալևոր ջրաղացպանի:

Եվ ասում էր՝ եկ, ձակատիդ դնեմ ես մի պաղ ալիք,
Ոտքիդ տակ փոժվեմ իմ նվիրական, գաղտնի կածանով,
Եկ, ես քեզ համար պահել եմ ծաղիկ մի հրաշալի,
Որ երգել գիտե երկնային ձայնով:

Եկ, ես քեզ համար պահել ջրտուփի գիշերները զով,
Օրհներգությունն եմ պահել մամոռտած այս ջրաղացի:
Իմ քարափներին դեռ ձեր ծխանի ծուխն է երազող
Ու բուրմունքներն են ձեր ցորենհացի:

Քարանձավներիս մութ խորքերի մեջ քեզ համար այնքան
Առասպելների ոսկի եմ պահել ու տաղ, ու հայրեն,
Եկ ու հավաքիր, ու թող որ նրանք հրով մոզական
Քո շրթունքներն ու քո մատներն այրեն:

Ու երբ աշխարհում դու հոգնած լինես, լինես կարեվեր,
Երբ այս աշխարհի ձանապարհներին փոշոտվի հոգիդ,

Եկ, որ վայրենի քնքշանքս նետեմ քո հասակն ի վեր,
Լույսով փարատեմ սևը մորմոքիդ:

Երբ այս աշխարհի մութ տագնապներից քունդ խուսափի,
Եկ, որ իմ ահեղ որոտմունքի մեջ քնես դու խաղաղ,
Երբ հավատը քեզ կնոջ պես դավի ու հույսը խաբի,
Եկ, տամ քեզ հավատն իմ ցողաշաղախ:

Երբ ներշնչանքիդ հուրը մարմրի ու դառնա մխանք,
Եկ, քեզ սպիտակ իմ խենթության մեջ նորից թաթախեմ,
Քո ամեն տողից իբրև աստղ, իբրև հրեղեն մի զանգ
Մաքուր ցողերիս ցլանքը կախեմ...

ԿԱՊՈՒՅՏԸ

Չէ, երազ չէ, պարզապես փակում կոպերն իմ ցավոտ
Ու իմ վճիտ մանկության վճիտ աչքերն եմ բացում...
...Եվ կապույտ է ամեն ինչ, գարնան կապույտ առավոտ,
Կապույտ ծուխ է ու մշուշ, կապույտ աստղ է ու արցունք...

Գիշերն ամբողջ երևի գարնան անձրևը լացել,
Հիմա հողի ծալքերից քնած կապույտն է հանում,
Երմոնյա տատս ահա այգու դոնակը բացել,
Անցորդներին ցողաթաց կապույտներ է բաժանում:

Չէ, երազ չէ, պարզապես յասամանը մեր այգու
Շատ էր առատ ու կապույտ, կապույտ հեղեղ էր ասես,
Մեր տան քարե պատերին իր ալիքները զարկում,
Դուրս էր հորդում մեր այգուց՝ կապը կտրած գետի պես:

Ամեն ձյուղը բյուրավոր աստղերից էր գոյացել,
Ամեն ձյուղը հեքիաթի մի թռչուն էր անանուն...
Երմոնյա տատս ահա այգու դոնակը բացել,
Կապույտ աստղեր ու կապույտ թռչուններ է բաժանում:

Թե տողերիս մեջ հիմա արցունքի շաղ կա առատ,
Թե չափից շատ է առատ հիմա կապույտն իմ երգում,
Ես մեղք չունեմ, դա կորած այգու շաղն է անարատ,
Ես մեղք չունեմ, դա կապույտ յասամանն է հեկեկում...

ԵՎ ՆՈՐԻՑ ՇՈՒՆԸ...

Տեր իմ, տեսիլք է արդյոք, թե իմ երազն է վերին...
Նա պառկած է դռան մոտ՝ դունչը դրած թաթերին:

Ձյունամրրիկ մի ահեղ լքված տունն է սասանում,
Իսկ նա պառկել հողմի տակ, ասես աղոթք է անում:

Նա՛ ընկերն իմ մանկության, նա՛ սևուկն իմ տխուրաչ,
Որ օրերի մշուշում քարավանի հետ սուրաց...

Ու հետ դարձավ՝ աչքերում անմարելի մի կսկիծ,
Ու հետ դարձավ, որ նորից այս մաշված սեմը հսկի:

Ես՝ միամիտ, ես՝ մանուկ, կարծում էի, թե նրան
Գորշ գայլերն այն հոշոտել, խրախճանել են վրան:

Բնչ իմանար իմ հոգին ու իմ սիրտը մորմոքուն,
Որ նա կարոտ է անմահ, որ նա հավատ է տոկուն...

Մենք նայում ենք մեկմեկու, և ճանաչում է նա ինձ,
Մոտ է գալիս՝ աչքերում սովահարված մի թախիծ:

Իսկ երբ հանում է լեզուն, որ իմ ձեռքերը լիզի,
Ասես այրող իր շնչով պիտի դեմքս հրկիզի...

Ձյունամրրիկ է ահեղ, ողջը՝ սառույց, ողջը՝ քար...
Մենք փարվում ենք մեկմեկու ու ոռնում ենք խելագար...

ԲԱՌԵՐ

Ասմունքող Սիլվա Յուզբաշյանին

Երևի բառն առաջին տառապանքից է ծնվել՝
Նախամարդու վայրենի տառապանքից ու ցավից,
Լրա ճաքած շուրթերի արյան շիթով է սնվել
Ու սնվել է զնգոցով այն ծխամած անձավի:

Երկրորդ բառը երևի սիրո մրմունջ է եղել,
Տաք արյան մեջ խշշացող անմեկնելի մի շշուկ,
Երանելի մի ծարավ ու թրթիռ մի հրեղեն,
Ու ցլացել է հոգու խորհրդավոր մշուշում:

Հիացմունքից է ծնվել երևի բառը երրորդ,
Խառն են եղել նրա մեջ երևի ծիչ ու հնչյուն,
Բայց գեղեցիկ է եղել, որպես զարնան առավոտ,
Որպես որոտ ու կայծակ, որպես արծվի կոնչյուն:

Հետո բառեր են ծնվել, բարի բառեր օրհնության,
Ահեղ բառեր անեծքի, ընդվզումի, բողոքի,
Բառեր, որ պարզ են եղել, որպես պտուղ ու ցորյան,
Խորհրդավոր են եղել, որպես Աստված ու ոգի...

Բառեր՝ ցողի պես ցողուն, բառեր նման կայծքարի,
Բառեր, որոնց խորքերից դեռ հրաշքն է շողշողում,
Բառեր, որոնց շուրթերին ծաղկում ծաղիկը վայրի
Եվ քնքշության ու լույսի մեղեդիներն են դողում:

Եվ բոլորը երկունքի ահեղ ցավով են ծնվել,
Եվ բոլորը տքնությամբ, ինչպես կրակը՝ քարից,
Եվ բոլորը նախ հողի արարչությանն առնչվել
Ու ջրդեղվել են հետո ցողերի մեջ աստղային:

Եվ հիմա քոնն են նրանք՝ այդպես հողոտ ու ցողոտ,
Եվ հիմա քոնն են նրանք՝ այդպես բարի ու ահեղ...
Ու խաղ չանես նրանց հետ, հեգի՛ր դժվար այն դողով,
Որով ծնվել ու մարդու ճաքած շուրթերն են վառել...

* * *

Հանգչող կրակի կապույտ մխանքում
Դեռ ցուլանքը կա վերջին կայծերի...
Ինձ մի երազ է մնացել կյանքում,
Իսկ քեզ դեռ հազար երազ կայցելի:

Թեև երազից չեն հայցում ոչինչ,
Բայց բարի եղիր, եղիր կանացի
Ու այնպես արա, որ գիշեր մի ջինջ
Երազներիդ մեջ ես գամ քեզ այցի:

Հոգնած կլինեմ, կլինեմ փոշոտ
Եվ տրտում, որպես աշուն ու գիշեր...
Ու երբ խոնարհվեմ աչքերիդ խոշոր,
Նրանք երևի ինչ-որ բան հիշեն:

Հիշեն, որ կար մեկն այս տխուր կյանքում,
Որ ինքն իրեն էլ լավ չհասկացավ,
Որ չտարբերեց թռիչք ու անկում
Եվ իրար խառնեց լույս, գինի ու ցավ:

Որ աշնանային մի ցուրտ գիշերով
Մատներիդ մրսած քնքշանքը շոյեց
Ու հանկարծ սիրեց իր վերջին սիրով
Եվ սակայն սիրեց հեթանոսորեն:

Ու գնաց հետո աշխարհից այս կույր
Եվ տարավ իր հետ իր չարն ու բարին,

Եվ տարավ իր հետ տենչանք մի մաքուր,
Որ հողի տակ էլ պիտի չմարի:

...Ու երբ արթնանաս, քո թարթիչներից
Թող մաքուր, մաքուր արցունքներ ծորեն,
Իսկ թռչունները սլանան վերից
Ու թող քեզ օրհնեն հեթանոսորեն:

ԳԻՇԵՐՆԵՐՆ ԻՄ ԶՐՏՈՒՔԻ...

Ո՞վ գողացավ ինձանից գիշերներն իմ ջրտուփի,
Բարդիններն իմ վեհափառ, իմ լուսնկան, իմ առուն,
Ո՞վ գողացավ ու տարավ արծաթ սրինգն իմ սյուփի,
Այն ո՞վ փշրեց իմ հրաշքն՝ իմ աշխարհին այս աշխարհում...

Ծղրիղները ինձ համար պիտի ոսկի մանեփն,
Դաղձը խոնավ հողի հետ պիտի խունկի պես բուրեր,
Պիտի երկինքն ինձ շոյեր այդ աստղային ժամերին,
Եվ գոհություներ հողի բոբիկ ոտքս համբուրեր:

Ու երևի ինձ թվար, թե ես էլ ծառ եմ ու հող,
Տաք բուրումներն են իմ մեջ իրիկնային արևի.
Կամ քարանձավն եմ այն մութ, ուր հեքիաթներ կան նիրհող,
Կամ աստղերի հետ խոսող թրթռոցն եմ տերևի:

Ու երբ ցոլար վերևում մաքուր ոսկին լուսաստղի,
Լնջեի տաք մի խուրձի՝ վրաս կապույտ ու բեհեզ,
Չիմանայի, չզգայի, որ ես հոգնած եմ սաստիկ,
Որ մաքրոր եմ ու զտված առաքյալի խղճի պես...

ՕՁԸ

Ու ես կանգ առա... Քարացա ահից...

Օձ էր...

Հասկացա...

Շապիկն էր փոխում...

Սուր քարերի մեջ գալարվում ցավից

Ու տառապանքի լեղին էր ցողում:

Սողում էր անվերջ, սուլում էր նա ձիգ,

Դեղին աչքերն էր փակում ու բացում...

...Եվ հանկարծ կանգնեց մերկ ու գեղեցիկ,

Եվ կանգնեց իբրև ահ ու հիացում:

Արևը դիպել բարակ իրանին,

Ոսկի էր խառնել կանաչին նրա,

Եվ հագին այդ նոր, ցոլուն ծիրանին,

Նայում էր հպարտ աշխարհի վրա:

Եվ տառապանքով այդպես նորացած

Ու գեղեցկացած ցավոտ այդ ծեսից,

Լույսի հրձվանքը աչքերի մեջ թաց,

Հեռացավ՝ որպես հրաշք ու տեսիլ...

ՆԵՐՇՆՉԱԼՔ

Երբ կանչում ես ինձ վերից, շանթն է զարկում թևերիս, Եվ մրրիկները սաստիկ իմ շրթունքներն են խանձում, Իսկ երբ անկում ես դառնում ու տապալում ես վերից, Ցավը փոխվում կարոտի ու նորից վեր է կանչում:

Լոկ դու գիտես անհայտի ճանապարհները թաքուն,
Որ մոլորվում ես անվերջ անդունդների մեջ խորին,
Քո բարության ժամերին դու այնպես ես նվազում,
Որ ես լսում եմ հեռու ալեբախումը ծովի:

Քո մեջ հողմեր են շաչում, ու ցուլեր են բառաչում՝
Մեհենական աստղերի ցլյանքներով պսակված,
Մասսյաց մթին վիհերի որոտմունքն է հառաչում,
Եվ անձավներն են թախծում, ուր ոգիներ կան փակված:

Դու կարող ես վայրկյանում ինձ դարձնել մարգարե,
Այնպես անել, որ բախտի գաղտնագիրը վերծանեմ,
Այնպես անել, որ անգամ անձավներից այդ քարե
Կապույտների ու ոսկու առասպելները հանեմ:

Եվ ինձ տանում ես անվերջ կղզիները կուսական,
Որ հեռավոր ծովերում դեռ անհաս են ու անհայտ,
Կղզիներն այն երագի, ուր չկա վիշտ ու կական,
Ուր թռչունները՝ կապույտ, ու ոսկեգույն են կանայք:

Անլուելի դու իմ կանչ, տառապանք իմ հիասքանչ՝
Ծարավի պես ծվարած իմ արյան մեջ ու ցավի,
Եվ օրհներգում եմ ես քեզ, որ չես հանգչում, որ դեռ կաս,
Որ խղճիս մեջ են խրվում կայծակները քո ծավի:

1985-86



ՀՈՂՄԱՇՈՒՆՉ ԳԻՇԵՐՆԵՐ



Երգ իմ,
Քեզ համար ամեն ինչ արի՛
Քո ճորտը դարձա, դարձա քո գերին,
Որ գոնե մի քիչ նման լինես դու
Խոստովանությանն
Առաջին սիրո
Եվ մահապարտի
Վերջին խոսքերին...

* * *

Չեմ հիշում հիմա,
Առաջին անգամ երբ այն գյուտն արի,
Թե հայ եմ ծնվել ես այս աշխարհում,
Գուցե այն օրը, երբ բոբիկ ուտքս դեմ առավ քարի,
Ու բթամատիս պտղեց մի կաթիլ ալ ու սև արյուն:

Գուցե այն գիշեր,
Երբ հայրենի տան կավե կտուրից
Նայել երկնքին, տեսել, թե աստղերն ինչքան են առատ
Եվ ափս պարզել, աղերսել եմ.
– Տեր, գեթ մեկը տուր ինձ...
Բայց Տերը ափն իմ թողել է պարապ...

Գուցե այն զարոն,
Երբ տեսել եմ ես զարմանքով մանկան,
Որ քարը ձեղքել ու դուրս է եկել մի կապույտ ծաղիկ,
Ծաղիկ մի ցողոտ, բայց այնքան տխուր, մենավոր այնքան,
Որ թվացել է, թե ցող չէ կոպին՝ արցունք է աղի:

Չեմ հիշում ես, ո՛չ,
Բայց մինչև հիմա իմ բթամատին
Պտղում է ասես կաթիլն այն արյան, որ սև է ու ալ,
Պարզված ափիս մեջ ոչ մի աստղ չկա, իսկ ծաղիկն այն բիլ
Ճեղքում է սիրտն իմ ու գիշերն ի լույս սկսում սգալ...

1994

ՏԱԳՆԱԴ

*Ոչ ոք չի քնել...
Գարսիա Լորկա*

Չի քնել ոչ ոք, Հայոց աշխարհում ոչ ոք չի քնել,
Ընդերքի կրակն անքնությամբ է նորից տառապում,
Մասսի անդունդը խորացել է խիստ ու խիստ մթագնել
Եվ ասուպների անկումներով է խորքերն իր չափում:
Կիսավեր մի բերդ իր մեղքն է քավում հեծությամբ քարե.
– Ինչպե՞ս, ախ, ինչպե՞ս ես չվանեցի հեղեղն այդ քոչի...
Իր քարանձավում զարթնել, զղջում է մի ծեր մարգարե,
– Աղոթք չէ, օ, ոչ, սուր էր հարկավոր ընդդեմ անկոչի...

Չի քնել ոչ ոք... Լեռները դարձել ծովական ալիք,
Մերթ իրենց թևին երկինք են տանում վիրավոր մի ոխ,
Մերթ ալեբախում իբրև բնազդի մուօ սպառնալիք
Ու մերթ հառաչում խառնարանների շուրթերով այրվող:
Մեկի սրտի մեջ կսկիծն է լալիս իբրև քարանձավ,
Մեկի կոկորդով վերուվարում է հրեղեն մի ցավ,
Մեկը շառաչով իր գաղտնարանի դռներն է բացում,
Ուր մեր հարության առասպելներն են հոգնած թևածում:

Չի քնել ոչ ոք... Չի քնել նաև տառապած մի այր,
Լա, որ ողջ կյանքում այրվել է իբրև անկեզ մորենի,
Լա, որ կորցրել Ավետյաց երկիր ու ծննդավայր
Եվ չի կարենում ելնել իր ցավի մթին ձորերից:
Մենակ է թվում, մենակ չէ սակայն, ինքն իր դեմ նստած,
Ինքն իր կասկածն է, ինքն իր հավատո քննիչն է դաժան,

Եւ անպատասխան հարցերն անդադար, իբրև շանթ ու կայծ,
Իր սիրտն է խրում ու տառապում է այսպես տարածամ:
Չի քնել ոչ ոք... Լուսինը՝ գունատ հացադուլավոր,
Եայրում է վերից, ասես աշխարհի սիրտն է խուզարկում.
– Տեր, անապատն այս ինչ ամայի է ու ինչ ահավոր,
Եվ ոչ մի տեղից աղբյուրի բարակ շիթ իսկ չի զարկում:
Տեր, անապատում և ոչ մի բարբառ արծագանք չունի...
Եվ սովահարի ձայնն է խլանում կոկորդում տոչոր,
Իսկ կույսը՝ նման դավի գնդակով զարկված թռչունի,
Թպրտում անվերջ, արյամբ է ցողում անապատն այդ չոր:

Չի քնել ոչ ոք... Արթուն է տագնապն ու սուկունն՝ արթուն,
Երկինք է միտել, երկինք է մտել մի զանգակատուն,
Շողն առավոտի տատրակի նման թառել է քիվին,
Ու թվում է, թե մայր զանգն է հանկարծ զնգում ոգևին,
Մայր ցավն է զնգում, զնգում ամեհի, ընդերկար զնգում,
Մայր հողն է տնքում, ու խենթանում է կրակն ընդերքում...
Եվ թվում է այգն արյամբ է շիկնել ու շառագունել,
Չի քնել ոչ ոք... Հայոց աշխարհում ոչ ոք չի քնել...

1988, դեկտեմբերի 6

ՀՈՐ, ՅՏԵՍՈՒԹՅՈՒՆ...

Եվ ահա նորից
Իմ գիշերները դարձել անվախձան,
Եվ գիշերները փոխվել են նորից ողբի ու ոխի,
Եվ դու ես իմ դեմ՝ քո հառաչանքով աստվածաշնչան,
Շուրթերիդ՝ բողոք, մազերիդ՝ մոխիր:

Հիշում ես տունս,
Նա էլ քո տան պես հացով էր բուրում,
Իսկ կանթեղի տակ մի հին Նարեկ էր ու մի փունջ ցորեն,
Խիղճը, հարսի պես, ամեն եկվորի ձեռքն էր համբուրում
Եվ աջը սրտին՝ հսկումի կանգնում երկյուղածորեն:

Հրաշք էր որդիս...
Նա, որ հիվանդ էր ցավով հանձարի,
Նա, որ արևի ու ձառագայթի ծարավից հանգավ,
Բայց անանձնական ուրախությունն էր պարզել նա չարին
Եվ ամեն դուռն կախ տվել որպես արծաթե զանգակ:

Բայց հիշում ես, Հոր,
Թե այն գայլը գորշ ծարավից արյան
Արար աշխարհի քնած խղձի դեմ ինչպես կաղկանձեց,
Ինչպես հոշոտեց նա մայր ու մանուկ, ողկույզ ու ցորյան,
Ինչպես իր շնչով ծիրանի ծառիս ծաղիկը խանձեց:

Հոր, իմ երկվորյակ,
Եվ մենք, որ քեզ հետ գուր չինք ու սեր,
Որ ոտքից գլուխ օրհնություն էինք գինու ու հացի,

Մոխիրների մեջ նստած, ոռնացինք Աստծո դեմքն ի վեր,
Եվ ի՛նչ էր մնում մեզ անզոր ու որբ ոռնոցից բացի:

Բայց լսիր, լսիր,
Տագնապ է նորից, ոճիր է ու դավ,
Մթան մեջ նորից պատառոտում են զգեստն իմ դասեր,
Վայրի ոհմակով լկում են նրա մարմինը արդար
Եվ այս աշխարհի փշոտ կողերով քաշքշում են դեռ...

Դե, լսիր դու ինձ,
Երկվորյակ իմ հեգ, տառապյալ իմ Հոր,
Ես ու դու այստեղ բաժանվենք պիտի,
Զգում ես, ցավիս ամպը խտանում, դառնում է ամպրոպ,
Որ արդարության ցուլացումներով հողն իմ մկրտի:

Ես պիտի ելնեմ,
Զրդեղվեմ պիտի իմ իսկ արցունքով,
Անզոր մորմոքի մոխիրն ու մուրը պիտի թոթափեմ,
Պարուրվեմ պիտի իմ լեռնաշխարհի կապուտակ բուքով,
Իմ լեռնաշխարհի արշալույսներով ինքս ինձ չափեմ:

Նայիր, աշխարհով
Սլանում է դեռ հրավառ մի կին,
Գալարվում է դեռ, որ իր մաշկի հետ այդ բոցը պոկի,
Ու ես էլ ահա նրա հետքերով սլանում կրկին,
Այրվում նրա հետ, դառնում ողջակեզ, դառնում եմ ոգի:

Ու գիտեմ հաստատ,
Աշխարհում միայն ոգին է անխոց.
Եվ անհնար է նրա մեջ խրել տապար ու դաշույն,
Թեև նա հաճախ անդունդների մեջ փակվում է անխոս,
Բայց երբ հառնում է, հառնում է իբրև հրեղեն մի սյուն:

Եվ հառնել է նա...

Իմ լեռնաշխարհում ամպրոպ է դարձյալ,
Որտոն է խոսում, և ոգում է շանթն իբրև մարգարե...
Տեղատարափ է, և ամեն շիթը հույս է խտացյալ,
Եվ ամեն շիթը՝ մաքրության կապույտ, բարության արև:

Իմ լեռնաշխարհում

Ոգու հանդես է, ծես է օծության,
Ու թվում է, թե ուր որ է վերջին ամպը կցրվի,
Հողն այս հողմահար, ելած մի վսեմ ալեկոծության,
Գոնե մեկ անգամ արդարության հետ կժամադրվի...

Եվ թվում է, թե

Ուր որ է պիտի հավատի հյուպեն
Կիսվի ու հանի մեր երազների լույսը հիասքանչ,
Մեր հովիտներով ընթանան պիտի զորության ցուլեր,
Մեր արտույտները դառնան սուրբ հացի հրավեր ու կանչ:

Եվ տունս նորից

Պիտի կրակով ու կավով բուրի,
Հարկի տակ նրա հավերժեն պիտի Նարեկ ու ցորեն,
Խիղձը, հարսի պես, ամեն եկվորի ձեռքը համբուրի
Եվ աջը սրտին՝ հսկումի կանգնի երկյուղածորեն:

Ու ես թոթափած

Իմ ալիքներից սև մոխիր ու մուր,
Հո՛ր, քեզ իմ ծամփին հանդիպեմ պիտի, ողջունեմ էլի՛
Ու քեզ պես նորից առած երկնային շնորհը մաքուր,
Ընթանամ պիտի արդար, փառահեղ ու երանելի...

ԶԱՐԿ, ԻՄ ԶԱՐՄԱՆԱԼԻԴ

*Արցախում գոհված
ազատամարտիկների հիշատակին*

Աստվածաշունչ էիր, լեռնաշխարհի իմ հայրց,
Աստվածաշունչ էիր ու սուրբ Ավետարան,
Ո՛ր եմ, սակայն, ախ, ո՞ր
Այն էջերդ, որոնց խորին խորհուրդն ի վար
Քո եփրատն էր իջնում, որպես ձերմակ Աստված,
Ու որոտով ահեղ «Լույս եղիցին» ոգում...
Այն էջերդ, որոնց լույսերի մեջ կապույտ
Լեռնաշխարհին էր Սասնա, որպես Հոբի բողոք,
Եվ գեղեցիկ, որպես Դավիթ հրաշալին:
Այն էջերդ, որոնց մշուշի մեջ լազուր
Վանա լիճն էր ծփում ու խոռվյալ հոգով
Աղոթքներ էր հուշում քո ձգնակեց սրբին:

Լեռնաշխարհի իմ հայրց,
Դու ծվատված, հատված, դու հրկիզված, կիսված
Մատյան Աստվածաշունչ ու սուրբ Ավետարան:
Եվ ի՞նչ մնաց քեզնից,
Ավանդ, միայն մի էջ,
Հողմահարված, խանձված մի էջ մնաց միայն,
Որպես խաչյալ կակիծ ու առկայծող կերոն...
Ու եթե դա էլ տանք,
Բոց չի ելանելու էլ եղեգան փողից,
Ու եթե դա էլ տանք,
Օ, Ծովինար, օ, մայր,

Ո՞ր աղբյուրից պիտի դու ջուր խմես բռով:
Ու եթե դա էլ տանք – չկանք ու չենք եղել:

Ուրեմն, զարկ, Արցախ,
Չկա ուրիշ հնար, և ուրիշ ելք չկա,
Քանզի հավերժի մեջ սա ակնթարթն է այն,
Որ կարող է հանգչել իբրև վերջին հառաչ,
Բայց կարող է նաև
Ուղեկիցը դառնալ հավերժության:

Ուրեմն, զարկ, Արցախ,
Չարկ, իմ զարմանալիդ...

Եվ տեսնում եմ, սակայն, որ հենց այս նույն պահին
Սրբեր թխամորուս, ձեզանից մեկն այնտեղ
Հոգեվարում է լուռ ու անխոռվ հանգչում:
Եվ տեսնում եմ ահա, որ հենց այս նույն պահին
Մի բուռ հող է առնում ջղաձգվող ձեռքով,
Որ հավիտյան պահի բռունցքի մեջ իր կուռ...

Ու ներիր ինձ, ներիր, մայրդ հանգչող քաջի,
Ես քեզ համար չունեմ ամոքումի խոսքեր
Ու չեմ գտնի երբեք...

Եվ դու ներիր նաև,
Հրաշալի աղջիկ,

Դու, որ քո ուսերին ծածանեիր պիտի
Երազորեն մաքուր, երազորեն թեթև
Քողը հարսանեկան,

Չես ծածանի սակայն...

Եվ նաև դու ներիր, դու՛ հրաշյա մանուկ,
Դու, որ չծնվեցիր ու չես ծնվի երբեք...
Արցախ, մի բուռ Արցախ,

Դու աշխարհի համար մի փշուր հող ես լոկ
Եվ սակայն մեզ համար հսկա զոհասեղան...
Ու թե հնար լիներ կայծակները խաչել,
Ես զոհերիս վրա կվառեի խաչերն այդ հրեղեն,
Ու թե հնար լիներ Հարդագողի ծամփան
Ոլորել ու դարձնել հսկա ծաղկեպսակ,
Ես զոհերիս վրա կդնեի պսակն այդ արցունքոտ,
Որ աշխարհին արար տեսանելի լիներ...

Ուրեմն, զարկ, Արցախ,
Չարկ, իմ զարմանալիդ...
Չկա ուրիշ հնար, և ուրիշ ելք չկա,
Քանզի ոսոխը քո՝ այդ քոչվորը վայրի,
Այդ լեզուն է միայն, որ հասկանում ճշտիվ
Եվ այդ լեզվից է լոկ, որ փոխվում է կրկին
Խուճապահար հոտի...

Իսկ դու, զարնան ծիծառ,
Որ քո բույնն ես հյուսել իմ քիվի տակ,
Բույն, որ վերք է թվում հիմա աչքիս,
Քո թևերը ծալիր
Ու ծվարիր լոին այդ վերքի մեջ:
Ինձ լռություն է պետք,
Որ մոգության շնորհի հայցեմ վերին ոգուց,
Վերին ոգուց հայցեմ խոսքեր ոգեկոչման
Ու բարբառեմ.
– Ելեք, մահապարտյալ գնդեր,
Վեր բարձրացեք հողից, սրբեր թխամորուս,
Որ դառնայիք պիտի նահապետներն ազգիս,
Սակայն, ավաղ, դարձաք նահատակներ...
Վեր բարձրացիր, քաջո, որ հենց այս նույն պահին
Մի բուռ հող ես առել ջղաձգվող ձեռքով,
Որ հավիտյան պահես բռունցքի մեջ քո կուռ...

Վեր բարձրացիր, ելիր,
Քանզի մոտ է թվում ինձ այն ժամը վերին,
Երբ իմ հայոց հողի խորին խորհուրդն ի վար
Պիտի քայլի Աստված
Եվ որոտով ահեղ «Լույս եղիցին» ոգի...
Ելիր, որ լույսն այդ մեծ, այդ արշալույսն առած,
Փռես սև-սուգ հագած ոտքերի տակ քո մոր,
Փռես ոտքերի տակ այն աղջկա,
Որ քեզ սիրահարված պիտի մնա հավետ...

Իսկ դու դեռ զարկ, Արցախ,
Զանրկ, իմ զարմանալիդ,
Չկա ուրիշ հնար, ուրիշ ծար չկա,
Զանրկ դեռ ու հավատա, որ արշալույսն այդ մեծ
Սրի ծայրին է քո,
Իսկ քո հողը մի բուռ
Քո քարակոփ ու կուռ բռունցքի մեջ...

1993, օգոստոս

ՀՈՂՄԱՇՈՒՆՉ ԳԻՇԵՐՆԵՐ ՇԱՐՔԻՑ

* * *

... Եվ բուքն ամբողջ գիշեր, իբրև ձերմակ կախարդ,
Ինձ երգում էր ուրիշ մի աշխարհի մասին.

– Ախ, դու իզուր, իզուր քո երազից փախար,
Իզուր վերադարձար դեպի ասփերն այս հին:

Ամենայն ինչ այնտեղ երանորեն թեթև,
Այնպես կապույտ էին այնտեղ տուն ու կտուր,
Լույսի սյուն էր սոսին, բարդին՝ երգող եթեր,
Եվ մահիկը լուսնի՝ հրեշտակի փետուր:

Հավքեր կային այնտեղ՝ թևերին աստղ ու կայծ,
Եվ մերկորեն չքնաղ ջրահարսեր կային,
Եվ չկային ժայռեր՝ տառապանքից կքած,
Քարանձավներ, որ խուլ ցավից հեկեկային:

– Լուիր, – շնչացի, – դու՝ շրջմուխիկ սին,
Դու, որ ոչ տուն ունես, ոչ հայրենիք, ոչ հող,
Դու ի՞նչ գիտես խանձված այս ժայռերի մասին,
Անձավների մասին՝ գիշերն ի լույս վայող...

Ջուր արեցիր դու, հողմ, գովքը ջրահարսի,
Դու, որ ծանոթ ես լոկ քղանցքներին կանանց...
Դու ի՞նչ գիտես արդյոք Աստվածամոր մասին,
Երա ցավի մասին՝ հավերժորեն անանց:

Եվ իմ և իմ մասին դու ի՞նչ գիտես, անտուն,
Գիտես ինչ է խառնել Աստված մի բուռ կավիս,

Գիտնն, որ ողջ գիշեր ուխտավորն եմ անքուն
Արցունքի ու խղճի, կրակի ու ցավի...

...Եվ բուքն հանկարծ հայացքն իմ աչքերին հառած,
Նայում երկար, երկար, զղջումի պես նայում,
Հետո բրդոտ գլուխն այրվող սրտիս դրած,
Ինձ հետ վայր՛ն է խուլ, եղբայրորեն վայում...

* * *

Հողմը մերթ լալիս, մերթ հեկեկում է ու մերթ մոնչում,
Եղերամայրերն ասես հավաքվել, եկել են ի մի,
Եվ ինչ-որ տեղից, ինչ-որ անհայտից զանգեր են հնչում,
Թախծալի զանգեր, զանգեր թաղումի:

Ու սիրտս է ծակում մթին մի տազնապ` այդ ո՞ւմ են թաղում,
Արդյոք հավատիս սիրեցյալներից ո՞ր մեկն է հանգել...
Լույսը` սիրուհիս, վաղուց է ննջում հողմի դագաղում,
Վաղուց են կապույտն իմ առևանգել:

Դեռ երևանում կա մի հինավուրց, խաղաղ մի փողոց,
Եվ բարդիներ կան, որ գիշերն ի լույս աստղեր են մաղում,
Այնտեղ մի գիշեր խոստովանել եմ սրբազան դողով,
Գուցե ձնեբուքն այդ դողն է թաղում:

Ամառվա արտում հասկը` Հիսուսի սուրբ խոնարհություն,
Եվ մկրտության անբառ աղոթք էր երգը արտույտի,
Հողմ, ո՞ր ես տանում բույրն արդարության, բույրը բարության,
Բույրն անձրևների, հողի, կապույտի:

Մի արծաթաձայն աղբյուր ունեի Լոր գյուղից վերև,
Որ ցերեկն անգամ աստղերի հետ էր խայտում ու խաղում,
Գուցե սառույցը նրա արծաթե ակունքը գերել,
Նրա ցուլցլուն աստղերն է թաղում:

Բայց և մի վսեմ ամպրոպ ունեի, որոտմունք մի բամբ,
Եվ սակայն, հողմդ, որքան մոնչաս, որքան կատաղես,
Դու այդ ամպրոպի տարափն աստղային ու շանթն ապստամբ
Ի՞նչ դագաղի մեջ և ո՞ր կթաղես...

* * *

Հողմ, իմ ահեղ ընկեր, փշաքաղված իմ գայլ,
Գնանք, ու թող մեզ հետ գա և գիշերն այս կույր,
Ես ուզում եմ ինքս նախ ինձ վրա սգալ,
Հետո խաղաղ հանգչել թևերիդ տակ մաքուր:

Ես չգիտեմ, կյանքում ծանոթ ես դու օդուն...
Ներիր, ինչ եմ ասում, ով տառապյալ հոգի,
Դու ինձնից լավ գիտես, որ մաղձ է նա ու թույն,
Բայց կապուտակ է բոցն իբրև Աստծո ոգի:

Ես այս գիշեր ահա ընպել եմ այդ օդուց,
Ընպել լիագավաթ ու ընպել եմ անզուսպ,
Իմ կոպերին հիմա արցունքներ են դողում,
Իսկ սրտիս մեջ միայն Աստծո ոգին է սուրբ:

Ես ուզում եմ քեզ հետ, իմ հարազատ, իմ հողմ,
Թևել ինչ-որ բարձունք, որ մոտ լինեմ Աստծուն,
Որ թաթերիս ելած, ոռնամ աղիողորմ,
Ոռնամ, իրար խառնեմ արցունք, կրակ ու ձյուն:

Ոռնամ կյանքիս վրա, որ գրավ էր դրված,
Իմ երազի վրա, որ աձյուն է մի բուռ,
Այն բառերի, որ իմ ճակատին են գրված,
Եվ վերծանել եմ ես տառապանքով անլուր:

Իմ բարության վրա, որ ինձ անվերջ փորձել,
Փորձություն է դարձել, դարձել հրե օղակ,
Եվ այն մեղքիս վրա, որ ակամա գործել
Ու չեմ ապաշխարել՝ վերջին օրվան թողած:

Սքանչելի մի մեղք, երգ-երգոցյան մի սեր,
Որ և ամռան գիշեր, և լուսաբաց էր ջինջ,
Նա նվաստիս համար կյանքն ու սիրտը կիսեց,
Սակայն, ավաղ, նրան ես չտվի ոչինչ...

Թե ուզում ես, մտնենք քարանձավն այս վայրի,
Ապաշխարեմ, ու նոր ձամփա ընկնենք հանգիստ:
Բայց իզուր է, գիտեմ, նա արցունքով կայրի
Մեղքն իմ սքանչելի, որ շնորհն էր կյանքիս...

Դե, ուրեմն գնանք, վերջին ռիսկ վատնիր,
Որ ինձ վրա փռես քո քնքշությունն ահեղ...
Իսկ թե կապույտ մի բոց իմ տեղը չմատնի,
Դու ոչ ոքի չասես, թե ինձ ուր ես թաղել:

Միայն ծեգին, երբ նա տնից դուրս գա լռին,
Չար երագի թողած տագնապն իր աչքերում,
Հողմ, ալիքդ մաքուր ոտքերի տակ փոփր
Ու իմ տեղակ հայցիր մի ահավոր ներում...

* * *

Բուք, սպասիր մի քիչ, կանգ առ դռանս դեմ,
Մոմս մարեմ ու գամ, ընկերանամ ես քեզ,
Դու մինչև լույս պիտի ահագնանաս, գիտեմ,
Ըմբոստանաս պիտի, ամենայն ինչ հերքես...

Իսկ ես բավ է նստեմ և սպասեմ իզուր,
Թե Հիսուսը կգա, որ իմ դուռը թակի,
Բավ է հուսամ, թե նա կբերի լույսն իր սուրբ
Ու կփոփ վրաս թևը հրեշտակի:

Թե ինձ կդարձնի անանձնորեն թեթև,
Իմ ուսից վար կառնի ապառաժն այս կոպիտ,
Եվ հրաշքով մի պարզ ինձ կտանի եթեր,
Որ աստղե աստղ անցնենք ու սլանանք բոբիկ:

Ո՛հ, այս գիշեր ցավից հերձվածող եմ դարձել,
Ու բողոքն է ոռնում՝ շուրթերին ծուխ ու շանթ,
Հեկեկում են իմ մեջ անպատասխան հարցեր՝
Մահու նման ահեղ, կյանքի նման դաժան:

Բուք, եկ մեկտեղ գնանք, քարափներին բախվենք,
Բախվենք քար ու փշի, ծամենք հող ու մոխիր,
Անդունդների վրա թևատարած կախվենք
Եվ այնտեղից հանենք քնած ոգին ռխի:

Ու թե մեր դեմ հանկարծ ելնի սոված մի գայլ,
Շոյենք ցավը վզի, մրսած դունչը փայենք,
Եվ սկսենք մեկտեղ մերթ խենթորեն ոռնալ,
Մերթ ընկեցիկ մանկան նվաղումով վայենք:

...Բայց և զուր է, գիտեմ, չի հասկանա ոչ ոք,
Որ կորցրած հուսո ամեն նշույլ ու փայլ,
Քարեքար են զարկում ու կաղկանձում անօգ
Մի բանաստեղծ, մի բուք ու սովահար մի գայլ...

ԻՆՉՊԷՍ ՊԻՏԻ ՎԵՐԱՆԱՍ

Մաքուր էի սիրո պես, գորովանքի պես քնքուշ,
Լույսի շուկն էր շուրթիս, ու կապույտն էր կոպիս տակ...
...Արձիճն ինձ զուր խնայեց... Արդեն վաղուց երկնքում
Կճախրեի ես թեթև, իբրև թեթև հրեշտակ...

Եվ կինչեր լույսի մեջ մի ոգեղեն մեղեդի,
Որ կիյուսվեր մայրական աղոթքների շշուկից,
Սուսափյունից իմ բարդու, թախծությունից իմ գետի
Եվ իմ կորած աշխարհի աստղալույսից ու սյուքից:

Կտխրեի ես այնտեղ պատանորեն ու մաքուր,
Հաստատ գիտեմ, որ նույնիսկ չէի մտնի քավարան...
...Ի՞նչ կտանեն ես հիմա՝ անհայտությունը այս կույր
Եվ այս սիրտը վիրավոր, որի հրաշքը տարան...

Ու թե ճախրեմ ես հիմա, պիտի ճախրեմ երևի
Մրրիկներից սևացած ու հալածված հավքի պես,
Շանթի հետքեր կլինեն իմ բզկտված թևերին,
Ծանր մի ցավ կլինի նրանց ամեն զարկի մեջ:

Եվ հոգուս մեջ կլինեն խիղճ ու հավատ մի խաբված,
Դավի խայթեր կլինեն, փուշ կլինի կասկածի,
Ու թևաբեկ կարոտներ, ու բնագղներ տագնապած,
Ու քարացած արցունքներ, որ զսպելով՝ չլացի:

Այդ ծանրության տակ քարե ինչպե՞ս պիտի վերանամ,
Ինչպե՞ս պիտի մերձենամ ես կապույտին ու ևստծուն,
Ինչպե՞ս պիտի ոգևին գարնան ամպրոպ ես դառնամ,
Ինչպե՞ս պիտի վերևից տեղամ մաքուր, որպես ձյուն...

1988

ՊԱՏԱՆՈՒԹՅԱՆ ԳԻՇԵՐ

Հրանտ Թամրազյանին

Մեզ պետք չէր ոչինչ – գինետան թախիծ,
Իսկ հետո՝ կապույտ քր հայացքը, Տեր,
Տողեր էին պետք չարենցյան տաղից
Ու երևանյան ամայի մայթեր...

Ծներ էին պետք անտեր ու անտուն,
Որ մեր հետքերով լուռ ու մունջ գային,
Ու երբ նստեինք, նստեին տրտում,
Ու երբ ոռնայինք, մեզ հետ ոռնային:

Իսկ մեր ոռնոցը շատ էր ահավոր,
Իսկ մեր արցունքը շատ էր անարատ,
Առաջին սիրո թախիծ էր նա որք
Եվ հանձարների մահվան պատարագ:

Մեզ պետք չէր ոչինչ – մի բուռ ծխախոտ,
Որ կուշտ ծխեինք գիշերվա կեսին
Եվ դառնությունն այդ անգոր մի ոխով
Փչեինք այս նենգ կյանքի երեսին:

Զնգում նաիրյան արծաթե առուն,
Աստղերի ցողն էր մեզ վրա կաթում,
Այնքան էինք մենք տխրորեն հարուստ,
Որ լուսաբացն իսկ չէինք նկատում:

...Ի՞նչ է կատարվել, չգիտեմ, ներիր,
Հին մայթերն արդեն մեզ չեն ծանաչում,
Իսկ որբությունն այն անտուն շների
Մեր այս որբության վրա է հաչում...

1990

* * *

Հիմա արդեն աշխարհում հարկավոր չէ ինձ ոչինչ,
Միայն մանուկ օրերի մի վաղորդյան կիսանինջ:

Չիմանայի, չզգայի՝ քնամձ եմ դեռ, թե՞ արթուն,
Բայց զգայի, որ վրաս մայրս աղոթք է կարդում:

Եվ զգայի, որ արդեն ծաղկավորվել նշենին
Ու աղջկա պես եկել և կանգնել է մեր շեմին:

Որ մեր բարդին երկնքի զովերի մեջ սուսափում
Եվ գիշերվա շնորհած կապույտ աստղերն է թափում:

Որ Հրազդանը ձորում շաչ ու շառաչ է դարձել,
Եվ անձավում բնակվող ծեր կախարդն է արթնացել:

Մայրս նայեր ու ժպտար, թե ինչ թեթև եմ շնչում,
Ու մտածեր, որ այդպես լոկ հրեշտակն է ննջում:

Հիմա արդեն աշխարհում հարկավոր չէ ինձ ոչինչ,
Միայն մանուկ օրերի մի վաղորդյան կիսանինջ:

Լոկ մի անգամ աշխարհում նորից այցի գար նա ինձ,
Հետո երբեք, էլ երբեք չարթնանայի այդ քնից:

1993

* * *

Սրտիս թելը, մայրիկ, ախ, բարակել է շատ,
Կոմիտաս է հնչում, ու դառնում եմ արցունք,
Խղձի մահն եմ տեսնում՝ փող եմ գալիս ուժատ,
Դառնում ավեր մատուռ, ծխացող մոմ ու խունկ:

Մի ժամանակ իմ մեջ ալ նժույզներ կային,
Որ սլացան հեռու ծամփաներով փոշոտ...
Գիտեմ, ինձ հետ հիմա նրանք պիտի լային,
Իսկ արցունքը նրանց շատ է տաք ու խոշոր...

Ինչի՞ն էր պետք, մայրիկ, ինձ այսպիսի մի սիրտ,
Այնպիսինը տայիր, որ լիներ կոշտ ու գոց:
Գիտեմ, հեռու ես շատ, բայց քո հեռվից լսիր,
Թե ինչ հառաչ է ձիգ ու ինչ անհույս հոգոց...

Իմ նժույզներ, լավեր, դժբ էլ հեռվից լսեք,
Յուրտ է քավարանն այս, դժոխքն այս շատ է շոգ,
Վերադարձեք, գրկեմ ձեր պարանոցը սեգ,
Ու սլանանք անդարձ ծամփաներով փոշոտ...

1985

ՄԱՀԱՐՈՒ ՀԵՏ

Աջնան շեկ շուկան ողկույզ է ու նուռ,
Գինին եռում է, մեղուն՝ խենթանում...
Իսկ երգն աշուղի տառապանք է կույր,
– Ախ, Մազադան են, մայրիկ, ինձ տանում...

Օրը բուրում է որպես խունկ ու դեղձ,
Եվ թափառում են շուկայում այդ հին
Մի սիրահարված, անտիպ բանաստեղծ
Եվ սիբիրական Գուրգեն Մահարին:

Դեռ պսպղում են նրա աչքերում
Ազահ մի կարոտ ու ազահ մի քաղց,
Տառապում է մի վիրավոր ներում,
Ուրախ մի թախիծ ու տխուր մի կայծ:

Հետո՝ գինետուն, մորմոք է ու մուր,
Թառը լալիս է, դափը խենթանում...
Դրսում երգում է դեռ աշուղն այն կույր,
– Ախ, Մազադան են, մայրիկ, ինձ տանում...

Շուրթիս Մահարուց տողեր են գալիս.
«Արծաթ դույլի մեջ աստղերն են խաղում»...
Մեր երակներում գինին է լալիս,
«Լուսինն է մեռել կապույտ դագաղում»...

Կապույտ գիշեր է: Մամռոտ Գետառից
Գորտերն են երգում միևնույն հանգով:

Բարդին աղոթք է, ուռենին՝ թախիծ,
Օծված աստղերի լուռ հեկեկանքով...

Ու թափառում ենք, ցողն է մեզ թրջում,
Թափառում անվերջ... Եվ գիտենք, սակայն,
Որ մեր հետքերով անհայտն է շրջում,
Եվ քմծիծաղում մի սև ուրվական:

Շրջում է, ձեռքին գերանդին իր կեռ,
Եվ սպասելով աստղերի հունձին,
Ասում է. «Հիշե՛ք, այն բակում, այնտեղ
Այս գերանդիով եմ հնձել Բակունցին»...

Գունատ եթերը մաղում ցուրտ ցողեր
Ու ցողերի հետ սարսափ է մաղում:
Իսկ տողն իմ շուրթին մի բառ է փոխել.
– Աստված է մեռել կապույտ դագաղում...

1947

ԵՍ ԵՎ ԵՍ

Եվ այդպես էլ ապրեցինք՝ ծվատելով մեկ մեկու,
Եվ այդպես էլ երբևէ մենք հաշտ չեղանք աշխարհում...
Ես ուզեցի խենթանալ, փոխվել բոցի ու ոգու,
Դու բռնացար, որ մխամ, դառնամ թաքուն մի այրում:

Երբ հավատն իմ վիրավոր մահանում էր հոգուս մեջ,
Եվ կսկիծը օձի պես դեպի իմ սիրտն էր սողում,
Գիշերները ականջիս շնչացել էս անվերջ,
Որ տառապանքս ես տամ ոչ թե տողին, այլ օղուն:

Ծնվել էի, որ ապրեմ հարբած ու բաց ու անտուն,
Ստիպեցիր, որ դառնամ ես ձգնակեց մի խոհեմ:
Գիշերները, երբ հաճախ իմ հունն էի ես քանդում,
Լուսաբացին իմ դիմաց նորից քարափ էր ու վեմ:

Ինչո՞ւ, ինչո՞ւ ես այսքան շատ ապրեցի աշխարհում,
Պիտի վաղուց կախվեի՝ թողած ցավերն այս վարար,
Բայց մուրհակն իմ չմարված անվերջ մատներս էր այրում
Ու չէր թողնում, որ կապեմ ես օղակն այն փրկարար:

Եվ հիմա ուշ է արդեն, ամեն ինչի համար՝ ուշ,
Եվ կախվելու համար իսկ արդեն ուշ է աշխարհում...
Շուրջս գիշեր է ու հողմ, սև մղձավանջ է ու մուժ,
Իսկ մուրհակն այն չմարված դեռ իմ մատներն է այրում...

1994

* * *

Հնար չկա, մորմոքն իջել, փոխվում է լուռ հեկեկանքի,
Ո՛ր ես, թունոտ իմ սփոփանք, դու՝ ոխերիմ սերն իմ կյանքի...

Դու, որ ցոլում գավաթիս մեջ, իրար խառնում աստղեր ու կայծ
Եվ մեղավոր հողեղենիս աստծո էիր փոխում հանկարծ:

Իջնում էիր երանորեն երակներիս թախիծն ի վար,
Եվ ծովն արդեն թվում ծունկիս, սեր էր թվում աշխարհն արար:

Բայց ուրիշ է ցավս հիմա, էլ չի թվում ծովը ծունկիս,
Հիմա արդեն ինձ կխեղդի անգամ կաթիլն արտասուքիս...

1988

* * *

Այս քանի օր է արդեն հեռախոսս համրացել
Ու նմանվել է այնպես փոքրիկ ու սև դագաղի,
Անգամ լարն այս մետաղի ասես ուզում է լացել,
Բայց զսպել է կոկորդում իր հեկեկանքը աղի:

Դու հեռու ես, դու չկաս... Դու որ նման ես այնպես
Իմ բախտի մեջ բռնկված ոսկեվորիկ կրակի:
Աշնան այս մութ գիշերով ես ինչ անեմ առանց քեզ,
Երբ մրսում են իմ քնքշանքն ու արյունն իմ երակի:

Գլխապտույտ իմ վերջին, իմ վերջին լույս ու խավար,
Վերջին կատար ու անդունդ, վերջին վայելք, վերջին սով...
Զգիտեի սկզբից, որ կդառնաս դու հավատ,
Որ հացի պես կլինես և օդի պես պակասող:

Դու հեռու ես, իսկ դրսում աշնան քամին է վայում,
Քանի՜ աշուն դեռ ունեմ... գիտեմ, որ քիչ են, ախ, քիչ...
Բայց քո աչքերը շողուն դեռ աստղորեն են նայում,
Եվ քո մարմինը ջահել դեռ սրսփում է մեղքից:

Ուշ հասկացա քեզ, ավաղ, ուշ հասկացա ամեն ինչ,
Եվ ամեն ինչ հասկացա անակնկալ մի ահով,
Որ իմ բախտն է ցուցում քո աչքերի մեջ այդ ջինջ,
Եվ ինչ խաղով սկսվեց, կվերջանա իմ մահով:

Ու երբ գնամ, երևի ապրես ուրիշ մի սիրով,
Սիրտդ ուրիշ կարոտի ու քնքշանքի դեմ բացած,
Բայց եթե դուրդ հանկարծ ծեծեն աշնան գիշերով,
Բաց, սիրելիս, դա երգիս մանուկներն են որբացած...

1986

ԱՆԵԾՔ ԴԱՐԱՎԵՐՋԻ

Գիտեմ, ես չեմ հասնի շառագունող դարին,
Գավաթս չեմ զարկի արշալույսին նրա,
Այս է բաժինն իմ լոկ, այս մեծն, ամոթալին,
Այս մոգությունը սև՝ հագին լույս ու հրաշք:

...Տուն ունեի այնտեղ – Իմ Ավետյաց հողում,
Հիսուսն ինքն էր հաճախ նստում դռան քարին,
Երբ ելնում էր տեղից, մաշված քարն այն շողում,
Շառավիղ էր նետում, որ շատանա բարին:

Շառավիղն այդ, ավաղ, իր տիրոջ պես խաչվեց,
Եվ դարն այս լուռ մնաց, խուլ էր ասես ու կույր,
Ու ներիր ինձ, ներիր, ով պատգամողդ մեծ,
Թե անեծքով պղծեմ շրթունքներն իմ մաքուր...

...Իմ մանկության ձորում խենթություն էր կապույտ,
Գետափը զուտ ոսկի, զմրուխտ էր ու հակինթ,
Եվ տարերքը գետի ծիածան էր կապում,
Որ մանկությունը մեր անցներ նրա տակից:

Ո՞ր եք, ո՞ր եք հիմա, խաղընկերներ իմ ջինջ,
Ոտաբոբիկ սրբեր, դարն այս ինչեր արեց,
Նախ ձեզ վրա փլվեց իբրև հուր ու արձիճ
Ու հետո մերկ կնոջ իր ցոփությամբ պարեց:

...Եվ ունեի մի սուրբ, մի արարիչ թախիծ,
Որից երգի մաքուր աստղալույսն են քամում,

Բայց իմ թախծի վրա հսկում ժանիքն ահի,
Իմ ներշնչման վսեմ վայրկյաններս էր ծամում:

Այս էր դարն իմ... Ու սա թիարան էր երգի,
Հավատո նենգ քննիչն իր վճիռն էր կարդում,
Որ չընկնի ոչ մի սերմ հայրենական հերկին,
Ու չձախրի օդում ոչ մի ոսկե արտույտ...

Եվ անիծում եմ քեզ, դարըդ ամենաչար,
Եվ անիծում եմ ես հրաշքներդ դաժան,
Դու՝ արքորյալ հավատ, արդարություն խաչյալ,
Դու՝ ճառագայթ մահու և օրհասի դու ժամ:

...Գիշերներս հիմա զառանցանք են ու թույն,
Երակների մեջ իմ՝ հողմի մահերգն է ժանտ...
– Տեր, առաքիր վերից Քո տառապյալ Որդուն,
Բայց խաչի տեղ ձեռքին դիր ռխի շեկ մի շանթ...

1994

ԵՐԱՆԻ ԷՐ ՔԵԶ...

Իմ գրապարտիչներին

Եվ այնպես հաճախ,
Երբ արթնանում ես առավոտ կանուխ,
Որ հերկերիդ մեջ ցորյանը ցանես քո խոսք ու հանգի,
Ինչ-որ դարանից դավի ու ստի նետը սլանում
Ու մխրձվում է թրթռոցի մեջ քո ներշնչանքի:

Դու՝ հավատացյալ, –
Խոստովանանքիդ սուրբ ժամն են պղծել,
Դու՝ լուսի ճամփորդ, –
Քո շողքն են առել սմբակների տակ,
Զառամ շուրթերով անունդ են ծամում խեղկատակ մի ծեր,
Ինչ-որ գեր առնետ,
Արնոտ աչքերով ինչ-որ ստահակ...

Երանի էր քեզ, ոգի դիվական, որ ձեռնոց նետած
Դարի դեմ, դավի, խարդավանքի դեմ ու սրտմաշուկի,
Կանգնեցիր հպարտ,
Ու երբ սրտիդ մեջ գնդակը տնքաց,
Ամպրոպն իր շանթով քեզ օրհնաբանեց լանջին Մաշուկի:

Բայց այս գալարվող,
Այս խայտաճամուկ նենգությանն ի տես,
Որ ունի միայն ծամածուռ երախ ու փտած ժանիք,
Կմոլորվեիր՝ ո՞ւմ դեմքին մաքուր ձեռնոցդ նետես,
Ո՞վ է քո պատվո դատին արժանի...

Ի՞նչ ասեմ, ավաղ,
Այստեղ էլ անգամ բախտն ինձ չժպտաց,
Ոսոխ էր տալիս – թող հաներ իմ դեմ ոհմական իսկ գայլի,
Բայց այս առնետը, Տեր իմ, սաստիկ է լպրծուն ու թաց,
Խեղկատակն այս ծեր շատ է նողկալի:

Ի՞նչ անես, ասա,
Պատվո օրենքը վաղուց է ջնջված,
Ճար չունես, պիտի լոկ վերից նայես ու քմծիծաղես,
Ամեն առավոտ արթնանաս նորից մաքուր, ներշնչված
Եվ հերկերիդ մեջ ոգուդ սրբազան ցորյանը շաղես...

1994



**ԳԻՐԻՔ ՈՂԲԻ
ԵՎ ԳՈՎԿԻՔԻ**



*Չայնիվ առչորման քեզ բարեբանեմ,
Ծարավ ոգեղեն,
Քեզ, որ ինձ համար ճակատագիրը ես,
Տաժանք ու գեհեն:*

ՈՂԲ ՄԵՂՎԻ

Սգացեք թախծության ցողով,
Ծաղիկներ ամենայն գույնի,
Սգացեք, հարսնացյալ ծառեր,
Սգացեք բողբոջներ բեղուն,
Աշխարհի դաշտերի վրա
Նեկտարը փոխվում է թույնի,
Աշխարհի ճամփեքի վրա
Մեռնում է բարության մեղուն:

Աշխարհի արարման օրից,
Աշխարհում լեղին է առատ,
Աշխարհի արարման օրից,
Թախիծ էր ու մաղձ էր դեղին,
Եվ ցավից արարվեց մեղուն՝
Մի փոքրիկ, ոսկեթև հրաշք,
Որ այդ ծով դառնության վրա
Գեթ մի պուտ քաղցրություն հեղի:

Իմ փոքրիկ, ոսկեթև մեղու,
Դաշնության գաղտնիք դու անլույծ,
Այդ ինչպե՞ն նյութեցիր, ասա,
Անսպառ քո սերն ու բարին,
Այդ ինչպե՞ն ժայռերի կողից
Կախեցիր դու ծանր մի լույս,
Որ իր հաստ շուրթերով լիզի
Ու մի քիչ մարդանա վայրին...

Դու զարմանք, դու արմանք-զարմանք,
Խայթ ունես, չես խայթում սակայն,
Թևում ու թռչում ես հեռու
Քեզ հսկող ցավից ու դավից,
Իսկ եթե չի մնում հնար,
Ու մեկին խայթում ես հանկարծ,
Դու ինքդ ես մահանում, իմ մեծ,
Քո խղճի տանջալի ցավից:

Աշխարհում Աստծո որդին
Երևի հենց դու ես, որ կաս,
Շնորհում, բաշխում ես առատ
Ու դեմը չես հայցում ոչինչ,
Ինչքան է կարկուտը չարի
Քեզ խաչել ծառերին ծաղկած,
Բայց հառնել, նյութել ես նորից
Քո լույսը, որ ծանր է ու ջինջ:

Բարության դու անվարձ մշակ,
Բարության արարիչ ճարտար,
Դու՝ թևող գթություն ու սեր,
Դառնության դու անձառ լուծիչ,
Դու՝ ծաղկի ուխտավոր հոգնած,
Դու՝ ծաղկի ձգնավոր արդար,
Դու՝ կյանքի զորություն ահեղ,
Բայց անզոր, իբրև գութ ու խիղճ:

Գարուն է... իմ այգում ահա
Դեղձենին արբունքի հասել,
Չգում եմ, հազիվ է զսպում
Իր կիրքն ու քնքշանքը վայրի,
Թե չգաս ու նրա ծոցում

Չդառնաս դու տարփանք ու սեր,
Հարսնության իր քողը նետած,
Կդառնա սգավոր այրի:

Բայց չկաս... Շարմաշուղ ծաղիկ,
Վեր պարզիր շեփորը քո հիր,
Ղողանջեք, ծաղիկներ զանգակ,
Թող հնչի ձեր գույժը վսեմ,
Մասրենի, սպիտակ բոցով
Աստրծո ոտքերը խանձիր,
Որ մի պահ աշխարհին նայի
Ու սանձի արհավիրքն այս սև...

Բողոքի անողոք ձայնով
Որոտա՛, բողբոջդ բեղուն,
Հնչեցնե՛ք տագնապով ահեղ,
Ծաղիկներ ամենայն գույնի,
Աշխարհի ճամփեքի վրա
Խղձի պես մեռնում է մեղուն,
Աշխարհի շուրթերի վրա
Մեռունը փոխվում է թույնի...

ՈՂԲ ՉԱՐԵՆՑԻ

Քնած է քաղաքը: Դրսում
Մրսում է սարսափը դեղին,
Մասիսի վիհերին կախված,
Թևաթափ ասուպներ մեռան:
Լսում եմ քո ձայնը.

– Օ, Տեր,
Մեկնիր ինձ բաժակդ լեղի,
Թեև դեռ շուրթերիս վրա
Կիսատ է Աղոթքը լեռան...

Ներիր ինձ, հանձարդ խաչյալ,
Ուշացած այս ողբս ներիր,
Տասնևհինգ տարիս էր միայն
Այն թվին բոլորել հագիվ,
Եվ գուցե այն օրը, երբ դու
Հանգել ես շնչի տակ նեոի,
Ես անգետ ծիծաղել, վազել,
Քաշել եմ աղջկա մազից...

Հետո իմ տեսիլքն այդ տեսել,
Սև խաչ է, ու դու ես վրան,
Կողեր են նիհար ու խոցված,
Ճակատ է արդար ու դալուկ...
Նայում ես, քո Կարսն է հեռվում,
Հանգչում է արևը նվաղ,
Հանգչում է դողանջը զանգի,
Որ այնպես նման է լալու:

Խշշում են ծառերը այգու,
Մաղում է թախիծը դեղին,
Աղջիկը քո վարդը չառավ –
Մորմոք է ու ցավ է անել...

Աշխարհում երեքը միայն՝
Մայր հողը, արգանդը ցեղի
Ու մեկ էլ կրակը գիտեն,
Որ իրենք հանձար են ծնել...

Եվ ինքդ, և ինքդ գիտես,
Չի ծանր է քո սիրտը սաստիկ,
Արյունդ ցավում է սաստիկ,
Սաստիկ է թախիծը մխում,
Մերթ դալուկ աղջիկն է կանչում,
Մերթ հեռու ցլանքը աստղի,
Կանչում է ոգի մի անհայտ,
Որ շատ է վսեմ ու տխուր...

Գնում ես, նախձիր է ու մահ,
Հողմերը ահեղ են, ախ, շատ,
Գնում ես, հետևում թողած
Ցնորքն ու տասնևութ տարիդ,
Աշխարհում լոկ չորսդ գիտեք,
Որ այդպես վտիտ ու գունատ
Քայլում է հողմերի միջով
Մարգարեն ու սուրբը դարի:

Եվ հիմա՝ այս խաչը ահա,
Եվ հիմա՝ զնդանը այս ժանտ,
Լույսի տեղ արյուն է կաթում
Քո արդար, քո խաչյալ աջից...
– Տեր, մեկնիր, աշխարհում արար
Կամ պատիժ առավել դաժան,
Քան խաչվել սեփական ուխտի,
Սեփական հավատի խաչին...

Եվ մեկնիր, այդ ինչպե՞ս եղավ,
Որ դավը գումարեց գնդեր,

Եվ խիղճը կարծրացավ այնքան
Որ դարձավ պողպատ ու արձիճ,
Որ սուտը բարձրացավ ատյան
Ու վայեց քսությանը ընտել,
Իսկ երգը թխարան նետվեց
Կամ փոխվեց վաճառյալ հարձի:

Լոում է քաղաքը: Դրսում
Մրսում է սարսափը դեղին,
Մասիսի վիհերին կախված,
Թևաթափ ասուպներ մեռան:
Լսում եմ քո ձայնը.

– Օ, Տեր,
Մեկնիր ինձ բաժակդ լեղի,
Թեև դեռ շուրթերիս վրա
Կիսատ է Աղոթքը լեռան...

Այդ պահին, ես գիտեմ հաստատ,
Սգացել զանգերը Կարսի,
Լացել է արգանդը ցեղիս
Ու ցեղիս արյունը հրե,
Եվ դարի հողմերին տված
Ալ բոցն ու սև ծուխը վարսի,
Լացել է կրակն այն թաքուն,
Որ գիտե հանձարներ սերել...

Ու սուգը ձգվում է դարձյալ,
Լալիս է շիրիմդ անհայտ,
Հեռավոր լույսերից ելած
Լալիս է մանուկը գալիք,
Փշրված հրաշքի նման
Լալիս են երգերդ կիսատ,
Եվ անհայտ հրաշքի նման
Չգրված երգերդ են լալիս...

ԳՈՎՔ ԻՄ ՈՍՈՒՄԻ

Ձայնիվ բերկրության քեզ բարեբանեմ,
Իմ թունտոս ոսոխ,
Քեզ, որ նենգության աչք ես արնամած,
Նախանձ ես ու ոխ:

Իմ ամբողջ կյանքում սիրտս էր ծվատում
Տանջող մի կասկած,
Միթե Երկնայինն ինձ չի շնորհել
Թեկուզ թույլ մի կայծ:

Միթե իմ գրած երգի ոչ մի տող
Չի փոխվել շողի
Ու չի խոցոտել սիրտն ինչ-որ մաղձոտ
Ապաշնորհի:

Եվ տրտում էի – ամեն բանաստեղծ
Իր դահիձն ունի,
Իմն ո՞ր է սակայն, մատնացույց արա,
Տերդ անհունի...

Բայց ես՝ միամիտ, ինչ իմանայի,
Որ այն պահերին,
Երբ տառապանքով բառ էի փնտրում
Լույսերում վերին,

Երբ երանելի ներշնչանքի մեջ
Ու տանջող դողի,
Անկեզ մորենուց հուր էի հայցում,
Որ փոխեմ տողի,

Երբ այգաբացին արտույտների հետ
Լույսը սաղմոսում
Կամ գիշերն ի լույս Նարեկա սրբի
Հետ էի խոսում,

Դահձիս արյունը փոխվում է մաղձի,
Փոխվում է թույնի,
Ու ժանիքներն է սրում նա անվերջ,
Նման դաշույնի:

Եվ արդ, ի վերջո, անգոր զսպելու
Մաղձ, նախանձ ու թույն,
Հայտնվել է նա՝ դեմքը սևակնած,
Աչքերը՝ արյուն:

Փառք քո հայտնությանն, իմ բարի դահիձ,
Իմ նենգ խղձալիս,
Ինքդ էլ չգիտես, թե քո հայտնությամբ
Ինձ ինչ ես տալիս:

Ինքդ էլ չգիտես, որ կասկածի փուշն
Իմ սրտից հանում,
Ու քո նենգությամբ դու իմ ինքնության
Ներբողն ես անում:

Որ նոր հավատ ես գումարում դու իմ
Ոգեղեն ջանքին,
Նոր դող ու թրթիռ, նոր լույս ու կապույտ՝
Իմ ներշնչանքին:

Օրենք է, կյանքում ամեն բանաստեղծ
Իր դահիձն ունի,
Շնորհապարտ եմ շնորհիդ համար,
Տերդ անհունի...

ԳՈՎՔ ԾԻՐԱՆԻ ԾԱՌԻ

Ձայնիվ ցնծության քեզ փառաբանեմ,
Ով ծառդ ազնիվ,
Հայոց ծառերի մեծամայրդ սուրբ,
Պայծառդ ազնիվ:

Ո՛վ գիտե, գուցե դեռ դրախտից են
Կորիզդ բերել
Կամ ներքև ընկած մի ոսկեվորիկ
Աստղից ես սերել:

Քանզի պտուղդ ինչ-որ երկնային
Համ ու հոտ ունի,
Եվ քո բնի մեջ վերուվարում են
Լույսերն անհունի:

Չգիտեմ, գուցե ինչ-որ մի անհայտ
Ու խոր փչակում
Հրե ծաղկի պես ինչ-որ գաղտնիք ես
Ինձանից փակում:

Խորշակ է եղել, եղել խանձահոտ
Մորեխ ու խավար,
Բայց խորշակի մեջ դու՝ կանաչ աղոթք,
Դու՝ ալ վարդավառ:

Հողմեր են շաչել, որ քեզ տապալեն,
Բզկտեն քո դին,

Բայց քո բնի մեջ չի լուել լույսի
Մաքուր մեղեդին:

Գարնան ամպրոպից դու խլել զորեղ
Չարկը կայծակի,
Քո արմատին ես շնորհել, որ նա
Որձաքար ծակի:

Արշալույսների շիկնանքն ու շողերն
Անվերջ հավաքել,
Սաղարթներիդ մեջ ու բնիդ մեջ ես
Գաղտնորեն փակել:

Տիրամայր դու սուրբ, խոցված ամենից
Ահեղ կայծակով,
Եվ հարս երկրային, ծոցիկդ լեցուն
Արևածագով:

Արմատ բարության ու համբերության,
Ծառ իմ ծիրանի,
Հավատիս ուսին՝ դու արշալույսի
Ծփուն ծիրանի...

ՈՐԲ ԱՆՁՆԱԿԱՆ

Թե Հայոց աշխարհում դեռ կա
Մի թաքուն, մի ծպտյալ ծմակ,
Թե դեռ կան անձավներ անհայտ,
Թե անհայտ անդունդներ դեռ կան,
Վեր կենամ, ընթանամ տրտում,
Ընթանամ մի թեթև խմած
Ու սգամ ինքս ինձ վրա,
Ինքս ինձ հառաչեմ երկար:

Նախ սգամ իմ արյան վրա,
Իմ այս հին ու ցաված արյան,
Որ իմ մեջ հեկեկաց՝ որպես
Իմ ցեղի առեղծվածն անլույծ...
Եվ սգամ հույսերիս վրա,
Որ դարիս հողմերը տարան
Ու թողին այս բողոքն անզոր,
Ու թողին տառապանքն այս լուռ...

Ասում են աշխարհի վրա
Ինչ-որ տեղ կա լացի մի պատ,
Երևի արցունքից մամոռել,
Երևի սևին է տալիս,
Երևի հողմերով տարված,
Իմ հույսի աղջիկը ծվատ
Գնացել, փարվել այդ պատին
Ու իր սև կսկիծն է լալիս:

Եվ սգամ իմ խղճի վրա,
Իմ ցաված, վիրավոր խղճի,
Երևի աղբյուրի նման
Նա պիտի ծիծաղեր ու լար,
Երևի նմանվեր պիտի
Նա մաքուր լեռնային լճի,
Որի մեջ կապույտը միայն
Եվ Աստծո գաղտնիքը ցուլար...

Ասում են, կա ահեղ մի օր,
Կա խղճի դատաստան ահեղ,
Եվ ոչ ոք չի կարող գտնել
Նրանից փախչելու հնար,
Ուրեմն, երկարիր, հառաչ,
Ուրեմն, արցունքներ, սահեք,
Որ մի քիչ մաքրված, զտված
Ու մի քիչ գեղեցիկ գնամ...

1986-1987

ԵՐԲ ԵՍ ՀԵՌԱՆԱՍ ...

Երբ ես հեռանամ, կտանեմ ինձ հետ միայն ցավն իմ կույր,
Եվ տենդն այս վայրի, որից անընդհատ շուրթերս են ձաքել,
Իսկ մնացյալը, որ խիղճ է արդար ու սեր է մաքուր,
Կուզեի այնպես ես ձեզ կտակել:

Կտակել դորձն այն, որով պատանու մատներն են դողում,
Երբ նա ուզում է աղջկա կրծքի կոծակը քանդել,
Հրեղեն շողն այն, որ թրթռում է մի կաթիլ ցողում
Եվ այդ կաթիլը դարձնում կանթեղ:

Եվ այն սուրբ ձյունը, որ անհայտության հեռու ոլորտից
Մանուշակների հրաշքն ու հասկի ոսկին է բերում,
Եվ այն հնչյունը, որ ծնվում ինչ-որ հեռու կարոտից
Ու հավքի փոխված ձախրում է վերում:

Եվ բարդիները՝ կանաչ հավատի ցուցլուն մոմեր,
Եվ գետակները, որ ցող են ցանում մանկանց ոտներին,
Մասրենիները, որ բոցերն իրենց երկնքին ձոնել,
Շիկնանք են տալիս առավոտներին:

Եվ քարափները, որոնց կապուտակ քարանձավներում
Բնակեցրել են իմ երազների կախարդ մոգերին,
Եվ խաչքարերը, որ ասես լուսե խիղճ են ու ներում
Ու միշտ խոսել են ինձ հետ ոգևին...

Եվ իմ տունը հին, իմ տունը խլված... Երբ արդարության
Ձեռքը բաց անի ձամփաներն այն փակ, ախ, եղեք բարի,
Գնացե՛ք, գտե՛ք մամռած թախիծը դարավոր այդ տան
Ու սիրտս դրե՛ք սեմի սուրբ քարին...



ԴՈՒՄՆԵՐ



...Որ խաչքար դառնամ
Իմ մարմնի խաչով:

ՌԵՔՎԻԵՄ

Ա

Ես եկել էի, որ այստեղ լռեմ,
Ես եկել էի, որ չոքեմ ծունկի,
Քարանամ այստեղ առանց արցունքի,
Հետո իմ փոքրիկ հողը հեռանամ,
Գլուխս դնեմ նրա քարերին
Ու թե լամ՝ այնտեղ,
Մորմոքամ՝ այնտեղ...
Եվ սակայն ինքս էլ չիմացա՝ ինչպես
Շուրթերս դիպան աղի տաք համին...

Ախ, ոսկորները...

Դեր-Չորի քամին

Մանկան ոսկորից սրինգ էր սարքել
Եվ արշալույսի խաղաղության մեջ
Սուլում էր մահվան անմահ նվագներ:
Սրինգն էր սուլում
Ու տեսիլներ էր կախում լազուրում:
Պատահոտվում էր պատանքն ավազի,
Ավազի տակից ելնում էր, ծփում
Մի խարտյաշ մանկան գանգուր մի ալիք...

– Ախ, գնանք, որդի,

Քելք արա, ո՛րչ է...

– Մերիկ, ախ, մերիկ,

Ոտիկս է ցավում,
Այս ճամփան՝ ավագ,
Այս ճամփան փուշ է,
Ու ծարավ են ես,
Ծարավ են,
Ծարավ...

Դեր-Չորի քամին
Մանկան ոսկորից սրինգ էր սարքել
Եվ նվագում էր ծարավի, մահվան
Անմահ նվագներ:

Ես եկել էի, որ այստեղ լուեն,
Ես եկել էի, որ չոքեմ ծունկի,
Քարանամ այստեղ առանց արցունքի,
Բայց ազոավները...

Ինչ ունեն արդյոք սև ազոավները
Չոր ու ամայի այս անապատում,
Որ գալիս, լույսը սևով են պատում,
Ճախրում են, ծչում, կոնչում են չոր,
Կտուցով քանդում ավազը տոչոր,
Բախվում են իրար, թևին են տալիս,
Ասես թե որս են խլում իրարից...

Ու ես հիշեցի.
Երկար են ապրում ազոավներն այս սև
Ու հեռվից կրկին այստեղ են հասել,
Որ կերակրվեն վաղեմի հուշով,
Որ մանկան մաքուր աչուկներ հանեն,
Սրտեր ծվատեն
Ու խրախձանեն...

Ագռավներ, սակայն,
Իզոյր եք եկել,
Նրանք վաղուց են մոխրացել այստեղ,
Վաղուց են դարձել փոշի ու աձյուն,
Եվ ձեր թևերը զուր են շառաչում
Այս դեղին, այս սև
Ավազի վրա՝
Այս անծայրածիր գերեզմանոցի...

Բ

Աշխարհում՝ անթիվ գերեզմանոցներ,
Անթիվ շիրիմներ՝ հողագունդն ի վար...
Եվ սակայն շիրիմն իմ ժողովրդի,
Իմ մի բուռ, փոքրիկ իմ ժողովրդի,
Ամենամեծն է
Աշխարհում արար...

Դեր-Չորի քամին
Մանկան ոսկորից սրինգ էր սարքել
Եվ արշալույսի խաղաղության մեջ
Սուլում էր մահվան անմահ նվագներ:
Սուլում էր, հուշում,
Որ ավազի տակ
Մի կարմիր-կանաչ
Ու մի կապուտակ
Երազ կա թաղված...
Եվ անապատը,
Որ հսկա ու փակ
Մեռյալի կոպ էր թվում իմ աչքին,
Շարժվում էր ասես,
Ու այն կապուտակ,
Այն կարմիր-կանաչ
Երազն էր ցուլում...

...Գյուղի բարդին էր կատարն օրորում,
Ու լույսերի մեջ արևագալի
Ձիլ զրնգում էր օրհներգը կալի:
Արեգակի մեջ ու մղեղի մեջ
Որոճում էին եզներն սպիտակ,
Եվ մանուկների ատամների տակ
 Համ էր ցորենի,
 Համ էր արևի
Ու համ էր կաթի...

Տաք մղեղի մեջ ու արեգակի
Հարս ու աղջիկներն օրորվում էին
Ու ցորեն էին էրնում մաղերով,
Աշխարհի վրա ասես շաղելով
 Սեր ու բարություն:

Հետո գիշերը՝ սոսափյունի մեջ,
Աստղալույսի մեջ ու անհունի մեջ
Կավե կտուրներն անրջում էին,
Եվ հոգնած, փակված կոպերի տակով
 Լուռ շրջում էին
 Երազանքները՝
Հույսերի ոսկե աստղերով առլի:

Ծեկ անապատը
Դեղին ու հսկա կոպ է մեռյալի,
Որ իր տակ հավետ ու անդարձորեն
Թաղել էր արև ու լույսի ցորեն,
Թաղել տերևի թրթիռ ու սոսափ,
Ողկույզի շնորհ, ջրերի հոսանք,
Հողի բուրումներ, մրգի բարություն,
Մեղվի տաք տքնանք ու համբերություն,

Արարչությունն է թաղել մայր հողի
Եվ արարողի երազն է թաղել:

Սուլում է քամին ու երգում ահեղ,
Որ ավազի տակ
Թաղված են աստղեր ու մարգարեններ...

Եվ ավազները շարժվում են ասես,
Եվ ավազներից ելնում է ահա
Մի ասպետական կորովի հասակ,
Հեթանոսորեն գեղեցիկ մի այր
Ու շշնջում է լուսե բարբառով.
– Ես կարող էի դարիս ձակատը
Բանաստեղծության աստղերով զուգել,
Բայց իմ ձակատը փշրեցին քարով...

Սուլում էր քամին ու երգում ահեղ,
Որ ավազի տակ թաղված են երգեր
Ու մարգարեններ...

Եվ ավազները շարժվում են ասես,
Եվ ավազներից ելնում է ահա
Մի սքեմավոր, սևավոր մի այր:
Սև թևերի պես սքեմը բացած,
Սավառնում է նա իբրև սև մի տենդ,
Սավառնում իբրև ոգու ցավը խենթ,
Սավառնում, հաճում, հետո թևաբեկ
Ծունկի է իջնում նա անապատին,
Ծունկի է իջնում
Իբրև խելագար,
Սևասուն սամում...

Ավազ է առնում նա անապատից,
Մոխիր է առնում նա անապատից

Ու ծամում,
Ծամում...

Եվ հետո
Հանկարծ
Մոխրից սևացած նրա շուրթերին
Թառում են, դողում լույսերը վերին,
Եվ սկսվում է
Մի սուրբ պատարագ...

Հողմեր են սուլել,
Սլացել վայրագ,
Չվել են տարիք,
Եվ ավազներ են չվել տարագիր,
Բայց անապատում ալիքվում էր դեռ
Չնգացող ցավը,
Չնգացող ծուխը,
Չնգացող բոցը
Այդ պատարագի...

Եվ պատարագի ալիքի միջով
Դեռ քայլ են անում մի խարտյաշ մանուկ
Ու ցամքած մի մայր...

– Ախ, գնանք, որդի,
Քելք արա, ուշ է...
– Մերիկ, ախ, մերիկ,
Ոտիկս է ցավում,
Այս ճամփան՝ ավագ,
Այս ճամփան փուշ է,
Ու ծարավ եմ ես,
Ծարավ եմ,
Ծարավ...

Ակնա ջրերը, ախ, արար-վարար,
Ակնա ջրերը կապուտաչ էին,
Ակնա ջրերը քարափներն ի վար
Զրնգոց էին ու կարկաչ էին,
Ակնա ջրերը
Աստղերի անհայտ
Ակունքից գալիս
Ու լալիս էին,
Ծիծաղից լալիս...

Արևն ընկնում էր ականաղբյուրի մեջ
Ու սառնությունից սարսռում, դողում,
Իսկույն ծաքում էր,
Ակնա ջրերի պաղպաջյունը ջինջ
Շուրթերիդ վրա աստղային կում էր...
Երկրի անձրևը, ախ, արար-վարար
Ու կապուտաչ էր,
Երկրի անձրևը քարափներն ի վար
Շունչ ու շառաչ էր,
Երկրի անձրևը երակ-երակ էր,
Երկրի անձրևը կապույտ լեղակ էր,
Երկրի անձրևը հորդ էր, հեղեղ էր,
Եվ ահեղ կիրճը նրա դեմ նեղ էր,
Գետը ուռչում էր տեղատարափից
Եվ հովազի պես
Վեր էր մագլցում
Ժայռ ու քարափից:
Տեր, այդ անձրևից մի երակ տայիր,
Գեթ մի շիթ տայիր,
Խարտյաշ մանկիկը ընկել ավազին,
Հևում է, նայիր,
Հևում, լռում է

Ու մարմրում է...
Բայց դու՛ խուլ,
Դու՛ կույր,
Դու այս աշխարհի
Խիղճը անմաքուր,
Մայրը քեզանից չի հայցում ոչինչ,
Լոկ վեր է հղում սայրասուր մի ծիչ,
Հետո երգում է,
Երգում ծիծաղով,
Ցնորված երգում,
Որ կախօրրան է պարտեզում կապել
Ու վրան վարդի թերթեր է թափել,
Սոխակին կանչել, ասել է. «Արի՛
Ու քունը հսկիր իմ մինուձարի»...

Սակայն սոխակի թևը չէ, օ, ոչ,
Ավազի թևն է
Իջնում զավակին,
Ագռավի սևն է
Իջնում զավակին...

Գ

Իմ Արարատյան սրբազան հողից
Երկնքի միջով ես այստեղ հասա...

Ու եղավ մի ժամ, մեծ, ահեղ մի ժամ,
Երբ ինքնաթիռի շուքը հեշտասահ
Եվ իմ հայացքը շոյում էին լուռ
Մեզանից հատված,
Մեզանից զատված
Մեր հովիտները կանաչ ու տխուր...

Ու ես իմ կյանքում առաջին անգամ
Զգացի, երկիր, քո ձգողական
Ուժը ահավոր:
Զգում էին ինձ,
Զգում էին վար,
Մեր հովիտները,
Վիհերը խավար,
Ճանապարհները մեր կայծակնաձև,
Որ շառաչել են մեր պատմության հետ
Ու ահագնացել...
Բայց լուռ են հիմա,
Թափուր են հիմա...

Մշուշ կար ցածում,
Մշուշ մի թեթև,
Ու ինձ թվում էր, թե դա ծուխն է լուրթ
Այդ հսկայական զոհասեղանի,
Որ մխում է դեռ:
Ու ես երկնքից Եփրատը գտա,
Ու լեռնապարը գտա Տավրոսի,
Ու գտա մի վանք,
Որ թվում էր, թե
Ուր որ է պիտի հայերեն խոսի:

Ու շեներ տեսա հովիտներն ի վար,
Ու շեներ տեսա լանջերին քարոտ,
Ո՞րն ես, Արաբկիր, իմ ծննդավայր,
Իմ արյան մորմոք, իմ արյան կարոտ...

Ու ես երկնքից իջել էի վար,
Թափառում էի երկրում իմ ավեր
Եվ ոգում էի անդունդներն ի վեր.

Մեր շեներն այստեղ
Ավերվում են լուռ,
Ավերակներս են
Ինձանից խլել...

Ակնա ջրերը
Հոսում են տխուր,
Աղբյուր-ակներս են
Ինձանից խլել...

Աստղիկը մերկ է
Մշո մուժի տակ,
Իմ աստվածներն են
Ինձանից խլել...

Միերի դուռը
Մնացել է փակ,
Առեղծվածներս են
Ինձանից խլել...

Այստեղ հանգչում է
Շիրիմը պապիս,
Պապիս ածյունն են
Ինձանից խլել...

Ահեղ եփրատը
Չարկում է ափին,
Այդ շառաչյունն են
Ինձանից խլել...

Թափառում էի հովիտներն ի վար,
Դեգերում էի անդունդներն ի վեր...
Մշուշն էր ծփում.
Մշուշ չէր դա, ո՛չ,

Դա ծուխն էր կապույտ
Այն հսկայական զոհասեղանի,
Որ մխում է դեռ:
Եվ աչքերիս մեջ արցունք էր դառնում
Ծուխն այդ մահահոտ:
– Ախ, իմ հայրենիք,
Իմ ծննդավայր,
Իմ ասպատակված,
Իմ որբ, իմ ցավոտ,
Գնում եմ դեպի շիրիմդ հսկա,
Որ ավազներին ընկնեմ ծնկաչոք,
Որ լռեմ այնտեղ,
Քարանամ այնտեղ,
Որ խաչքար դառնամ
Իմ մարմնի խաչով...

Դ

Արևը ելել,
Իմ գլխի վրա կանգնել հսկումի
Եվ ինձ ձուլել էր իմ ստվերի հետ:
Անապատային շիկացած մի տենդ,
Իմ ներբանների մաշկը այրելով,
Հասնում ծակատիս
Ու բոցկլտում էր ծակատիս վրա:
Ինձ քամի էր պետք, ու քամի չկար:
Ես ուզում էի քայլել ավազով,
Բայց ձայներ էին խձձվում ոտքիս,
Եվ հառաչանքի թեժ բոցերն էին
Կտրում իմ ծամփան:
Ջուր էր աղերսում անապատը շեկ,
Եվ անապատի ալիքները շեկ
Մարող, մարմրող մանուկների պես
«Ջուր» էին ձջում...

Ես ուզում էի շնչալ նրանց.
– Ելեք, մանուկներ,
Ես ջուր կբերեմ ձեզ Արագածից,
Մեր աղբյուրների սառնորակ լացից
Ալիք կբերեմ,
Որ դնեմ այրվող ձեր ձակատներին,
Հովեր կբերեմ,
Չովեր կբերեմ,
Սոսափ կբերեմ,
Չով ամպ կբերեմ,
Որ ձեզ պարուրեմ...

Ես ուզում էի այդպես շնչալ,
Եվ սակայն ձայնս ելնում, դիպչում էր
Անապատի պես իմ չոր հագագին
Ու խլանում էր,
Մարում տխրագին:

Կանգնել էի ես
Համրությամբ կքած,
Քարե արցունքիս
Ծանրությամբ կքած,
Կանգնել էի ես
Ու խրվում էի ավազների մեջ:
Կարմիր էր ավազն ու ավազը՝ սև,
Բոսոր էր ավազն ու ավազը՝ սև,
Դեղին էր ավազն ու ավազը՝ սև,
Ու խրվում էի ես դեղին ու սև
Այդ հառաչի մեջ...
Ես խրվում էի իմ դաժան դարի
Մղձավանջի մեջ...

Եվ անապատը հառաչում էր ձիգ.
– Դար քսաներորդ,
Ես խարան էի քո խղձի վրա,
Բայց այդ խարանից քո խիղճը չայրվեց
Եվ նոր, նորանոր սև խարաններից
Քո դեմքը եղծվեց
Ու ծաղկատարվեց...
Ծաղկատար դեմքով դու ինչպե՞ս պիտի
Պտտվես չքնաղ արեգակի շուրջ...

Եվ անապատը հառաչում էր ձիգ,
Եվ անապատի այդ հառաչանքում
Ասես մահացած մարգարեների
Բողոքն էր զանգում.
– Դար քսաներորդ,
Դարեր ու դարեր մենք սեր նյութեցինք,
Բջիջ առ բջիջ քամեցինք բարին,
Մեր մի բուռ սրտով մենք փոթորկեցինք
Ու փոթորկումի
Մեր մաքրությունը տվինք աշխարհին,
Մենք խարույկ ելանք,
Ողջակիզվեցինք,
Դարձանք լույս ու հուր,
Կայծակների պես
Մենք փշրվեցինք,
Որ քեզ պարզենք երկինք մի մաքուր
Եվ հայացքիդ դեմ կախենք հարության
Առասպելները
Հիասքանչ ու մեծ...
Դու ի՞նչ արեցիր սերը մեր նյութած,
Մեր նյութած բարին.
Ինչպե՞ս կարեցար Դեր-Չոր արարել,

Ինչպե՞ս կարեցար այս քուրան վառել,
Ինչպե՞ս կարեցար սև խրախճանքի
Կանչել դու չարին...

Եվ հառաչում էր անապատը ձիգ.

– Տեր, քիչ էր կարծես ինձ վերուստ տրված
Բախտն ամայության,
Հավերժ ամլության,
Հավերժ համրության
Այս բախտը տխուր,

Որ բերիր հետո իմ մեջ թաղեցիր
Ողջակիզության փոթորիկն այս խուլ
Եվ տվայտանքը այս խուլ ձայների...

– Ա՛խ, գնանք, որդի,
Քեքք արա, ո՛ւշ է...
– Մերիկ, ա՛խ, մերիկ,
Ոտիկս է ցավում,
Այս ճամփան՝ ավազ,
Այս ճամփան փուշ է,
Ու ծարավ եմ ես,
Ծարավ եմ,
Ծարավ...

Եվ արթնանում էր հուշն անապատի,
Եվ հուշերի պես արթնանում էին

Ալիքները տաք,
Նախ շնչում էին ալիքները տաք,
Հետո հառաչում,

Մոնչում էին ալիքները տաք,
Պտտվում էին կրունկի վրա,
Դառնում ամեհի մի պտուտահողմ
Ու երկնքի մեջ մխրձում էին
Դեղին,

Շիկացած,
Հրեղեն մի ոխ...

Ե

Հետո գիշեր էր:
Դեռ լուսին չկար:
Ազոավներն ասես
Իրենց թևերի սևի սևն էին
Քամել ու փոել այդ անապատին:
Դեռ շրջում էի ես դառնապատիր
Ավազների մեջ
Ու մաքուր էի որպես առաքյալ:
Այս անապատի բոցը ինձ զտել,
Ավազե այրող հողմը մկրտել,
Եվ արցունքներս մաքրել էին ինձ...
Ես մաքուր էի, զուտ էի ու ջինջ
Որպես առաքյալ...

Հեռվից նայողին կարող էր թվալ,
Թե անապատի թախծության վրա
Շրջում է այրվող, մերկացած մի սիրտ
Կամ առկայծում է թափառիկ մի հուր...
Քամին դեռ մանկան ոսկորը առած,
Սուլում էր տխուր,
Ու սև էր, սև էր, սև էր ամեն ինչ...
Ու միայն տեղ-տեղ
Մահացող մանկան աչքերի նման
Ֆոսֆորափայլն էր շողում տենդագին.
Ֆոսֆորի փայլը,
Ոսկորի փայլը,
Այդ ահավորը,
Այդ սարսուղին
Ամեհի ցուրտը...

Անապատներում գիշերը ցուրտ է:
Եվ ցերեկային շոգ տենդից հետո
Ես ոտից գլուխ
Սարսուում էի...

– Ո՞ր եք, ագռավներ, ո՞ր եք հեռացել,
Եկեք, ֆոսֆորի այս փայլը կտցեք
Ու տարեք, գցեք
Աշխարհի սրտին
Ու խղձի վրա:

Սև էր գիշերը...
Ու սև գիշերը,
Ֆոսֆորափայլի մոմերը ձեռքին,
Հսկում էր մահվան այդ մեծ եզերքին:
Բայց մոմերն ինչ են,
Ո՛չ, մոմեր պետք չեն,
Ես Արարատի ձակատից պոկած
Կայծակ կբերեմ, շանթեր հրեղեն,
Նրանց արմատը այստեղ կխրեմ,
Որ ծառերն աճեն շանթ ու կայծակի
Ու նման ոսկե արևածագի՝
Նահատակներիս վրա շողշողան...

.....
Հետո գիշերը կանգնել էի ես
Եփրատի դաժան կամուրջի վրա:
Լուսինը ելավ:
Անապատային կարմիր մի լուսին:
Կարմիր լուսնի տակ
Եփրատը կարմիր ցլանք էր տալիս,
Ու թվում էր ինձ,
Թե երակն է նա,

Բացված երակն է
Հայոց աշխարհիս:

Կանգնել էի ես:

Սպիտակ հագած մի բարակ աղջիկ
Եփրատի դաժան կամուրջի վրա
Եվ լուսնկայի անուրջի վրա

«Սուրբ-Սուրբ» էր երգում:

«Սուրբ-Սուրբ»-ը՝ սարսուռ,

«Սուրբ-Սուրբ»-ը՝ ոգի,

«Սուրբ-Սուրբ»-ը՝ լույսը

Անմահ մորմոքի,

«Սուրբ-Սուրբ»-ը՝ կարոտ

Ու վերին թախիժ,

«Սուրբ-Սուրբ»-ը՝ հյուսված

Կիրակնալույսից ու մթնշաղից,

Հյուսված արցունքից

Ու խնկաբույրից,

Պոկված դեղձենուց,

Լեռան աղբյուրից,

Պոկված մայր հողի բացված երակից,

Զոհասեղանի կապույտ կրակից,

Մեր անդունդների խորացումներից,

Մեր կատարների ցլացումներից...

«Սուրբ-Սուրբ» էր երգում:

Լսում էր, լսում Եփրատը լռած

Ու հետո ասես ինչ-որ բան հիշում

Ու հայերեն էր Եփրատը խշշում:

«Սուրբ-Սուրբ» էր երգում...

Ու տիեզերքում

Լռություն էր խոր:

Ու «Սուրբ-Սուրբ»-ի մեջ

Իմ հայրենիքն էր ցլում հեռավոր:

Լեռները կապույտ
Ու թանձր կապույտ ալիքներ տալով,
Ծփում են, ծփում ու չեն քարանում,
Տիեզերական զրնգուն ու զով
Մի լուռություն է այդ վեհարանում:

Արարատ լեռը անհունին թիկնել,
Ցուլքեր է նետում ձյան ու սառույցի,
Կատարի ամպը արևից շիկնել
Ու բաշ է դարձել քնած առյուծի:

Իսկ այնտեղ՝ ցածում,

Ապրիլ է նորից...

Չնհալը լացել,

Խենթացել,

Անցել,

Հետքից թողել է փրփուրը ծաղկի...
Ցուլանքների մեջ արևածագի

Մեղվի

Ու ծաղկի

Ներդաշնությունն է քաղցրորեն զնգում,
Դաշտը ծայրեծայր այրվում է քնքուշ,
Դաշտը ծայրեծայր հեղեղ է ծաղկի,
Հրդեհ է ծաղկի,
Ծաղկի զրնգոց...

Ապրիլը դաշտից առել կայծ ու բոց,

Լեռներն է ելել

Ու լեռներն ի վեր

Վառել մասրենու վայրենի թփեր,
Վառել կակաչներ ու հորոտ-մորոտ,
Չանգակածաղկի ծիծաղն արևոտ
Եվ հրաշքներ է վառել անանուն,
Իսկ հավերժության կապույտ սահմանում

Վառել է, ահա՛
Հարության նման
Հրեղեն ու բորբ
Մի ցայգածաղիկ...
Ախ, իմ հայրենիք,
Անապատները նետեցին վրադ,
Որ դու չծաղկես...
Ու հիմա հեռվից,
Այս անապատից
Նայում եմ ես քեզ:
Ես քեզ եմ նայում, իմ հին տառապանք,
Ես քեզ եմ նայում, դարավոր իմ խաչ,
Եվ մահվան մթին այս անապատում
Ես ծնկաչոք եմ
Քո ծաղկի առաջ...

Լեռները կապույտ
Ու թանձր կապույտ ալիքներ տալով,
Ծփում են, ծփում ու չեն քարանում...
Արևածագի լույսերով օձված
Խաղաղություն է այդ վեհարանում...
Այնտեղ՝
Հավերժի կապույտ սահմանում
Վառվում, ցուլում է ծաղիկը հրկեզ...
Քո ցայգածաղկի
Կերոնի առաջ
Ծնկաչոք եմ ես...

1977

Հալեպ-Երևան

ԳԻՇԵՐԱՅԻՆ ԶՐՈՒՅՑ ՆԱՐԵԿԱՅՈՒ ՀԵՏ

*Դատավոր արդար,
Մեր հավերժության վճիռն ես գրելի,
Կնքել կնիքով քո սուրբ հանձարի:*

Նարեկա վանքը՝ երկնքից կախված քարե մի բուրվառ,
Եվ այրվող մի սիրտ,
Հրդեհվող մի սիրտ՝ բուրվառում քարե...
Ու ես իմ դարից խենթ ու հողմավար
Այցի եմ գալիս
Քեզ, խղձի ճորտակ, բարու մարգարե,
Քեզ, բուժիչ բարբառ, լույս անպարագիծ,
Աստծո ախոյան ու զրուցակից,
Քանզի սրբորեն չոքելու համար,
Իմ տագնապները ոգելու համար,
Խոկալու համար,
Տոկալու համար,
Թեթևանալու, հառնելու համար
Խղձիդ խորանն է ամենից հարմար...

Ներիր, ձգնակյաց,
Իբրև ուխտավոր մի ոտաբորիկ,
Վանա կապուտակ լճակի ափով ես պիտի գալի,
Ես գերեզմանդ պիտի փնտրեի երկնքի կոպին,
Ծունկի իջնեի
Ու քեզ իմ դարի օրհնանքը տալի:

Եվ սակայն ներիր, ներիր, բարեգրկթ,
Ներիր, ոգու հաց, լույսի մանանա,
Անկարող եմ գալ,

Ինձնից խլված է լեռնաշխարհն իմ լուրթ,
Գերեզմանը քո ու լիձը Վանա:

...Տո՛ն պիտի լիներ այդ վանքի բակում,
Լիներ Վարդավառ,
Երգեին պիտի ու կաքավեին հարսն ու աղջիկներ,
Ջուր պիտի տեղար,
Լո՛յս պիտի տեղար անձիկներն ի վար,
Եվ օրը պիտի
Նրանց ծիծաղի ցուանքից շիկներ:

Եվ պիտի լիներ նաև այլ մի տոն,
Շիրիմիդ վրա
Տո՛ն պիտի լիներ բանաստեղծության,
Եվ քերթողները կարդային պիտի ներբողներ ու ձոն՝
Վասն արևի,
Սիրո,
Թախծության:

Բայց լսիր, ահե՛ղ,
Այն աղջիկները,
Որ գային պիտի բակը քո վանքի
Եվ ամեն մեկը նմանվեր պիտի մի Աստվածամոր,
Ոսոխի բրդոտ ու բիրտ թաթերում մեռան լլկանքից,
Մերկությունն իրենց
Ծածկած լոկ իրենց սև ու սուգ ծամով:

Եվ մանուկներն այն,
Որ վանքիդ բակում
Չոհվող գառների անհույս մայունից տխրեին պիտի,
Իրենք, հենց իրենք
Գառների նման ձերմակ ու մաքուր

Սրահար եղան ավազների մեջ սև անապատի:

Եվ քերթողները,
Որոնց ձակատին քո մատն էր վերին,
Եվ ամեն մեկը լույսի ձամփորդ էր,
Խղձի սուրբ մի աստղ,
Անապատների ծանապարհներին
Ջարդված գանգերով ընկան դիտապաստ:

Գիշեր է հիմա,
Աստղերի տխուր զրնգոցի տակ
Ինչ-որ նահատակ ասուպներ մեռան,
Եվ Կաթնծիրը,
Որ երկարում է հրեղեն ու տաք,
Ասես հառաչն է Արարատ լեռան...

Գիշեր է նորից.
Արթնացել նորից ցավն իմ տվայտող
Ու մորմոքում է կրկին ու կրկին,
Եվ Կաթնծիրը մի տող է միայն,
Հրեղեն մի տող,
Մեր տառապանքի չգրված գրքից:

Լսիր ինձ, անոխ,
Ու ես դիս ունեմ, քեն ունեմ քո դեմ,
Ես գանգատ ունեմ և ունեմ անեծք,
Ինչո՞ւ սուզվեցիր
Դու աստվածային ոլորտն այն վսեմ,
Ինչո՞ւ բերեցիր ու դրիր մեր մեջ
Այս խիղճը անեղծ...

Եվ ինչո՞ւ պիտի
Քո աստվածային ու սուրբ բարբառով
Մեր անձն ու հոգին
Այդ անզոր խղձին մենք առնչեինք,

Կանգնած վայրենի այս լեռների մեջ՝ վայրենի քարով
Մեր ժանիքները պիտի սրեինք ու կոնչայինք:

Մեր ինչին էին, ասա, հարկավոր
Ոստան ու վանքեր,
Օծված ինքնության այս վսեմ ոճով,
Սրեինք պիտի մեր ժանիքներն ու սրերը մեր կեռ,
Ասպատակեինք վայրենի քոչով:

Պիտի ելք տայինք
Մեր բնազդների վայրենի բուքին,
Նենգեինք պիտի ու խարդավեինք,
Շողոմ խոսքերով դանակ խրեինք
Հանդիպողների մեջք ու թիկունքին,
Բարեկամներին պիտի դավեինք...

Բայց մեղա՛, մեղա՛, բյուր անգամ մեղա,
Ինչէր եմ ասում,
Բերանս ծեփիր քո արդար աջով,
Խափանիր, քավիչ, խոսքն իմ սևասուն
Լուսե հեղեղիդ ահեղ շառաչով...
Մաքրիր ինձ անձառ ճառագայթներով,
Կասկածանքներիս սև մուժը վանիր,
Աստծուն առնչված քո սուրբ մատներով
Խղձիս մեջ խրված այս խայթը հանիր,
Լվա ինձ կապույտ քո ամպրոպներով,
Արտասուքներիդ մաքրությամբ ցողիր,
Սրբիր ձակատս աջով քո ներող
Եվ ինձ օրհնությամբ նորից ողողիր:
Մեղք չունես, գիտեմ,
Դեռ ջրհեղեղյան տապանից իջել,
Այգի ենք տնկել մենք ձեռքով Լոյան,
Մեր քրտինքն ենք տաք

Տվել ողկույզի բարությանը ջեռ
Եվ վայրի հասկը դարձրել ցորյան:
Խղձի արմատը
Ապառաժների ոխի մեջ խրած,
Ծիրանի ծառի խոնարհ տքնանքով
Բարին ենք հինել,
Լեռներից պեղված մեր ցոլուն ոսկուց չենք հատել դրամ,
Ոսկուց ձուլել ենք աստվածուհիներ:

Մեր քարերը բիրտ
Գետերի վրա կամուրջ ենք արել,
Որ սիրո ազնիվ քարավանները այցելեն մեր տուն,
Մեր վանքերի հետ երկինք ենք միտել դարեր ու դարեր
Աշխարհի համար
Հայցելու բարիք ու խաղաղություն:

Բայց գիտեմ հաստատ,
Նարեկա վանքը սրբաքար ու հին,
Որ դու ծնկաչոք խիղճ ես արարել,
Որ դու Աստծո հետ
Հրույցն ես արել քո աստվածային,
Հիմա ոչխարի փարախ են արել:

Ու ներիր, ահեղ,
Քեն ունեմ քո դեմ և ունեմ բողոք,
Որ քո հեծության մեծությունն ունի,
Մեր ինչի՞ն էր պետք,
Ասա, զրույցն այդ արցունքով ողող,
Որ դու, մարդասեր,
Բացիր Աստծո հետ, լույսի, անհունի:

Մենք կանգնած էինք

Դաժան աշխարհի չորս հողմերի մեջ,
Քառուղու վրա նենգության, նետի, ստության, սրի,
Խավարից, չարից ու դավից հյուսված
Չրահ էր մեզ պետք,
Դու մեզ Աստծո լույսը հագցրիր:

Ինչո՞ւ ուզեցիր,
Որ ապավինենք մտքի կանթեղին,
Որ լույսի փոխենք մեր սիրտը այրվող,
Երբ անապատից սրարջավ եկող հորդան այն դեղին
Արտաշնչում էր լոկ մոխիր ու դխ:

Մարեինք պիտի
Մեր կանթեղների լույսը ոսկեվոր
Ու մեր արտերի ոսկեվոր լույսը պիտի մարեինք,
Լույսը ողկույզի, լույսը հավատի, որ մթան մեջ խոր
Այն աչքերը շեղ մեր ցուցլանքը չնշմարեին:

Բայց մեղա՛, մեղա, ստուգապես մեղա,
Ներիր քուշանիս ու հոնիս կոպիտ,
Որ բարբառեցի անմահ լույսի դեմ,
Մտոք կույր եղա,
Ներիր կամ շանթիր ինձ, որպես Հոբի:

Լույսն է աշխարհի ճշմարտությունը,
Միակն ու մերկը,
Լույսն է աշխարհի գեղեցկությունը,
Միակը դարձյալ,
Լույսը ծաղիկն է արևածագի
Ու լույսը երգ է:
Լույսն է երևի այն անքննելին,
Որի անունը կյանք է հանդերձյալ:

Քո Աստվածն ինքն էլ
Խտացած լույս էր ու լույսի գումար,
Քո մատյանն ինքն էլ
Տառապած շուրթով լույս է բարբառում,
Ամեն ինչ կյանքում սպառում ունի,
Ունի վերջ ու մահ,
Եվ լույսը միայն չունի սպառում:
Լույսի համար են բարձրացել խարույկ ու փոխվել լույսի,
Ու լույսն է միայն, որ պարզ է այդքան,
Այդքան անմեկին,
Ու լույսն է միայն, որ անկշիռ է,
Նման է հույսի,
Ու անկշիռ է տրվում ամենքին:
Լույսն է խտանում ու դառնում է հասկ,
Բողբոջ է դառնում,
Լույսն է ծիծաղում
Ակնադրյուրների կապուտակ կոպին
Եվ առավել է լույսն իմաստնանում
Ու գեղեցկանում,
Երբ փոխվում աստղի
Ու շողշողում է շեղբի մեջ խոփի:

Եվ ինքը՝ խոփը, հենց շեղբ է լույսի,
Մենք խոփն ենք դարեր Աստծո պես պաշտել,
Եվ դուք եք վկան,
Հովիտներ Մուշի, Տարոնի, Կարսի,
Եվ դուք եք վկան, իմ Կարնո դաշտեր:
Լուսնյակ է եղել,
Անուշ է եղել քունը հոտաղի,
Կապույտ անհունը
Մեզ վրա կապույտ օրհնանք է հեղել,

Մեզ վրա ոսկե շշուկն է փովել աստղային տաղի,
Եվ մեր խոնջանքը վաստակած Աստծո խոնջանք է եղել:

Բայց արյուն հոսեց մեր ակոսներով,
Մեր լույսի հասկը
Գլխատվեց անհույս ու անապավեն,
Ու ես վեճ ունեմ, քեն ունեմ, ներող,
Նախնիներիս դեմ ոխ ունեմ ու քեն:

Առաջին մետաղն, ասում են, դու ես ձուլել, իմ երկիր,
Բայց խոփն ո՞ւմ էր պետք,
Սրեր էին պետք ու մկունդ, ու նետ,
Եվ ո՞ւմ էին պետք
Մեսրոպյան տառերն այս երկաթագիր,
Մեզ երկաթակիր հրոսակների շառայուն էր պետք:

Դուք մեր ափի մեջ ինչո՞ւ դրեցիք խղձի մաճն արդար,
Յաթաղան տայիք, տապար ու կացին,
Եվ ինչո՞ւ դրիք
Աստղոտ ցորենի հրաշքը խարտյաշ,
Որո՞ւմ դնեիք,
Որ թույն խառնեինք օտարի հացին..

Բայց ներիր, ներիր,
Վեհորեն ներիր մի վերջին անգամ,
Իսկ թե ներումի խոսքեր չգտնես,
Անեծքով շանթիր,
Ես չէի, դա իմ մորմոքն էր անկամ,
Որ մերթ կուրանում
Ու նմանվում է սևասուն խանդի:

Ներիր, բարեգութ,

Փարատիր մաղձի մուլուցքն այս դեղին
Եվ կասկածանքիս ամպերը ցրիր,
Հուշիր ինձ նորից
Դու ճշմարտությունն այն հայտնի ու հին,
Որ նա, ով սուր է իր ձեռքը առնում,
Ընկնում է սրից:

Եվ դու դարեդար
Շնորհել լույսը քո սուրբ կանթեղի
Եվ արտասուքիդ
Ցողերով ես մեզ անվերջ լվացել,
Որ մենք կարենանք, ներքևում թողած մաղձը մեր լեղի,
Ոգու պես թեթև երկինք թևածել:

Քանզի գիտեիր,
Որ փոքր է հողը ու փոքր է ածուն,
Եվ դար ու դարեր
Հողմը այդ հողից սահման է պոկում,
Ուրեմն պիտի երկինք վերանանք,
Հասնենք Աստըծուն,
Ուրեմն պիտի խորանանք, իջնենք անդունդը ոգու:

Եվ դու, նորոգիչ,
Մերթ վերին լույսին մեզ առնչեցիր,
Մերթ անդունդները,
Ոգու վիհերը տարար գահավեժ,
Ու մենք լույսի հետ մութը շնչեցինք,
Մենք ժառանգեցինք ալեբախության տանջանքը հավերժ:

Մեծդ, գիտեիր,
Տիեզերական խորհուրդը վերին,
Որ շարժման մեջ է ամեն զորություն,
Ալեբախումն է,

Որ մաքրություն է բերում ծովերին,
Ու տառապանքն է բերում խորություն:
Ու մեզ մաքրեցիր,
Որ դառնանք վերին լույսին արժանի,
Որ անդունդներից հանենք բարության աստղերը կորած,
Եվ մեր քարը բիրտ,
Որ պիտի դառնար լոկ ոխ ու ժանիք,
Լույսի սյուն արինք,
Հրաշքի խաչքար
Ու խղձի խորան...

Մեր տառապանքից
Ոգու հրեղեն սյուններ բարձրացան,
Որ ճշմարտության ու գեղեցկության տեղն էին հուշում,
Մեր կարոտները
Արծաթե մաքուր զանգակներ դարձան
Եվ աստղերի պես
Լույսի ղողանջներ փռեցին մութում:

Ամենն այդ գիտեմ,
Բայց երբ գիշերն է իջնում աշխարհին,
Ներիր, անարատ,
Չարթնում է նորից թախիժն իմ արյան,
Չարթնում է նորից պարտությունների մորմոքը դեղին
Եվ հեկեկում է երակների մեջ իմ բազմադարյան:

Ու երբ հիշում եմ,
Որ իմ Եփրատը, քարեքար ընկած,
Ծիածաններ է հորինում անգամ գիշերվա մթնում,
Որ իմ հայրենի տնակին իջած խոշոր լուսնկան
Մեր երազներն է այնտեղ որոնում, սակայն չի գտնում,
Հիշում, որ վանքը, Նարեկա վանքը,

Ուր դու, հանձարեղ,
Զրուցում էիր
Աստծո հետ,
Լույսի
Ու առեղծվածի,
Հիմա ոչխարի փարախ են արել,
Արյունս նորից փոխվում է մաղձի:

Ու երբ հիշում եմ,
Որ չի ավարտվել այն նախձիրը դեռ,
Շարունակվում է գիշերվա դավով, ստով տվնջյան,
Որ այն Գայլը Գորշ
Սողալով ելնում Արարատն ի վեր
Եվ ժանիքներով ջնջել է փորձում
Նրա անունը աստվածաշնչյան,
Որ ամեն գիշեր
Քար են գողանում սրբաքար Անուց,
Որոնց նախշերում
Մեր տաք քրտինքի արծաթը դեռ կա,
Որ մեսրոպատառ մեր հիշատակն են այնտեղ սպանում,
Ու մորթվող հուշն է գիշերների մեջ հառաչում երկար,
Որ ջնջում,
Հերքում,
Եղծում են ոձիրն այն եղեռնական
Եվ աշխարհով մեկ դրամով գնված սուտն են որոձում,
Ու երբ մենք, սեղմած ատամները մեր,
Լուում ենք անգամ,
Ու մեր փոխարեն քարերն են գոչում,
Ուզում եմ այնպես,
Ով արդարախանդ,
Որ մոնչայիր դու երկինքն ի վեր,
Եվ քո մոունչով

Նարեկա վանքը դարձած նետ ու շանթ,
Երկինք սլանաբ
Ու այս աշխարհի խղճի մեջ խրվեր:
Եվ խոռովքի մեջ,
Խառն ու խուռներամ այդ մառախուղի,
Որ մորեխների թուխպեր են ասես խավար ու ահեղ,
Այդ մոխիրների, մխանքների մեջ սև ու անուղի
Խեղվում են ասես
Ու խարխափում են խենթ ու շնչահեղձ:

Ես սարսափում եմ ու շշնջում եմ,
– Բացվիր, առավոտ,
Ծոխ, երկինք ելիր,
Հուրհրա նորից, հայրենի օջախ,
Խաղաղվիր նորից, արյուն իմ ցավոտ,
Ու թող համրանան քո շրթունքներին հառաչանք ու ախ...

Բացվիր, առավոտ,
Թող քո լույսերը անձրևեն առատ,
Թող բարին քայլի
Ամեն կածանով ու արահետով,
Հայրենի աղբյուր, ցուլ անարատ,
Ինչպես արցունքը հավատացյալի՝
Աղոթքից հետո:
Ու երբ զարթնում են մանուկները մեր,
Լույսով թաթախվում,
Դառնում ճնձղուկ և խառնվում են ծաղկին ու հովին,
Ու երբ արտույտն է
Հայրենի փոքրիկ մեր արտին կախվում,
Հաշտարար վսեմ,
Հաշտվում եմ քեզ հետ, հաշտվում ոգևին...
Հաշտվում եմ քեզ հետ,

Ջրաղաց արդար, որ դար ու դարեր
Մեր խղճի մաքուր ալյուրն ես նյութել,
Փեթանկ անխափան,
Ծոցիդ մեջ առած ծաղիկ ու արև,
Մեր ոգու մեղրը զտել ես թույնից
Ու զտում ես դեռ...

Լուսարար անքուն,
Անպակաս արել յուրը կանթեղի
Ու հալածել ես չարքը մթության,
Դեղապետ հմուտ,
Բուժիչ զորությամբ բանական դեղի
Մաղձը փարատել, մեզ ուժն ես տվել ողջամտության:

Դարբին կորովի,
Դու լույսի անխոց զրահ ես կռել,
Որ հագնենք ընդդեմ խավարի, չարի,
Դատավոր արդար,
Մեր հավերժության վճիռն ես գրել,
Կնքել կնիքով քո սուրբ հանձարի:

Հավատում եմ ես,
Դու պիտի քայլես աշխարհե աշխարհ,
Քեզ հետ քերթության մեր լույսը տանես...
Առաքյալ անբիծ,
Դու ամենեցուն, իբրև սուրբ նշխար,
Մեր սիրո հացը պիտի բաժանես:
Պիտի ընթանաս
Այս ահեղ դարի ճամփեքով խրթին,
Մեր արդարության բարբառը հաստես,
Պարտիզպան հմուտ ու հրաշալի,
Աշխարհի սրտին
Մեր խղճի ոստը պիտի պատվաստես:

Հավատում եմ ես,
Հայոց աշխարհի լեռներից այս մով
Ալիքի նման դու պիտի պոկվես լույսով քո վերին,
Փոթորիկ անդու,
Պիտի հավերժող ալեբախումով
Մի քիչ մաքրություն խառնես աշխարհի պղտոր ծովերին:

Իսկ թե կա, իրոք,
Ու լինելու է դատաստան ահեղ,
Իսկ պատմությունը հաճախ է արդար ատյանն իր բացում...
Տառապյալ դու մեծ,
Դու պիտի կանգնես
Մաքրւր,
Փառահեղ,
Իբրև մի վկա,
Որ հավասար է հենց իրեն՝ Աստծուն...

1983

ՏԵՆԴ

*...Ակունքին իջնեի ծունկի,
Այդ ջրից խմեի մի կում...*

Հագինը կրակ է ու ծուխ,
Հագինը կարմիր է ու սև,
Իսկ ինքը աղջիկ է բարակ,
Երևի տասնվեց տարու...
Բացում է թևերը ահա,
Պարում է, ծփում է ասես,
Ծփում է իրանը ձկուն,
Կրծքերը դողում են առույգ:

Պարում է, ծփում է ասես,
Բարձրանում, իջնում է ներքև,
Կարմիրը և սևը խառնած,
Կրակե մրրիկ է դառնում...
Պարում է, պարում է, պարում,
Ու մի զույգ բարավիկ ձեռքեր
Քնքշորեն իջնում են ահա,
Արծաթե սկուտեղն առնում:

.....

Չարթնել եմ... գիշեր է խավար,
Քունքիս մեջ զարկեր են մուրձի,
Այս ինչ է պատահել ինձ հետ,
Ո՛ր էի և ո՛ր եմ հասել...
Գիշերը աշխարհին թեքված
Մի հսկա գավաթ է սուրձի,

Ու մեկը մրուրով նրա
Իմ բախտն է գուշակում ասես:

...Իսկ հեռու գետակի ափին
Կանգնել է սևաչ մի մանուկ,
Նայում է, արև են բերում
Գետակի ջրերը ելած,
Եվ հետո քարեքար տալով,
Սպիտակ փրփուր են տանում,
Նայում է, չգիտե սակայն՝
Ամենն այդ ծիծաղ է, թե՛ լաց...

Նայում է, չգիտե սակայն,
Թե ինչն է ինչ-որ չար ձեռքեր
Քաշելով տանում են իրեն
Ու պոկում գետակի ափից...
Ախ, ամեն առավոտ այնտեղ
Կապուտակ հավքեր են երգել,
Իսկ բարդին խշշում էր խաղաղ,
Որ վերից աստղ ու ցող թափի:

Ախ, այնտեղ անուշ էր այնպես
Ծխի հոտն ու հոտը հացի,
Մայում էր սպիտակ մի գառ,
Եվ օրը լույսով էր լեցուն...
Նայում է, գետակը ոսկե
Ճերմակել, փոխվել է լացի,
Ճերմակած իր տատի նման
Հառաչում, ծնկներն է ծեծում:

...Բայց ո՞վ է հետևում պատի
Եվ ինչն է չի գալիս, ախ, ներս,
Այդ ո՞վ է իմ մասին խոսում,

Թե՛ ես եմ զառանցում ցավից,
«Ապրել ես այսքան ու այսքան,
Պոետի համարում ունես,
Էլ ո՞ր ես երկնչում այդքան,
Էլ ո՞ր ես վախենում մահից»...

Խավարը խտացել ասես
Ու վրաս ամպեր է փռել,
Որ մերթ տոթ քրտինք են քամում,
Մերթ փոխվում սարսուռ ու դողի:
Թվում է, ուր որ է ահա
Ուղեղիս ծալքերում հրե
Պիտի որ կայծակը շողա՝
Նման մի հանձարեղ տողի:

Այդ ո՞վ էր, դու ինքդ հուշիր,
Որ քսան տարեկան մեռավ,
Հանձարեղ տրտունջը ոգեց
Ու հանգավ իբրև հուր ասուպ...
Ինչո՞ւ ես հապաղում այդպես,
Շշնջա աղոթքդ լեռան
Ու գնա, միացիր հավետ
Մայրիկիդ ու հողին քո սուրբ:

Այդ ե՞րբ էր, որտե՞ղ եմ տեսել՝
Բարալիկ, մենավոր մի ծառ
Բռնկվել կրակով աշնան
Ու բոցը երկինք էր նետել,
Կապույտը անհուն էր այնպես,
Անհունը այնպես էր պայծառ,
Ու բոցը թրթիռ էր ոգու,
Ու բոցը ոգի էր թեթև:
Հիշում ես, աշխարհում մի օր

Ապրել է պոետ մի գանգուր,
Երգել է Շահանե ու սեր,
Դաշտային անամոք թախիծ...
Եվ այդպես գեղեցիկ, ջահել,
Եվ այդպես թեթև ու անփույթ,
Կտրել է երակը մի օր,
Կախվել է առաստաղից:

Չգիտեմ, ինչու են այս սև
Հուշերը շանթի պես զարկում,
Չգիտեմ՝ կայծակի սպին
Կապոյտ է լինում, թե՞ կարմիր...
Ախ, եթե մի հնար լիներ,
Թողնեիր իմ հոգին արթուն,
Իսկ ինքդ չքվեիր հավետ,
Իմ անզոր, տառապած մարմին:

Ախ, եթե մի հնար լիներ,
Մարեի քեզ, այրող իմ տենդ,
Գնայի լեռները մեր զով,
Կորչեի կապուտակ միգում:
Ես այնտեղ Լոր գյուղից վերև
Սառնորակ մի աղբյուր գիտեմ,
Ակունքին իջնեի ծունկի,
Այդ ջրից խմեի մի կում:

Ես գիտեմ, հաճախ է այդպես՝
Մի աղբյուր, շաղոտ մի ծաղիկ
Կամ գարնան ամպրոպ մի մաքուր
Կամ անհայտ, անծանոթ մի կին
Հայտնվում հրաշքի նման,
Քեզ հանկարծ փրկում են ցավից,
Ու կրկին աշխարհը անցավ,

Ու հա՛շտ է աշխարհը կրկին:
Բայց հիմա հողերս նվում,
Հողերս դարձել են հրե,
Թևերս կախվել են, որպես
Վիրավոր կռունկի թևեր,
Ուզում եմ շնջալ, ասել.
«Ձեռքերս գլխիս տակ դրեք»,
Բայց բառը քարացել իմ մեջ,
Չի ելնում չոր կոկորդս ի վեր:

Երևի նման եմ հիմա
Աշխարհի առաջին մարդուն,
Որ ցավից ուզել է խոսել,
Ծարժել է շուրթերը իր գոց,
Չեն ծնվել բառերը սակայն,
Բառերը տառապել արթուն,
Բառերը շուրթերը այրել,
Դարձել են հառաչ ու տնքոց:

.....

Հագինը կրակ է ու ծուխ,
Հագինը կարմիր է ու սև,
Ծփում է իրանը ձկուն,
Կրծքերը դողում են առույգ...
Աստված իմ, այդ ո՞վ է, ասա,
Հուշիր ինձ, այդ ո՞ր եմ տեսել,
Աստված իմ, չքնա՞ղ է որքան
Եվ հազիվ տասնվեց տարու:

Պարո՞ւմ է, պարո՞ւմ է, պարո՞ւմ,
Գալարվում բոցի պես ահեղ
Եվ այդպես գալարքով բոցի

Ծունկի է իջնում նա հլու...
Եվ հետո ելնում է կրկին
Ու կրկին սկսում է պարել,
Ձեռքերում սկուտեղն արծաթ
Ու վրան՝ մի արնոտ գլուխ...

.....

Այդ ո՞վ է հետևում պատի
Եվ ինչո՞ւ չի գալիս, ախ, ներս,
Այդ ո՞վ է իմ մասին խոսում,
Թե ես եմ զառանցում ցավից,
«Ապրել ես այսքան ու այսքան,
Պոետի համարում ունես,
Էլ ո՞ր ես երկնչում այդքան,
Էլ ո՞ր ես վախենում մահից»:

Հասկացիր, վախ չունեմ ես, ո՛չ,
Ես գիտեմ, վայրկյան է դա լոկ,
Ես գիտեմ, ցավ չկա բնավ,
Կա միայն կտրվող մի թել...
Եվ սակայն իմ խորքից մի ձայն
Ինքն իրեն արծագանք տալով,
Ասում է. «Ստո՛ւմ ես, ներիր,
Ու մեղք է ցավի մեջ ստել»:

Հասկացիր, ասում եմ կրկին,
Դու զուր ես բարբառում, ախ, զուր,
Աշխարհում կարող էի ես
Վաղուց, շատ վաղուց չլինել:
Ես եղա կռվում այն ահեղ,
Հյուսիսի հողմերի մեջ ցուրտ...
Մի գիշեր, սոսկալի, հոգնած,

Ձյան մեջ եմ, հասկացիր, քնել:

Ու քունս թեթև էր այնպես,
Ես ասես ամպերից կառչել
Ու թեթև փետուրի նման
Բարձրանում, վեր էի հառնում...
Այդպես է, ասում են, երբ մարդ
Քնի մեջ սկսեց սառչել,
Ինքն այդպես անկշիռ, թեթև,
Մահն այդպես անցավ է դառնում:

Եվ զուր ես բարբառում այդպես,
Ես մահից վախ չունեմ բնավ,
Ես նրան մոտիկ եմ եղել,
Ես անգամ տեսել եմ նրան...
Եվ սակայն, սատանան տանի,
Արշալույսն, ամիս, շատ է չքնաղ,
Չքնաղ է ծաղիկը ցողոտ,
Հրաձք է աղբյուրը լեռան:

Հրաձք է շշուկը աստղի,
Մամուռի արցունքը՝ հրաձք,
Հրաձք է այն դողը թեթև,
Որ կապույտ ավարտն է բոցի,
Հրաձք է շամանդաղը լուրթ
Վաղորդյան անդունդի վրա,
Հրաձք է բուրմունքը՝ բխած
Կանացի լուսեղեն ծոցից:

Եվ դեռ կան վայրկյաններ վերին,
Որ կանչել ու կանչում են դեռ,
Եվ դեռ կա առեղծված մի մեծ՝
Արարման մուժի պես թովիչ,

Եվ բավ է առնչվի հանկարծ
Ինձ նրանց ծվենը թեթև,
Որ հոգիս հրեղեն դողով
Վերանա մեղավոր հողից:

...Բայց գիշերն այս ինչքան երկար,
Եվ լույսն այս ինչքան է դեղին,
Այրվում եմ, թվում է դարեր
Հենց այսպես խաչված եմ եղել...
Ու ջուր են շուրթերիս քսում,
Ու ջուրը թվում է լեղի,
Թվում է՝ ափերիս մեջ խոր
Խրվել են ժանգոտած մեխեր:

Թվում է՝ գալարվում ահա,
Ելնում է սնկածև մի ծուխ,
Կախվում է աշխարհի վրա
Իբրև մի անողոք հարցում...
Ծխի մեջ ծչում ու իսկույն
Կորչում է խարտյաշ մի մանուկ,
Ու հետո դողում է կոպիս
Մի խոշոր, շողուն մի արցունք:

Այդպես էլ չիմացա կյանքում,
Թե արցունքն ինչո՞ւ է շողուն,
Ինչո՞ւ է նա այդքան հստակ,
Երբ դառն է այսքան ու աղի...
Հիմա էլ չգիտեմ նույնիսկ
Ինչո՞ւ ես կոպերիս դողում,
Արմատդ ցավիս մեջ խրած
Արցունքի հրեղեն ծաղիկ:
Ասում են, թե մարդուց բացի

Ձիերն էլ արտասվել գիտեն,
Ձիերն էլ կարոտից լալիս,
Կախում են բաշերը տխուր:
Նժույզներ, ձեզ շատ են սիրել,
Ձեր խոշոր աչքերն են իմ դեմ,
Նժույզներ, այս գիշեր գայիք,
Տանեիք, դուք գիտեք, ամի, ուր...

Լեռներում կապույտ է ու զով,
Լեռներում քամին է զնգում,
Լեռներում ցավ չկա բնավ,
Կա միայն թախիծ մի թեթև,
Նժույզներ, իմ կրծքի վրա
Փռեիք բաշերդ քնքուշ,
Սուրայիք հովերի միջով,
Մարմինս հանեիք եթեր:

Այդ ո՞վ էր, չեմ հիշում հիմա,
Հներից, քաջերից մեր սեզ,
Ցավի մեջ գալարվել անքուն,
Մորմոքել, հառաչել մի օր,
Թե մահն իր վատթար է, քանզի
Անկողնում պառկած է հասել,
Երանի, հազար երանի,
«Դիպեալ էր ի վերա ձիոյ»...

.....

Հագինը կրակ է ու ծուխ,
Հագինը կարմիր է ու սև,
Ծփում է իրանը ձկուն,
Դողում են զիստերը նրբին...
Կարմիրը և սևը խառնել,

Պարում է, պարում է թեթև,
Ձեռքերում սկուտեղն արծաթ
Ու վրան՝ Գլուխը սրբի...

Սալումն, այդ դու ես, գիտեմ,
Կյանքի պես չքնաղ ու ջահել,
Կյանքի պես դաժան ու ահեղ,
Սալումն, այդ դու ես, գիտեմ,
Արնամած գլուխը սրբի
Բարալիկ ձեռքերով պահել,
Պարել ես դարեր ու դարեր,
Հիմա էլ պարում ես իմ դեմ:

.....

Այդ ինչ է մթան մեջ հեռու,
Թափո՞ր է արդյոք, թե՞ անտառ...
Թվում է, հողմեր են ելնում
Եվ պիտի ուր որ է վայեն:
Թվում է, մթան մեջ նստել,
Քամու հետ սուլում է դանդաղ
Եվ նորից դանակ է սրում
Մի ինչ-որ սևադեմ Կայեն:

Ու շեղբը ցուլում է մթնում,
Ու շեղբը ցուլանք է տալիս,
Ու շեղբի ցուլցուն սայրին
Խիղճն ինքն է արնոտվում ասես:
Եվ հետո խավարի խորքից
Մի զսպված քրքիջ է գալիս,
Երևի ծիծաղը մահու
Եվ մահու կատակն է դա սև:

Ու ահա թեքվում է վրաս

Մի գունատ, ոգեղեն մի դեմք,
Քիթը կեռ, աչքերի մեջ խոր
Հրաշքի տեսիլք է ու բոց...
Շշնջում, ասում է կարծես,
Թե ինչ է քո ցավն իմի դեմ,
Ինձանից խլեցին հավետ
Մի վերին սրբություն սրբոց:

Մարմինս ցնդել էր ասես,
Թափանցիկ ոգի էր դարձել,
Ոգու պես այրվում էր անվերջ՝
Նաիրյան մորմոքը վրան:
Եվ սակայն մթան մեջ ահեղ
Բարձրացավ անողոք մի ձեռք,
«Նավզիկեն» անմշակ մնաց
Ու կիսատ՝ «Աղոթքը լեռան»:

Ասում եմ՝ վարպետաց վարպետ,
Ցավը չէ ինձ այդքան տանջում,
Դեռ ունեմ չքաված մեղքեր,
Մուրհակներ ունեմ չմարած,
Դեռ հեռու-հեռավոր ավից
Անհայտի խորհուրդն է կանչում,
Ծաղիկը՝ հրաշքի նման
Ու ցողը աստղի պես վառած:

Դեռ մեղքեր ունեմ չքաված,
Ակամա ու կամա մեղքեր,
Որ գալիս ու սիրտս են խրվում
Իբրև խայթ, իբրև փուշ ու մառ...
Այդ էրբ էր, կապուտակ մի բոց
Իմ սիրտը մեջտեղից ձեղքել,
Ցերեկն ինձ հարբած էր պահում

Եվ ամբողջ գիշերը՝ խումար:
Ու եղավ հանձարեղ մի օր,
Նա ասաց. ո՞ր կուզես գնանք,
Ես այսօր շոա՛յլ եմ ասաց,
Ես այսօր նման եմ հողի...
Ի՞նչ ասեմ քեզ, անզոր իմ սիրտ,
Չգտար ճամփա ու հնար,
Եվ թռավ վայրկյանը հավետ,
Ծուխ դարձավ ու դարձավ մոխիր:

Կապուտակ այդ բոցի համար
Դու պիտի քո կյանքը տալիր,
Պահեիր, ինչպես մեր նախնիք
Սրբազան կրակն են պահել:
Իսկ հիմա ամեն ինչ կորած,
Ամեն ինչ փոխվել է ցավի,
Ու սրտիդ ավերի վրա
Սգում է կսկիծը ահեղ:

Եվ մեղքեր ունեմ չքաված,
Որ արդեն անզոր եմ քավել,
Որ պիտի ցավիս հետ տանեմ
Ու խառնեմ մեղավոր հողին:
Իմ մայրը գիշերը մեռավ,
Երբ հանգիստ քնած եմ եղել,
Չտվի համբույրս վերջին,
Մահու դեմ մեն-մենակ թողի:

Եվ մեղքեր ունեմ չգործած,
Որ սակայն առավել լեղի,
Առավել թունոտ մի խայթով
Խոցել են ու խիղճս պեղել...

Որտեղ որ արնել է մի սիրտ,
Մոլեզնել սարսափը դեղին,
Թվում է, ես էլ եմ կյանքում
Այդ չարին մեղսակից եղել:

Ինչ ասեմ, Նարեկա վանքի
Ճգնավոր ահեղ ու արդար,
Որ ինձ էլ քո ձորտը արիր,
Որ ես էլ աղոթեմ առ քեզ,
Որ անգամ տենդի մեջ այս տոթ
Ինքս իմ վճիռը կարդամ,
Չգործած մեղքերիս համար
Ինքս ինձ պատեպատ զարկեմ:

Եվ պարտքեր ունեմ չմարած,
Չմարած մուրհակներ ունեմ,
Ու դեռ կան մոզական բառեր,
Որ փնտրել ու դեռ չեմ գտել:
Հոգուս մեջ դողում է անվերջ
Թախծության հրաշքը գունեղ
Եվ նյութը ոգու հետ կապող
Աննշմար, հրեղեն, մի թել:

Գեղարդա վիմափոր վանքի
Հանձարեղ վարպետին եմ պարտք,
Ծնկածալ աղոթք եմ ես պարտք
Տքնանքիդ, քարագործ Մոմիկ:
Ես պարտք եմ ժայռերից կորզած
Ձեր ոգուն խոնարհ ու հպարտ,
Պարտք եմ ձեր հրաշքին անձառ,
Ձեր անձար ծարավ ու ծոմին:

Ձգիտեմ, որտե՞ղ եմ տեսել,

Երևի ձորում էր Գառնո,
Մի բեկոր ապառաժ քարից
Մի կաթիլ արցունք էր ծորում,
Այդ կապույտ կաթիլից ծնվել,
Ցուլում էր ծաղիկ մի արնոտ,
Արցունքից ծնված այդ ծաղկին
Ես պարտք եմ թախիժ մի խորունկ:

Մի հսկա քնքշություն եմ պարտք
Խանդի պես այրվող մի կնոջ,
Որ մի օր իմ խուցը եկավ,
Երբ սիրտս հոգնած էր ու ծեր,
Եկավ նա հողմի պես վայրի
Ու եկավ նա իբրև շնորհ,
Որ հետո օրերիս վրա
Իր վայրի քնքշանքը գցեր...

.....

Հագինը կարմիր է ու սև,
Հագինը՝ կրակ ու արյուն,
Հագինը վառվում է անվերջ,
Այրում է գիստեր ու իրան...
Ա՛խ, այդպես չքնաղ ու թեթև
Այդ մեղքն է աշխարհում պարում
Ձեռքերին սկուտեղն արծաթ,
Արնամած գլուխը վրան:

.....

Չարթնել եմ... Գիշեր է նորից,
Քունքիս մեջ զարկեր են մուրձի,
Այս ի՞նչ է կատարվել ինձ հետ,
Ո՛ր էի և ո՛ր եմ հասել...
Գիշերը աշխարհին թեքված

Մի հսկա գավաթ է սուրձի,
Ու մեկը մրուրով նրա
Իմ բախտն է գուշակում ասես:

Գուշակիր, մի քաշվիր, ասան,
Ես ինքս էլ տեսնում եմ անգամ,
Որ նրա մրուրի մեջ սև
Հազիվհազ մի աստղ է դողում:
Բռնում եմ ես շողը նրա,
Ուզում եմ քայլ անել դանդաղ,
Բայց մինչև ծնկներս, ավաղ,
Խրվում եմ, թաղվում եմ հողում:

Խրվում եմ, թաղվում եմ ուժատ,
Ասես թե Միերն եմ ես որբ,
Հողերս նվում են սաստիկ,
Ցավում են կոպերս մարող:
Բայց շողը ամուր եմ բռնել,
Բռնել եմ ճառագայթն այդ բորբ
Ու ինքս խորհում եմ իմ մեջ,
Որ դա հենց քո շողն է, Կարոտ...

Կարծում եք վաղո՞ւց է արդեն,
Ինչ կյանքում հրաշքներ չկան,
Կարծում եք վաղո՞ւց են արդեն
Կարոտն ու հավատը մեռել...
Եվ ահա հավատով քուրմի
Այդ ոսկե աստղի դեմ ծնկած,
Ուզում եմ մոգական խոսքով
Երկնքից նրան վար բերել:

Ու նա էլ ցուլանքով իր հուր
Հմայում ու ինձ է կանչում...
Չգիտեմ, նա՞ է ցած գալիս,

Թե՛ ես եմ սլանում եթեր...
Մեր տունը, հովիտն է այնտեղ,
Մեր ոսկե գետական է հնչում,
Կապույտի թրթիռը հագած,
Մեր բարդին դողում է թեթև:

Ախ, այնպես անուշ է այնտեղ
Ծխի հոտն ու հոտը հացի,
Եվ շաղոտ խոտերում կորած
Սպիտակ մի գառ է մայում...
Թվում է, թե ոչինչ չկա
Կապույտից ու լույսից բացի,
Ու մայրս թեքվել է վրաս,
Թեքվել ու վերքիս է նայում:

Նայում է, մատներով բարակ
Առնում է արևի մի շող
Ու նրա ասեղով ոսկե
Իմ ցավի փշերը հանում...
Ու հետո լեռնային ծամփան
Ջրնգուն հովերի միջով
Մեզ տանում ակունքն այդ գետի,
Մեզ դեպի երկինք է տանում...

1983

ԱՍՔ ՍԱՐԴԱՐԱՊԱՏԻ

Տուր ինձ խորհուրդը

Քո այդ սրբազան խելագարու թյան...

Եվ ամբողջ գիշեր
Հայոց աշխարհում տազնապ էր ու ցավ,
Եվ ամբողջ գիշեր
Մոլեգնեց սարսափն ու ահագնացավ,
Կույր բախտի նման
Խավարում վայեց չարագույժ մի բու,
Կույր մոլուցքի պես
Երկարեց ոռնոց մի արյունարբու,
Մահը ողջ գիշեր
Հեսանում էր ժանտ ժանիքը գայլի,
Որ կուրծքը ձեղքի
Ու խմի արյունն արևագալի...

Հույսը՝ հոգեվար,
Հավատը կույրի բիբ էր ձերմակած...
Եվ սակայն հրաշք՝
Հայոց պղինձը արթնացավ հանկարծ...
Լուսաբացի դեմ
Արթնացան հանկարծ զանգակներն ամեն,
Մեկը՝ հեծություն,
Մեկը՝ դեռ անզոր վրեժ էր ու քեն,
Մեկը՝ մորմոք էր,
Մեկը՝ նաիրյան անամոք թախիծ,
Մեկը՝ հառաչանք,

Պոկված մեր բախտի մթին անձավից,
Մեկը՝ մայրորեն
Ծնկները ծեծող աղերսանք ու կոծ,
Մեկը՝ հարսի լաց,
Մեկը՝ որբության մրսած հեկեկոց,
Մեկը՝ բարալիկ,
Շատ էր բարալիկ, որպես հուսո թել,
Ու մեկն աղոթք էր,
Որ ոգու թևով երկինք էր միտել,
Հասել էր Աստծո կապույտ դռներին,
Սեմն էր համբուրում շուրթերով պապակ,
Ծեծում էր, ծեծում հավատով խորին,
Բայց Աստծո դուռը շանթերով էր փակ...

...Հայոց աշխարհում
Կարմիր մայիս է ու կապույտ մի լույս,
Եվ լույսերի մեջ
Կանգնած է մենակ բոբիկ մի Հիսուս,
Շուրթերի վրա
Դեռ գեթսեմանյան գավաթի լեղին,
Կանգնել է մենակ,
Լալու չափ շվար, մահու չափ դեղին,
Ամենայն ինչից
Եվ անգամ շնչից արյուն է ծորում,
Եվ սիրտն է միայն
Սև սքեմի տակ աստղի պես ցլում...
Կանգնել է մենակ...

Իսկ մշուշի մեջ արևագալի
Բանակ է ոխի, քանակ է գայլի,
Արնոտ երախ է,
Որ որոճում է ոճիրն իբրև քաղց,

Արյան ծարավ է
Ու արյան հոտից խենթացող կաղկանձ...
Հիսուս իմ բոբիկ,
Մահդ ստույգ է, քեզ հոշոտելով,
Քո վերջին արյան
Վերջին սրբազան շիթը ոթելով,
Ուր որ է պիտի
Աստղի պես ցլուն քո սիրտը ծանկի
Ու նստի վերջին մի խրախճանքի...

Երկիր Հայաստան,
Դու՝ խղձի Հիսուս, դու՝ սիրո հանձար,
Հաճախ եմ տեսնում ես պահն այդ զարհուր,
Վեր թռչում, վանում մղձավանջն այդ չար,
Հետո ողջ գիշեր տվայտում եմ լուռ,
Հետո ողջ գիշեր մորմոքով արթուն,
Ես՝ որդիդ նվաստ, ես՝ հետին քերթող,
Առեղծվածներիդ մատյանն եմ կարդում,
Ջանում վերծանել գեթ մի բառ, մի տող,
Եվ բառերն, ասես,
Ինձ աստղերի պես աչքով են անում,
Բայց ես հրեղեն
Այդ ակնարկները լավ չեմ հասկանում...

Ու չեմ հասկանում, ինչպես արթնացավ,
Ինչպես խենթացավ ու ահագնացավ
Պղինձը ջղիդ, պղինձը ոգուդ...
Պղինձը՝ հրաշք ու պղինձը՝ գյուտ,
Պղինձը՝ ցասում ու պղինձը՝ ոխ,
Պղինձը՝ երակ մի խելագարվող
Պղինձը՝ արյան աղաղակ ու ձիչ,
Պղինձը՝ համրի ահավոր կոհնչ,

Պղինձն՝ ընդերքի ղողանջն առաջին,
երկնքի վերջին ու ահեղ կանչը:

Եվ առաջինը՝ հլու այդ կանչին,
Եկավ նա ինքը՝ մեծաաքանչը,
Եկավ մայրենին, մեր հրե սյունը,
Մեր տառապյալը, մեր հողմասունը,
Բյուր անգամ կիզված մեր այդ անկեզը,
Մեր ինքնությունը, մեր գոյն ու «ես»-ը...
Բոքիկ ոտքերին
Նախաստեղծության մշուշ էր ու ցող,
Շրթունքները դեռ
Ցուլցում էին եղեգան բոցով,
Ցորյանի համը,
Խորհուրդ խորինը և սքանչելին,
Գումարել էր նա
Սուրբ Ավարայրից առած կանչերին,
Նա, որ դարեդար
Ծեծվեց այն քոչվոր հողմ ու խավարով,
Բայց և դարեդար
Խղձի նշխարով ու լույսով սնվեց,
Եկավ գերագույն իր զորավարով
Ու զինվորներով իր երեսունվեց...

Եվ ահա պոկված
Մամռած որմերից հին Ջվարթնոցի,
Քարե արծիվը՝
Կեռ կտուցի մեջ ծվենը բոցի,
Իսկ թևերի մեջ կապույտ մի շառաչ,
Բարձրացավ երկինք ու թևատարած՝
Շողերի միջով արևագալի
Սլացավ դեպի ոհմակը գայլի...

Գեղեցկությունը պարզելով մահին,
հաչքարը եկավ իբրև շարքային,
եկավ ու կանգնեց դաշտի մեջ այն բաց,
Կանգնեց գեղեցիկ, որպես առեղծված:
Մամուած էր ու հին, բայց այնքան անեղծ,
Հիասքանչորեն այնքան տանջալի,
Որ ասես ոտքը հենց նոր դուրս հանեց
Քուրայից Աստծո և կամ հանձարի...

Եվ եկավ ահա
Ինքը՝ սուրբ խենթը, ինքը՝ վրեժը,
Բոցերի բոցը, ամենաթեժը,
եկավ նա արդար, եկավ ոգեղեն,
եկավ նա հպարտ ու ինքնավայել,
Նա, որ տեսել էր Դեր-Չոր ու գեհեն
Եվ անզորության սև խայթից վայել,
Հիմա բարձրացել, ելել մոլեգին,
Մերթ ցուցում էր, որպես Աստծո սուր,
Մերթ ձչում, որպես խելագար մի կին,
Անեծքով խանձում երկինքը լազուր...
Ելած Սասունից ու Խանասորից,
Նահատակները գալիս էին դեռ,
Մանուկներ էին գալիս Դեր-Չորից,
Որպես սրբերի ահարկու գնդեր...
Եվ գալիս էին
Եփրատ շարտված աղջիկներն անբիծ,
Սավառնում էին
Հրեշտակների նման հրեղեն,
Կայծակներ խլում,
Շանթ էին խլում գարնան խոլ ամպից,
Որ այդ ոհմակի ողերին խրեն...

Եվ մահն էր գալիս,
Բայց ոչ այն կույրը, անիմանալին,
Այլ իմացյալը, որ քույրն է կյանքի,
Նա, որ նման է
Ցորյանի, ցողի, անձրևի մահին
Եվ գեղեցիկ է
Ընկնող աստղի պես ու ներշնչանքի:
Այդ մահն էր գալիս նման սուրբ դիսի,
Որ մութ կասկածը հավատի փոխի,
Հուսո նշույլը՝ արևածագի,
Անթեղված կայծը՝ ահեղ կայծակի,
Որ ոգու ողբը դարձնի մոռնի,
Սրտերը՝ քուրա, մատները՝ բռունցք,
Ըմբոստությունը՝ խելագարություն,
Ավարտը՝ սկիզբ, մահը՝ հարություն...

Լռություն եղավ...
Եվ լուրջան մեջ
Ոգեց Արարատն իբրև մարգարե,
Ոգեցին հանկարծ
Անդունդներն ամեն կոկորդով քարե,
Իրենց խորքերից
Առասպելների բամբյունը հանած,
Որոտում էին
Քարանձավները մեր խավարամած,
Մեր պղնձաշուրթ
Քարափներն էին վերացած ոգում,
Որձաքարը բիրտ
Պղնձե ջղից ղողանջ էր պոկում,
Անգամ լեռնային
Կապույտ մի ծաղիկ, պատռած քողը ձյան,
Խառնել էր նրանց ձայնն իր թախծության...

Եվ այդ ձայները
Ահագնանալով, փոխվում ամպրոպի,
Ելնում էին վեր,
Իբրև հառաչն ու բողոքը Հոբի...

Եվ փանօք քեզ, ամպրոպ,
Քեզ, որ փոխվեցիր տեղատարափի...
Լույսի շառաչ էր,
Սրբության մեռոն, ցող էր հավատի,
Եվ մենք, որ ասես
Խեղված էինք, խեղձ, ցավից աղարտված,
Սպառված ոգի,
Ծվատված մարմին, հույս էինք պարտված,
Հանկարծ բարձրացանք,
Կնքվեցինք լույսի շանթով, կայծակով
Ու մաքրվեցինք
Մի անպարագիծ արևածագով:

Շանթի հարվածից
Մեր սիրտը բացվեց, որպես գաղտնարան,
Հրաշք՝ այնտեղ էր
Մեր անխոց ոգին, մեր չքնաղ Արան...
Եվ ահա կրկին
Պղինձը զնգաց հայոց ընդերքում,
Եվ հայոց շուրթին
Արդեն խենթության տարերքն էր երգում,
Հուսո նշույլը
Արդեն փոխվում էր արևածագի,
Անթեղված կայծը՝ ահեղ կայծակի,
Հառաչը արդեն դառնում էր մռունչ,
Սիրտը՝ շեկ քուրա, մատները՝ բռունցք,
Ցասումի ցուլը

Գնում էր արդեն խոյահարության,
Եվ ինչ-որ տեղից
Ցոլում էր ասես լույսը հարության...
Կանգ առ, ակնթարթ,
Նայիր, ամենից սուրբն ու սուկալին,
Որ ընդառաջ է ընթանում գայլին,
Դեր-Չորից եկած
Այն մանուկների գունդն է ահարկու,
Նայիր, թե նրանց
Թաթիկները թույլ ինչպես են զարկում...
Եվ կրկին նայիր,
Կույսերն այն ննջած Եփրատի ջրում,
Որ փոխվել ոգու և հրեշտակի,
Գայլի ողերին ինչպես են խրում
Իրենց ցասումի շանթը շեշտակի...

Կանգ առ, ակնթարթ,
Դու, որ վեհորեն արդար ես այդքան
Եվ արդարորեն այդքան պանծալի,
Կանգ առ ու նայիր, թե գեհենական
Ինչ սարսափով են
Մարում աչքերն այդ սովահար գայլի:

Եվ նայիր նաև,
Թե իմ մայրենին իր արդարությամբ
Ինչպես է չարի թաթը թրատում,
Նայիր խաչքարին,
Տես, թե հրաշքի փխրուն բարությամբ
Ինչպես է ոխի ժանիքը ջարդում:

Եվ լյառն Արարատ
Նայում էր ահեղ վեհափառությամբ

Եվ անդունդներից
Հղում էր անվերջ օրհնությունն իր բամբ,
– Զարկ, իմ տառապյալ,
Զարկ, իմ հրեղեն, զարկ, իմ պանծալի,
Քո ձեռքերի մեջ
Սուր չէ, կոհնչ է, մոունչ է ցավի,
Քո ձեռքերի մեջ
Մանկան հառաչ է, անեծք մայրական,
Զարկ, իմ սխրալի,
Եվ թող, որ լինի ական ընդ ական:
Եվ անգամ արտույտն իմ ոսկեթևիկ
Երկինք վերացել,
Նա, որ ողջ կյանքում
Ցորենի ծիլն է ոսկու վերածել,
Նա, որ ողջ կյանքում
Աշխարհն է օծել միայն օրհնությամբ,
Իր ճովողյունի
Ցասումն էր խառնել որոտին այդ բամբ...

Եվ հողն իմ հայոց
Ցավն իր թոթափում, դառնում էր ոգի,
Եվ հողն իմ հայոց
Փոխվում սրբազան խելագարության,
Եվ հողն իմ հայոց
Փոխվում կախարդի, փոխվում էր մոգի,
Որ առաջինը աշխարհում արար
Մահը վերածի ստույգ հարության...
Փանք քեզ, ականթարթ,
Փանք, որ լսեցիր,
Թե գայլի մեջքը ոնց է ձարձատում,
Թե ժանիքներից թույնի ու մաղձի
Անզորությունը ինչպես է կաթում:

Փնփ, որ լսեցիր,
Թե պարտված չարն ինչ քսու է վայում,
Ինչ աղիողորմ,
Ինչ զարհուրիկ է լացը չախկալի,
Փնփ, որ ի վերջո
Չտեսնվածը տեսար աշխարհում,
Տեսար արնամած արցունքն այդ գայլի...

Լոեց ամեն ինչ...
Լոեց ամպրոպն իր շանթ ու կայծակով,
Ծիածան եղավ,
Կամար էր ասես կապուտակ վանքի,
Մեր մահն էր անցնում
Այդ ծիածանի կամարի տակով
Ու փոխվում կյանքի...

Մայր Հայաստանը
Սևի տեղ հագնում ծառագայթ փառաց,
Հարության հրաշքն,
Իբրև մերկ մանուկ ձեռքերին առած,
Պարզում էր վերև,
Պարզում արևին, պարզում երկնքին,
Որ լույսով, ցողով
Ու արծիվների կոհնչով կնքի...
Լսիր զինվորիդ,
Դաշտ իմ ոգեղեն, իմ Սարդարապատ,
Զանգ իմ պղնձե,
Ցուլ իմ կորովի, քարակուփի իմ պատ,
Գիտեմ, ախ, գիտեմ,
Դեռ չի ավարտվել մարտն այդ խելահեղ,
Ու երբ տանջում է ինձ կասկածն ահեղ,
Երբ հույսն իմ նվում ու լաց է լինում,

Երբ տազնապներն են խոցում ինձ խորին,
Գալիս եմ այստեղ ու ապավինում
Քարե ցուլերիդ կարմիր կորովին,
Քո արծիվներին, սլացքին քո սյան
Ու զանգակներին այս կոմիտասյան...

Ոչինչ չեմ հայցում ես արդեն կյանքից,
Կուշտ եմ և՛ ցավից, և՛ տառապանքից,
Լոկ քեզնից ունեմ ես հայցում մի լուռ,
Հող իմ, հրաշք իմ, դաշտ իմ հարության,
Քո պղնձաջիղ այդ ընդերքների
Գաղտնիքը ինձ տուր,
Տուր ինձ խորհուրդը
Քո այդ սրբազան խելագարության...

1988, մայիս

ՎԱՀԱԳԸ ԴԱՎԹՅԱՆԻ ԶԵՌԱԳՐԵՐԻՑ

Մտքու

Մայր, եւ դեռ կյանքումս ոչ մի երբ չստեղծ դու հասնա զքան,
 եւ չեմ հասկնիլ երկարատեւ սեպ ժողովարկի վառի,
 խաբկի եմ միայն, թե կա՞նք աշխարհում մի այլ արարած
 եղբայր զհասարակածս ու աշխարհ վառի:

Գրեիր և ներս... շայն սեղանի է ու ցուրտ սարքում,
 եմ հազարս եւ դու նիւ աղտոտելի թախածի միտքում,
 մի վառ եւ գրեցի, ոչ հաւատումս եւ ու ոչ շայն հասնումս,
 Մտքումս եւ խաղաղ մի հազարումս:

Երբ կարծեցիր, որ աստեղ կարծեց ու «նարկի» կարգում,
 կարգումս մի եւ, խոսքու դու աշխարհի տեղի վառումս,
 Չարտեղի մեռ զարգումս եւ ասեմ այն լայնակ ստեղծումս,
 Մի քիչ եւ եմ լսել վառվածս մի ստեղծումս =

Երբ լայնակ մեռ երբեք մեռ կամ թաքնի եւ խոսքումս,
 Երբեք եւ ցուրտ ու լայն եր ցուրտս կեստեղծ մի գրեմ,
 կարեւոր հասկնիլ լսելի արեմ ասել մի մեռումս
 ու խաղ եր ասումս իմ մեռնալուսեւ կեց =

Պա մեռնալուսեւ կյանքումս մի կեց կեց ստեղծ սեղանս,
 Յեռն շայնակ կյանքումս խաղաղ այն միջոցումս,
 կյանքումս մի կեց մի կարծի, կարեւոր, մի կարծի աշխարհ,
 եւ կեց կեցի և կեցի այն:

Կարան եմ, ճարտի, դու խելով եմ արդար, խորու եմ ցածր,
դու՝ առ-դու տեղահատի, դու՝ զգացման վերադառնալու պայքարի,
Քաղաքի օրերու և երբ ուրիշ արեւ ու սիրտ ցածր,
Երջանաւորելու արդե՞ն Կեղեկան...

- 2 -

Ինչ երբ մի շնորհի կարգ առե՞լ կեղեկան վերջ մի անունու,
Ո՞ր պիտի պիտե՞ մի դուռու սրտու, մի խելով և կունու...
Կարան եմ, ճարտի, լուսն եմ, օտառը, այդ ինչ եմ անում,
Եւ՝ ոչե՞ն, Եւզման պիտի արքանու...

Կահագն Դավթյան

1980

x x x

Լույս առաջարկ:

Դու, որ ժամ ես կայծակացու,
կ'աւշաբեկ ինչ կարգաւորու ազգիս ցոյց
իջնի քոյնիս ինչպէս ժողովոյ կ'աւ ինչպէս
կ'ընդունի կ'ստեղծուի ինչպէս կ'աւ:

Կ'իմե՞ս ո՞րքո՞ւ ընդունուիս ինչպէս
կ'աւ ընդունի կ'աւ ինչպէս ինչպէս
Լույս կ'աւ կ'աւ ինչպէս ինչպէս
կ'աւ ընդունի կ'աւ ինչպէս ինչպէս:

Կ'աւ ինչպէս:

- Ինչպէս կ'աւ ինչպէս ինչպէս
Կ'աւ ինչպէս ինչպէս ինչպէս ինչպէս
Ինչպէս կ'աւ ինչպէս ինչպէս
Կ'աւ ինչպէս ինչպէս ինչպէս:

Կ'աւ ինչպէս:

Կ'աւ ինչպէս ինչպէս ինչպէս
Կ'աւ ինչպէս ինչպէս ինչպէս
Կ'աւ ինչպէս ինչպէս ինչպէս
Կ'աւ ինչպէս ինչպէս ինչպէս:

Կ'աւ ինչպէս:

Կ'աւ ինչպէս ինչպէս ինչպէս
Կ'աւ ինչպէս ինչպէս ինչպէս
Կ'աւ ինչպէս ինչպէս ինչպէս
Կ'աւ ինչպէս ինչպէս ինչպէս:

Կ'աւ ինչպէս:

Կ'աւ ինչպէս ինչպէս ինչպէս
Կ'աւ ինչպէս ինչպէս ինչպէս
Կ'աւ ինչպէս ինչպէս ինչպէս
Կ'աւ ինչպէս ինչպէս ինչպէս:

3

Խոշո՞ւ առեցե՛ր:

Որ էստե՛ն դառն ազգա՞ռի կեցե՛ր:

Խոշո՞ւ ի՞նչ կտնե՛ր բոցե՛ր լեկե՛ր այս վերին ա-խոցե՛ր:

Ի՞նչ կարգա՞ւտե՛րս գառնից առնե՛ր կե՛ր եւ կե՛ր:

Խոշո՞ւ քա՛ղե՛ր: որ սա՛ն աչքե՛ր դառն օճե՛ր:

Խոշո՞ւ քե՛տե՛ր

Հասարակացի քա՛ղ քա՛ղե՛րս

Ի՞նչ ի՞նչ կոչե՛ր ձե՛ր պարզե՛ր լիճե՛ր հոգե՛րս առնե՛ր:

Կի՛ն հասարակե՛ր ի՞նչ ի՞նչ կոչե՛րե՛ր ճա՛ր ք յ առնե՛ր:

Կի՛ն կենդանու՛ն յճե՛ր Կարգե՛ր ազգա՞ռի ազնե՛ր:

Ե՛կե՛ր սե՛ր օրե՛րս:

Ե՛կե՛ր քե՛տե՛ր կի՛ն հասարակացի:

Ե՛կե՛ր սե՛ր օրե՛րս ի՞նչ փոփոխե՛ր ժողովուրդի առնե՛ր:

Ի՞նչո՞ւ ի՞նչ է՛ր աչքա՞ռի...

Ի՞նչ կե՛ր աչքա՞ռի վրա՞ն -- ի՞նչե՛ր ք յ ի՞նչ:

Կենդանու՛ն ք ա-խոցե՛ր ք սա՛ն յազգա՞ռի:

Ե՛կե՛ր վա՛ռ ք ի՞նչե՛ր:

Կոչե՛ր ի՞նչ վրա՞ն ք ազգա՞ռի:

Ե՛կե՛ր դա՛ռ ք ի՞նչ:

Կա՛րգ ազգա՞ռի սե՛ր ինքնա՞ռի...

Մե՛կու՛ն է՛ր օրե՛ր:

Մե՛կու՛ն ազնե՛ր ի՞նչ ի՞նչ ք ի՞նչ:

Որ ժողովուրդ ազնե՛ր ի՞նչ ի՞նչ ի՞նչ ի՞նչ ք ի՞նչ:

Ե՛կե՛ր ազնե՛ր:

Որ ազգա՞ռի ի՞նչ ի՞նչ ի՞նչ:

Մե՛կու՛ն ի՞նչ ի՞նչ ի՞նչ ի՞նչ ի՞նչ ի՞նչ:

Կի՛ն ի՞նչ ի՞նչ ի՞նչ ի՞նչ ի՞նչ ի՞նչ:

Որ ի՞նչ ի՞նչ ի՞նչ ի՞նչ ի՞նչ ի՞նչ:

Մե՛կու՛ն ի՞նչ ի՞նչ:

Կի՛ն ի՞նչ ի՞նչ ի՞նչ ի՞նչ ի՞նչ:

Եկ վեկ եւ ցիւրհ հոգի ունի ջնդոյ անկը նեն-թընէ,
 Գութ այս ազգս գո- կէր սրբոյ աւ կէր զերջ:
 Զուր խմբուր Կուր-ը ք յեն-թընէ:

Մոյ անտոյնս գո խաղաղ-թընս շուրհ վերս,
 Չկէր անուր սրբաբոյն-ուր սրբն ճանուր,
 Իսկ եչ վէչ Կ ցիւրհ:
 Իսկ վերս առաջոյն կ'ը բարձրագոյն:
 Չայտ ճանաչուի Իր ոչնէ Կուր:

... Գիտեա անթոյն լոբոյ անտեղ սրբուր Կուր:
 Եկ ուրիշ ցոյ յերկն ժամ թեկուր անկն,
 Զյուր Իր ճանուր զուր թեկն զիջ անթոյն Չուր
 Երկուն Իր Խաղաղ
 Երկուն,
 Կուր
 Իր Խաղաղ թեկն:

Լայն առաջոյն,
 Կուր, որ զուր կ'ը Խաղաղ-թընս,
 Կուր, որ Խաղաղ թեկն,
 Երկուն կ'ը Խաղաղ,
 Կուր ճանուր զուր լայն Խաղաղ այս ճանն զուր,
 Երկուն այս թեկն զուր թեկն ա սրբոյ Կուր:

x x x

Ելջ ես՝ սթառեղե. որ շին վայրս դուռս է՝
 Լիկ ճիւղս եւ արագը. որտեղ եւ լիկ է,
 Ան եւ դուռսդեղե. որ իս սրտն մէջ գոյ
 Ծիւղս է. որ լուսն արագը է:

Եւ դուռսդեղե արագը ճիւղսդեղե. որ լուսն
 Լիկ սրտն արագը. որ լուսն արագը...
 Ճիւղս արագը եւ լուսն արագը. որ լուսն
 Լուսն արագը եւ լուսն արագը. որ լուսն

Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն

Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն

Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն

Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն
 Լուսն արագը. որ լուսն արագը. որ լուսն

Լուսն արագը

-5-

Երգ

Դրո՞ք է աչքի՝ թե՛ հարե... Եւ աչքե պիտի,
Աշուն զնշեւ է արեւ ինչի վայրիս...
Ի՞նչ արեւս էր Կե-վեց եւ այս աշնան,
Որ շտաբ է, աչքեւ շտաբ եւ շտաբ:

Ազգայնացաւ է, որպիսի խեղճ, որպիսի սեր ու հարս,
Ու զնշեւի, զնշեւի, որպիսի թախաճար...
Բա՛ն ինչ է Կե-վեց ու շտաբ եւ շտաբ,
Ինչպե՞ս էր Կե-վեց ինչպե՞ս ինչպե՞ս:

Ի՞նչ էր շտաբ եւ շտաբ, թախաճար է Կե-վեց,
Թախաճար է սեր ու շտաբ ու շտաբ Կե-վեց,
Ինչպե՞ս ինչպե՞ս աչքեւ աչքեւ Կե-վեց,
Ու շտաբ ինչ ինչպե՞ս Կե-վեց Կե-վեց:

Կայս աչքի՞ն ինչ Կե-վեց շտաբ է ու աչք,
Ու շտաբ է Կե-վեց Կե-վեց աչքեւ շտաբ,
Աչքեւ աչքեւ ինչ էր ինչ Կե-վեց Կե-վեց,
Կե-վեց Կե-վեց Կե-վեց աչքեւ շտաբ:

Եւ ինչպե՞ս էր Կե-վեց ինչ Կե-վեց Կե-վեց,
Որ ինչ էր ինչպե՞ս ինչ ինչ ու Կե-վեց,
Եւ աչքեւ ինչ Կե-վեց ու աչքեւ Կե-վեց
Կե-վեց Կե-վեց աչքեւ շտաբ ու Կե-վեց:

Եւ աչքեւ ինչ ինչպե՞ս Կե-վեց Կե-վեց,
Կե-վեց աչքեւ ու ինչ ինչպե՞ս Կե-վեց...
Ինչ Կե-վեց ինչ Կե-վեց, Կե-վեց Կե-վեց Կե-վեց,
Ու Կե-վեց Կե-վեց Կե-վեց Կե-վեց:

Գրություն

x x

Մայրամուտն է ու հեռու... Արեգը առկա է և հար-
 ձևերը շարունակ են հարձակվում իրար առջևից և կարծես...
 Եվ նույնպես պետք է գրա... Բնական կարգով
 կարծես կա բանակ, որ տեսնելու է ժողովուրդը:

Իմ երկիրս փակել, կայսրության օրը երևալով,
 Երբ իմ հարսերը կարծես կրակի օրը ու գրեթե,
 Գլխապես կա իմ խելք... Իմ արյունը կառնում
 շուրջ ճակատի կա կռիվ ու կրակի կա զրոհում:

Եվ զարթոյն իմաց, յե կռիվ կա կայսրության,
 յե կռիվ կա իմ յոթն ճակատներում իմ արյուն...
 Բայց կարծես, որ իմ ինչ մեծ թվերն է կռիվ
 Եվ պետք է ինչ կռիվ իմ յոթնական առկա է:

Եվ առկա է իմ կռիվ իմ յոթնական իմ
 ու իմ կռիվ իմ ինչ յոթնական յոթնական...
 Եվ իմ կռիվ իմ յոթնական յոթնական յոթնական
 ու յոթնական յոթնական ու յոթնական, յոթնական կռիվ:

Եվ ինչ յոթնական յոթնական իմ յոթնական կռիվ,
 որ կարծես կա ինչ կռիվ իմ կռիվ յոթնական...
 Եվ իմ յոթնական յոթնական, և իմ յոթնական կռիվ...
 Եվ իմ յոթնական կռիվ ու յոթնական յոթնական

և նույնպես կա կռիվ... Երբ երևալով կա կռիվ,
 Երբ կռիվ յոթնական կա կռիվ... Երբ կռիվ կա կռիվ...
 Երբ կռիվ կա կռիվ, ու կռիվ իմ կռիվ յոթնական...
 Երբ կռիվ կա կռիվ, ու կռիվ...

Մայր 1981.

Երբ կռիվ կա կռիվ

x^x
 x^x

Այսուհետև բոլոր x -ը կլինի x^x ,
 Այսուհետև կաթիլ x -ը կլինի x^x :
 Օրհնություն և արթնություն,
 Բոլոր x -ը կլինի x^x և կլինի x^x :

Ինչպես x^x կլինի x^x և կլինի
 Ինչպես x^x կլինի x^x և կլինի,
 Ինչպես x^x կլինի x^x և կլինի,
 Ինչպես x^x կլինի x^x և կլինի x^x :

Ինչպես x^x կլինի x^x և կլինի
 Ինչպես x^x կլինի x^x և կլինի,
 Ինչպես x^x կլինի x^x և կլինի,
 Ինչպես x^x կլինի x^x և կլինի x^x :

Ինչպես x^x կլինի x^x և կլինի,
 Ինչպես x^x կլինի x^x և կլինի,
 Ինչպես x^x կլինի x^x և կլինի,
 Ինչպես x^x կլինի x^x և կլինի x^x :

Կարոտ Կարոտ

24/ii-81

4

Կարձ Ծառի

Չարձի ցորենիս ի՞նչ հարստե՛հ, ծառը արձե՛հ,
 Բիշ, որ կիշ հոֆեր ծախարսի՛ր ե՛ս, ցածու՛ր ու զձե՛հ:

Բիշ, որ կարձու՛ր ե՛ս կիշ արձի հարստե՛հ Բարձր
 Բայ՛ն է կարձու՛ր ե՛ս արձիս արձիս ու՛ր արձիս:

Ան ե՛ս՝ արձիս, կարձ Ծառ է՛մ, ի՞նչու՛ր կարձու՛ր Ծառ,
 Բիշ ե՛ս արձիս, արձիս արձիս՝. կիշու՛ր արձիս:

Կարձու՛ր արձի հարձու՛ր, կարձու՛ր ե՛ս ի՞նչ շե՛րս Բարձր,
 Բայ՛ն արձիս ու՛ր Բարձր է՛մ Բարձր արձիս Բարձր:

Ան Բարձր արձիս, կարձու՛ր ե՛ս կիշի կիշ, արձիս Բարձր,
 Բայ՛ն արձիս, արձիս Բարձր է՛մ Բարձր արձիս:

Կիշ կիշի կարձի կարձի արձի կարձի Բարձր արձիս արձիս,
 Զարձու՛ր արձիս Բարձր է՛մ արձիս Բարձր արձիս:

Գարձի Բարձր արձիս Բարձր է՛մ արձիս, արձիս Բարձր,
 Զարձու՛ր ե՛ս... Բարձր է՛մ արձիս Բարձր, Բարձր արձիս:

Ան Բարձր է՛մ Բարձր արձիս արձիս արձիս,
 Բարձր է՛մ Բարձր արձիս, Բարձր է՛մ Բարձր արձիս:

Կիշ Բարձր արձիս Բարձր, արձիս Բարձր է՛մ Բարձր,
 Բայ՛ն արձիս Բարձր արձիս արձիս Բարձր արձիս...

Եզր

Դու՝ շիտուհու, դու՝ շուշու, հույն հույն կիտ - կիտ,
կիտ կարտե կի սյուռե կի ժ ըտիտ - ըտիտ,
կի - խիտու ժ ըտ ըտյուռե ժարտեռե,
Կարտե ժարտե ըտիտ ժ իտիտ ժարտեռե:

" Կիտ կարտեռե, կիտ կիտ, կարտե կիտ - կի կիտ,
Շուշու կարտե ըտիտ ըտիտեռե ըտիտ:
Բա ըտիտեռե խիտեռե ըտիտեռե ըտիտ - ըտիտ:
Բա կիտեռե ըտիտեռե ըտիտեռե ըտիտեռե:

Բարե սյուռե, կարտեռե ըտիտեռե կարտե,
կարտե կարտե կարտե ըտիտեռե կարտե,
կարտե կարտե կարտե կարտե կարտե,
Կարտե կարտե կարտե կարտե կարտե:

Կիտ կիտեռե կիտեռե կարտեռե կիտեռե,
կարտե կարտե կարտե կարտե կարտե,
կարտե կարտե կարտե կարտե կարտե,
Կարտե կարտե կարտե կարտե կարտե:

Կարտե կարտե կարտե կարտե կարտե,
կարտե կարտե կարտե կարտե կարտե,
Կարտե կարտե կարտե կարտե կարտե,
Կարտե կարտե կարտե կարտե կարտե:

Կարտե կարտե կարտե կարտե կարտե,
կարտե կարտե կարտե կարտե կարտե,
Կարտե կարտե կարտե կարտե կարտե,
Կարտե կարտե կարտե կարտե կարտե:

Լաբառի կարգադրում

Արարչի շնորհի պատերազմը

Դիմե՛ Քան որպես սուրբագույն հեռու,
Այ՛ արևի ճառագույն շնորհը:
Ք. Բառ

Չարե՛րի արհեստը առ սկսած եւ երկինքը ճեղքել
Արարե՛, որպէս երկնքի արհեստը,
Կենդանի կարծր եւ զոտ արևի եւ խառն ճեղք
Բարբառի եւ առ ճեղք արևի ճեղքը:

Քիչ արարե՛ իմ արհեստը եւ արհեստը արհեստը
ճեղքել եւ արհեստը իմ արհեստը,
Քիչ արարե՛ իմ արհեստը, ճեղքել արհեստը
Բարբառի արհեստը, ճեղքել եւ արհեստը:

Եւ արհեստը արհեստը, ճեղքել իմ արհեստը ճեղքել
Եւ արհեստը արհեստը ճեղքել արհեստը,
Քիչ արարե՛ իմ արհեստը, ճեղքել արհեստը,
Քիչ արարե՛ իմ արհեստը, ճեղքել արհեստը:

Եւ արհեստը արհեստը, ճեղքել եւ արհեստը
Եւ արհեստը արհեստը ճեղքել արհեստը,
Քիչ արարե՛ իմ արհեստը, ճեղքել արհեստը,
Եւ արհեստը արհեստը ճեղքել արհեստը:

Եւ արհեստը արհեստը, ճեղքել եւ արհեստը,
Արհեստը արհեստը եւ արհեստը արհեստը,
Այ՛ արհեստը արհեստը, այ՛ արհեստը արհեստը,
Այ՛ արհեստը արհեստը ճեղքել եւ արհեստը:

Արհեստը արհեստը եւ այ՛ արհեստը, ճեղքել արհեստը,
Արհեստը արհեստը արհեստը արհեստը,

- 9 -

Եվ արդա, արդ, երբ կրկին ազատ չա՛ն վերադառնա
և՛ մարտն, վաղն կազան կլինի...

Երբ, հեռու, մեզ այս քաղաք կա՛ն համարձակ արտառ,
Ե՛րբեր, քաղ ի՞նչ քաղաքներ վերա,
Որ կարգաւ մի ակն կարգաւ ա՛ն արդ արտառ,
Շին քաղաք, վաղն կ՛ա՛ն արտառ...

Եվ հեռու հեռու լաւ ի՞նչ ակն հեռու ա՛ն,
Լաւ է լաւ ա՛ն արդ արտառ,
Շին քաղաք ի՞նչ կրկին ա՛ն արտառ,
Որ արդ, արդ, ի՛նչ ի՛նչ կարգաւ...

10. 11. 86

x
x x

Ե՛ն ինչպե՛ս, կրոնի մեջ զգուշացա՛նք ինչպե՛ս
այն առաջին և երկրորդ ստեղծողի մասին,
Արևիկ առաջին կենտրոնի փոքրամասնագետները,
այնպե՛ս մեզ լսող ու զգուշացող ժողովուրդը

Ե՛ն ինչպե՛ս կենտրոնի մասին, ուր մեզ մեծ
մի լուսավորող մեջ, այնպե՛ս ինչպե՛ս կենտրոնի,
հիմնականում մեզ մեծ մասնագետները,
այնպե՛ս կենտրոնի մասին, ուր մեզ մեծ



x x x

Այս քաղաքում լի էր զիտեր,
 շիտ կորտ ու լուսեր,
 եղ արձարտ քաղաքայառ ընդ
 շիտ քաղաքի արևը զգար...

Ինչ քաղաքի արձարտ կարտ
 Արձարտի կորտի կարտ,
 Այս քաղաքի կարտ էր զիտեր
 Կարտի կարտ ու լուսեր...

Ինչ քաղաքի ու լուսեր
 Այս կարտի կարտ էր զիտեր,
 Այս կարտի կարտ էր զիտեր
 Կարտի կարտ կարտ էր զիտեր...

x x
x x x
Ո՛ր շնո՞ւ կ'հայտնա՞ւորուի՞ զ՛ շնո՞ւ,
Զո՞ւն ք կ'առայու՞ն,
Զո՞ւն է՞ զ՛ արջա՞ն...

Ե՛կ այդ շնո՞ւ մոյ ճաշքո՞ւն ե՞ս քո,
Խեղքո՞ւն ե՛ս, սիր՛ք ե՛ս,
Խոջո՞ւն ճաշքո՞ւն ճո՞ւղ առջո՞ւն...

x x x
x x x
Ո՞ր է՞ կ'հայտնա՞վ, ո՞ր է՞ շնո՞ւ շուքո՞ւ,
Ո՞ր առա՞ջո՞ւն մոյ՞ւր է՞ շնո՞ւն...
Ե՛կա՞ն ե՛ս կ'արժե՞,
Վա՛նկ ան ջո՞ւն,
Ե՛ս մոյ՞ւր է՛ս մոյ՞ւր սարձո՞ւն...

$$x \ x$$

Շուքից աւ խափելի,
 որ խզումս մի քիչի ճարտուս անգլանի,
 Ազուսս էր վերջին խաչի ու կարգանի,
 Գլխից կրան՝ ճանճիմով վիշի,
 Գլխին կարգանս ու զուսն թելիկս...

Շուքից աւ խափելի,
 որ խզումս մի քիչի կաւ աւելուս մի կիւս,
 որ կարգանս թելի աստից աւաւելի
 էր աւարտն ճարտիկս,
 Գլխից մի քիչի վիշի ու զուսն թելիկս...

Շուքից աւ խափելի,
 Եւ աւարտն աւաւարտն էրս քիչ լիւսն...



x x
x x

Պրոն է՛ն էլյակի վերակ
 Չարի՛ք զ՛մա մայրս,
 Լեզուս կայր զ՛մա,
 Է՛ր զ՛մա սյա-րի,
 Երբ զ՛մա քնարս ուրե՛կ
 Ե՛ր մեզմանս կուցանի,
 Երբ զ՛մա փոխակեր զ՛մա
 Լըքսանու-րի...

Ին կի՛ օրհես է՛ն զ՛ն,
 Կի՛ օրհես է՛ն զ՛ն
 Չեքսանուր զ՛մա
 Իրան Տառի՛ք,
 Օրհես կայր կանո՛ս,
 Օրհես կայր կանո՛ս,
 Է՛ր ~~ք~~ Կրքուր կանո՛ս
 Կի՛ մըքսանու-րի...



Մշտման

Երբ-էր ազատ է, երբեք ազատ է,
 Երբ օրհնել է, երբ և քանի,
 Երբ քանի է, առ ակ զարթել է
 Զարթուած էր եւ խելագար...
 Երբ-էր օրհնել է քանի է-քանի է,
 Կ-ը լոք ծախել է, ծ-ը առ արդ-ը...
 - Զարթ. Բաւ-ը այս քանի էր է,
 Եւ հաւան-ը է, ինչ է հաւան-ը:

~~Եւ Բաւ-ը քանի էր քանի էր քանի է,~~

Երբ այս-պէս ց-ը է առ ինչ քանի է,
 Երբ-էր քանի էր է առ զարթուած է,
 Երբ-էր քանի էր է քանի էր քանի է:

Երբ ինչ քանի է քանի է հաւան-ը,
 Երբ զարթուած է քանի է հաւան-ը...
 - Երբ, Բաւ-ը այս քանի էր է,
 Եւ հաւան-ը է, ինչ է հաւան-ը...

Շարժ լոք է... Երբ-էր քանի է,
 Երբ-էր քանի է, քանի է քանի է...
 Երբ զարթուած էր է, քանի է քանի է,
 Երբ է քանի է քանի է, քանի է քանի է...
 Երբ քանի է քանի է քանի է քանի է:

Գրգռում անկողն ունի կառուցած...
 Գրգռե՛լ սոսնձ և զժեռն զկեր ի ինձ
~~և ո՞րտե՛ս անարժեք և զժեռն կողմն~~
 Ի՞նչ ի՞նչ հաճույ՜ն ինձ կանոնով,
 Ինչո՞ւ խորս ծանր և ո՞րտե՛ս Գրգռ...
 և ո՞ր տե՛ս հայտն զի՛նձ, ազգո՞ւր զոչո՞ւր ե՛մ,
 Եզո՞ւր ծանո՞ղ ե՛մ, ազգո՞ւր զի՛նձ,
 Գրգռե՛լ զտե՛ս անկողն ունի կառուցած,
 Կըստե՛ր ահա և անկողնով,
 Ի՞նչ ի՞նչ հաճույ՜ն, անարժեք լսե՛լ,
~~Ինչո՞ւ~~ զոչո՞ւր և զոչո՞ւր կողմն:
 'Անարժեք և ոչո՞ւր հաճույ՜ն,
 Ինչո՞ւ զոչո՞ւր ազգո՞ւր և ո՞րտե՛ս ինձ...
 Այ՛ն Գրգռո՞ւմն ունի զոչո՞ւր ինձ,
 Եզո՞ւր անարժեք և սոսնձ, ի՞նչ սեր...
 Եզո՞ւր զժեռն և զոչո՞ւր կողմն,
 Եզո՞ւր զժեռն և զի՛նձ ի՞նչ ինձ...
 — Եզո՞ւր հաճույ՜ն զի՛նձ անկողն ինձ,
 Գի՜ն կանոնով և ոչո՞ւր...

Յ իւ - 88

Գրգռ

* * *

Մանուկ էի ես դեռ, անգետ չարին, բարուն,
Աշխարհը երգ էր դեռ, կյանքը հրաշք,
Չէի տեսել ես դավ, չէի տեսել արյուն,
Ու թեթև էր այնպես հոգուս վրա:

Աշնան տխուր մի օր մաշված սեմին մեր տան
Հայրս ձերմակ-ձերմակ մի գառ մորթեց...
Իմ առաջին արցունք, իմ տրտմության
Իմ մորմոքի կապույտ ծաղկաթերթեր...

Հետո օրեր անցան, հետո հրաշքն անցավ,
Կյանքը դարձավ մի մութ, խրթին հարցում,
Ու տեսնում եմ հիմա մահեր, դավեր, հանցանք,
Բայց քարացել հոգիս, չունի արցունք...

1942

ՄՂՁԱՎԱՆՁ

Գիշեր... Սուգն իր վարսերի տված հողմին ու բուքին,
Ինչ-որ կին է սլանում ու որոնում որբուկին...

Արդարության առաքյալն արնոտ ծնկները գրկել
Ու լալիս է ինչ-որ տեղ՝ իր աչքերով կիսակոյր,
Ինչ-որ մթին անդնդում ցավի ճիչը մրրկել
Ու ինքն իրեն փշերին, մացառներին է զարկում:
Եվ իմ սրտի մեջ ասես ինչ-որ սեպեր են խրված,
Չեմ կարենում հավաքել բեկորներն իմ փշրված,
Ճանապարհն եմ կորցրել ժայռից բուսած այն ծառի,
Որ պղնձի զրնգոց ու սխրանք էր պանծալի:
Այն աղբյուրն եմ կորցրել, որ մաքրությամբ իր տրտում
Եվ աստղերի արցունքով իմ հավատն էր մկրտում:

Գիշեր... Սուգն իր վարսերի տված հողմին ու բուքին,
Ինչ-որ կին է սլանում ու որոնում որբուկին:

Լեռնաշխարհը քարե՝ անքնություն է ու տենդ,
Խավարի մեջ թավալվում, չի քնում հողն իմ հայոց,
Եվ աչքերով, որ բորբոք, որ ոգեփայլ են ու խենթ,
Ուրվականներ են շրջում քամիների մեջ վայոդ:
Իսկ ես ծվատ ու տրտում ու՞ր եմ գնում, չգիտեմ,
Ինչ-որ վիհեր են խավար, ինչ-որ անդունդ է իմ դեմ,
Ինչ-որ անտառ է մթին, և խաչեր են, սև խաչեր,
Որ քարացել խավարում ու անզոր են հառաչել,
Հետո շներ, որ սակայն նորից փոխվել են գայլի
Ու երկինք են մխրձել ոռնոցն իրենց սոսկալի...

Գիշեր... Սուգն իր վարսերի տված հողմին ու բուքին,
Ինչ-որ կին է սլանում ու որոնում որբուկին...

ԵՌԱԳՈՒՅՆԸ ՇՈՒՇՎԱ ԲԵՐԴԻՆ

*Թրքաց մայրեր թող լան, ու դուն
Ուրախ լուրեր տար ի Ձեյթուն...*

Մ. ՊԷՇԻԿԹԱՇԼԵԱՆ

Եվ չտեսան, և չտեսան նրանց աչքերն արնոտ ու կույր,
Որ դու, Արցախ, ոչ թե մի բուռ, այլ բռունցք ես պղնձակուռ...
Եվ չտեսան, և չտեսան, որ Դեր-Չորից այն հեռավոր,
Պատուած պատանքն իր ավազե, ելավ մանուկ մի թևավոր,
Ելավ մանուկ մի հրաչյա, չքնաղ՝ նման հրեշտակի,
Որ իր փոքրիկ բռունցքներով նախ երկնքի դուռը թակի,
Ապա մաքուր իր ձեռքերով առած նշխարն արդարության,
Իջնի Արցախ, շրթունքներին երզը ոխի ու հարության.

- Թրքաց մայրեր թող լան, ու դուն
Ուրախ լուրեր տար ի Ձեյթուն...

Եվ չտեսան, և չտեսան, որ դարձած լույս, դարձած ոգի,
Նորից Նժդեհն է արշավում՝ նման մի նոր Սուրբ Գևորգի,
Որ բոցերից Սոււմգայիթի ելնում աղջիկ մի սիրասուն,
Ելնում փխրուն ու բարալիկ, բայց և ահեղ, որպես ցասում,
Որ ելնում են ամեն կողմից ֆիդայիներն այս ոգեղեն,
Դառնում անտես մի զորագունդ, թշնամու դեմ դառնում գեհեն,
Եվ եռագույնն են ծածանում մեր հինավուրց Շուշվա բերդին,
Վրեժի շանթն աչքերի մեջ, վրեժի երզն իրենց շուրթին.

- Թրքաց մայրեր թող լան, ու դուն
Ուրախ լուրեր տար ի Ձեյթուն...

Ներք, տղերք, ձեզ բոլորիդ ես չգիտեմ անուն-անուն,

Բայց շուրթերիս ամեն մեկիդ փառքի երգն է հասունանում,
Լոկ քեզ գիտեմ, քեզ՝ քաջ Մոնթե, սակայն գիտեմ իբրեւ լեգենդ,
Գիտեմ, որ դու խոնարհ ու հեզ, բայց կովի մեջ կրակ ես խենթ,
Ես քեզ գիտեմ, նոր Անդրանիկ, մաքրամաքուր, դու լույսի սյուն,
Դու անմարմին, որպես Հիսուս, և էպոսի դու դյուցազուն,
Երդումի պես ձեր շուրթերին հնչեց նորից երգն առնացի,
Որ երգն է սուրբ մեր քարեղեն ու ոգեղեն առեղծվածի.

-Թրքաց մայրեր թող լան, ու դուն
Ուրախ լուրեր տար ի Ձեյթուն...

Փանք քեզ, հայոց անմահ ոգի, փանք հառնումին քո հիասքանչ,
Դու լույսի սերմ, ցայգածաղիկ, լեռան աղբյուր ու հողի կանչ,
Ծիրանի ծառ դու ծաղկավոր ու շեկ ժայռից բխած գիհի,
Երկինք միտող տաճար ու վանք և խորություն անհուն վիհի,
Համբերություն որձաքարի և կայծակի դու շառաչուն,
Դու նորածին հուրհեր մանուկ և հերոսի դեռ տաք աձյուն,
Եվ քանի դեռ սուր են խրում քո սրտի մեջ ու քո վերքի,
Քո շուրթերին թող չլի վրիժառու տողն այդ երգի.

- Թրքաց մայրեր թող լան, ու դուն
Ուրախ լուրեր տար ի Ձեյթուն...

1992, մայիսի 9

ՀԱՅՇ

Եվ մենք կանգ առանք ձյունոտ կատարին Արարատ լեռան,
Եվ բուքը մեր դեմ ծառացավ՝ նման ձերմակ հովազի,
Մեզ կիզեց հետո դաշտի շոգը շեկ ու բոցը նոսան,
Բոցը եղեգան ու բոցը վազի...

Մենք հայ ենք, այո, ժառանգներն ենք մենք նահապետ Նոյան,
Մենք բուք ենք ու բոց, բարության շշուկ ու ձիչ ենք ոխի,
Ցասում ենք ու ցավ, անդունդի անկում ու լեռան խոյանք,
Եվ խոնարհ՝ որպես վազը խաղողի:

Որձաքար ենք մենք, ու մեր ջղերի կարծր կապույտից
Ցողեր են ցոլում, անարատ, որպես ներշնչման աղբյուր,
Եվ անդունդ ենք մենք, որի խելագար գլխապտույտից
Հառնում են հանկարծ կատար ու բարձունք:

Մենք վիհերն ի վար քարեքար ընկած գետ ենք ու վտակ,
Որ խղձի պես են քրքրում իրենց, իրենց ծվատում,
Ապառաժ ենք բիրտ, բայց մեր շուրթերից ձաքձքած ու տաք,
Ծաղկաթերթերի քնքշանք է կաթում:

Եվ այդպես ըմբոստ , և այդպես խոնարհ կանգնած ենք դարեր
Այն ամենանենգ քառուղու վրա, ուր մահն է վայում,
Եվ դար ու դարեր մեր աչքերին է նայում նա ահեղ,
Ու մենք էլ անթարթ նրան ենք նայում:

Բայց նա չգիտե, որ մեր սուրբ հացը ծվենն է լույսի,
Բայց նա չգիտե , որ մեր ջուրն ըմպած արցունք է մի կում,

Մեր մագաղաթներն առասպելներ են ոսկու, փիրուզի
Եվ արեգական հավերժ ծառագում:

Հողմածաղիկ ենք, ցողունը՝ բարակ, թերթերը՝ շաղոտ,
Բայց որի արմատն ահնարին է մայր հողից պոկել,
Որ այսքան տանջված, բայց ոգել ենք մի այնպիսի աղոթք,
Որ դեռ աշխարհում ոչ ոք չի ոգել...

Մենք՝ մթին անձավ, մենք՝ խրթին բարբառ ու անբառ երդում,
Մենք՝ խորհուրդ խորին, որ մատչելի չէ կյանքում ոչ ոքի,
Ոչ ոք չգիտի, որ օրհասական մի ակնթարթում
Կարող ենք վառվել ու դառնալ ոգի:

Եվ մեզնից բացի երևի ոչ ոք չի տեսնում կյանքում,
Որ մեր հոգու մեջ ու հայացքի դեմ մեր տառապագին
Հարության չքնաղ այն հրեշտակի լույսն է հորձանքում,
Որ փայլակ ունի, շանթ ունի հագին:

Մենք հայ ենք, այո, ժառանգներն ենք մենք նահապետ Նոյան,
Մենք տքնությունն ենք ու ձգնությունն ենք մեր խոնարի վազի,
Մենք բուք ենք ու բոց, անդունդի անկում ու լեռան խոյանք
Ու մոլեգնություն՝ խոցված հովազի...

15.08.93

ՀԱՎԱՏ

Ես՝ ճառագայթ խղձի, նա՝ ոխի սև նիզակ,
Ես՝ ցորենհասկ արդար, նա՝ ավազե սամուռ,
Ես՝ մենավոր խաչքար, որ շանթով է կիսած,
Նա՝ հողմային ժանիք, իմ հրաշքն է ծամում:
Բայց ես ապրեմ պիտի...

Երագի ճորտ ու զոհ՝

Ես ընթանամ պիտի՝ նման առաքյալի.
Պիտի ձամփաս փնտրեմ մեն մի աստղի լույսով,
Մի շիթ աղբյուր պիտի հանեմ ամեն քայլի,
Տատասկի մեջ պիտի փնտրեմ վայրի մի հասկ,
Որ նա պատմի ինձ լուռ, թե ինչպե՞ս է տոկում,
Պիտի ծունկի իջնեմ ակունքի դեմ այն պարզ,
Որ անդունդի գաղտնիք ու աստղ ունի հոգում:
Պիտի ոգեմ, կանչեմ ձգնակեցի մի ծեր,
Որ նա պատմի վասն մի կում ջրի, հացի,
Պիտի փնտրեմ, գտնեմ տքնության սև խուցեր,
Ու այնտեղից հանեմ ցուլքը լուսաբացի:
Պիտի ականջ դնեմ քեզ, անդունդի հառաչ,
Ու վերծանեմ պիտի քո բարբառը խրթին,
Պիտի ծունկի իջնեմ ես այն ծաղկի առաջ,
Որ բացվում է անգամ հրաբուխի շուրթին,
Մազարմատից պիտի նոր գաղտնիքներ հայցեմ,
Գաղտնուղիներ հայցեմ մեր բերդերից մամուած:
Պիտի գնամ, գտնեմ ես ջրաղաց մի ծեր,
Որ խորհրդի նստենք գլուխ գլխի տված:

...Հիմա գիշեր է խոր: Լեռներն իրենց ուսին
Հավերժության կապույտ աստղալույս են բարձել,

Եվ այնպես է թվում, թե լեռնաշխարհն իմ հին
Դարերի հետ խոսող վեհարան է դարձել:
Ինչ է խոսում, ավաղ, չեմ հասկանում ոչինչ,
Ինչ եք պատասխանում, անհայտության դարեր,
Բայց բառեր են հասնում ինձ աստղերի պես ջինջ,
Հասնում բառեր հուսո ու հավատի բառեր:
Եվ թվում է, Մհեր, թե անձավում այն մութ
Բնազդի պես հանկարծ վրնջում է քո ձին...
Ու ես անհուսության սև ամպերը վանում,
Հավատում եմ նորից ցեղիս առեղծվածին:
Հավատում եմ, Մհեր, որ դու զորեղ ես դեռ,
Որ ծառանա պիտի դեռ հրեղեն քո ձին,
Պողովատիկ պայտով պեղի կայծ ու շանթեր
Եվ քարանձավն այն մութ արշալույսով օծի:
Թե մոտենա պիտի հովիվն այն ժեռ քարին,
Կանգնի քո դեմ որպես առաքյալ մի հառնած
Եվ որոտա.

- Մհեր, ե՛լ, ցորենն ու գարին

Պիտի շուտով խոշոր արշալույսներ դառնան...

1993

ԱՌԱՔՅԱԼԸ

Ա.Գ. Սախարովի հիշատակին

Առաքյալներն են միայն այդպես զարկվում կայծակով,
Մարգարեներն են միայն շանթահարված մահանում...
Քայլում էիր՝ ձակատիդ փշե պսակը ծակող,
Քայլում էիր ու ձեռիդ խղճի կերոնը տանում:

Թող ղողանջեն զանգակներն իմ Հայաստան աշխարհի,
Արձագանքեն լեռ ու վիհ նրանց տրտում հնչյունին,
Քո սիրո մեջ տառապած, տառապանքիդ մեջ բարի
Դու բույն սվիր մեր բախտի արնոտ ու սև թռչունին:

Ու երբ քայլում էիր դու պատառոտված իմ հողով,
Թվում էր, թե սրբի պես ոտաբոբիկ ես քայլում,
Թվում էր հողն իմ հայոց դարձել կրակ ու բողոք,
Քո ներբանները, օ, ո՛չ, սրբիդ ձակատն է այրում:

Դու ջուր էիր աղերսում ոչ քեզ համար՝ աշխարհի,
Սակայն տեսա, թե ինչպես ջուրթիդ լեղի են քսում...
Կանգնել էիր դու խոնարհ ընդդեմ շեղաչ այն չարի,
Բայց և կանգնել էիր դու՝ ըմբոստ, իբրև հրո սյուն...

Այսօր հայոց աշխարհի արշալույսը հառաչեց,
Հառաչեցին նրա հետ ավերակները հայոց...
Արդարություն, բարձրացիր, քո առաքյալը խաչվեց,
Խիղճ մարդկային, խոնարհիր դրոշներդ ավելոծ:

Ձեռքս դրել եմ սրտիս ու քո լուռ ողբն եմ անում,
Ձեռքս դրել եմ սրտիս, որ զսպեմ ցավն այս ծակող...
Մարգարեներն են միայն խաչի վրա մահանում,
Առաքյալներն են միայն այդպես զարկվում կայծակով...

15.12.1989

* * *

*Անդրանիկ Հարությունյանի՝
Բերդաձորի Անդռյի հիշատակին*

Ոչ լեռան արծիվ ու ոչ դյուցազուն,
Ոչ կաղնեբազուկ, ոչ բոցամորուս,
Վտիտ ես, բարակ՝ որպես լուսի սյուն,
Եվ գունատ՝ որպես տառապյալ Հիսուս:

Քո մկրտության սուրբ ծեսն են արել
Կապույտ լեռները անառ Արցախի,
Քո կնքահայրը վրեժն է ահեղ,
Եվ քո մեռունը՝ լեղին մեր ցավի:

Քեզ շատ են փորձել արձիժ ու կրակ,
Բայց նահանջել են ոգուդ ցլանքից,
Լուսի սուրբ սյունը որքան էլ բարակ,
Բայց զորավոր է ական ու արկից:

Դու՝ նոր Անդրանիկ, նոր Աղբյուր Սերոբ,
Աչքերիդ խորքում շանթն է նույն տենդի,
Դու՝ դեռ անանուն, դեռ անհայտ հերոս,
Բայց շուտով պիտի փոխվես լեգենդի...

Գունատ ես՝ որպես տառապյալ Հիսուս,
Վտիտ ու բարակ՝ որպես լուսի սյուն,
Բայց դու՝ կորովի ու բոցամորուս,
Դու՝ լեռան արծիվ, դու՝ նոր դյուցազուն...

1992

* * *

Ես մի ձորակ գիտեմ,
Բարակ մի գետ ունի,
Ու բարդիներ բարակ,
Քարերի մեջ կորած
Մի արահետ ունի
Ու մի այրված քարափ...

Երբ աղքատ եմ լինում,
Ու երբ հոգս է լինում
Հոգուս վրա բարձած,
Ես գետակից այն ջինջ
Հավաքում եմ ոսկի
Ու հավաքում արծաթ:

Երբ ցաված եմ լինում,
Ծարաված եմ լինում,
Ու չի օգնում ոչինչ,
Մտքով գնում անտեղ
Ու ծունկի եմ գալիս
Գետակի դեմ այն ջինջ...

1976

* * *

Երբ արմատս եմ փնտրում,
Ձգում է քարը բիրտ,
Քանզի ծանր է այնպես
Տրտմությունն իմ արյան...

Երբ սաղարթս եմ փնտրում
Դու սլանում ես, սիրտ,
Դեպի երկինքը լուրթ
Ու երգում ես «Հարյավ»...

1987

ՎԱՀԱԳՆ ԴԱՎԹՅԱՆ. ՀԱԿԻՐՃ ԿԵՆՍԱԳՐՈՒԹՅՈՒՆ

Ծնվել է Արևմտյան Հայաստանի, ավելի ծիշտ՝ Փոքր Հայքի Արաբկիր գյուղաքաղաքում, 1922 թվականի օգոստոսի 15-ին, եղեռնից փրկված էրզրումցի հոր և արաբկիրցի մոր ընտանիքում: Հայրը հողագործ է եղել, մայրը՝ ջուլիակուհի:

Չորս տարեկան է եղել, երբ թողել է ծննդավայրը: Հետագա ամբողջ գիտակցական կյանքն անցել է Հայաստանում: Մասնակցել է Հայրենական Մեծ պատերազմին: Կրթությունը բանասիրական է, 1948 թվականին ավարտել է Երևանի պետական համալսարանը:

Ռազմաձակատից վերադառնալուց հետո սկսել է թղթակցել «Ավանգարդ» թերթին, ուր աշխատել է մինչև 1954 թվականը:

Այնուհետև աշխատել է մի քանի լրատվամիջոցներում՝ «Գրական թերթի» պատասխանատու քարտուղար (1954-1962) և գլխավոր խմբագիր (1962-1965), «Հայրենիքի ձայն» թերթի հիմնադիր-գլխավոր խմբագիր (1965-1967): Այնուհետև նշանակվել է Սփյուռքահայության հետ մշակութային կապի կոմիտեի նախագահի տեղակալ (1967-1981), «Վերածնված Հայաստան» հանդեսի գլխավոր խմբագիր (1981-1991):

1991 թվականին ընտրվել է Հայաստանի գրողների միության նախագահ, որը ղեկավարել է մինչև 1994 թվականը: 1986 թվականին ընտրվել է ՀՀ ԳԱԱ թղթակից անդամ, 1995 թվականին՝ ակադեմիկոս:

Մահացել է 1996 թվականի փետրվարի 22-ին՝ Երևանում: Հանգչում է Երևանի Կոմիտասի անվան պանթեոնում:

Վահագն Դավթյանի անունով են կոչել Երևանի թիվ 149 դպրոցը և Արաբկիրի զբոսայգին, որտեղ տեղադրված է

բանաստեղծի հուշարձանը: Արաբկիր վարչական շրջանում նրա անունով նաև փողոց կա:

2012 թվականին Երևանի Արաբկիր համայնքի Նաիրի Զարյան փողոցի 80 հասցեում բացվել է Վահագն Դավթյանի հուշատախտակը:

Վահագն Դավթյանը պարգևատրվել է՝

- «Հայրենական պատերազմի երկրորդ աստիճանի» շքանշանով:
- «Աշխատանքային կարմիր դրոշի» շքանշանով
- «Պատվո նշան» շքանշանով

Վահագն Դավթյանն արժանացել է՝

- ՀԽՍՀ մշակույթի վաստակավոր գործչի կոչման
- Հայաստանի պետական մրցանակի (կրկնակի անգամ) և Չարենցի անվան մրցանակի

Վահագն Դավթյանի ստեղծագործությունները

Վահագն Դավթյանի ստեղծագործությունները սկսել են տպագրվել 1935 թվականից: Հեղինակ է 40-ից ավելի բանաստեղծական ժողովածուների, գրական-հրապարակախոսական հոդվածների 2 գրքերի, «Բարի հսկան» (Վիլյամ Սարոյանի մասին) գրքի, «Համառոտ պատմություն հայոց» պատմագրության, «Անխորագիր» վիպակի, «Զուգահեռ ճանապարհ», «Ի սկզբանե էր Բանն» և մանուկում տպագրված հազարավոր հոդվածների, գրախոսությունների, էսսեների, հուշագրությունների:

Թարգմանել է Ա. Պուշկինի, Ս. Եսենինի, Ա. Բլոկի, Վլ. Մայակովսկու, Ծ. Պետեֆիի, Ռ. Բյուրնսի, Ռուդաքիի, Էդ. Մեծելայտիսի, Ա. Կիրակոսյանի և այլոց բանաստեղծությունները:

Վահագն Դավթյանի բանաստեղծական ժողովածուները

- Առաջին սեր (1947թ.)
- Աշխարհի առավուտը (1950թ.)
- Ճանապարհ սրտի միջով (1955թ.)
- Լուսաբացը լեռներում (1957թ.)
- Թոնդրակեցիներ (1961թ.)
- Ամառային ամպրոպ (1964թ.)
- Բայց ծնվեցի (1965թ.)
- Ծուխ ծխանի (1969թ.)
- Անկեզ մորենի (1972թ.)
- Երկերի ժողովածու 2 հատորով (1975թ.)
- Չուգահեռ ճանապարհ (1976թ.)
- Կապույտ գիրք (1978թ.)
- Բարի հսկան, հուշագրություն (1979թ.)
- Լույսն իբրև հաց, հատընտիր (1980թ.)
- Ասք սիրո (1982թ.)
- Լույս առավոտի (1984թ.)
- Երկերի ժողովածու 2 հատորով (1985թ.)
- Անքնություն (1987թ.)
- Ծննդավայր (1988թ.)
- Ի սկզբանե էր Բանն (1989թ.)
- Հայաստան 88 (1991թ.)
- Համառոտ պատմություն հայոց (1992 թ.)
- Գիրք ողբի և գովքի (1994 թ.)
- Հողմաշունչ գիշերներ (1995թ.)
- Անխորագիր (էսսե-վիպակ) (2003թ.)
- Օրինության նվագներ (2003թ.)
- Արևոտ հովիտ (2007թ.)
- Հայերգություն (2008թ.)
- Ընտրանի (2012թ.)

Գրքեր Վահագն Դավթյանի թարգմանությամբ

- Ալիսիա Կիրակոսյան, Արմատ և էություն, (1967, 1971 թթ.)
- Ռոբերտ Ռոժդեստովենսկի (1975թ.)
- Ռոբերտ Բյորնս, Իմ սիրտը լեռներում է (1977 թ.)
- Էդուարդաս Մեժելայտիս, Քարե գինի (1980թ.)
- Շանդոր Պետեֆի (1981թ.)
- Աստղային ձայներ (1983թ.)
- Գարսիա Լորկա, Արյունոտ հարսանիք (1986թ.)
- Ռուդարֆի (1995թ.)

Վահագն Դավթյանը՝ օտար լեզուներով

- Рассвет в горах (1960թ.)
- Летний зной (1960թ.)
- Poème d’amour et d’épée (1974)
- Неопалимая купина (1980թ.)
- Свет как хлеб (1981թ.)
- Libro Azul (1981թ.)
- Сказания о любви (1984 թ.)
- Ռեքվիեմ՝
 - լիտվերեն (1980թ.)
 - իսպաներեն (1981թ.)
 - ռուսերեն (1981թ.)
 - գերմաներեն (1986թ.)
 - ֆրանսերեն (1986թ.)
 - արաբերեն (1996թ.)
 - վրացերեն (2015թ)

Վահագն Դավթյանի մասին մենագրությունները

- Հենրիկ Գալստյան, Վահագն Դավթյանի պոեզիան, 1978թ.
- Ժենյա Քալանթարյան, Վահագն Դավթյան, 1991թ.
- Լևոն Հայրապետյան, Վահագն Դավթյանի խոսքարվեստը, 1999թ.
- Անցողիկն ու հավիտենականը, Վահագն Դավթյանի հիշատակին, կազմող՝ Սիլվա Յուզբաշյան, խմբագիր՝ Գ. Ջանիկյան, 2005թ.
- Դավիթ Գասպարյան, Վահագն Դավթյան, 2007թ.

ԲԱՆԱՍՏԵՂԾՈՒԹՅՈՒՆՆԵՐ ՎԱՀԱԳՆ ԴԱՎԹՅԱՆԻ ՄԱՍԻՆ

* * *

Երգդ շուրթեր ունի՝ մի խոր
Կարոտանքից ծաքած,
Հողոտ ոտքեր, ձեռքեր հողոտ
Ու երկնքոտ ձակատ:

Նայում են ինձ , նայում՝ արթուն
Քո տողերի տակից
Եվ մի ցողոտ ուրախություն,
Եվ մի շողոտ թախիծ:

Քո երգի մեջ երազային՝
Մի երկիր կա քարոտ,
Եվ հավատ կա Հրազդանի,
Եվ Եփրատի կարոտ:

Ինչ ասեմ, թող երգդ մնա
Նաիրական այդպես,
Երազային, երկնագնա
Եվ իրական այդպես:

Համո Սահյան

ԾՆՆԴԱՎԱՅՐԸ ԿԱՐԴԱԼՈՒՑ ՀԵՏՈ

Երանի թե օրը այդ գար,
Դու գնայիր քո տունդարձի ճանապարհով,
Քեզ կրծքասեղմ համբուրելի
Ու ասելի՝ գնան բարով:
Ու ասելի՝ երբ որ հասնես
Կարոտահույզ գետը Եփրատ,
Քո սիրո հետ խառնիր նրան
Մեր սրտեղեն սերն անարատ:
Ու ասելի՝ երբ ծխացնես
Մարած օջախը պապերիդ,
Մեր աչքերի հուրն էլ խառնիր
Նրանց նործուխ կրակներին:
Ու ասելի՝ երբ բարդենիդ
Քեզ ընդունի ստվերապարզ,
Մեզանից էլ խառնիր նրան
Կանաչ արև, կանաչ երազ:
Ու ասելի՝ երբ ամայի
Կալդ նորից լցնես հասկով,
Մեր քրտինքի լույս էլ խառնիր
Աստղացուլուն քրտինքին քո:
Ու ասելի՝ երբ որ կտրես
Պատառն արդեն քո սուրբ հացի,
Մեր խնդության լացն էլ խառնիր
Քո խնդության պայծառ լացին:
Ա՛խ, երանի՛ օրը այդ գար,
Դու գնայիր քո տունդարձի ճանապարհով,
Քեզ կրծքասեղմ համբուրելի
Ու ասելի՝ գնան բարով:

Լյուդվիգ Դուրյան

* * *

Լույսի շառաչ է կրկին, ամպրոպի ծիչ, ուրցի բույր,-
Վեր կաց, վեր կաց, Բանաստեղծ, գնա լեռները կապույտ:
Այնտեղ նվազ է հիմա, շողի թրթիռ է վետ-վետ,
Արթնացել են մշուշից ամեն ծերպ ու արահետ,
Ու շաղ տալով քարափին շամանդաղ ու աստղաջուր՝
Քո տեսած այն առաջին առավոտն է դողանջում:
Մեկն անձրևի շղարշից կանչում է քեզ կարոտած,
Նրա չթե շորերից ծաղիկներ են թափվում ցած...
Ինչ գործ ունեն օրերի խառնուխոփվ հորձանքում
Քո թախիծը աստղային ու քո երազը մաքուր,
Վեր կաց, վեր կաց, Բանաստեղծ, թողած և մեղք, և ներում,
Գնա, սուզվիր հեռավոր քո մանկության ձորերում:
Գնա, կտրիր քեզ համար շամբուտներից Մայր գետի
Մի եղեգնյա ձեռնափայտ՝ ներսում շունչ ու մեղեդի,
Բարդին իր զով ստվերից մի թաշկինակ կտա քեզ,
Որ ձակատդ սրբելով՝ հոգնությունդ ամոքես:
«Քելե, լառ» երգելով գնա երկիրը քո հին,
Ուր նարնջե ցուքերով բոցկլտում է մորենին:
Քո շուրթերին՝ օրհնություն, քո աչքերում՝ երգ ու սեր,
Վեր կաց, վեր կաց, Բանաստեղծ, ձամփա ընկիր լեռն ի վեր:
Գնա բարձրիկ ու հեռու այն աշխարհը մշտասուրբ,
Որի խոով զանգերի փոթորիկն էր քո ներսում...
Հավք ու ծաղիկ, ցուք ու խոտ շշնջալով ամպի տակ՝
Կառաջնորդեն քեզ դեպի անձրևները կապուտակ:
Գնա, հասիր քո Երկրի հովիտները թխպասույզ,
Ուր հինավուրց տաղերով Ոսկեգետակն է հոսում:
Եվ կտեսնես ջրի մեջ բրդի թելերն արծաթե,
Եվ շուրթերդ կդողան, և արցունքդ կխեղդես...
Եվ լեռների մշուշից՝ կարոտալի հաչոցով

Մի շուն կգա ընդառաջ՝ մորթը սևուկ, չալ պոչով,
Կփարվի քո ոտքերին՝ հայացքի մեջ հին մխանք,
Կհարցնի տխրահաչ. «Ու՞ր եք ախր, ի՞նչ եղաք...»:
Հետո կամաց կցրվի ցավի մլարը դեղին,
Կտեսնես՝ ծուխ է ելնում քո հայրական օջախից,
Կասես՝ մայրս է այնտեղ, մայրս, որ լույս էր դառել,
Ահա եկել է նորից, մեր հին թոնիրը վառել:
... Վեր կաց, վեր կաց, Բանաստեղծ, ճամփան երկար,
կյանքը կարճ,
Վեր կաց, գնա մորենուղ մխանքներին ընդառաջ:
Գնա, ու թե մոլորվես մութ կիրճերում, ժայռի տակ,
Կդարձնի բախտը քեզ երկրիդ ասուպ շողարձակ:
Եվ կարոտից դողալով, և զնգալով տխրաշուք,
Կցուցլաս հավիտյան հին լեռների մշուշում...

Իգնատ Մամյան

ԲԱՆԱՍՏԵՂԾՈՒԹՅՈՒՆ` ՆԱՄԱԿԻ ՓՈԽԱՐԵՆ

Բա՛խտ է, թե՛ նզովք բանաստեղծ լինել...
Գիտեմ ինչպես է ցավում վերքը ձեր:
Ասում եք` Բառը Աստծո չափ հին է,
Այսօր ինչպե՛ս եք քնից վեր կացել:

Դեռ չի հորինվել այն սպեղանին,
Որ բանաստեղծի վերքերը բուժի...
Իսկ Աստվածորդու քարե սեղանին
Կավե սափորը նման էր կուժի:

Օրը բացվեց: Ես ցավում եմ, այո,
Որ մեր զրույցը անավարտ մնաց:
Ձեր շուրթերին մի բառ կար հմայող,
Որն անհայտության կածանով գնաց:

Հուշը օգնում է: Բայց ի՞նչ եք կարծում,
Ո՞ր էր խենթացած Տերյանը գնում...
Չկային բառեր: Կա՛ր ուղի, կա՛ր ձյուն,
Հույսը հատնում էր, լույսը` չքանում:

Պիտի պահպանենք սյուները մեր վեհ,
Թող վայրահաչի այլասերվածը...
Բարին չի կարող չարի հետ մերվել,
Վկան` Չարենցի մորֆու սրվակը...

Գիտեմ, դժվար է, սակայն ինձ ասեք.
Այդ ե՛րբ է դառնում զավակը ծնող...

Ինչ էր մտորում Վարուժանը սեզ,
Երբ հեռանում էր անդարձ կածանով:

Ձանգվի ձորում այդ ու՛մ արյունն էր
Հեղվում զորացած չարի թաթերով...
(Տեր, անշրջելին միթե մարում է,
Հղփացած չարին պիտի դատեր ո՞վ...):

Տառապանքից է պոեզիան քամվում,
Այսօր գտնվ եք մի տող լուսեղեն,
Դուք ամեն անգամ խաչին եք գամվում,
Որ հետո ձայնեք՝ տիանք, լույս եղև...

Ես գիտեմ, այո՛, ես հաստատ գիտեմ,
Որ դուք հրեղեն կարոտներ ունեք:
Որ հաղթ կանգնած եք տառապանքի դեմ,
Եվ ձեզ ձգում է տեսիլքը գունեղ...

Ո՞վ տեր կկանգնի Ձեր անտեր Ցավին,
Ո՞վ կմեկնի ձեր տագնապը թաքուն...
Մզանում է մեր ոգեղեն ծավին,
Օրհասը կրկին մեր դուռն է թակում...

Ներեք ինձ, զի Ձեր վերքերին դիպա,
Որոնք երգ դարձած ինձ էլ են թովել...
Օ՛, անբառ երգի երկնահույս դիպակ,
Օ՛, բանաստեղծի անբուժելի վերք:

Ձնհալի ծամփով գարունն է գալիս,
Թող ցայգալույսը ձեր վերքը ցողի,
Ձի Ձեր մանկության մանրանկարի
Ծաղիկը երգ է, իսկ երգը՝ ծաղիկ:

Արտաշես Ղազարյան

ԴՈՒ ԱՐԵՎԻՑ ԾՆՎԱԾ ԼՈՒՅՍԻ ՑՈԼԱՆՔ

Դու արևից ծնված լույսի ցուլանք,
Ու արևի համար զոհաբերվող ոգի,
Դու կարոտի մորմոք ու երազի խոյանք,
Արաբկիրում ծնված դու նաիրյան որդի:

Դու հայրենի հողի շքեղ փառաբանանք,
Փայլատակող հոգու անմատչելի բարձունք,
Դու անմոխիր կրակ, բարու բարի բաղձանք,
Դու եղեռնից ծնված չորացող արցունք:

Դու կապույտով սնված կապտամշուշ թախիծ:
Քո սուրբ սիրո առաջ դու ծնկաչոք աղոթք,
Խղձի շողով հյուսված դու ճառագայթ անբիծ
Եվ Աստծուն ուղղված ցասումնալի բողոք:

Դու ներշնչման հրաշք ու ներշնչող արվեստ,
Թաքուն տենչանքների դու գունագեղ փթթում,
Դու աստղերի հառաչ, դու մարտնչող ասպետ,
Դու խաղողից քամված գինու լուռ փղձկում:

Դու տուն բերված խաչքար, դու ցորենի բուրմունք,
Դու Եփրատի ափին կորցրած գյուղի մխանք,
Դու երազի բեկոր, դու հևասպառ հուզմունք,
Եվ հավերժող լույսի պատարագված ըղձանք:

Քո աշխարհին է հիմա իմ մեջ ալեկոծվում,
Դու իմ հեռու ընկեր, դու երգ իմ արտույտի,
Դու արվեստի նշխար, դու կարկաչող հուզում,
Հավերժություն մեկնող դու «Լույս առավոտի»:

Վահրամ Հաճյան

ԱՆԴԻՆ

Ճնձղուկներ, ճնձղուկներ հուրհրան
Լուսաթավ դաշտերին ձախրելիս,
Ի՞նչ կուզես, իմ հոգի, այս ժամին,
Արդյոք ամյն, ինչ արդեն դու ունես:

Արդյոք ամյն, ինչ կյանքում ունեցար՝
Եվ սերեր, և դավեր մեկուսի,
Կյանքը քո, խեթ մի ձի թամբելով՝
Սլացավ կեռամանով ահալի:

Գուցե ամյն, ինչ երբեք չունեցար,
Ինչ որ դու կուզեիր որ լիներ,
Չէ՛, հոգիս, իմ հոգին չի ուզել
Պարուրվել խնդումով ահալի:

Իսկ հիմա սգասյուրք դաշտերին
Մի անգույն իրիկուն է իջել
Եվ քամին կորուսյալ իր ձայնով
Շեփորում է վախճանն արևի:

Ի՞նչ կուզես, իմ հոգի, ինձ ասա,
Ի՞նչ կուզես մենավոր այս ժամին,
Արդյոք ամյն, որ շուքով քեզ տանեն՝
Քո անցած դաշտերով արյունի:

Որ կրկին, որ էլի դու անցնես
Չինավառ շարքերով հույզերիդ
Եվ հետո գիշերով սպանեն
Քո մտքի բեկորները այրի:

Ո՛չ հոգիս, կար հրաշք մի ցերեկ,
Ճնձղուկներ, ճնձղուկներ դաշտերում,
Ծննդիս այդ օրում առաջնեկ
Տիրոջ տաք օրհնությունն է սպասում:

Վահան Վարդանյան

ՎԱՀԱԳՆ ԴԱԻԹԵԱՆԻ ՀԵՏ

Բոցը խաղաղ յօնքերիդ,
Պահը մեղմ էր ու կարմիր,
Նայում էի ձեռքերիդ,
Վիպող տեսնում ու դպիր...

Լսում էի Գինու երգ,
Գինիդ մնաց գավաթում,
Այնտեղ մի շիք տիկին շեկ
Տատանվում էր ու... հատնում:

Անպարտ էիր ու խոհուն,
Աչքս բռնեց ամէն պահ.
Նոյնպէս նայածքն այն սահուն,
Որ խաղում էր ինձ վրայ...

Քեզնով տեսայ Արտաւազդ՝
Հողից հեռու թագաւոր.
Բանաստեղծ մի ազնւազան,
Փոքր Հայաստանը բոլոր:

Ձիգ լուցինք այդ գիշեր,
Դու բարեսիրտ կուռքի պես.
Զգրեցի ես «յուշեր»,
Էլ չտեսայ երբէք քեզ...

Խոցն խորացաւ իմ արնող,
Ուզում էի հանել ձայն,
Գեղջուկական երգի տողն.
Ինձ էլ տարէք Հայաստան...

Վարանդ

ԿԱՐԾԻՔՆԵՐ ՎԱՀԱԳՆ ԴԱՎԹՅԱՆԻ ՄԱՍԻՆ

Վահագն Դավթյանը բազմաշնորհ բանաստեղծ է, նրա բանաստեղծությունները միջնադարյան մեր երգերի խորությունն ունեն և արևմտահայ պոեզիայի շքեղությունը, պոետական կուլտուրան բարձր է, տեխնիկապես կուռ է, հողի բույր ունի, բայց և եթերային է...

ԱՎԵՏԻՔ ԻՍԱՀԱԿՅԱՆ

Վահագն Դավթյանը թե՛ շատ ազնիվ հոգի է և թե՛ սքանչելի բանաստեղծ: Հայ բարեգործական միության համագումարում նրա կարդացած պոեմը ոգեշունչ էր: Փառք Աստծուն Վահագնի, Սևակի, Մահարու, Թոթովենցի, Չարենցի համար:

ՎԻՆՅԱՄ ՍԱՐՈՅԱՆ

Վահագն Դավթյանն ապացուցում է, որ լիարյուն կյանքով ապրող իսկական բանաստեղծի համար մեր հին հողագունդը նրա հետ նորից է ծնվում, և այն, ինչ մենք կոչում ենք նորարարություն, նրա արյան մեջ է: Դավթյանը ընթերցողին կաշառում է իր անկեղծությամբ: Նա հմուտ, նուրբ վարպետ է բնությունը գրով նկարելու գործում:

ԳՈՒՐԳԵՆ ՄԱՀԱՐԻ

Իր զուսպ, զորեղ, սթափ ներկայությամբ՝ ոչ մեկի, ոչ մեկիս բերանը մի անգամ չչարժվեց մեծարման խոսքով պսակավորելու իրեն, և միայն հիմա, իր լռությունից օգտվելով, ասենք. ինչ մեծ, ինչ սև խոռոչ է իր լքած տեղը՝ բանաստեղծի տեղը և գործչի տեղը, ապաստարանը մշակութային ողջ ժառանգության և ապաստարանը կենդանի բոլոր թրթիռների:

ՀՐԱՆՏ ՄԱԹԵՎՈՍՅԱՆ

Վահագն Դավթյանը՝ իմաստուն բանաստեղծը, մեծ սրտի տեր

հոգեբանը, խորունկ քննադատն ու մտածողը, ստեղծում էր աշխարհներ, որոնք լայնացնում են հայ բանաստեղծության ուղիները և լույս նետում առաջացող սերունդների գալիք ճանապարհին..

ՀՐԱՆՏ ԹԱՄՐԱՅՅԱԼ

Իր բանաստեղծությունները մեկում նա խոստովանում է, որ իր սիրելի զբաղմունքն է. «Բարձրանալ կատար... ու կանգնել արծվի հարևանությամբ»: Մարդ, որ արծիվների ցեղից է: ...Ես սիրում եմ Վահագն Դավթյանի պոեզիան, որը իսկապես «մաքրում է արյունը», մարդկային երակների մեջ արևի լույս է ներարկում, մարդուն դարձնում ավելի լավ, ավելի ազնիվ, հանում մինչև Արարատի բարձունքները:

ԷԴՈՒԱՐԴԱՍ ՄԵԺԵԼԱՅՏԻՍ

1982 թ. լրանում է Վ. Դավթյանի վաթսուն տարին: Դա համարվում է այն հասակը, որն անվանում են «իմաստության հասակ»: Վ. Դավթյանի բանաստեղծական աշխարհը, իսկապես, թևակոխել է այդ հասակը, որն արդեն շփման եզրեր է բերում հայ դասական բանաստեղծության մեծ հասակի հետ:

ՍՈՒՐԵՆ ԱՂԱԲԱԲՅԱԼ

գրականագետ

Ես շատ եմ մտածել, թե ինչ ահավոր ու պատասխանատու բան է Նարեկացուց հետո Հայաստանում բանաստեղծ լինելը: Հիմա մտածում եմ, որ այդպիսի բանաստեղծ կորցնելը ևս մեր երկրում առանձնապես ահավոր է: Բայց և այնպես այն ժամին, երբ մեծ բանաստեղծ Վահագն Դավթյանը հեռացել է, որպեսզի հանդիպի Պարոյրի ու Համոյի հետ, այդ անուններն արտասանելիս անգամ ականա հպարտություն եմ զգում: Պոեզիայի, ուրեմն նաև պոետների համար անցյալ չկա:

ՍՏԱՆԻՍԼԱՎ ՌԱՍՍԱԴԻՆ

ոուս քննադատ

Լինելով նույնքան տաղանդավոր, որքան իր գրչակիցները՝ Համո Սահյանը, Պարույր Սևակը, դժբախտաբար, Վահագն Դավթյանը չունեցավ իր անձնական քարոզիչը: Դա ցավալի է, որովհետև նրա ժառանգությունն այսօր արժանի չափով տարածված չէ: Իմ հիշելով, որևէ մեկն այնպիսի խանդով ու նախանձախնդրությամբ չէր պահպանում գրական չափանիշներն ու ծաշակը, ինչպես դա անում էր Վահագն Դավթյանը: Նրա ծաշակի ու չափանիշների հետ հաշվի էին նստում գրող Գուրգեն Մահարին, գրաքննադատ Սուրեն Աղաբաբյանը: Նրա հարազատ եղբայրությունն էին փնտրում Վիլյամ Սարոյանն ու Հրանտ Մաթևոսյանը: Վահագն Դավթյանի հետ այսպիսի մարդկանց միասնությունը թույլ չէր տալիս, որ մանր-մունր բաներ ներթափանցեն գրականություն...

ՌԱԶՄԻԿ ԴՎՈՅԱԼ
բանաստեղծ

Նա չափազանց բծախնդիր էր և չէր սիրում, այսպես կոչված, բանաստեղծական անփութությունները՝ գրեթե կատարելության էր հասցնում իր բանաստեղծական տեխնիկան, ինչի շնորհիվ էլ մեզ թողեց նաև բարձրարվեստ թարգմանությունների հրաշալի նմուշներ...

ՀՈՎՀԱՆՆԵՍ ԳՐԻԳՈՐՅԱՆ
բանաստեղծ

Իսկական բանաստեղծի կյանքն էլ, մահն էլ ցավագին չի լինում: Նրան գտնում են շարունակաբար, թե՛ կենդանության օրոք, թե՛ մահից հետո: Մի անգամ, Գառնիի ձորում, ժայռերի ընդերքից ընկնող կաթիլքը ափերի մեջ որսալով՝ ասաց. «ես այս կաթիլն եմ»: Թե՛ իր պոեզիան ի նկատի ուներ, թե՛ իր կյանքը: Եկեք սուզվենք այդ ծով- կաթիլի անհատակ խորությունների մեջ:

ՎՐԵԺ ԻՍՐԱՅԵԼՅԱՆ
արձակագիր

Բառի արժեքը գիտեր: Բառից էր գալիս ու գնում էր դեպի իր բառը, իր կշռույթը, իր պատկերը, գույնը, հանգը... Անպայման ստեղծեց բանաստեղծական իր տարածքը, իր խորհրդանշանները, իր արմատական բառ- պատկերները:

ԴԱՎԻԹ ԳԱՍՊԱՐՅԱԼ
գրականագետ

Կապույտի և լույսի չընդմիջվող ներկայությամբ՝ Վահագն Դավթյանը քար առ քար, բառ առ բառ վերակերտել է իր կորցրած ծննդավայրը, իր ժողովրդի խճճված հանգույցները թել-թել բացելով՝ կիսել է ցավը, խինդը և ապա փառավորվել նրա հավերժության հրձվանքով:

Ապրելը հեշտ է, երբ շուրջդ բանաստեղծի ներկայությունը կա՝ որպես աստվածային շնորհով օժտված երևույթ, որպես խղճի ձայն, որպես զորացնող թռիչք՝ դեպի հեռուները շոշափելի ու անկշիռ:

ԽԱՉԻԿ ՄԱՆՈՒԿՅԱԼ
բանաստեղծ

«Արվեստում ցավն է ստեղծում արժեք»,– ասում էր նա: Եվ իր պոեզիան՝ կորցրած հայրենիքի անընդհատ մխացող գիտակցության, իրական ու անիրական կանացի իդեալի որոնումի, գենետիկ կոդ սողոսկած հեթանոսի և Լյառը բարձրացող Աստծո որդու դրոշմն ուներ: Արդեն 20 տարի է, որ մեր կողքին չէ նա՝ գրականության ու մշակույթի Մեծը: Ետչարենցյան ամենախոշոր հայ պոետներից մեկը, գուցե ամենաամբողջականը: Եվ վաղուց հասունացել է Վահագն Դավթյանի ստեղծագործական ժառանգության համակարգված ուսումնասիրության խնդիրը:

ԱՆԱՏՈՒԻ ՀՈՎՀԱՆՆԻՍՅԱԼ
բանաստեղծ

ՎԵՐՋԱԲԱՆԻ ՓՈԽԱՐԵՆ ԿԱՄ ՎԱՀԱԳՆ ԴԱՎԹՅԱՆԻ ՄԵԾ ՀՈՒՆՁՔԸ

Հարգելի ընթերցող, ձեր սեղանին է Վահագն Դավթյանի ստեղծագործության ծավալուն ժողովածուն: Այս մտահղացումը իրագործել ենք ՀՀ վաստակավոր արտիստ, ասմունքող Սիլվա Յուզբաշյանի հետ: Հանդիպելով ու քննարկելով ժողովածուն ստեղծելու գաղափարը, արձանագրեցինք, որ երկար տարիներ` շուրջ երկու տասնամյակ, Վահագն Դավթյանի ստեղծագործությունները ամբողջական տեսքով չեն հրատարակվել, իսկ եկող ու առաջ գնացող սերունդները միշտ դրա կարիքն ունեն: Սկսվեցին որոնումները, փնտրտուքները: Թվում էր, թե այստեղ խնդիրներ չպետք է լինեին, մանավանդ որ ժողովածուն կազմելու բարդ գործը ստանձնել էր Վահագն Դավթյանի պոեզիայի գիտակ և անզուգական կատարող Սիլվա Յուզբաշյանը:

Ինչպես և սպասելի էր, ինքը` Սիլվան, ավելի ու ավելի խստապահանջ դարձավ: Ցանկություն կար հնարավորինս ավելի շատ ստեղծագործություններ ընդգրկել, որ դրանք արտահայտեին մեծ բանաստեղծի ստեղծագործության ողջ պատկերը: Եվ արդյունքում ստացվեց ոչ թե հատընտիր, այլ մի ժողովածու, որը ընդգրկուն է, և կարող է ներկայացնել Վահագն Դավթյանի ստեղծագործության ամբողջականությունը: Փաստորեն այստեղ ներկայացված են Վահագն Դավթյանի պոեզիայի լավագույն նմուշները: Համաձայն եմ Սիլվայի հետ, ամենադժվարինը ընտրությունն է... Մանավանդ` քանի ժամանակը առաջ է գնում, այնքան Վահագն Դավթյանի պոեզիան ավելի հրատապ, լեցուն ու խորիմաստ է դառնում:

Մոտ և մտերմիկ բարեկամություն չի եղել իմ և մեծ բանաստեղծի միջև, չնայած նրա հետ դիպվածային հանդիպումների

Ժամանակ ջերմ ու մարդկային վերաբերմունքի եմ արժանացել: Նրա խոսքի ինքնատիպ հնչերանգների և ասելիքի ազդեցությունն այնքան մեծ էր, որ անընդհատ ուզում էիր լսել նրան: Իսկ նա ուրախանալ գիտեր երիտասարդության ձեռքբերումներով և նաև խոր մտահոգվել նրանց առջև ծառայած խնդիրներով:

1981 թվականն էր. սովորում էի Մոսկվայի Մ.Վ. Լոմոնոսովի անվան պետական համալսարանի Ժուռնալիստիկայի ֆակուլտետում և ամռանը Երևան էի եկել՝ մասնագիտական պրակտիկայի: Մի օր անցնում էի այսօր Հանրապետության, այն ժամանակվա Ալավերդյան փողոցով, ուր գտնվում էր Սփյուռքահայության հետ մշակութային կապերի կոմիտեն և նրանց կողմից հրատարակվող «Վերածնված Հայաստան» ամսագրի խմբագրությունը: Ծանոթ էի ամսագրին, և այն ձգում էր իր տեսքով ու ձևավորումով, բովանդակությամբ ու ասելիքով: Մտածում էի՝ հենց այստեղ կուզենայի նյութեր հրապարակել Մոսկվայի հայության մասին:

Ներս մտա, փնտրեցի գլխավոր խմբագիր Վահագն Դավթյանի աշխատասենյակը, ասացի, որ ապագա լրագրող եմ, կուզենայի հանդիպել և առաջարկել համագործակցություն: Հարցրեց. «Երբեք տպագրվել ես հայկական մամուլում»: Ի պատասխան՝ պայուսակիցս հանեցի «Ավանգարդում» տպագրված թերթերի մի խուրձ ու մեկնեցի իրեն. «Ամեն ինչ հասկանալի է, գրիր Մոսկվայի ծանաչված և նշանավոր հայերի մասին, ինչպես որ կան,- ասաց նա՝ ավելացնելով,- վստահ եմ, որ հետաքրքիր ու ուշագրավ հերոսներ կգտնես»... Այդպես սկսվեց ծանոթությունը և համագործակցությունը և ինչ-որ տեղ նաև բարեկամությունը Վահագն Դավթյանի հետ: «Վերածնված Հայաստան» ամսագրի էջերում սկսեցին լույս տեսնել իմ ակնարկներն ու հարցազրույցները: Ամեն մի հրապարակումից հետո ստանում էի Վահագն Դավթյանի քաջալերող, ոգևորող գնահատականները, նաև նոր հանձնարարականները:

Ամեն անգամ Երևան գալով այցելում էի խմբագրություն,

ոչ միայն իմ երախտագիտությունն ու շնորհակալությունը արտահայտելու, այլև, նախ և առաջ նրա հետ որպես լրագրող շփվելու, ով անցել էր լրագրություն տանող դժվարին ճանապարհը: Առաջին հերթին նա քաղաքացի-լրագրող էր, մեծ հրապարակախոս, ով կարևոր առաքելություն էր կատարում՝ հետաքրքիր ու ինքնատիպ կրթամշակութային, մարդասիրական պատուհան ստեղծելով դեպի սփյուռք:

Այն ժամանակ դժվար էր պահել ու փայփայել նույն արժեքային համակարգը, որ ստեղծվում ու ձևավորվում էր հայրենիքի ու սփյուռքի միջև: Վահագն Դավթյանը այն առաջամարտիկներից էր, ով ձգտում էր այնպես անել, որ ձիշտ և նպատակային ճանաչեն միմյանց՝ մայր հայրենիքը և սփյուռքը. լրագրողական հողի վրա ստեղծված բարեկամությունը հետագայում էլ շարունակվեց: Արդեն հանդիպումների առիթներ եղան որպես հեռուստալրագրող:

Միշտ նրան տեսա որպես իր երկրի նախանձախնդիր քաղաքացի, ով ոչ միայն հստակ հասկանում էր իրավիճակը, այլ ուներ խնդրի լուծման իր առաջարկը և բանալին:

Շուրջ 20 տարի է, ինչ մեզ հետ չէ մեծ բանաստեղծը, կավելացնեի՝ տաղանդավոր լրագրող-հրապարակախոսը, հասարակական գործիչը, բայց այսօր էլ նրա ստեղծագործությունները զարմացնում են իրենց ասելիքով, ինքնատիպ փիլիսոփայությամբ, պոետական բարձրարվեստ կերտվածքով: Ավելի քան վստահ եմ, որ որքան մեզանից հեռանում է Վահագն Դավթյանը, նույնքան մեզ են մոտենում նրա ստեղծագործությունները՝ մեր ժամանակին ավելի համահունչ, ավելի խոր ու համամարդկային ասելիքով...

Եվ այս ճամփաբաժանում Վահագն Դավթյանի այս նոր ժողովածուն, որը վերնագրված է «Աստղ ու ցորեն», կատարելու է իր աստվածահաճո առաքելությունը: Մյուս կողմից ցորենի խորհրդանիշով նրա պոեզիան բարի հունդեր է ցանում մեր հոգիներում, որն այդքան շատ ունի դրա կարիքը: Մյուս կողմից նրա աստղը մեզ առաջ է տանում՝ ձիշտ

կողմնորոշելով այս դժվարին ու բարդ աշխարհում, ուր բարու, գեղեցիկի, մարդկայինի աստղապահն է մեծ բանաստեղծը:

Վահագն Դավթյանի աստղաբույլի և ցորենի հասկերի խրձերի մեջ նրա լուսապայծառ պոեզիայի հետքերն ենք տեսնում ու ցանկանում, որ այդ ձանապարհը, որը դեպի ապագա է տանում, լինի կողմնորոշիչ հուսո աստղ և լուսե ցորեն մեր ժողովրդի համար:

Իսկ այս ամենն անհրաժեշտ է հավատի զորավոր ծառը միշտ կանաչ պահելու համար, քանի որ առանց հուսո աստղի չկա ցորեն հասկ:

Զգիտեմ որն է լավագույնը՝ երբ որ ինքդ ես կարդում լուսե պոեզիան, ինչպիսին Վահագն Դավթյանինն է, թե՛ երբ այն քեզ մատուցում են: Երևի թե երբ կա այս ամենի ոսկե միջինը: Հենց այդ հնարավորությունն էլ ձգտել ենք ստեղծել ընթերցողի համար, որ ցանկության դեպքում կարողանանք Սիլվա Յուզբաշյանի օգնությամբ վայելել Վահագն Դավթյանի պոեզիայի լավագույն նմուշները:

Մի խոսքով ներկայացվող ժողովածուն ինչ-որ տեղ համարենք ընթերցողի հետ վաղուց սպասված հանդիպման հնարավորություն, երբ ամեն մի ընթերցող իր համար կարող է բարձրակարգ պոեզիայի մեծ տոն ստեղծել:

Իսկ մենք էլ ամեն ինչ պետք է այնպես անենք, որ այդ տոնը միշտ շարունակական լինի:

Սերգո Երիցյան

*«Լոռվա ձոր» հայրենակցական միության նախագահ,
բանասիրական գիտությունների դոկտոր, պրոֆեսոր*

ԲՈՎԱՆ ԴԱԿՈՒԹՅՈՒՆ

| | |
|------------------------------------|----------|
| Ամբողջական մի աշխարհ | 4 |
| Երբ վերջին անգամ | 7 |
| ԱՆԿԵՉ ՄՈՐԵՆԻ | |
| Նախերգանք | 10 |
| Ծննդավայր | 11 |
| Կանչ | 12 |
| Առաջին հուշ | 13 |
| Գառը | 15 |
| Ջրհորը | 16 |
| Հեքիաթը | 17 |
| Գիշեր | 18 |
| Վիրավոր կռունկը | 19 |
| Համր քարեր | 20 |
| Ոսկեգետնակը | 21 |
| Արյունոտ լույս | 22 |
| Ամպել էին, մթնել էին | 23 |
| Շունը | 24 |
| Եփրատը | 26 |
| Փուշը | 27 |
| Եվ մի աշխարհ մնաց այնտեղ | 28 |
| Մեր ծիծեռնակը | 29 |
| Այնտեղ, արևոտ այն քարափներին | 30 |
| Կապույտ անդունդ | 31 |
| Ձայներ | 32 |
| Եվ դարձել են հեկեկանք | 34 |
| Մեղեդի | 36 |
| Ակնա ձորում | 37 |
| Աստղի պես | 38 |
| Թե հրաշքով | 39 |

| | |
|--------------------------|----|
| Մի գիշերով արթնանայիր... | 40 |
| Փշրված լուսին | 41 |
| Դեպի սկիզբը | 42 |
| Ճանապարհ | 43 |
| Մշո լեռներում | 44 |
| Հողմերի դեմ | 46 |
| Ծունկի եկ, ծունկի... | 48 |
| Մանկության գիշեր | 50 |
| Առավոտը | 52 |
| Էլ բավական է... | 53 |
| Ծուխը | 54 |
| Տեսիլք | 56 |
| Կալը | 58 |
| Ամռան օր | 59 |
| Վայրի մեղր | 60 |
| Նուռը | 61 |
| Ամռան գիշեր | 62 |
| Մորեխը | 64 |
| Իրիկնամուտ | 68 |
| Անկեզ մորենի | 69 |

ԱՍՔ ՍԻՐՈ

| | |
|---|----|
| Հիմն կնոջ | 73 |
| Ժամ հայտնության | 74 |
| Այսօր քեզ նորից հիշել եմ | 76 |
| Առուններում փշուր-փշուր | 76 |
| Դաշտով վազում է | 77 |
| Մի հեռավոր ծղրիդի կանչ | 78 |
| Գալիս էր՝ բոբիկ, մազերը արծակ | 79 |
| Երկու ծաղկած փշատենի | 80 |
| Գարնան ջրերն են հորդում, գարնան ջրերն են երգում | 81 |
| Ձմռան գիշեր | 82 |
| Ալիքը խփում ու տանում է նավակը | 83 |

| | |
|--|-----|
| Հովի շունչը կար ու հովի թև | 84 |
| Շաղոտ փեշը քամուն տված | 85 |
| Քեզ | 86 |
| Եվ ամեն անգամ քեզ հանդիպելիս | 87 |
| Սպասում | 88 |
| Ո՞ր գնամ հիմա և ո՞ր թափառեմ | 89 |
| Նորից ձնհալ է, ձնհալ | 90 |
| Արեգակն է համբուրում | 91 |
| Իմ պատանության կապույտ գիշերներ | 92 |
| Վայելք | 93 |
| Գիշերն ի լույս իմ բոլոր | 94 |
| Ասում են հին վերքն հաճախ է ցավում | 95 |
| Դու եկար այն գիշեր, դու եկար ինչպես սերն է գալիս | 96 |
| Ծաղկի, ցողի ու լույսերի մեջ ծավի | 97 |
| Անանուն | 98 |
| Երազիս մեջ այսօր քեզ հետ էի նորից | 99 |
| Ամառային ամպրոպ | 100 |
| Դու խուժեցիր իմ բախտի մեջ | 102 |
| Գնանք, սիրելիս | 103 |
| Սեր | 104 |
| Գիտեմ, սիրված ես եղել կյանքում | 105 |
| Եթե հարցնես | 106 |
| Ես հաշտ էի ապրում իմ բախտի հետ | 107 |
| Տաք ձյունը | 108 |
| Կեսն է գիշերվա | 111 |
| Ես չգիտեմ, ի՞նչ ես շահում | 112 |
| Իմ քսան տարին և տասնութը քո | 113 |
| Սրտիս զարկերը և ժպիտը քո | 116 |
| Կարմիրն ու սևը | 120 |
| Այնպես մի անի, որ ես ուրանամ իմ սրբությունը | 124 |
| Մենախոսություն | 125 |
| Այո, սիրելիս, իմ և քո սերը նման եղավ շատ | 128 |

| | |
|--|-----|
| Գիշերը անցավ ու ծանր անցավ..... | 129 |
| Վերջերս հաճախ երազներիս մեջ..... | 130 |
| Քոնն է մեկընդմիջտ | 130 |
| Տարելից | 131 |
| Տար ինձ, քամի | 133 |
| Ներիր, սիրելիս, ներիր ինձ լուռ..... | 137 |
| Խոսք նոր տարուն..... | 138 |
| Ժամն է արդեն, սիրելիս, եկ բաժանվենք մենք անձայն..... | 139 |
| Տխուր էր չուն..... | 140 |
| Շնորհապարտ եմ քեզ | 140 |
| Քո մասին խորհելիս | 142 |
| Մենք բաժանված ենք..... | 143 |
| Ինչ-որ տեղ հիմա | 144 |
| Այն կինը, որի մատները պիտի..... | 145 |
| Իրիկնամուտ է | 146 |
| Չարթնում է նորից խոռվքն իմ վայրի..... | 147 |
| Ես չկանչեցի, դու ինքդ եկար..... | 148 |
| Մենք իրարից զատված երկու շշուկ..... | 149 |
| Եվ ահա կրկին ցավոտ մի թախիծ | 150 |
| Հեռանում ես դու... .. | 151 |
| Եվ դու, որ մի օր եկար քնքշորեն ու անակնկալ..... | 152 |
| Փխրուն է ավազն ու ավազը տաք | 153 |
| Եվ կար ժամանակ, որ իմ քաղաքի | 154 |
| Եվ հիշում եմ ես՝ կարմիր էր գինին | 155 |
| Կայիր դու այդպես, կայիր իմ կյանքում | 156 |
| Եվ հիմա միայն | 157 |
| Հեռու ծովափին նստել երևի | 158 |
| Անծանոթ ծես | 159 |
| Բարալիկ էր նա, խալ ուներ այտին | 160 |
| Աստղի պես | 161 |
| Կախարդուհին | 162 |
| Ի սկզբանե | 163 |

| | |
|---|-----|
| Այդ ես նկատեցի, որ չես քայլում դու, ոչ..... | 165 |
| Հայտնություն | 166 |
| Դու անհայտն ես | 167 |
| Օրհնյալ լինես դու... .. | 168 |
| Աշնան ծառերը բոց են ու բեհեզ..... | 169 |
| Ես, սիրելիս, շատ եմ ապրել | 170 |
| Դրսում նորից ապրիլ է մեծ | 172 |
| Սեպագրեր | 174 |
| Անակնկալ ամպրոպ | 175 |
| Մայրամուտ է ու մշուշ... Այրվող ամպերն են մարում | 176 |
| Եվ առեղծվածն է ինձ դեռ կուրորեն տանջում..... | 177 |
| Նախազգացում | 178 |
| Ակնթարթ | 179 |
| Գարուն | 180 |
| Երևան, ինձ ներիր | 181 |
| Կորուստ | 182 |
| Թվաց, գիշերվա հողմի մեջ ահեղ | 183 |
| Դու կհեռանաս, ու թղթերիս մեջ..... | 183 |
| Գիշերային երթ | 184 |
| Ես բաց եմ ապրել ու սիրել եմ բաց..... | 186 |
| Գիշերն այս մութ ու խորհրդավոր է՝ որպես բնազդ..... | 187 |
| Աստված քեզ պահի | 188 |
| Քաղաքը թողինք | 189 |
| Որմնանկար..... | 190 |
| Ու ես գիտեմ | 191 |
| Պահը | 192 |

ԵՐԿԻՐ, ԳԱՂՏՆԱՐԱՆ

| | |
|------------------------------------|-----|
| Երկիր, քարի մոլուցք..... | 195 |
| Հարստություն | 196 |
| Ասում են հեռու Եփրատն է մի օր..... | 197 |
| Հայրենիք..... | 198 |
| Կարմիր բլուր | 200 |

| | |
|---|-----|
| Ճնձղուկը | 201 |
| Ես՝ Հայաստան, ես՝ քարե... .. | 202 |
| Դու փոքրիկ ես, իմ աշխարհ..... | 203 |
| Երգն Հայաստանի | 204 |
| Զվարթնոցի արծիվը | 205 |
| Երկիր հայրենի | 206 |
| Հավատում եմ քեզ | 208 |
| Քարե մրրիկն է այստեղ ննջում թևերը ծալած | 210 |
| Մի փոշոտ, փափուկ ճամփա | 211 |
| Քարե քնքշանք..... | 212 |
| Քարափ է, քար է... .. | 213 |
| Երբ կարոտել եմ խոյանքի՝ Արարատիդ եմ ես նայել..... | 214 |
| Յոթ երգ՝ երկրին | 215 |
| Անի | 221 |
| Ծնորհապարտ եմ քեզ | 223 |
| Իմ հողը | 224 |
| Իմ մայրենի, իմ բարբառ | 225 |
| Կա մի հայ աղջիկ..... | 226 |
| Խաչքար | 229 |
| Մարմաշեն..... | 230 |
| Քանի հազար տարի | 231 |
| Հեռվից | 232 |
| Ավերակ վանքում | 235 |
| Հայոց լեզու..... | 236 |
| Քար է ու լույս | 238 |
| Քեզ հետ եմ, երկիր... .. | 239 |
| Ձայն իմ արյան | 240 |
| Որձաքարի բեկոր | 241 |
| Մորս հիշատակին..... | 242 |
| Զվարթնոց | 244 |
| Մայր | 245 |
| Ո՛ր ես գնում..... | 246 |

| | |
|--|-----|
| Ներբող մայրենի լեզվին..... | 248 |
| Լուռ է լինում ու խավար, քունն է կանչում այն ափից | 250 |
| Նա այդ գիշեր մինչև լույս խոնարհված էր սնարիս..... | 251 |
| Հող իմ կիսված..... | 252 |
| Երկիր, գաղտնարան..... | 253 |
| Ձորի մշուշ, վիհի մխանք..... | 254 |
| Երգող խաչքար..... | 255 |
| Կայծքար | 257 |
| Պարտք..... | 258 |
| Ցորեն | 259 |
| Ինքներգություն | 260 |
| Արագածն է այնտեղ, այնտեղ՝ Արան | 262 |
| Գառնո ձորը | 263 |
| Ինձ թվում է միշտ..... | 264 |
| Հայոց լեռներ | 265 |
| Մենավոր ծառ | 266 |
| Մեր տառերը | 267 |
| Գրոհը կարճ տևեց... Գիշերը խիտ էր, թավ..... | 267 |
| Ո՛չ, ես չեմ կարող մոռանալ նրան | 268 |
| Բալլադ | 269 |
| Հինվորը վերջին բարձունքի վրա | 270 |

ԳԻՆՈՒ ԵՐԳԸ

| | |
|-------------------------------|-----|
| Նախերգ | 273 |
| Այգեպանը | 274 |
| Այգեպանի աղջիկը | 275 |
| Այգեպանի խոսքն արեգակին | 276 |
| Այգեբաց | 278 |
| Ծաղկում | 279 |
| Գարնան անձրև | 280 |
| Վազն է լալիս..... | 281 |
| Այգեպանի խոսքը հողին | 282 |
| Կանաչ հրդեհը..... | 284 |

| | |
|------------------------------|-----|
| Ամառ | 285 |
| Կարասներ | 286 |
| Քրտինքի կաթիլ | 287 |
| Վազն է խոսում..... | 288 |
| Շոգը | 289 |
| Այգեպանի խոսքը ջրին..... | 290 |
| Առուներ | 292 |
| Դարձյալ վազն է խոսում..... | 293 |
| Սիրո գիշեր..... | 294 |
| Այգեկութ | 295 |
| Գինով է լցվում..... | 296 |
| Բարդիներ | 297 |
| Ողկույզներ | 298 |
| Աշուն է..... | 299 |
| Այսօր խաղող է ձմլում..... | 300 |
| Գինին | 301 |
| Մառանը | 302 |
| Հարսանիք | 303 |
| Այգեպանի խոսքը մարդուն | 305 |
| Վերջերգ..... | 306 |

ՏԱՂԵՐ

| | |
|------------------------|-----|
| Տաղ ներշնչման | 309 |
| Տաղ անանձնական | 310 |
| Տաղ ամպրոպի | 311 |
| Տաղ կարոտի | 312 |
| Տաղ առաջին ձյան | 314 |
| Տաղ հողի | 316 |
| Տաղ ձնծաղկի | 318 |
| Տաղ նժույգի..... | 319 |
| Տաղ կնոջ | 320 |
| Երկրորդ տաղ կնոջ | 321 |
| Տաղ անծանոթուհու | 323 |

| | |
|-----------------------|-----|
| Տաղ երգի | 325 |
| Տաղ երագի | 327 |
| Տաղ արյան | 329 |
| Տաղ ճանապարհի | 330 |
| Տաղ ծառի | 331 |
| Տաղ կրակի | 332 |
| Տաղ սպասման | 333 |
| Տաղ ժամանակի | 335 |
| Տաղ հայրենի տան | 336 |
| Տաղ անձնական | 338 |

ԵՐԳԻ ԾՎԵՆՆԵՐ

| | |
|--|-----|
| Բոլոր բառերից ամենաշատը..... | 343 |
| Երկիր, ես քո դեմ ծունկի եմ իջնում..... | 343 |
| Գարնան ամպրոպը | 344 |
| Գնամ... .. | 344 |
| Իմ հայոց երկինք..... | 345 |
| Աղքատ եմ նորից... .. | 345 |
| Արշալույսն այնտեղ..... | 346 |
| Տուն իմ հայրենի | 346 |
| Աղբյուրը... .. | 347 |
| Այս ծաղիկները երևի հողի | 347 |
| Անձրևը անցավ... .. | 348 |
| Գարնան անձրևի առաջին կաթիլ..... | 348 |
| Գյուղի առավոտ... .. | 349 |
| Ամառ է..... | 349 |
| Մայրամուտն ասես հնդիկ է մի թուխ..... | 350 |
| Ցողի կաթիլը | 350 |
| Բարդիներ | 351 |
| Ծիծեռնակները վերադարձել են | 351 |
| Աղբյուրը... .. | 352 |
| Ամենատխուր..... | 352 |

| | |
|------------------------------------|-----|
| Ես երեկ արտում մի կակաչ տեսա... | 353 |
| Ժայռի շրթունքին՝ աղբյուրի ծիծաղ | 353 |
| Շանթի հետքեր կան ժայռի կողերին | 354 |
| Արցունքի կաթիլ | 354 |
| – Թռչուններ, ասեք | 355 |
| Բառը դողում է | 355 |
| Երբ լուսաբացին ճանապարհ ընկնես | 356 |
| Եվ փաթիլը ձյան իմ բաց ափի մեջ | 356 |
| Վաղն առավոտյան ինձ շուտ արթնացրեք | 357 |
| Գարուն է | 357 |
| Բարձրացել էիր ոտներիդ ծայրին | 358 |
| – Անձրև հովիտյան | 358 |
| Դու նման էիր այնտեղ բոլորին | 359 |
| Ու նախ անձրևի մի կաթիլ իջավ | 359 |
| Թե իմ պատճառով | 360 |
| Նորից ու նորից կարոտը գալիս | 360 |
| Ամառ է | 361 |
| Գիշերը դրսում անձրև էր գալիս | 361 |
| Գարունն է անցնում | 362 |
| Եվ ես ասում եմ | 362 |
| Գիշերը հողմ էր, գիշերը մրրիկ | 363 |
| Եվ լիներ այնպես | 363 |
| Երգել եմ ուզում | 364 |
| Թեթև որպես լույս ու որպես ներում | 364 |
| Երբ երգ եմ գրում, ինձ թվում է միշտ | 365 |
| Բանաստեղծություն | 365 |
| Ամպրոպն անցել է | 366 |
| Ես սրտիս ցավից արթնացա հանկարծ | 366 |
| Լեռների վրա զրնգաց տխուր | 367 |
| Մի զարմանալի, մենավոր թռչուն | 367 |
| Աստղերը նայում | 368 |

ԼՈՒՅՍ ԱՌԱՎՈՏԻ

Լոյս առավոտի, դու, որ նման ես երաժշտության 371
 Լոյս առավոտի, դու, որ նման ես Հարությանն այն մեծ 373
 Լոյս առավոտի, դու, որ նման ես մի մեծ կրկնության 375
 Լոյս առավոտի, դու, որ նման ես ոսկե կածանի 376
 Լոյս առավոտի, դու, որ նման ես օրհնաբանության 378
 Լոյս առավոտի, դու, որ նման ես կնոջ շիկնանքի 380
 Լոյս առավոտի, դու, որ նման ես մի մեծ շնորհի 382
 Լոյս առավոտի, դու, որ նման ես երկրպագության 384
 Լոյս առավոտի, դու, որ նման ես սուրբ ճշմարտության 386
 Լոյս առավոտի, դու, որ նման ես մի մեծ հայտնության 388
 Լոյս առավոտի, դու, որ նման ես անմոխիր այրման 390
 Լոյս առավոտի, դու, որ նման ես հսկա արտույտի 392
 Լոյս առավոտի, դու, որ նման ես մի մեծ մաքրության 394
 Լոյս առավոտի, դու, որ նման ես հավիտենության 395

ԲԱՆԱՍՏԵՂԾԻ ԱՍՏՂ

Բանաստեղծի աստղը 401
 Տրտունջ 402
 Սիրտս 404
 Անքնություն 405
 Անքնության պահերին 406
 Սիրտ, ես գլուխս եմ խոնարհում քո դեմ 408
 Սիրտ իմ, նման ես Գեղարդա վանքի 409
 Ու ցավում ես, սիրտ... 410
 Ինչ-որ հեռու տեղ մոլորված գառի 411
 Ճանապարհ 412
 Կատարներ կան այնտեղ 413
 Աջնան բարակած ջրերը լալիս 414
 Տերև են այրում 415
 Երգը 416
 Անորոշություն 417
 Անանձնություն 418

| | |
|---------------------------|-----|
| Քարը | 419 |
| Պոետական խրախճանք | 420 |
| Վայրկյան | 422 |
| Կարոտ | 424 |
| Քնքշանք | 425 |
| Ներշնչանք | 426 |
| Երգից հետո | 428 |
| Եղիշե Չարենցի հետ | 430 |
| Միսաք Մեծարենցի հետ | 432 |
| Սերգեյ Եսենինի հետ | 433 |
| Գարսիա Լորկայի հետ | 435 |
| Գուրգեն Մահարու հետ | 437 |
| Համո Սահյանի հետ | 439 |
| Տենդ | 440 |
| Առանց հեծյալի | 441 |
| Նիագարա | 442 |
| Ինքս իմ դեմ | 444 |
| Սրնգահարը | 446 |
| Երազ | 448 |
| Երկխոսություն | 449 |
| Հավատ | 450 |
| Գուշակություն | 452 |
| Բաղձանք | 453 |
| Գիշերային տրտունջ | 454 |
| Ուր եք | 456 |
| Ընկել են ջահել | 457 |
| Կրկնվող երազ | 458 |
| Գարնան առավոտ | 459 |
| Այրված կտավներ | 460 |
| Իմ մուսային | 462 |
| Կորած տողը | 464 |
| Ես և ես | 465 |

| | |
|-----------------------------|-----|
| Պատրանք..... | 466 |
| Հավատում եմ քեզ | 468 |
| Ամպրոպը լեռներում | 469 |
| Ես փախա ցավից | 470 |
| Դեղին անքնություն | 471 |
| Կանչ..... | 472 |
| Գիշերամուտ..... | 473 |
| Ներեցեք, տղերք..... | 474 |
| Գիշերային այց..... | 476 |
| Իրիկնային տեսիլ..... | 478 |
| Հարցում | 480 |
| Աստղային բախտ | 481 |
| Աշնան անտառ | 482 |
| Յոթ խորհուրդ իմ երգին | 483 |
| Լեռան ճամփա | 486 |

ՀՐԱՇԲԸ

| | |
|--|-----|
| Հրաշքը..... | 489 |
| Գարնանային | 490 |
| Աշուն, տխրաչյա աղջիկ ես դու..... | 490 |
| Նժույզներ | 491 |
| Այնպես տխրում է հոգիս, այնպես թախծում է լրին | 492 |
| Առաջին ձյունը | 493 |
| Հինա է դրել բարավիկ թխկին | 494 |
| Ամառ է..... | 495 |
| Ապառաժ է վայրի | 496 |
| Դեղին տոթ է ու քար | 497 |
| Ամառային մի արշալույս..... | 498 |
| Կանչում է..... | 499 |
| Տեսիլք | 500 |
| Որտեղ որոնեմ..... | 502 |
| Աշնան օր..... | 503 |
| Առավոտ | 504 |

| | |
|--------------------------------------|-----|
| Դու՛ իմ հանցավոր | 505 |
| Օրհնությունք եզ, կյանք..... | 506 |
| Շնորհ | 507 |
| Ծաղիկները | 508 |
| Աղբյուրը | 509 |
| Լիճը | 510 |
| Սիրտս հաշվում է ժամ ու ժամանակ..... | 511 |
| Այն հեռավոր լազուրում | 512 |
| Ելնեի կանուխ | 513 |
| Իրիկնամուտ..... | 514 |
| Կանչ | 515 |
| Այսքանը միայն | 516 |
| Ես հավատում եմ | 517 |
| Ամպրոպ կլինի | 518 |
| Լեռան աղբյուր | 519 |
| Ակնթարթ | 521 |
| Թեկուզ գիտեմ..... | 522 |
| Այնտեղ | 523 |
| Աշնանային..... | 524 |
| Սպասիր մի քիչ | 525 |
| Ամպրոպի կարոտ | 526 |
| Աղբյուրի կարոտ | 527 |
| Լեռան կարոտ | 528 |
| Ձյան կարոտ | 529 |
| Գույների կարոտ | 530 |
| Նա եկել է նորից | 531 |
| Անտառի կարոտ | 532 |
| Լիներ այնպես, լուսաբացին | 533 |
| Դաշտի կարոտ | 534 |
| Գարնան գիշերն անտառում | 535 |
| Արարչություն (փոքրիկ պոեմներից)..... | 536 |

ԱՆՔՆՈՒԹՅՈՒՆ

Անքնություն 549
 Անքնն գիշեր 551
 Գիշերն ահա երևակվում 553
 Ես սեպագիր եմ հողմերից եղծված 555
 Տրտունջ..... 556
 Նորից օդն է բռնկվել ինչ-որ կապույտ սոսափով 558
 «Հավատ» 559
 «Հող» 560
 Լեռներում ձնհալ է 561
 Արշալույս 562

«Սաղմոսարան» շարքից

Սաղմոս Ա..... 563
Սաղմոս Զ..... **565**
 Ես ձամփա ընկա, որ այս տանջալի կասկածը մարեմ 567
 Կապույտ մշուշ է ելնում վիհերն ի վեր, ձորն ի վեր..... 569
 Երգ հողի ու երկնքի 570
 ...Եվ ամեն գիշեր ես խոսք եմ բացում..... 572
 Ես խազերն եմ վերծանում..... 573
 Նա գալիս է գիշերով ու ականջիս շշնջում..... 577
 Զրույց Զվարթնոցի հետ..... 578
 Գիշերային թռիչք..... 580
 Եփրատի կիրճում..... 582
 Կապույտը 584
 Եվ նորից շունը..... 585
 Բառեր 586
 Հանգչող կրակի կապույտ մխանքում 588
 Գիշերներն իմ ջրտուքի... 590
 Օձը 591
 Ներշնչանք 592

ՀՈՂԱՇՈՒՆՉ ԳԻՇԵՐՆԵՐ

Չեմ հիշում հիմա..... 595
 Տագնապ..... 596
 Հոր, ցտեսություն... .. 598
 Զարկ, իմ զարմանալիդ..... 601

«Հողմաշունչ գիշերներ» շարքից

...Եվ բուքն ամբողջ գիշեր, իբրև ձերմակ կախարդ 605
 Հողմը մերթ լալիս, մերթ հեկեկում է ու մերթ մոնչում 607
 Հողմ, իմ ահեղ ընկեր, փշաքաղված իմ գալլ..... 608
 Բութ, սպասիր մի քիչ, կանգ առ դուանս դեմ 610
 Ինչպե՞ս պիտի վերանամ 611
 Պատանության գիշեր..... 612
 Հիմա արդեն աշխարհում հարկավոր չէ ինձ ոչինչ 613
 Սրտիս թելը, մայրիկ, ախ, բարակել է շատ 614
 Մահարու հետ 615
 Ես և ես 617
 Հնար չկա, մորմոքն իջել, փոխվում է լուռ հեկեկանքի 618
 Այս քանի օր է արդեն հեռախոսս համրացել 619
 Անեծք դարավերջի 620
 Երանի էր քեզ..... 622

ԳԻՐՔ ՈՂԲԻ ԵՎ ԳՈՎՔԻ

Ողբ մեղվի 627
 Ողբ Չարենցի 630
 Գովք իմ ոսոխի 633
 Գովք ծիրանի ծառի 635
 Ողբ անձնական 637

Երբ ես հեռանամ 639

ՊՈԵՄՆԵՐԻՑ

Ռեքվիեմ 643

| | |
|-------------------------------------|-----|
| Գիշերային զրույց Լարեկացու հետ..... | 662 |
| Տենդ..... | 677 |
| Ասք Սարգարապատի..... | 692 |

Վահագն Դավթյանի ձեռագրերից

| | |
|---------------|-----|
| Ձեռագրեր..... | 703 |
|---------------|-----|

Անտիպ բանաստեղծություններ

| | |
|--|-----|
| Ձեռագրեր..... | 717 |
| Մանուկ էի ես դեռ, անգետ չարին, բարուն, | 725 |
| Մղձավանջ | 726 |
| Եռագույնը Շուշվա բերդին | 727 |
| Հայր..... | 729 |
| Հավատ | 731 |
| Առաքյալը | 733 |
| Ոչ լեռան արծիվ ու ոչ դյուցազուն..... | 734 |
| Ես մի ձորակ գիտեմ | 735 |
| Երբ արմատս եմ փնտրում..... | 736 |
| Վահագն Դավթյան. Հակիրճ կենսագրությունը..... | 737 |

Բանաստեղծություններ Վահագն Դավթյանի մասին

| | |
|---|-----|
| Երգդ շուրթեր ունի՝ մի խոր | 742 |
| Ծննդավայրը կարդալուց հետո..... | 743 |
| Լույսի շառաչ է կրկին, ամպրոպի ձիչ, ուրցի բույր..... | 744 |
| Բանաստեղծություն՝ նամակի փոխարեն..... | 746 |
| Դու արեվից ծնված լույսի ցլանք..... | 748 |
| Անդին | 749 |
| Վահագն Դաւթեանի հետ | 750 |
| Կարծիքներ Վահագն Դավթյանի մասին | 751 |
| Վերջաբանի փոխարեն կամ | |
| Վահագն Դավթյանի մեծ հունձքը | 755 |

ՎԱՀԱԳՆ ԴԱՎԹՅԱՆ

ԱՍՏՂ ԵՎ ՅՈՐԵՆ

ВААГН ДАВТЯН

ЗВЕЗДА И ПШЕНИЦА

Հրատարակչական խմբագիր՝

Գալյա Հովհաննիսյան

Համակարգչային շարվածքը՝

Ալինա Մելքունյանի

Համակարգչային ձևավորումը՝
Կազմի ձևավորումը՝

Լիանա Մինասյանի
Արաբո Սարգսյանի

Լուսանկարները՝

Գագիկ Հարությունյանի
Վարազդատ Սևոյանի
Պողոս Պողոսյանի
ընտանեկան արխիվից

ԷԳԻԹ ՊՐԻՆՏ
Երևան, Քոմիտասի 12
Ֆոն.՝ (374 10) 520 848
www.editprint.am
info@editprint.am



ЭДИТ ПРИНТ
Ереван, ул.Туманяна12
Тел.՝ (374 10) 520 848
www.editprint.am
info@editprint.am